


Jusiñamui uai:
Jusiñamui jito rafue
illa rabenico



New Testament in Huitoto, Murui (PE:hui:Huitoto, Murui)

Jusiñamui uai: Jusiñamui jito rafue illa rabenico
New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488

Contents

MATEO	1
MARCOS	63
LUCAS	100
JUAN	161
HECHOS	204
ROMANOS	254
1 CORINTIOS	277
2 CORINTIOS	304
GÁLATAS	319
EFESIOS	328
FILIPENSES	337
COLOSENSES	343
1 TESALONICENSES	349
2 TESALONICENSES	354
1 TIMOTEO	357
2 TIMOTEO	363
TITO	368
FILEMÓN	371
HEBREOS	373
SANTIAGO	393
1 PEDRO	399
2 PEDRO	406
1 JUAN	410
2 JUAN	416
3 JUAN	417
JUDAS	418
APOCALIPSIS	421

MATEO JESUCRISTO EN RUEMO ILLA RAFUE CUIAFUE

Jesucristo ie usumatiai (Lc 3.23-38)

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori.

² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori.

³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori.

⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón.

⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori.

⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñoña ollena, David micori Urías micorina jobaimemo orede. Jobaimemo naimie fiodailla mei, naiñaiñoña ote.

⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori.

⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori.

⁹ Uzías micori jitodi Jotam. Jotam micori jitodi Acaz. Acaz micori jitodi Ezequías micori.

¹⁰ Ezequías micori jitodi Manasés. Manasés micori jitodi Amón. Amón micori jitodi Josías.

¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci.

¹² Naie meinomo Jeconías micori Salatiel micorina comuitate. Salatiel micori jitodi Zorobabel micori.

¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori.

¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori.

¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori.

¹⁶ Jacob micori jitodi José micori. José micoridi María ini. Naiñaiñoñodi Jesús ei. Naimie mameci jiaicidi Cristo.

¹⁷ Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniamoo ite nairai anamo cai jaiagai illa facaisemo catorce nanoramaci mameci jiai ite. Babiloniamoo ite nairai anamo cai jaiagai illa facaisemona Jesús jeicia facaisemo catorce nanoramaci mameci jiai ite.

Jesús jeicia rafue (Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñoña jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñoña uruesitate.

¹⁹ José micorí maremie. María jai uruesillana naimie micorí fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecina facajanona, naiñaiñona dotaacade.

²⁰ Naimie micorí comecina iemo facaia, naimie micorí nicairillanona, naimie micorímo Jusiñamui jaienici bairiano raite:

—José, David micorí jito, Mariana jaciruiñeno ono, o aina illena. Jusiñamui Joreño naiñaiñona jai uruesitate.

²¹ Himana jocoite. Ie comini naimaci jeacinomona naimie jilloitajaibilla jira, Jesúna o jitalle naimie mamecidi —raite.

²² Bie rafue suide, Jusiñamuidi ie lloraima micorí jai e llotataga uaina suillena.

²³ Jai e llotatate:

Himana uiñoñediñaiñomo comuite uruedi.

Himana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

²⁴ José micorí casidemo, Jusiñamui jaienici lloga uaina finode. Mariana ote, ie aina illena;

²⁵ Iadedi nai jitona naiñaiño nia jocoñenia, naiñaiño diga naimie micorí nia iniñede. Naiñaiño jito jeicia mei, José micorí jítade naimie mamecina Jesúna.

2

Monamo ite ramo comeciaina facauidino rafue

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micorí. Monamo ite ramo comeciaina facauidino naie facaiseconi Jerusalémo jítoma billafo dinena bitimaci. Jerusalémo itinomo jicanotimaci:

² —¿Ninomo como jeiciga omoi judíuai illaimadi? Jítoma bisoillafomo como bairede ucuduna ciodicai. Naiemona naimie jeicana jai uiñotikai. Naimiemo iobillacinona fecallena biticai.

³ Herodes micorídi naicinona cacajanona, ie comeci jarire ite. Jiaimie naimie meifomo illana jitañede. Jerusalémo itinodi jiai jarire itimaci.

⁴ Ie facaise Herodes micorí judíuai illaicomina uaiduanona, naimacimo Cristo raillamie jeicana jicanote.

⁵ Uai otimaci:

—Judea railla eniruemo. Belémo. Iena Jusiñamui facaina micorídi jai e cuega:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baifemo faite cuega.

⁷ Iena cacaja mei, Herodes micorídi monamo ite ramo comeciaina facauidino bainino uaidote. Naie ucudu bairia facaise raise uiñollena jicanote.

⁸ Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai fecaacadícue —llote.

—Jii —fairiotimaci.

⁹⁻¹⁰ Iena naimie micorí llua mei, jaidimaci. U cuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride.

¹¹ Fo jaillano uruena, ie ei María diga, ciotimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caímare sorirede rana jiai fecadimaci.

¹² Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaienici di naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide.

¹⁵ Herodes micori fiodable dinori nainomo ite. Ie muidona Jusiñamui ie facaina lloaima micori llotataga uai jai suide. Jaie lloga: “Egiptomona cue Jitona jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite isaiai diese faetate. Belén ecimo itino uruiaina jiai faetate. Naie ucudu mena años jaie nano bairena jira, mena años itisaiai dierisedena faetate.

¹⁷ Raquel micori jaie eia isoi, Belén itino birui eedimaci. Jeremías micori iena jaie cueda:

¹⁸ Ramá railla nairai dinena Raquel micori eo eiana cacadicue.

Cai usuño Raquel micori eede.

Naiñaiño micori uruai micoriai facaina eede.

Jaie cominimona firaduacinona jitañede, naiñaiño uruai micoriai jai fiodable jira.

¹⁹ Digarui illanona, Herodes micori fiodable mei, Egiptomo José micori dane nicairillanona, Jusiñamui jaienici naimiemo bairede.

²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide.

²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillana naimiemo llote.

²³ Nazaret railla nairai dine jaide, nainomo illena. Iemona Jusiñamui facaina lloaia micoriai jaie cueda jai suide. Cristona jaie cuedimaci: “Naimiedi Nazaret imie”.

3

Jofue iñenanomo Juan Bautista micori illa rafue

(Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micoridi jofue iñenanomo illanona, cominina dafaifia, Jusiñamui rafuena naimacina llofueuide.

² Comini naimie micori dine billanona, naimacimo llote:

—Omoi jeacinona faionocaida, omoi comeciiai iuailai meido. Jusiñamui dibeimo omoi i. Naimie anamo omoi illana naimie jitailla jira, omoimo iena lloiticue —llote.

³ Isaías micoridi Jusiñamui facaina lloaima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciiai marena finuana ñaite.

⁴ Juan micoridi camello itirai ai ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite.

⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fueмона jai jaisoidimaci.

⁶ Jusiñamui naimaci jeacinona naimaci llua meino, naimacidi Juan micori bautizaga.

⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Niese Jusiñamui riicaillifueмона jilloitomoi? Cue dine omoi billena, ¿bu omoi llua?

⁸ Omoi comeci ai iuailai meido. Omoi jeacinona faimonocai. Iemona Jusiñamui jitaillacinona fino. Mare rafuena finocana jai. Naiemona omoi comeci ai iuailai meiduana uiñoitica i. Ie mei omoi bautizallomoi.

⁹ Omoi comeciaina facañeno: “¿Bue ñellena o llua isoi finoitica i? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifueмона jilloitica i”. Ero, omoi lloiticue: Cue llua isoi omoi finoñenia, naimie riicaillifueмона jilloñeitomoi. Abraham micori uruiaidomoi; iadedi Jusiñamui jitaillacinodo jaiacañedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede.

¹⁰ Ero, llisiñede riara tiedomoi. Tiia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoi na jai duere finoacade. Ie riicaillafue anamo jai itomoi. Omoi comeci ai iuai omoi meidoñenia, omoi na duere finoite.

¹¹ Jusiñamui dibeimo omoi comeci ai iuai omoi meidoia, jinui diga omoi na bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoi mo itataite. Omoi comeci ai iuai omoi meidoñenia, omoi na duere finoite.

¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeci ai iuailai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue

(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite.

¹⁴ Juan dinena naimiemo llote:

—Bautizallena cuemo bitio; ia dama ite. Cuena o bautizaia, cuemona mare.

¹⁵ Jesús uai ote:

—Cuena mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade.

¹⁶ Jesús bautizaja mei, jinui mona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

¹⁷ Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

4

Jesúna Taife ramo faia rafue

(Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite.

² Cuarenta digarui Jesús guiñede. Naie facaise fuilla mei, guiñeno illamona, aimetaite.

³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomeniconajaita”.

⁴ Jesús uai ote:

—Dama ite. O lluana finoñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofo muidomo Taife Jesúsna uite.

⁶ Raite:

—Jusiñamui Jitodiodena, eniruemo mai ana uai. David micori ona jaie cuega: Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluana finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiaie eo ebire eruaide.

⁹ Naimiemo llote:

—Nana bie nairaiaie cue anamo birui illamona, cuena o sedaia, nana bie nairaiaie omo iititicue. O caiñici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai.

¹¹ —Ie facaise naimiemona Taife jaide. Naimie jailla mei, Jusiñamui jaienisaie Jesús dine bitimaci. Naimiena ecallena bitimaci.

Galileamo Jesús illa rafue

(Mr 1.14-15; Lc 4.14-15)

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretno Jesús jaide.

¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiaie ite.

¹⁴ Nainomo Jesús jailla jira, Isaías micori jaie cuegafuiaie jai suide.

¹⁵ Naimie micori naie cominina jaie cuega:

Bie eniruemo diga nairai ite.

Zabulón ite. Neftalí ite.

Monaillai fuemo nairai ite. Jordán ruicafebeimo nairai ite.

Galileamo nairai jiaie ite. Nainomo judíuainedino jai itimaci.

¹⁶ Jeacino anamo naimaci illamona, naga naie eniruemo ite comini jitiñedonomo itimaci isoidimaci

Jusiñamuina uiñoñoeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cuega. Jusiñamuina naimaci uiñoñoena jira, naimacina iese cuega. Jesús nainomo birui llofua jira, mare rafuena jai cacadimaci.

¹⁷ Galileamo rilla mei, Jesús llocana jaide. Llofuate:

—Jusiñamui dibeimo illena, omoi jeacinona fañonocaida, omoi comeci iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaamagamiena fetua rafue

(Mr 1.16-20; Lc 5.1-11)

18 Jiairuido Galilea railla jorai fuemo Jesús macaritemo, menamiena cide. Naga ie ama iaimaia. Dame Simón. Jiaici naimie mamecidi Pedro. Ie ama Andrés diga ite. Lloijina fairaima iaimaia. Iese jaca naie iaimaiaidi maijuidiaimaia.

19 Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaidicue. Lliciaina birui ocabitomico; iadedi cominina oitomico, cue dibeimo naimaci illena.

20 Iena cacajanona, ieconi iaimaia lloijina fainonocaida, naimie diga jaidiaimaia. Ie llofueganona jaillena, jaidiaimaia.

21 Lliai bai Jesús jaidemo, jiaie menamiena cide. Naga ie ama iaimaia. Dame Jacobo. Jiaimie Juan iaimaia moodi Zebedeo. Naimie diga botemo itiaimaia. Lloijina sigaidimaci. Jesús iaimaia uaidote, naimie llofueganona jaillena.

22 Ieconi iaimaia moona fainonocaida, botemona ari billanona, Jesús diga jaidiaimaia.

Jesús ailluena cominina llofuia rafue (Lc 6.17-19)

23 Nana Galileamo Jesús jaide. Judíuaí ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciaí iuaina meiduana llofueite. Ie cominina naimaci illena llofueite. Naga isoide duicono duidinona jillotate.

24 Iemona nana Siria railla eniruemo naimie mameci soride. Naie comini naga isoide duicono duidinona naimie dine atidimaci. Abi isiredinona atidimaci. Jananiaí anamo illa cominina atidimaci. Naillidinona atidimaci. Niraídanidinona atidimaci. Nana naimacina jillotate.

25 Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

5

Anedumo naimie ia, Jesús lloga rafue (Lc 6.20-23)

1-2 Ailluena cominina Jesúna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raíta, Jesús naimacimo llote:

—Omoína Jusiñamui ie cominina sedaacana rafuena ja llofueiticue. Naimie anamo naimaci illena llofueiticue.

3 Ero, Jusiñamui naimiena jitaidinona sedaite. Comeciaína facadimaci: “Naimie jitaillacinona daní finonidicaí; ia naimie caína canuanona, iena finoiticaí”. Naimie cominina naie isoidino illamona, naimie naimacina canoite. Iemona caimare iitimaci.

4 Jusiñamui sunaitinona sedaite. Ailluena comini jeacino finocana jaidimaci. Iena uíñuamona, damierie sunaitimaci. Naimie cominina naie isoidino illamona, Jusiñamui naimaci comeciaína ocuiñotaite. Iemona caimare iitimaci.

5 Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iese iite. Iemona caimare iitimaci.

6 Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci.

7 Jusiñamui cominina duenaitinona sedaite. Naimacina naimie duenailamona, Jusiñamui naimacina ico duere finoñeite. Iemona caimare iitimaci.

8 Jusiñamui jeanide comeciredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci.

⁹ Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mamecirenitimaci. Iemona caimare iitimaci.

¹⁰ Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaitimaci. Iemona caimare iitimaci.

¹¹ Cuemo omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreñona tainona lloitimaci. Duere sefuitomoi; iadedi Jusiñamui omoina caimare itataite.

¹² Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefuia, iocire omoi jai.

Jesús comini illa rafue
(Mr 9.50; Lc 14.34-35)

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai marañede. Iena rifañellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini marañede rafuena eo finoñedimaci. Sal ie caimano jai iñenia, ¿niese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

¹⁴ 'Cuemo omoi duilla jira, jiaie cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñoticaí. Jusiñamui jitailla isoi omoi illamona, jiaie comini naimiena uiñoitimaci.

¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena.

¹⁶ Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñoitimaci. Iemona: “Jusiñamui maremiena” raitimaci.

Jesúdi Moisés micorina llofuia rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofuia jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai marañede” raiñedicue. “Jusiñamui facaina lloraini micoriai jaie llogacinuai marañede” jiai raiñedicue; iadedi omoina naie llogacinaina raise uiñotaacaducue.

¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite.

¹⁹ Omoi einamaci raitimaci: “Dajerie llogacino jiaie llogacino baifemo faite”. Cue raiticue: Naga llogacino omoi ñinoñenia, naga omoi llofueñenia, nana Jusiñamui jitaillacinona finoñedomoi.

²⁰ Ero, Jusiñamui jitailla rafuedo judíuai illaicomini baifemo omoi jaiñenia, Jusiñamui sedajanomo jaca iñeitomoi. Naimaci naie jaie llogacinuai uiñotimaci; iadedi naimaci comeciai Jusiñamui dibeimo iñedimaci.

Jesúdi iciriñena llofuia rafue
(Lc 12.57-59)

²¹ Jesús llote:

—Omoi llofueraimona bie jai cacadomoi. Moisés micori omoi jaiagaimo llote: “Comena meineño. Comena bu meineia, jeacino jai finode. Naimie fiodaillena juez llua”.

²² Naie llogacinodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefullena, juez dine naimie uiga. Jiaimiena bu jeare ñaia, jeacino jai finode. Naimie duere sefullena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

²³⁻²⁴ 'Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra fañonocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

²⁵ 'Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaite.

²⁶ Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriño.

Jesúdi iima ie aiñede riño diga illa llua rafue

²⁷ Jesús llote:

—Omoi llofuerañimona bie jai cacadomoi. Moisés micori jaie llote: “Omoi aiñede riñoia diga iño. Omoi iniñede iñia diga iño”. “Iena bu finoia, jeacino jai finode” raitomoi.

²⁸ Jiaie rafue birui lloiticue. Ie aiñede riñoimo eruaillamona naiñaiño bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode.

²⁹⁻³⁰ Biena ñaiticue. Nie isoide rafue omoina jeacino finotaia, iemo eruañeno. Iena llinoño. Iemo comecina facaño. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoño.

Jesúdi iima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoi llofuerañimona bie jai cacadomoi. Moisés micori jaie llote: “Ie aina bu dotaacania, naiñaiñoimo dotajacanabena fecaja”. Iedo jai jaicabidomoi. Iena bu finoia, omoimona mare.

³² Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñoia ie aina illena bu ua mei, naimiedi jeacina jai finode. Jeacino finoñellena, aina dotaño.

Jesúdi Jusiñamui mameci jamai ebena llinoñenana llua rafue

³³⁻³⁵ Jesús llote:

—Omoi llofuerañimona bie jai cacadomoi. Moisés micori omoi jaiagaimo llote: “Taino lloño; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoimona mare. “Jusiñamui caina duere finoñeite” raitomoi. Iemona monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jia llinotomoi. Jusiñamui mamecina jamai ebena llinoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jia llinotomoi, nainomo

ie illano illa jira. Eniruemo ite ra mameci omoi linoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi linoia, Jerusalén naimie nairaina jira, naimie mamecina jiai llinotomoi.

³⁶ Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jiai linoño. Dama Jusiñamui iena usere itataja jira, dama naimie iena jitire itataja jira, ifotirai mamecina omoi linoia, Jusiñamui mamecina jiai llinotomoi.

³⁷ Ie jira Jusiñamui mameci jamai ebena linoño. Jiaie ra mameci jamai ebena linoño; iadedi nie isoide rafuena omoi finoa, omoi lloga uaina taino lloño fino. Uanaicinona jaca lono. Uanaicinona omoi lloña, Taifemona omoi uaina otomoi.

*Jesúdi iba oñenana llofuia rafue
(Lc 6.29-30)*

³⁸ Jesús llote:

—Omoi llofueraimona bie jai cacadomoi. Moisés micori jaie llote: “Fuirillamona o uisina jaimie jino juiconoia, juez naimie uisina juiconuana lla. O isidona jaimie oni tainoia, juez naimie isidona oni tainuana lla. Jaimie ona duere finoa, o duere sefuilla isoi, juez naimiena duere finua”. Iedo birui jai jaicabidomoi;

³⁹ iadedi birui omoimo lloticue: Ibana oño. Maraiñede rafue finodimemona omoi abina riidoño. Omoi cacaina naimie dutaia, naimie diga iciriño. Enefebeimo omoi uieco dobaiño, enefebei omoina naimie dutallesa. Naimie omoina duere finoa, ibana oño.

⁴⁰ Omoi iniroi bairollena omoina bu llogidoia, juez nia omoimo lloña, naimie jitailla iniroi baifemo naimiemo feca.

⁴¹ Daje kilómetro naimaci raruaia omoina uillana illaicomini ocuia, iena uiño. Nibai omoi comeci jitañede; ia naimacina canollena, iena mena kilómetros uiño. Naimaci ocuilla baifemo uiño.

⁴² Omoimo ite rana bu jicaia, iena caidiño. Omoi rana bu jamai jicuano uia, abido atillena, iena caidiño feca.

*Jesúdi omoina gaiñenano isiruillena lla rafue
(Lc 6.27-28, 32-36)*

⁴³ Jesús llote:

—Omoi llofueraimona bie jai cacadomoi. Llotimaci: “Omoi cominina isirui; iadedi omoi nairaiñedinona enoi”. Iedo jai jaicabidomoi.

⁴⁴ Omoimo birui lloticue: Omoi nairaiñedinona isirui. Omoi gaiñenanona isirui. Omoina duere finodino facaina Jusiñamuimo jii. Naimaci comeci iuai meiduana naimiemo jicano.

⁴⁵ Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jtomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate.

⁴⁶ Naimie comini omoi illamona, nana comini daje isoi isirui. Omoina isiruitinona omoi isirua, mare; iadedi omoina gaiñenanona omoi isiruiña, Jusiñamui omoina: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiña, maraiñede finoraini baifemo faiñedomoi. Naimaci isoi itomoi.

⁴⁷ Dani omoi cominina omoi uaidoia, mare; ia omoina gaiñenanona omoi uaidoña, naimaci baifemo faiñedomoi. Jusiñamuina inoñedino baifemo faiñedomoi. Naimaci isoi itomoi.

⁴⁸ Iena omoi uiñuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue finuana llua rafue

¹ Jesús llote:

—Omoína nia llofueitícue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoño, iena jiaie comini jamai cioillena. Iena ja ñaitícue.

² Dueredinomo rana omoi jamai fecaia, iena uainino feca. Jiaie cominimona iobilacinona omoi feiñollena, iena fecaño. Ofiracomo maredinona abi caitadino isoi omoi iño. Naisomo maredino abi caitadino isoi iño. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci.

³ Dueredinomo rana omoi fecaia, jiaie cominimo iena lloño.

⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoína: “Mare” raite.

Jesús Jusiñamuimo jia rafue

(Lc 11.2-4)

⁵ Jesús llote:

—Jusiñamuimo omoi jia, maredinona abi caitadino isoi omoi iño. Ofiracomo naimacina comini cioillena, marefodo jidimaci. Jicabilla facaiseconi naisomo naimaci ia, naimacina comini cioillena, marefodo jia jidimaci. Naimacina: “Jusiñamuina eo sedadimaci” comini raillana jitaidimaci. Cominimona iobillacinona birui jai feiñotimaci.

⁶ Omoi jiacania, omoi jofomo fo jai. Nainomo Jusiñamuimo anado omoi ji. Iena Jusiñamui uiñuamona, omoi jicaca rafue naimiemona feiñoitomoi.

⁷ Jusiñamuimo omoi jia, naimiena ñnoñedino isoi jamaicinona ñaiño. Naimaci comecina facadimaci: “Daje jiracinona diga icaiño cai jia jira, ja muidomo cai Moo caina raise cacaite”.

⁸ Naimaci isoi iño. Nia omoi jicañenia, naimie omoi jitaille rafuena uiñote.

⁹ Naimiemo omoi jiacania, iese ji:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

¹¹ Nagarui guille caimo itata.

¹² Caina jeare jaino finoa, iena caimona feilla isoi, cai jeacinona omona feilla jira, cai jeacinona oni dota.

¹³ Caimo ramo bu faia, caina cano, iena cai ñnoi raillano. Jeacinona finuamona caina jillota.

Iese omoi ji.

¹⁴ Omoína jiaie comini jeare finoa, iena omoi feitaia, omoi monamo ite Moo omoi jeacinona iena faitajanona, jiaí oni dotaite;

¹⁵ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

¹⁶ Jesús llote:

—Omoína nia llofueitícue. Raitomoi: “Jusiñamuina eo raise cai sedajanona, birui cai guiñeitícai. Iemona naimie caina eo duenaite” raitomoi. Iese Jusiñamuina omoi sedaja, sunaiño, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci.

¹⁷ Ero, naimaci isoi omoi iñeno; iadedi omoi guiñenarui ia, omoi abiai raise fino.

¹⁸ Iemei cominidi omoi guiñenarui illana uiñoñeitimaci. Naimacimona iobillacinona feiñoñeitomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

Jesúdi Jusiñamuimo comecina facaja rafue
(Lc 12.33-34)

¹⁹ Jesús llote:

—Omoi jofomo ailluena rana eenocana uiñeno. Gireco iena guicabite. Dajerie ra nemuide. Omoi jofomona jiaie comini iena fiiacadimaci. Ailluena ra eenuamo omoi comeciaina facañeno;

²⁰ iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Girecuaimona, nemuillamona, firirainimona, iena nainomo faifiñeitomoi.

²¹ Aillue ra omoimo ia, Jusiñamuimo comeciaina facañedomoi; iadedi naimie jitail-lacinona omoi finoia, naimiemo comeciaina facadomoi.

Jesús cai comecina llua rafue
(Lc 11.34-36)

²²⁻²³ Jesús llote:

—Cai uisi diga rana ciodicai. Cai uisi maraiñenia, rana raise cioiñedicai. Ie isoide. Cai comeci maraiñenia, maraiñedicinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

Jesús raruiaina llua rafue
(Lc 16.13)

²⁴ Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Rarui ai ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue
(Lc 12.22-31)

²⁵ Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite.

²⁶ Silliñaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite.

²⁷ Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoina a sairitarede.

²⁸ ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maijiñedimaci. Iniroina tifiñedimaci;

²⁹ iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

³⁰ Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino.

³¹ Omoi comeci jarire finoñeno. “¿Buena guiticai? ¿Buena jítaiticai?” rañeno. Iemo comeciaina eo facañeno.

³² Jusinamuina ñnoñedino iemo comecina facacabidimaci. Nana omoi jitaillacinona omoi Moodi uiñua jira, naimaci isoi iñeno.

³³ Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoi mo iite. Iniroi omoi mo iite.

³⁴ Jusiñamui omoi birui jitailla ra omoi mo iite. Iena uiñuamona, jiairuido suille rafuemo jarire comecina facañeno. Ico omoi jitailla ra omoi mo jiai iite.

7

Jesúdi jiaie cominina mameriñenana llua rafue

(Lc 6.37-38, 41-42)

¹ Jesús llote:

—Omoína nia llofueiacadicue. Jiaie cominina mameriñeno. Jiaie cominina omoi mameria, omoi mo ite maraiñede rafue facaina Jusiñamui omoína duere finoite.

² Jiaie cominina omoi mamerilla diese Jusiñamui omoína duere finoite.

³ Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoi mo ailluena ite maraiñedicinomo nano omoi comecina faca.

⁴ Omoi mo maraiñedicino illamona, ¿niese omoi ecimo itimiema mameritomoi?

⁵ Omoi mo ite maraiñedicinomo omoi comecina facacaiñena jira, maredinona abi caitadinodomoi. Omoi comeciaina nano raise fino. Iemei omoi ecimo itimiema canorenitomoi. Naimie comecina raise canorenitomoi.

⁶ 'Ero, eo mare rana omoi jiconiaimo fecañeno. Eo raifide rana omoi chanchuaimo fecañeno. Naimacimo omoi fecaiadedi, iena feiñoñeitimaci. Omoína gaiñenamona, jiconiai omoína ainitimaci. Chanchuai iena jamaillamona, iena saitaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoi llocabia, omoína duere finoitimaci. Omoi rafuena jamaitimaci.

Jesúdi cai jitailla ra jicaja llua rafue

(Lc 6.31; 11.9-13)

⁷⁻⁸ Jesús llote:

—Daje ra omoi faifia, iena jenodomoi. Raise jenoia, iena baitomoi. Damiena omoi jenoia, naimie illanomo jaidomoi. Nainomo naimiema baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoi mo iite.

⁹ Ero, omoi mona naimiemo llomenicono ie moomo ie jito jicaia, noficina fecañede.

¹⁰ Lliciaína jicaia, jaiona fecañede.

¹¹ Jeacinona finocabidomoi; iadedi mare ra omoi uruiaimo fecacabillana uiñotomoi. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

¹² Jusiñamui jitaillacinona omoi finuamona, jiaie cominina marena fino. Jiaie comini omoína finuana omoi jitailla isoi, naimacina fino. Naimaci omoína marena finuana omoi jitaia, naimacina marena fino. Naimaci omoína maraiñeno finuana omoi jitaia, naimacina ie isoi maraiñeno fino. Moisés micori ie isoidicinona jaie llofue. Jusiñamui facaina lloraini micoriai ie isoidicinona jaie jiai llofuetimaci.

Jesúdi Jusiñamui dine rille llua rafue

(Lc 13.24)

¹³⁻¹⁴ Jesús llote:

—Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca itimaci. Naimie dine rillena eo sefuirena jira, janore comini naiedo jaidimaci. Jiaie naiso

ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue

(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacinodo omoi jai, Jusiñamui rafuedo raise jaiñeitomoi.

¹⁶ Naimaci lloga rafuemona naimaci Jusiñamui llorainiñenana uiñoitomoi. Ero, eecuaimona uvas railla riarra oñega. Eecuaimona higos railla riarra jiai oñega.

¹⁷ Mare riaromona mare llisilla comuide. Maraiñede riaromona maraiñede llisilla comuide.

¹⁸ Mare riaromona maraiñede llisilla comuiñede. Maraiñede riaromona mare llisilla comuiñede.

¹⁹ Mare llisilla comuitañena jira, naga maraiñede riarra jaitaca, iena jobaillena.

²⁰ Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusiñamui naimacina duere finoite.

Jesúdi ie Moo ie comini sedajanomo ille llua rafue

(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite.

²² Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticaí. O uaido jananiaina oni oredicaí. O uai diga siño rafuena finodicaí” lloitimaci.

²³ Uai oiticue: “Omoina uiñoñedicue. Cue cominiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

Jesúdi naimiena #nuana ñaia rafue

(Lc 6.47-49; Mr 1.22)

²⁴ Jesús llote:

—Cue lluana cacadomoi; iadedi omoimona nana #noñedomoi. Cue lluana #notimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite.

²⁵ Noci deidemo, eo jinuidemo, jofomo ille toia, aifi bitemo, jofa raise finua jira, jofa goiñede. Iena faifiñede. Ie isoide. Cue lluana #notimie faifiñeite.

²⁶ Cue lluana #noñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana rañede.

²⁷ Noci deidemo, eo jinuidemo, jofomo ille toia, aifi bitemo, jofa goillamona, jai eo judaisite. Iena faifide. Ie isoide. Cue lluana #noñedimie faifite —llote.

²⁸⁻²⁹ Moisés micori rafue uiñoraini isoi naimie llofueñena jira, illaimamo ite uai itimie isoi naimie llofua jira, nainomo ite cominidi naimie lluari rajicaidimaci.

8

Jesúdi efonaitimiena jillotaja rafue

(Mr 1.40-45; Lc 5.12-16)

¹ Naimie llofua mei, anedumona Jesús ie llofueoicaigano diga ana bite. Ailluena comini naimiena racadimaci.

² Efonaitimie naimie dine billanona, naimiena raise uaiduamona, cañici ifodo ana rainadate. Raite:

—Maestro, o jítaiadedi, cuena jillotaredio.

³ Jesús ie onolli naimiemo oni ñuitajanona, naimiena jetade. Raite:

—Ona jillotaiacadícue. Mai o jillo. —Ieconí naimie jillode.

⁴ Jesús naimiemo llote:

—O jilluana bumo lloñeno; iadedi Jerusalémo, Jusiñamui jofomo, Jusiñamui díga ñairaima díne mai jai. O jilluana comini raise uñollena, naimiemo o abina acatajai. Moisés micorí jaie lloga rana Jusiñamuimo feca. —Iemei Jesús oni jaide.

Jesúdi capitán mullaímana jillotaja rafue

(Lc 7.1-10)

⁵ Capernaum railla nairaimo Jesús ria, capitán raillamie naimie díne bite. Naie capitán Roma railla nairai imie. Judíuñedimie. Billanona, duere llote:

⁶ —Maestro, cuena cano. Cue jofomo cue mullaíma ite. Ie abina niraídanide. Naimie abi eo isirede. Naimiena jillota.

⁷ Jesús uai ote:

—Naimie díne jaitícue, naimiena cue jilloitallena.

⁸ Naie capitán dane llote:

—Jaiñeno. Jamai bue isoidícue. Iemo, ¿ñiese cue jofomo biitio? O uaido bene lluanona cue mullaíma jilloite.

⁹ Jiaie illaícomini anamo itícue. Naimaci lloga uaina ñnotícue. Cue anamo jiaie soldaduai illanona, cue uaina ñnotímaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina o lloia, cue mullaíma jilloite.

¹⁰ Iena cacajanona, Jesús rajicaide. Naimie díga jaidinomo llote:

—Bie isoi cue uaina ñnotimiena jaca baiñedícue. Cai judíuai cominimona biesedimiena jaca ññede.

¹¹ Ero, Jusiñamui ie cominina sedajanomo naimaci illena, díga judíuaiñedino cue llua uaina ñnoitímaci. Naga nairaiaimona ñnoitímaci. Jusiñamui cominina Abraham micorí, Isaac micorí, Jacob micorí illamona, naimaci díga Jusiñamui ie cominina sedajanomo bie judíuaiñedino iitímaci. Nainomo caimare nabaitímaci.

¹² Ailluena judíuaiñedino ñnoitímaci. Jusiñamui ie cominina sedajanomo duillanodi omoi judíuai. Naimiena omoi ññoñena jira, oomina oni dotaite. Dotaja mei, eo duere sefuillamona eetomoi.

¹³ Capitámo Jesús llote:

—Mai jai. Cue uai siñonana o ñnua jira, o jitailla rafue omo jai suide. —Ieconí naimie mullaíma jillode.

Jesús Pedro jifaiñona jillotaja rafue

(Mr 1.29-31; Lc 4.38-39)

¹⁴ Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaríde.

¹⁵ Naiñaiño díne jaillanona, naiñaiñona jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mr 1.32-34; Lc 4.40-41)

¹⁶ Naie naiona naimie díne comini ailluena jananiai anamo itinona atidímaci. Ie uaido naimiedi jananiaina oni oretate. Nana atíca duidinona jiaí jillotate.

¹⁷ Naimacina Jesús jillotajamona, Isaías micorí jaie ciegafuiaí iese jai suide. Naimie micorí jaie cueba: “Caina jilloitajanona, cai duiconona oni oretate”.

Jesús ie llofuegamiena damie jaillana ie rafue

(Lc 9.57-62)

¹⁸ Ailluena comini naimie ecimo illana Jesús cüanona, ie llofueoicaiganomo ruica dine jaillena llote.

¹⁹ Ieconi Moisés micori rafue llofueraima naimie dine billanona, llote:

—Maestro, o jaillinomo o diga jaiacaducue. O llofuegamiena jaiacaducue.

²⁰ Jesús uai ote:

—Janorede ocainaiadi joforedimaci. Silliñiai jillainiaredimaci; iadedi jofoniducue. Monamona billanona, imana jaiducue; iadedi bueniducue. Jofoniducue. Cue diga o jaiacania, bue isoidena cuemona oñeitio. Iemo o comecina raise faca.

²¹ Ie facaise jiaie llofuegamie Jesúmo llote:

—O diga jaitucue; ia cue moo nia fioidañena jira, o diga nia jaiñeitucue.

²² Jesús naimie uai ote:

—Cue diga idai mai bi. Cuen a ñoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baifemo faite. Cue diga mai bi.

Jesúdi joraina llücaitaja rafue

(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci.

²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira,

²⁵ jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuen a raise ñoñedomoi. Jacinaiñeno.

Iemei Jesús naidacaillano, aifina lletade. Joraina jiai llücaitade. Ieconi llücaide. Bagoñede.

²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

Bai jaillanona, ruica dine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica dine naimaci ridemo, Gadara railla eniruemo sijidimaci. Ieconi menamie Jesús dine bitiaimaiaia. Jananiai anamo ite iaimaiaia. Comini raiollanomo nofie moto ifuaimona bitiaimaiaia. Nai iaimaiaia eo riirena jira, jaca bu nainomo jainide.

²⁹ Jesúsna iaimaiaia cüa facaise jananiai iaimaiaia cuirioitate:

—Jusiñamui Jitodio. ¿Ñiese cocona nibaiacadio? Coco duere sefuelle facaise nia iñede; iadedi birui cocona duere finuaibidio —cuiroidiaimaiaia.

³⁰ Naie bai iaie ailluena chanchuai guillano itimaci.

³¹ Jananiai Jesúmo duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconi nai iaimaiaimona jananiai oni jaillanona, chanchuai abimo jaide. Iemona iconiido chanchuai joraimo aisicana jaillanona, corobaiside.

³³ Iena cüanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiaia rafuena llotimaci.

³⁴ Ie jira ailluena comini Jesús dine bitimaci. Naimiena cüano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

*Jesús tísítaitimiena jillotaja rafue**(Mr 2.1-12; Lc 5.17-26)*

¹ Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride.

² Nainomo rilla mei, naimie dine comini ie biiramo biide tísítaitimiena atide. Naimiena atidinodi Jesús naimiena jillotajana inote. Iena Jesús uñuanona, tísítaitimie mo llote:

—Moo, o comecina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús dine ofidinomona dajerie Moisés micori llogacinona llofueraini itimaci. Jesús lluana naimaci cacajano, Moisés micori llogacinona llofueraini comecina facadimaci: “Dama Jusiñamui jeacina dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁴ Naimaci comeciaina facajacinona Jesús uñuamona, Jesús dinena jicanote:

—¿Bue ñellena omoi comecina jeare facadomoi?

⁵ Bimie mo: “O jeacina jai oni dotadicue” cue lloia, cue uai siñonana uññoñeitomoi; ia bimie mo: “Mai naidacaillanona macari” cue lloia, cue uai siñonana uññoitomoi.

⁶ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uññollena, tísítaitimie mo lloiticue: “Mai naidacai. O biira ferianona, o jofomo mai jai”.

⁷ Iese naimie raillamona, tísítaitimie jillode. Naidacaida, ie jofomo jaide.

⁸ Comini iena ciuanona, jacinaitimaci. Bimie mo ie uaina Jusiñamui fecajana naimaci uñuamona, Jusiñamuimo iobillacina fecadimaci.

*Jesúdi Mateona fetua rafue**(Mr 2.13-17; Lc 5.27-32)*

⁹ Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci.

¹¹ Nainomo fariseuai comini jamai bitimaci. Moisés micori llogacinodo eo jaidimaci. Jesúsna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanooitimaci.

¹² Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaiddimaci. Ie isoide. Mareuidino cuena jitaiñedimaci; ia maraiñedino cuena jitaiddimaci.

¹³ Jusiñamui facaina lloaíma micori jaie cuega rafuemo omoi comeciaina faca: “Jusiñamui llote: ‘Rana cuemo omoi fecajana jitaiddicue; ia cominina omoi dueruillana jiai jitaiddicue’ llote”. Cominina cue dueruilla jira, Jusiñamui dibeimo naimaci illena, mareuidinona itatajaibiñedicue; iadedi Jusiñamui dibeimo naimaci illena, maraiñedinona itatajaibiticue. Omoimona maraiñedino diga nabairiticue; ia naimacina uaibiticue.

*Jesús dine Juan Bautista llofueoicaigano billa rafue**(Mr 2.18-22; Lc 5.33-39)*

¹⁴ Naie facaise Juan Bautista llofueoicaiganodi Jesús dine bite. Naimie mo llote:

—Cai einamací llua isoi, Jusiñamuina cai raise iobitallena, guiñenaruillai illa facaiseci-
oni guiñedícai. Cai jeacino facaina sunaicabitícai. Fariseuai comini jiai guiñedímaci;
iadedí o llofueoicaigano guitímaci. Cai einamací llogacínodo jaidícai. ¿Bue ñellena o
llofueoicaigano iedo jaiñedímaci?

¹⁵ Jesús uai ote:

—Jiaie rafuedo iena lloiticue. Coniruedí ie aina uarui ia, iobilla jira, ie nabaiñiai
sunaiñedímaci. Iobillamona guitímaci. Jiairuido jai aireiacade conirue naimaci díga
iñenia, naimaci comeci sunaillamona, naimaci jitaia, guiñenaruillaidí iite. Ie isoide. Cue
comini díga birui cue illa jira, iocire itímaci. Ico cue jaille mei, sunaitímaci. Ie muidona
birui cue llofueoicaigano guicabitímaci.

¹⁶ Jiaie rafuedo iena lloiticue. Nia jocoñega comue iniroidí jacaie iniroimo jillíñega.
Jilliadi, jocua mei, comue iniroi jacaie iniroimona fo llirite. Eo fodo cuararite. Jai
maraiñeno cioite.

¹⁷ Jacagomona finoca bolsa como finoca vino joneñega. Jonegadena, mairiñena jira,
sirillamona, goi raire cuararite. Vino faifite. Igoi jiai faifite. Como finoca vino
comogomo jonelle. Iemei iena faifiñeite. Ie isoide. Omoi einamací rafue ifomo jiaie rafue
birui ite. Iena omoimo llocabitícue. Iedo jaidícai —llote.

Jesúdi mena duide riñona jillotaja rafue

(Mr 5.21-43; Lc 8.40-56)

¹⁸ Juan Bautista llofueoicaigano díga Jesús llotemo, jiaimie naimie díne bite. Naimiedi
judíuai ofiraco sedaraima. Jesúsna duere jicanollena, caiñici ifodo rainadacaida llote:

—Cue jisa como fodaite. O onolli naiñaiño o jonellesa, naiñaiño jilloillesa, cue
jofomo cue díga mai bi.

¹⁹ Iena cacajano, Jesús naimie díga jaide. Ie llofueoicaigano jiai jaidímaci.

²⁰ Bai jaillanona, duidíñaiño jinafona jaide. Naimie iniroina jetallena, naimie díne bite.
Ie jeraimona doce años jaca diaide. Billanona naimie iniroina jetade.

²¹ “Naimie iniroi cue jetajamona jilloiticue” comecina facajamona, naiñaiño naimie
iniroina jetade.

²² Ieconí Jesús dobaidacaida, abido erodatemo, naiñaiño cide. Raite:

—Ñoo, o comecina ocuiño. Cuená o inua jira, jai jillodio.

Ieconí naiñaiño jillode.

²³ Ofiraco sedaraima jofomo Jesús rillano, naie jofo nama jisa jai fodailla jira, comini
merire fillana cacade. Ailluena failliñailana cacade.

²⁴ Jesús dinena raite:

—Jofomona nana omoi jino jaillana jitaídícue. Cuemona biñaiño fodaíñedesa. Jamai
inide.

Iena cacajano, naiñaiño jai fodaite uiñuamona, Jesúsri jaisitímaci.

²⁵ Comini jino oretaja mei, naiñaiño onollina naimie llinuano, fodaillamona naiñaiño
jillode. Jillua mei, naiñaiñodi naidacaide.

²⁶ Naie rafue nana naie enirue itinomo llocana jaide.

Jesúdi uisínide iaímaiaína jillotaja rafue

²⁷ Ofiraco sedaraima jofomona Jesús bai jaidemo, uisínide iaímaiaí naimie jinafona
jaidiaímaiaí. Jesúsna ado uaidotiaímaiaí:

—Cai illaíma David micorí jitodio. Jusiñamuimona o billa jira, cocona duenai.

²⁸ Uai oñeno Jesús Capernaumo jaide. Naimie fo jailla mei, naimie díne bitiaímaiaí.
Iaímaiaímo Jesús jicanote:

—¿Omiconá cue jillotajana inotómico?

Fairiotiaímaiaí:

—Jí.

²⁹ Iaímaiaí uisína Jesús jetajano raite:

—Cuena omico inua diese jilloitomico.

³⁰ Iecon iaimaia uisidi cide. Jesús naie rafuena llwana eo janotade.

—Bumo lloñoeno —llote;

³¹ iadedi iena llocana jaidiaimaia. Iemona Jesús mameci nana naie eniruemo itinomo soride.

Jesús ñañedimiena jillotaja rafue

³² Capernaumona Jesús bai jaidemo, naimie dine Janaba anamo illamiena jiaie comini atidimaci. Janaba anamo naimie illa jira, naimie ñainide.

³³ Jesús Janabana oni orede. Oretaja mei, naie iima ñaite. Nainomo ite comini rajicaillanona raitimaci:

—Cai comini dine bie isoide iima jillwana jaca cioñedica.

³⁴ Ie jira fariseuai comini dinena raitimaci:

—Taife dibeimo Janaba illamona, Jesúsdi Taife uaido Janabana oni orede —raitimaci.

Jesúdi cominina duenaila rafue

³⁵ Diga nairaiaimo ie llofueoicaigano diga Jesús llocana jaide. Nainomo judíuai ofracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeci iuaina meiduana llofueite. Ailluena duidinona jillotate. Naga isoide duicomona jillotate.

³⁶ Naimacina duenaite. Naimaci comeci iticino oni duiñoitimie iñena jira, naimacina duenaite. Ailluena cominina cide. Toica llaudaia isoi ebe isoi jaidimaci. Naimaci comeci ocuiñonidimaci. Jusiñamui naimacina sedaacana uiñoñedimaci.

³⁷ Naimacina duenailamona, ie llofueoicaiganomo llote:

—Illimo ailluena trigo ia, iena ollena, ailluena majirainina jitailla. Ie isoide. Ailluena comini ite naimacimo Jusiñamui rafuena cai lllollena; iadedi naie rafuena lloraini eo iñedimaci.

³⁸ Ie rafue naimaci lllollena, ailluena cominina raire naimie oretallena Jusiñamuimo jicano.

10

Jesúdi ie doce llofueoicaiganona fetua rafue

(Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, janania anamona cominina jilloitallena. Duiconona oni oretallena, iena jia iñonocaide.

² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaia Zebedeo jito iaimaia.

³ Felipe. Bartolomé. Tomás. Cuena jia uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo.

⁴ Jiaie Simón. Naimiedi cananista comini facaisemo duide. Judas Iscariote micori. Naimiedi Jesúsna gaitatate.

Jesúdi ie llofueoicaiganona oretaja rafue

(Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judíuaiñedino dine jaiñoeno. Samaritano railla comini dine jaiñoeno;

⁶ ia cai judíuai comini dine jai. Naimacimona ailluena comini Jusiñamui rafuena nia iñoñedimaci. Faificana nia jaidimaci.

⁷ Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeci iuaina meido”.

⁸ Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno.

⁹ Ucubena uiñeno. Guille ifo meidollena, rana uiñeno.

¹⁰ Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jguidana uiñeno. Jiaie cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno.

¹¹ Nie nairaimo omoi ria, omoi rafuena jitaidimiena jeno, naimie jofomo omoi illena. Naie jofomo omoi i, naie nairaimo omoi ille dinori.

¹² Naie jofomo omoi rillanona, naie cominina marena uaido.

¹³ Omoina naimaci raise feiñoia, naimaci uri illena, naimacimo marecinona lloño; iadedi omoi rafuena naimaci jitañenia: “Jusiñamui omoina canoite” naimacimo lloño.

¹⁴ Omoina bu feiñoiacañenia, omoi uaina bu cacarefiacañenia, naie nairaimona omoi jaillanona, omoi eilliammo ite jearacuaina jaidino. Marañede rafuena naimaci finuana naimaci uiñollena, omoi eilliana jaidino.

¹⁵ Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifuea llua rafue

¹⁶ Jesús ie llofueoicaiganomo nia llote:

—Naimacina janallari fañellena, naimaci duere sefuiñellena, toica llaudaiaia raise sedajana jitaidimaci. Ie isoide. Eo marañede comini motomo omoina oretaiticue. Omoina duere finoacanitimaci. Raise sedajana jitaidomoi. Jaio fioidañellena, aiside. Naimiena bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i.

¹⁷ Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci.

¹⁸ Cue rafue omoi llua muidona, omoina gaitajanona, illaicomini dine omoina uitimaci. Omoina llogidoitinomo cue rafuena lloitoimoi. Naie illaicominimo iena jiai lloitoimoi.

¹⁹ Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomoi.

²⁰ Dani omoi comeciaino ñañeitomoi; ia Jusiñamui Joreño uaido ñaitomoi.

²¹ Cueno inotomoi; ia ailluena cuena inoñeitimaci. Cueno omoi inua jira, omoina enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruiaidi naimaci moonna, naimaci eina meinetallena, naimacina llogidoitimaci.

²² Cue muidona ailluena comini omoina enoitimaci; iadedi cue uaina fañonocañedimie cue Moo diga monamo ja muidomo jaca iite. Naimiena jillotaiticue.

²³ Cue rafue naimaci jitañenamona, omoina nie nairai duere finoia, dinomona cue rafuena lollena, jiaie nairaimo raire jai. Cue rafuena omoi lollena, diga judíuui illanuaimo nia jaitomoi. Nana naie comini nia inoñenia, Jusiñamui dinena dane abido biiticue.

²⁴ Ero, ie llofueraima duere sefuia, ie llofuegamie daje isoi duere sefuite. Ie eci illamie duere sefuia, ie mullaima daje isoi duere sefuite.

²⁵ Ie isoide. Cue cominina omoi jaillamona, cue duere sefuia, jiai duere sefuitomoi. Taife mameci jiaici llinuanona, “Beelzebúdio” jaino cuena raitimaci. Iese cuena naimaci jeare ñaia jira, cue cominina omoi illa jira, omoina jiai jeare ñaitimaci.

Jesús di jaciruiñeno llofua rafue
(Lc 12.2-9)

²⁶ Jesús nia llote:

—Cuenta ñinoñedinomoina jeare ñaitimaci; ia nana cue rafuena llocana omoi jailla jira, naimacina jaciruiñeno.

²⁷ Omoimo rafuena anado jai lloticue. Iena nana cominimo marefodo llono. Ado llono.

²⁸ Omoi abina meineredimaci; ia omoi joreño meinenidimaci. Omoina naimaci meineia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede.

²⁹ Omoina duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fioidañede.

³⁰ Ero, niga ifotirai omoimo illana Jusiñamui uiñote.

³¹ Naimiedi omoina sedajana jiai uiñote. Silliñiai baifemo Jusiñamui isiruigamoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

Jesús naimiena janoñenana llofua rafue
(Lc 12.8-9)

³² Ie llofueoicaiganomo Jesús nia llote:

—Cue rafuena omoi llumona, jiaino omoina duere finoitimaci. Cuenta birui omoi janoñenia, nana comini Jusiñamui uicomo ico ia, nainomo omoina janoñeiticue. “Cue cominidomoi” omoina raiticue.

³³ Cuenta birui omoi janoia, nana comini Jusiñamui uicomo ico ia, nainomo omoina janoititue. “Cue cominiñedomoi” omoina raiticue.

Jesús muidona nana comini uri iñena rafue
(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuenta ñinoñedinodi cuenta ñinotina enoitimaci. Enoillamona cuenta ñinotina duere finoitimaci.

³⁵ Cue lloga rafuena damierie ñnua muidona, ie moo illa dibeimo ie jito iñeite. Ie ei illa dibeimo naiñaiño jisa iñeite. Ie jifaiño illa dibeimo naiñaiño mio iñeite. Iese cominina uri itatañedicue.

³⁶ Omoi comini coninina enoitomoi. Iemona duere sefuitomoi.

³⁷ Ero, ie moonna cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise duiñede. Ie uruia cue baifemo bu isirua, cuemo raise duiñede.

³⁸ Cue facaina bu fioidacaiñenia, cuemo raise duiñede. Naimiedi cue comini naimiena lloiacaiñedicue.

³⁹ Cue facaina fioidacaiñedimie ja muidomo faifite. Cue diga jaca iñeite; iadedi cue facaina fioidaitimie monamo cue diga jaca iite.

Jesús Jusiñamuimona ibana feiñua llua rafue
(Mr 9.41)

⁴⁰ Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuenta jiai feiñotimaci. Omoina bu feiñoia, cuane jiai feiñote. Cuenta feiñotimiedi cuenta oretatimiena jiai feiñote.

⁴¹ Naimie cue comini illamona, damierie Jusiñamui facaina lloraimana feiñoitimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite.

⁴² Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite –llote. Iemei Jesús ie llofueoicaiganona, ie rafuena lollena, orede.

11

Jesús dine Juan Bautista micori ie llofueoicaiganona oretaja rafue
(Lc 7.18-35)

¹ Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uiñollena, Jesús dine ie llofueoicaiganona orede.

³ Jesús mo llotimaci:

–Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uiñoiacadica. Imieñedi odena, jiaimie billemo nia ocuridica.

⁴ Jesús uai ote:

–Cue lluaana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono.

⁵ “Uisidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono.

⁶ Jiai llono: “Nibai nana cue rafuena raise cacaiñedio; ia cuena jaca nia inocana o jai, camare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesúsdi Juan rafuena llote:

–Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoiñede. Nie isoide rafue naimiemo ia, cue rafuena llocana jaide.

⁸ ¿Bue ñellena naimie dine jaidomoi? Mare iniroina jitadimiena cioiñedomoi. Mare iniroina jitadinona omoi cioacaniadedi, illaicomini dine jaidomoi.

⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoi naimie llua jira.

¹⁰ Malaquías micori naimiena jaie cueda:

Jusiñamui raite: “Ero, o uicodo cue rafuena lollena, damiena oretaiticue, comini comeciaina marecinona duiñollena”
cueda. Malaquías Juan Bautistana cuete.

¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi.

¹² Juan llofuea tainiamona ailluena comini cue rafuena inuamona, Jusiñamui dibeimo birui duere iacadimaci.

¹³ Nana Jusiñamui facaina lloraini micoriadi cue billena jaie llotimaci. Moisés micori iena jiai jaie llote. Juan facaise naie llogacino jai suide.

¹⁴ Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena inotomoidena, Juandi naimiena uiñotomoi.

¹⁵ Omoi jeforena jira, raise fueollena, cue llua mo cacarei.

¹⁶ Jesús nia llofue:

–Ero, omoi na ñaiticue. Jifanote uruia isoidomoi. Uruia jifanoiacania, naimaci nabaiñiaina uaiduanona, raitimaci:

17 “Omoï diga jifanoiacadicaï; iadedi caï diga jifanoiacaiñedomoï. Caimarede rafuena caï jifanoiacania, sunailla rafuena jifanoiacadomoï. Sunailla rafuena caï jifanoiacania, caimarede rafuena jifanoiacadomoï. Coninina nabairiñedicaï” raitimaci.

18 Ie isoidomoï. Juan jirorainide. Caimare guiñede; ia naimie diga nabairiñedomoï. Naimiena gaiñedomoï. Ie jira omoïmona dajerie naimiena raitimaci: “Janaba anamo naimie illamona, naimie uairico isoi ite” raitimaci.

19 Monamona billanona, imana jaidicue. Omoï isoi guiticue. Caimataidicue; ia cue diga nabairiñedomoï. Cuenajai gaiñedomoï. Ie jira cuena jeare ñaitomoï. Raitomoï: “Guillaredimie. Jiroruidimie. Jearede rafue finodino diga nabairitimiedio”. Iese raitomoï; iadedi Jusiñamuina inotinodi cue finoca rafuena marenana uiñotimaci.

Dajerie nairai Jesúsna inoñena rafue

(Lc 10.13-15)

20 Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite.

21 Llote:

—Omoïmona damerie Corazín railla illanomona bitomoï. Omoïmona damerie Bet-saida railla illanomona bitomoï. Cue rafuena omoï inoñena jira, duere sefuitomoï. Omoï dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotailamona, naimaci comeciai iuai meidotimaci. Naimaci comeciai iuaina meiduana uiñotallena, ebinide iniroina jitajanona, naimaci ifogiamo jusefona jonetimaci.

22 Jusiñamui uicomo nana comini ico ia, Tiro nairai baifemo duere sefuitomoï. Sidón nairai baifemo duere sefuitomoï.

23 Omoïmona damerie Capernaum railla illanomona bitomoï. Birui abina iedoiacadomoï; iadedi jairuido sunaitomoï. Omoï dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoï comeciai iuai omoï meidoñena, monamo cue Moo diga jaca iñeitomoï; iadedi naimie omoïna duere finollemona sunaitomoï.

24 Jusiñamui uicomo nana comini ico ia, cue rafuena omoï inoñena jira, Sodoma railla nairai baifemo duere sefuitomoï —llote.

Jesús ie Moo diga ñaia rafue

(Lc 10.21-22)

25-26 Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitaille jira, iese uiñotadio. Ie jira iobillacinona omo fecaadicue. Mai.

27 Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoïna naimiena uiñotadicue. Ie muidona naimiena uiñotomoï.

28 Omoï jeacinomona omoï jillobillena, duere jaidomoï. Omoï comeciai marena uri illena, cue dibeimo mai omoï i.

29 Cue llucino anamo omoï i. Cue rinina jira, cuemona omoï fueo. Iemei omoï comeciai marena uri iite.

30 Omoïna cue canua jira, cue llucino anamo omoï iacanano ia, sefuinide. Omoïna cue canolle jira, cue llucino finuana sefuinide.

12

Sábadoruimo Jesús llofueoicaigano maijia rafue

(Mr 2.23-28; Lc 6.1-5)

¹ Ie rafue llumona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naído jaide. Ie llofueoicaigano aimetailla jira, trigona tijiano, golluano, guicana jaidimaci.

² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

³ Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide.

⁴ Jusiñamuimo fecaca llomeniconu uanona, guitimaci. Jamai bue isoidino naie llomeniconu guillanu Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede.

⁵ Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijuuidimaci. Jusiñamuina naimaci sedallena, ocainana fatimaci. Iraina bonodimaci. Iese maijuuidimaci; iadedi Jusiñamuimona jeacino finoñedimaci. Moisés micori jaie ciegafuiana raise cacañedomoi. Iena raise facañedomoi.

⁶ Omoimo nia lloiticue. Jusiñamui jofomo finoca rafue baifemo faiticue.

⁷ Jusiñamui facaina lloraima iena jaie ciega: “Cuemo rana omoi fecajana jitaidicue; ia omoi jitaillamona, jiaie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomo!” lloñedomoi. Cuemona cue llofueoicaigano jeacino finoñedimaci.

⁸ Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

Jesúdi onollina idisarodimiena jillotaja rafue

(Mr 3.1-6; Lc 6.6-11)

⁹ Bai jaillanona, nairai dine rillanona, naimaci ofiracomo Jesús fo jaide.

¹⁰ Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci.

¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi.

¹² Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³ Onollina idisarodimiemo llote:

—O onolli mai oni ñuita.

Iena ñuitajamona jillode.

¹⁴ Iena ciuanona, fariseuai jino jaidimaci. Naimiena meinellena, coniniri siadotimaci.

Isaías micori jaie Jesúna ñaia rafue

¹⁵ Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuenallocana jaiñeno —naimacimo llote. Naimie mameci are sorillana jitañede. Fariseuai diga ie uai uaitaiacañede.

¹⁷ Iemona Isaías micori jaie ciegafuiai jai suide. Jusiñamui Isaías micorina jaie cuetataga:

¹⁸ Ero, cue fetoca mullaima ite.

Naimiedi cue isiruigamie. Naimieri iobidicue.

Cue Joreño naimiemo cue fecajanona, judíuainēdinomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue llumona, naimiena ñnotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuainēdino naimiena ñnoitimaci.

Fariseuai Jesúna jeare ñaia rafue

(Mr 3.19-30; Lc 11.14-23; 12.10)

²² Jesús dine damieredi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Cíode.

²³ Naiena ciodino rajicaillanona raitimaci:

–Ñibai bimiedi David micori jito. Cai illaimana naimie illena, naimie micori jitomo ocuridicai.

²⁴ Iena damierie fariseuai cacajano, raitimaci:

–Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate –raitimaci.

²⁵ Naimiena naimaci enoillana Jesús uñuanona, naimacimo llote:

–Daje isoi comeciaina lloillamo daje nairai facañenia, danomo majinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainainidimaci. Oni jaidimaci.

²⁶ Ie isoide. Beelzebú uaido jananiaina omoi llua isoi cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci.

²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uñollena. Iemei cue finoca rafuena uaitañeitomoi.

²⁸⁻²⁹ Ero, maridimie ie jofomo ite rana ñibai fiñacdomoi. Iena fiñillena, naimiena nano raise omoi maiga. Raise maia mei, ie rana fiñedomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llua jai uñotomoi.

³⁰ Cue dibeimo iñedimie cuena enoide. Cue dibeimo cominina itatañedimiedi naie cominina cuena ñnotañede.

³¹ Ie jira omoimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreña jeare ñaiacinona dotañeite.

³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamuimona biticue. Cuena omoi jeare ñaia, Jusiñamui iena feitarede; iadedi naimie Joreña omoi jeare ñaia, Jusiñamui iena birui feitañeite. Iena íco jaca feitañeite.

Jesúdi riará llisilla llua rafue

(Lc 6.43-45)

³³ Jesús llote:

–Llisillamona nie isoide riará illana uñoticaí. Amena ie llisilla llillamona, amena marena uñoga. Llillamona, amena marañenana jiai uñoga.

³⁴ Ie isoide. Omoi ñaiamona omoína uñoticaí. Cuena omoi marañeno ñaia jira, omoi comeciai iticinona uñoticaí. Omoi marañena jira, jaio nairaidomoi isoidomoi.

³⁵ Mareuidimie mare ie comecimona ñaite; iadedi marañedimie marañede ie comecimona ñaite.

³⁶ Jamai ebena birui omoi ñaia, Jusiñamui uicomo nana comini ico illa facaiseconi Jusiñamui iba oite.

³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui ðibeimo omoi comeciai iuai meido.

Dajerie Jesús siño rafuena finuana jitailla rafue
(Mr 8.12; Lc 11.29-32)

³⁸ Naie facaiseconi dajerie Moisés micori llogacinona llofueraini dajerie fariseuai diga Jesúmo llotimaci:

—Maestro, o lloga uaina cai ñnollena, siño rafuena o finuana cioacadicaí.

³⁹ Jesús uai ote:

—Marañedicinona finocabidomoi. Jusiñamui ðibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micori jaie ite rafuena uifnotomoi. Naiemo omoi comeciaina omoi faca.

⁴⁰ Darui amani aillue llíciái jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue.

⁴¹ Llícíái jeraimona naimie jillua mei, Nínive railla nairai ðine Jonás micori jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi” omoína raifñeiticue. Jonás micori baifemo birui uaidicue; iadedi cuena ñnoñedomoi.

⁴² Ero, Saba railla nairai ie illañiño micoridi Salomón micori ðine jaie aarena jaide. Naimie micori uifnuacinona naiñañiño micori cacareillena, aarena jaide. Salomón micori baifemo birui uaidicue; iadedi cuena ñnoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñañiño micori omoína ico ñaite: “Naimiedi siño rafue finuana ciodomoi. ¿Bue ñllena naimiena ñnoñedomoi?” omoína ico ñaite.

Janaba anamo illamie rafue
(Lc 11.24-26)

⁴³ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue ifñenanomo jaide; iade baiñede.

⁴⁴ Baiñena jira, naimie comecina facade: “Navui cue anamo illamie ðine abido jaiticue”. Abido naimie bia, naie ifima comeci namanidena naimie baite.

⁴⁵ Iemei oni jaillanona, jiaie siete jananiaina naimie diga atide, naimaci anamo naie ifima illena. Naie siete jananiai naimie baifemo marañedimaci. Iemona naie ifima eo fodo jaide. Ie isoide birui ite marañede comini. Cue rafue naimaci ñnoñenia, eo fodo jaitimaci.

Jesús ie comini
(Mr 3.31-35; Lc 8.19-21)

⁴⁶ Jofomo comini diga Jesús nia ñaia, naimie ei, ie amatiaí diga, bite. Naimie diga ñaiaacanano, jino naidaide.

⁴⁷ Damie Jesúmo llote:

—O ei, o amatiaí diga, jino ite. O diga ñaiacade.

⁴⁸ Naimiemo Jesús ðinena jicanote:

—¿Bu cue ei? ¿Bu cue amatiaí?

⁴⁹ Ie llofueoicaigano ðine ie onolli ñuitajanona, raite:

—Jadi, cue ei, cue amatiaí.

⁵⁰ Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

13

Trigo judaídime rafue

(Mr 4.1-9; Lc 8.4-8)

¹ Nai jofomona nairui Jesús jaillanona, jorai fue dine jaide.

² Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci.

³ Ailluena rafue naimacimo llote:

—Jusiñamui omoína sedaacana omoi fueollena, bie rafuena lloiticue. Damie trigona judaiaide.

⁴ Naimie judaia mona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

⁶ raise jainañena jira, ecasillamona duide. Ie jira llisiñede.

⁷ Eecuai illanomo jiaie iduai juide. Eecuai sicuamona, riarra eecuai ibaica. Ie jira llisiñede.

⁸ Mare eniruemo jiaie iduai juide. Sicode. Llisillamona danademo cien diga llisillana ote. Jiañamona sesenta diga llisillana ote. Jiañamona treinta diga llisillana ote.

⁹ Omoi jeforena jira, raise fueollena, cue lluomo cacarei. Iena ñno.

Jesús ie como lloga rafuena llofuia rafue

(Mr 4.10-12; Lc 8.9-10)

¹⁰ Ie llofueoicaigano Jesúmo jicanuaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoína ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede.

¹² Jusiñamuina ñnotimie Jusiñamui rafuena ñnocana jaite. Jusiñamui naimiëna uiñotaite; iadedi Jusiñamuina ñnoñedimie Jusiñamui rafuena uiñoñecana jaite.

¹³ Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoñoeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

¹⁴ Isaías micori naimacina jaie cuega rafue birui jai suide. Jaie raite: Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisnidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoína cue jilloitai raillanona”.

Isaías micori Jusiñamuina ñnoñedinona iese jaie cuete;

¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ni ua omoi marena ille jillaci.

¹⁷ Jusiñamui facaina jaie lloraini micoriai omoi siñoña ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesúdi trigo judaidimiena llua rafue
(Mr 4.13-20; Lc 8.11-15)

¹⁸ Jesús llote:

—Ero, omoína trigo iduaina judaidimie rafuena llofueitícue.

¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaino cacaja uaina ñnotañede.

²⁰ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci.

²¹ Nofiemo riga iduai jinaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci.

²² Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci.

²³ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide.

²⁵ Naimie inia mei, ie enoidimie trigona eruaide raiticiaina bainino judaiaide. Iemei oni jaide.

²⁶ Trigo sicuamona lliside. Naie facaise naie raiticiai como raise bairede.

²⁷ Judaidimie maijiraini iena cianona, naimiemo llote: “Mare iduai navui ritio. ¿Niesedeta raiticiai eo sicode?”

²⁸ Uai ote: “Cueno enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?”

²⁹ Uai ote: “Dama ite. Raiticiai omoi raitia, trigona jiai jaitaitomoi. Dama iesede.

³⁰ Danomo sicoite. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue
(Mr 4.30-34; Lc 13.18-19)

³¹ Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riaro sicode.

³² Mostaza ido eo janorede; iadedi sicua mei, eo aillue riaro jaillamona, nainomo silliniñai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofua rafue
(Mr 4.33-34; Lc 13.20-21)

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede.

³⁵ Jusiñamui facaina lloraima micori iena jaie cuega: Jusiñamui llote: “Jiaie isoide rafuedo cominimo lloiticue. Comini nia uiñoñega rafuena lloiticue. Enirue finua facaise mona jaca bu iena uiñoñede. Birui naimaci uiñollena, iena lloiticue”.

Jesús trigo motomo riga raiticiaina llofuia rafue

³⁶ Comini jino fainonocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñollena, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloticue.

³⁸ Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini.

³⁹ Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisaí. Trigodi cuena ñnotino.

⁴⁰ Jobaillena raiticiai ofitaja isoi, ico abido cue bia, daje isoi iite.

⁴¹ Cue jaienisaína oretaiticue, nana jeacinona finoraini diese ofitallena, cue illanomonona iraimo dotallena.

⁴² Nainomo eo duere sefuillamonona, eeditimaci. Subicaitimaci.

⁴³ Iemei jitoma lligaiñua isoi, Jusiñamui sedajanomo naimiema ñnotinodi marena bairenitimaci. Omoi jeforena jira, raise fueollena, cue lluomo cacarei. Bie isoi omoi duere sefuiñellena, cue lluaña ñno.

Jesúdi eniruemo isiruiga reica rana llofuia rafue

⁴⁴ Jesús llote:

—Jusiñamui díbeimo comini jailla rafuena lloiticue. Jiaie uaido iema omoi lloiticue. Eniruemo isiruiga raífide ra bu baía, ie nama jai iñena jira, naie eniruema uainino íbaacade, naie ra ollena. Ucube ollena, naie rari íobilla jira, nana naimiemo íte raruaína fecaite. Iemei eniruema íbaite. Ie isoide. Jusiñamui íllanomo omoi íllena, jiaie rafue uanona jaiño. Dani Jusiñamui rafuema uanona jai. Dani íemo omoi comeciána faca.

Perlas railla rafue

⁴⁵ Jesús llote:

—Jusiñamui díbeimo comini jailla rafuena lloiticue. Iema omoi raise uiñollena, perlas railla rana íbaraimana lloiticue. Eo mare perlas íballena jenocabide.

⁴⁶ Eo raífide perla naimie baía, naie perlana íballena, nana íe raruaína fecaite. Ie isoide. Jusiñamui íe cominina sedaacaja rafuema omoi cacaja jira, iema ocana jai.

Jesús lloijina ñaía rafue

⁴⁷ Jesús llote:

—Jusiñamui díbeimo comini jailla rafuena lloiticue. Iema omoi raise uiñollena, lloijina lloiticue. Joraimo lloijina comini faianona, naga isoide lliciaína otimaci.

⁴⁸ Ari sonua mei, mare lliciaí diese fetodimaci. Marañede lliciaí diese oni faitimaci.

⁴⁹ Ie isoide. Ico abido cue bia, íese íite. Jusiñamuina ñnotinomona naimiema ñnoñedíno diese oni fetollena, Jusiñamui jaienisaí biitimaci.

⁵⁰ Iemei iraimo Jusiñamuina ñnoñedínona dotaitimaci. Nainomo eo duere sefuillamonona eeditimaci. Subicaitimaci.

Jesús llofueoicaiganodi mare rafuena jai uiñua rafue

⁵¹ Ie llofueoicaiganomo Jesús jicánote:

—¿Nana cue lluaña cacadomoi?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuellaena, naimacina caimare itatallena, jofonama ie mare raruaímona naimaci jitailla ra naimacimo fecade. Comini comeciaina lloticue. Jusiñamui facaina lloraini micoriai llogacinona uiñotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide.

⁵⁴ Ie eniruemo rillanona, Nazaretmo ite ofiracomo llofujete. Naiemona cominidi raijicaillamona raitimaci:

—¿Ñiese naimiedi eo abina uiñote? ¿Ñiese siño rafuena naimiedi finode? Naimiedi jamai bue isoidimie.

⁵⁵ Naimie amederaíma jito. Naimie eidi María. Naimie amatiáidi Jacobo, José, Simón, Judas.

⁵⁶ Naimie miriñotiaídi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵⁸ Naimie uaina naimaci ñnoñena jira, Jesús ailluena siño rafue ñnoñede.

14

Juan Bautista micori fodailla rafue

(Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade.

² Naimie ecimo maijuidinomo llote:

—Fodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañena, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluaña gaiñenano, naimiena duere finode. Herodes Juan micorina gaitatajanona, cárcelmo jonetade.

⁵ Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite.

⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade.

⁷ Ie jira naiñaiño llote:

—Ñie isoide rana o jitaíadedi, omo iiticue. Illaíma uai cuemo illa jira, iena ua finoiticue.

⁸ Naiñaiño ei naiñaiño lluanona, naiñaiño uai ote:

—Juan Bautista ifogi bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote.

¹⁰ Ie lloga uaina finollena, cárcelmo soldadona orede. Nainomo Juan micori ifogina jaitade.

¹¹ Bandejamo naimie micori ifogi jonecaida, soldado atiano, Herodías jisamo fecade. Ieconí ie eimo fecade.

¹² Iena fidiano, Juan micori llofueoicaigano naimie micori abina uaibitimaci. Iena naimaci raia mei, Jesúmo lluidimaci.

*Jesús cinco mil iñiaina ecaja rafue
(Mr 6.30-44; Lc 9.10-17; Jn 6.1-14)*

¹³ Juan micori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimonona eillido bitimaci.

¹⁴ Eniruemo Jesús sijia, ailluena cominina dafaifide. Naimacina cianona, naimacina duenaillanona, duidinona jillotata.

¹⁵ Jitoma ana itemo, ie llofueoicaigano naimie dine llaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoi eca.

¹⁷ Uai onaisite:

—Dani caimo ite cinco llomenico, mena lliciai diga.

¹⁸ Uai ote:

—Iena cuemo ati.

¹⁹ Raitie illanomo comini ana raillesa llono —raite.

Naie cinco llomeniconona naie mena lliciai diga uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena.

²⁰ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

²¹ Cinco mil iñiaí diese guitimaci. Naimaci aitiaí jiaí guitimaci. Naimaci uruiaí jiaí guitimaci.

*Jesús jinui emododo macarilla rafue
(Mr 6.45-52; Jn 6.16-21)*

²² Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote.

²³ Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite.

²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci.

²⁵ Nia monañedemo, jinui emododo naimaci dine Jesús bite.

²⁶ Naimiena naimaci cianona, jacinailamona, raitimaci:

—¿Bu joreño caimo billana ciodicai? —Jacinailamona cuiriidimaci.

²⁷ Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

²⁸ Pedro uai ote:

—Uanai cai Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite;

³⁰ iadedi aifi billana naimie cianona, jainaite. Jinuimo anabaiacade. Ado cuirioide:

—Nama, cuena cano.

³¹ Jesús ie onolli oni ñuitajanona, naimiena llivanona, raite:

—Eo janore cue uaina ñnotio. ¿Bue ñellena eo ñnoñedio? Cuena ñnotiodena, jinui emododo cue dine niadedi ridio.

³² Botemo a iaiaiaí jaillamona, ie facaise aifi llicaiide.

³³ Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

³⁴ Ruica dine jaillanona, Genesaret railla eniruemo ridimaci.

³⁵ Jesúna nainomo itino uiñuamona, naimie dine duidinona atillena, nana nairaimo jiaie cominina oredimaci.

³⁶ Naimie dine billanona, daní ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

15

Jesúdi comini comeciaina ñaia rafue

(Mr 7.1-23)

¹ Jerusalémona fariseuai comini Jesús dine bitimaci. Moisés micori llogacinona llofueraíni jiaí bitimaci.

² Naimiemo jicanotimaci:

—¿Bue ñellena o llofueoicaigano cai einamací rafuedo jaiñedomaci? Naimaci guiacania, naimaci onollí cai einamací llua isoi raise jocoñedomaci. Ie jira cai abimo jeacino finodomoí.

³ Jesús uai ote:

—¿Bue ñellena nana Jusiñamui llogacinodo jaiñedomaci? Omoí einamací llogacinodo jaidomoí; iadedí nana Jusiñamui llogacinodo raise jaiñedomaci.

⁴ Jusiñamui jaie llote: “O moo uai inuanona, naimiena cano. O ei uai inuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

⁵ Iese Jusiñamui llote; iadedí omoí einamací llotimaci: “Jusiñamuimo cai ucubena cai fecajamona, cai moona, cai eina jai canonicicaí”.

⁶ Iese omoí finocabilla jira, omoí einamací llogacinodo omoí jaillamona, Jusiñamui uaina jamaidomoí.

⁷ Mareuidinona abi caitauidinodomoí. Isaías micori omoína jaie raise llote. Naimiedi Jusiñamui llua cuete:

⁸ Bimaci naimaci uaido marecinona cuemo llote; iadedí cue rafuedo raise jaiacaiñedomaci.

“Ona isiruiticaí” llotimaci. “Ona sedadicaí” llotimaci.

Jamai ñaitimaci. Naimaci comeciái cue díbeimo raise iñede.

⁹ Cue uai itena, jamai comini llucacinona naimaci llofuecabilla jira, tainona cuena sedadimaci.

¹⁰ Fariseuai díga iese llua mei, naimie ecimo ailluena comini dane ofillanona, naimacimo llote:

—Iena raise omoí uiñollena, cue llua cacarei.

¹¹ Omoí einamací isoi omoí guiñenia, naimaci isoi omoí onollina omoí jocoñenia, omoí comeciaina jearetañedomaci. Omoí guigamona, omoí onollina jocuamona, Jusiñamuina nabaiñedomaci. Omoímo jeacino illa jira, Jusiñamuina nabaiñedomaci. Omoí comeciái jearena jira, jeacinona finocabidomoí.

¹² Ie llofueoicaigano naimiemo lluaibitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedí jai ieconi duite. Naimaci rafue cue Moomona oñenia, ja muidomo ieconi duite.

¹⁴ Naimacina faínonocai. Uanaicínona naimaci uiñoñena jira, uisínidino isoidimaci. Jiaimiena uisínidimie ifoia, dafomo uaidiaímaiaí. Ie isoide. Uanaicínona fariseuai

uiñoñaena jira, uanaicinona llofuenidimaci. Uanaicinado jaiñedimaci. Ja muidomo faifitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Ñiese cue llwana jiai nia cacaiñedomoi?

¹⁷ Nie isoide ra guitomoina, omoi jebemo jaide. Ie mei omoi abiaimona jino bite;

¹⁸ iadedi omoi comeciaino iticinomona jearedena ñaitomoi. Omoi comeciai jearena jira, jearede rafuena finocabidomoi.

¹⁹ Omoi comeciai jearena jira, jeare comeciaina facacabidomoi. Comena meinecabitomoi. Omoi aiñede riño diga icabitomoi. Omoi iniñede ima diga icabitomoi. Firicabitomoi. Tainona llogiricabitomoi. Jiaie comini joreña jeare ñaicabitomoi.

²⁰ Bie isoidicinuai omoi comeciaino illa jira, jearede rafuena finocabidomoi; iadedi omoi einamacii llua isoi, omoi onolli jocoñenamona jeacino comuiñede.

Jesúdi judío iñaiñoñediñaiñoña jillotaja rafue

(Mr 7.24-30)

²¹ Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide.

²² Ie facaiseconi naie eniruemona judíuñediñaiñoñodi billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiñoño eo duere sefuicabide.

²³ Jesús uai oñede. Ie jira ie llofueoicaigano naimie dine billanona, duere llote:

—Naiñaiñoña abido ie jofomo oreta. Caimo duere jicanuaibitesa.

²⁴ Jesús uai ote:

—Faificana jaillana naimaci jai jailla jira, dani cai judíuai cominimo cue Moo cuena oretate. Naimiedi judíuñediñaiñoño cuena oretañede.

²⁵ Ie facaise naimie dine naiñaiñoño billanona, naimiemo iobillacinona fecallena, caiñici ifodo ana rainada raite:

—Maestro, cuena cano.

²⁶ Judíuaiñedinona naimie canoñenana naiñaiñoño uiñollena, naiñaiñoño Jesús llote:

—Uruiai guillamona jiconiaina ecadicaidena, maraiñede.

²⁷ Naiñaiñoño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiaie rafuemo comecina facade. Uruiaina llote; iadedi judíuaiimo comecina facade. Jiconiaina llote; ia judíuaiñedinomo jiai comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁸ Jesús uai ote:

—Cue uaina o inua jira, o jitailla rafuena finoiticue. —Ieconai naiñaiñoño jisa jillode. Janaba naiñaiñoñomona oni jaide.

Jesús ailluena duidinona jillotaja rafue

²⁹ Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei,

³⁰ ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate.

³¹ Ailli uainidino jai ñaiana cacajamona, ailli onollina idisaruidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisnidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

*Jesúdi cuatro mil iñiaina eaja rafue**(Mr 8.1-10)*³² Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci bai raillanona. Naimacina cue duenaila jira, naimacina canoacaducue.

³³ Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

³⁴ Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriaí caimo jiaí ite.

³⁵ Comini ana raillena Jesús llote.

³⁶ Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena.

³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

³⁸ Nainomo cuatro mil iñiaí guitimaci. Naimaci ainiaí jiaí guitimaci. Naimaci uruiaí jiaí guitimaci.

³⁹ Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

16*Fariseuai comini Jesúmo siño rafuena finuana jicanuano billa rafue**(Mr 8.11-13; Lc 12.54-56)*

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Ico are maremonanite”.

³ Jiaí raitomoi: “Jitiramo mona jiairenia, ja noci deite”. Monamo omoi eruailamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi.

⁴ Jeacinona finocabidomoi. Jusiñamui dibeimo raise iacaiñedomoi. Siño rafuena finoñeitucue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiaí jilloitucue. —Ie llua mei, naimacimona Jesús ie llofueoicaigano diga oni jaide.

*Jesús siritate rana llofuia rafue**(Mr 8.14-21)*⁵ Ruica dine naimaci rillanona, ie llofueoicaigano llomeniconona feillana uibiñotimaci.⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

⁷ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconona cai atiñena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise iñoñedomoi. Omoína canoredicue. ¿Bue ñellena dani omoi llomenico iñenana siadotomoi?

⁹ ¿Niese ñnoñedomoi? ¿Niese cue navui siño fino ca rafuemo comeciaina facañedomoi? Navui cinco mil iññiai cinco diganicodemo guitimaci. Monillamona, guigamona fiebillamona, doce cirigaiamo iraidomoi.

¹⁰ Jiaicaiño cuatro mil iññiai siete diganicodemonona guitimaci. Monillamona guigamona fiebillamona, siete cirigaiamo iraidomoi.

¹¹ Omoina cue ecallena, ¿niese cuena birui ñnoñedomoi? Llomeniconona ailli ñaiñedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

¹² Ie facaise naimie llua jai cacadimaci. Llomenico siritate rana naimie ñaiñede; iadedi fariseui llofuicinomona naimaci abina rairuillena ñaite. Saduceuai llofuicinomona naimaci abina rairuillena ñaite.

Pedro Jesúsna llua rafue

(Mr 8.27-30; Lc 9.18-21)

¹³ Cesarea Filipino railla enruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraima micoridio”.

¹⁵ Jesús dane jicanote:

—¿Niese omoi cuena raitomoi?

¹⁶ Pedro uai ote:

—Odi cai Jilloitaraimadio. Cristodio. Jusiñamui facaina lloraini micoriai o billena jaiel lotimaci. Cai cajede Jusiñamui Jitodio.

¹⁷ Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade.

¹⁸ Pedro, o comecina uiñoticue. Cuena como o lloga uaina meidoñeitio. Bie rafuena jiaie cominimo o llua mona, jiai ñnoitimaci. Cuena ñnuamona, cue cominina jaitimaci. Cue ñibeimo ñnedino iena itatanidimaci.

¹⁹ Ailluena cominimo Jusiñamui ie cominina jailla rafuena nano lloraimana jaitio. O llucinodo jaitino cue cominina jaitimaci. O llucinodo jaiñeitino cue cominina jaiñeitimaci.

²⁰ Iena llua mei, ie llofueoicaiganona rairuide:

—Cue Cristonana bumo ña lloño.

Jesús ie fiodaillena llofuia rafue

(Mr 8.31-9.1; Lc 9.22-27)

²¹ Naie facaisemona ie llofueoicaiganomo Jerusalémo naimie jaillena marefodo llote:

—Nainomo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloiticue.

²² Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

²³ Jesús jinafo ñne naimiemo erodate. Raite:

—Cuemona oni jai. Iese ñaiño, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaile rafuedo jaiñena. Cue ñibeimo naimie jaillamona, duere sefuicana jaite. Nibaí ñaiemona fiodaite. Bu iese jaiacania, cue ñibeimo naimie iite.

²⁵ Duere sefuillana jaciruillamona cue cominina bu jaiacaiñena, ja muidomo faifite; iadedi duere sefuillana jaciruillamona cue cominina bu jaiacania, jaca faifñeite.

²⁶ Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite.

²⁷ Cue jaienisaí diga cue Moo dinena monamona ico biitícue. Cue Moo uai cuemo illanona, ebirena biitícue. Nagamie imaci finoca rafue diese cue iba ollena biitícue. Cue cominiñedinona duere finoitícue.

²⁸ Uanaicinona omoimo lloitícue. Omoimona dajerie nia fioidañeitomoimo, illaimana cue bairellena cioitomoí.

17

Jesús abi meidocaila rafue

(Mr 9.2-13; Lc 9.28-36)

¹ Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiaí uite. Jacobo ama, Juan, jiaí uite. Jiaie llofueoicaiganona uñede.

² Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie dacaiño eo userecaide.

³ Naie facaise naimacimo Moisés micorí joreño, Elías diga bairede. Elíadi Jusiñamui facaina jaie lloraíma. Jesús diga ñaitiaímaiaí.

⁴ Jesúsimo Pedro llote:

—Nama, bene cai illana mare. O jitaia, daje amani bisaini finoitícue. Daje oue; jiaie Moisés micorí ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidícue. Naimie lluomo cacareillanona, iena ñno —llote.

⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci.

⁷ Jesús naimaci dine billano, naimacina jetajanona, raite:

—Mai jaciruiñeno naidacai.

⁸ Naimaci erorillamona, dama Jesúsna cioidimaci.

⁹ Anedumona bitimacimo, naimacimo Jesús llote:

—Omoi aillí ciua rafuena bumo lloñeno, cue fioidaillamona cue jillua dinori.

¹⁰ Naimiemo llotimaci:

—Moisés micorí llogacinona llofueraini birui raicabitimaci: “Elías raillamie dane biite. Ie mei cai Jilloitaraíma biite” raitimaci. Jusiñamuimona o billana ñnoticaí. Odi cai Jilloitaraímana ñnoticaí. Odi cai Jilloitaraímadíomo, ¿bue ñelli iese raitimaci?

¹¹ Uai ote:

—Raise ñnotomoí. Elías isoidimie jai bite, nana Jusiñamui jitailla rafue raise lollena. Jusiñamui dibeimo naimaci illena, comini imaci comeciaí meiduana llote.

¹² Ero, naimie jai bite; iadedi bie comini naimiena raise uiñoñedinimaci. Naimaci jitailla jira, naimiena jai meinetimaci. Ie isoide. Naimacimona duere sefuitícue. Monamona bitícue, imana cue jaillena; iadedi duere sefuitícue.

¹³ Ie muidona Jesús llofueoicaigano naimiedi Juan Bautista micorína ñaiana jai uiñotimaci.

Jesúdi Janaba anamo itimiena jillotaja rafue

(Mr 9.14-29; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caiñici ifodo rainadacaida raite:

¹⁵ —Maestro, cue jítóna duenai. Janaba anamo naimie ite. Iemona naillicabide. Duere sefuide. Uai-uaicabide. Jiaicaiñodedi iraimo uailanona, uside. Jínuimo jiai uailanona, niadedi corobaite.

¹⁶ Naimiena jilloitallena o llofueoicaigano dine naimiena atidicue; iadedi naimiena jillotanidimaci.

¹⁷ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

¹⁸ Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemona Janaba oni jaide. Iecon naie urue jillode.

¹⁹ Ie mei ie llofueoicaigano Jesúsno anado jicanotimaci:

—¿Bue ñellena Janabana oni oretanidicai?

²⁰ Uai ote:

—Raise nia omoi ñnoñena jira, uanaicinona omoimo lloiticue. Janaba oni oretallena, cue uai navui omoimo iticue. Birui raise cuena omoi ñnoñenia, bie Janaba oni oretanidomoi. Jusiñamuina eo janore ñnotomoidena, diga rana finodomoi. “Oni bai jai” bie anedumo llotomoidena, omoina naimie canuamona, bie anedu oni lliai bai jaite. Jusiñamuina omoi ñnoia, naga rana finoredomoi.

²¹ Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

Jesús ie fiodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano diga danomo itemo, Jesús naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci.

²³ Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúsno Jusiñamui jofu facaina damie ibataja rafue

²⁴ Capernaumo naimaci rilla mei, Jusiñamui jofu ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúsno iena nia loñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniamona ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofu facaina naimie cuena ibatañede;

²⁷ iadedi Jusiñamui jofu ucube orainina coco iciñellesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

Jesús ie llofueoicaigano moto imiema ille rafue

(Mr 9.33-37; Lc 9.46-48)

¹ Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiēna ille?

² Iena cacajanona, Jesús daje urue uaiduanona, naimaci motomo jonete.

³ Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fañonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi.

⁴ Bie urue isoi abi iedoñedimiedi Jusiñamui ie cominina sedajanomo imie moto naimiēna ille.

⁵ Bie isoidimie cuemo duillamona, naimiēna feiñotimiedi cuena jai feiñote;

⁶ Iadedi cuena ñnotimiena jeacinona finotaiacadimie iena finoñellena, jeacinona finotaiacadimie cimaiomo aillue nofici maianona joraimo corobaillena, naimiēna dota-cadena, cuemona mare.

Jesúdi jeacinona finoñenana llofua rafue

(Mr 9.42-48; Lc 17.1-2)

⁷ Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite.

⁸⁻⁹ Biena ñaiticue. Nie isoide rafue omoina jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi naimiēna ñnotinomona damie faifillana jitaiñena rafue

(Lc 15.3-7)

¹⁰ Jesús llote:

—Urue isoi omoi illena como lloticue. Iena dane lloiticue. Cue Moo naimacina uñua jira, bie urue isoidinona jamaiñocaiñeno. Monamo cue Moo ecimo naimaci jaiēnisaí jaca ite, naimacina canollena.

¹¹ Jusiñamuimona cue billanona, naimiēna ñnoñedinona naimaci jeacinomona jilloital-lena biticue.

¹² Ero, omoimo iena jiaie rafuedo lloiticue. Damiemo cien diga toica llauda ite. Naiemona daje feiraite. Iena faifñellena, jiaie llaudaiaina fañonocaida, iena jenuaite.

¹³ Iena baillanona, ieri iobite. Baillari oni jaiñedinori baifemo iobite.

¹⁴ Ie isoide. Jusiñamui naimiēna ñnotinomona damie faifillana jitaiñede. Ie jira naimacina jeacinona finotañeno.

Jesús omoi ecimo itimie omoina jeare fñuana llofua rafue

(Lc 17.3)

¹⁵ Jesús nia llote:

—O ecimo itimie ona jeare finoia, naimie dine iena lluai. Daímaiaí iena omico llono. O uai naimie fairioia, naimie o dibeimo jai iite.

¹⁶ O uai naimie fairioñenia, jiaí menamiēna uñño, o lluomo iaímaiaí cacareillesa.

¹⁷ O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina ññoñedimiena omoi nabaiñena isoi, Moisés llogacinodo raise jaiñedino omoi nabaiñena isoi, naimiēna nabaiñeno. Omoi ofiracomo naimiēna feiñño.

¹⁸ Iese omoi finoia, omoi comeciái daje isoi lloillamona, Jusiñamuimona mare.

19' Omoimo nia lloiticue. Daje isoi comecina cue Moo Jusiñamuimo jicallena menamaiaia facajamona, cue Moomo iaiaiaia jianona, cue Moo iaiaiaia jitailla rafuena finoite.

20 Menamie cue dibeimo illamona, damie amani cue dibeimo illamona, naimaci motomo iticue.

21 Pedro naimiemo jicanuaibite:

—Nama, cue ecimo itimie cuena jeare finoia, ¿niga icaiño ibana cue oñeno iena feitaiticue? Nibai siete digacaiño.

22 Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uñollena, bie rafuena lloiticue.

23-24 Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Damie eo debede. Diez mil ucubena debede.

25 Naimie ucube iñena jira, naie illaimadi ie cuenta iballena, naimie ai, ie uruiaia diga, nana ie raruiaia diga, fecallena llote.

26 Iena cacajano, ie illaima uicomo caiñici ifodo raita duere jicade: “Nama, dama ite. Fecuisse omo ibaiticue”.

27 Naimie duenailamona, naie illaima llote: “fbatañeiticue. Cuemo jai debeñedio. Mai jai”.

28 Ie mei naimie jaide. Bai jaillanona, jiaie maijiraia diga dafaifide. Jai debeñedimieo janore debede. Cien ucubena debede. Jai debeñedimie dinena ie cimaina llinuana llote: “O debia cuemo mai iba”.

29 Ie jira debedimie caiñici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”.

30 Uai ote: “Ja raire jitaidicue”. Naimiena duenaiñena jira, cárcelmo naimiena jonetade, ie cuenta iballe dinori.

31 Naimie nabaiñiaia iena fidianona, sunaitimaci. Ie jira naimaci illaima dine nana naie rafuena lluidimaci.

32 Naie illaimadi nano debedimiena abido uaiduano, naimiemo llote: “Maraiñedio. Navui o cuentana ibatañedicue, cuemo o duere jicanua jira.

33 ¿Bue ñe o nabaina duenaiñedio, ona cue duenaila isoi?”

34 Icirillamona, naie illaima naimiena cárcelmo jonetade, nainomo duere sefuillena, nana ie cuenta iballe dinori.

35 Ie isoide. Cue Moo Jusiñamui omoina duere finoite, omoi comeciaia jitaillamona omoi ecimo itimie ie maraiñede finoca rafuena omoi feitañenia —llote.

19

Jesús iima ie aina dotaja rafuena llofua rafue

(Mr 10.1-12; Lc 16.18)

1 Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide.

2 Ailluena comini naimiena racadimaci Nainomo duidinona jillotate.

3 Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿iima ie aina dotajana rairuidio? ¿Ñie isoide rafue muidona damie ie aina dotarede?

4 Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaiaiaiaina finode. Imana finode. Riñona jiaia finode”.

5 Ie jira Jusiñamuidi jaie llote: “Ie ai diga illena, iima ie moona faionocaite. Ie eina jiaia faionocaite. Ie ai diga illamona, menade comedi daamiena jai jaide” llote.

6 Menade come jai damiena jai ite. Jusiñamui iese iaiaiaiaina itataja jira, iima ie aina dotañellesa. Riño ie inina dotañellesa.

⁷ Dane jıcanotımacı:

—¿Bue ñe Moisés mıcorı cuete: “İma ie aına dotaacania, dotalle rabena nano cueite. İe mei naiñaiñoa dotaite?”

⁸ Jesús uai ote:

—Jusiñamui uaina raise omoi ñnoñena jira, Moisés mıcorı İma ie aına dotajana rairuiñede; iadedı nano dofoconi iese iñede.

⁹ Jıaie riño diga naimie illena, ie aına bu dotaia, jıaie İma diga naiñaiño iñenia, naimiedi jeacinona jai finode. İe aına dotajana rairuidıcue.

¹⁰ Naimiemo ie llofueoicaigano dinena llotımacı:

—İese ia, caı jitaillamona aına jamai caı dotanina jira, damamei aınidıcaı.

¹¹ Naimacımo Jesús llote:

—Nana comını omoi como llucınodo jainidımacı. Dani Jusiñamuina jitaıdino iedo jairedımacı.

¹² Dajerie naimacı jeiciamona aireiacaiñedımacı. Dajerie naimacı abına diamona aireiacaiñedımacı. Dajerie Jusiñamuina eo sedaacanano aireiacaiñedımacı.

Jesúdı naimie dıne uruiaı billana jitailla rafue

(Mr 10.13-16; Lc 18.15-17)

¹³ Jesús dıne comını naimacı jesanidena atısıte. İe onolli naimacımo naimie joniamona, naimacı facaina naimie Moo diga naimie ñaillena atısıte. “Naimacına raise cano” ie Moomo lollena jitaıdımacı. İe llofueoicaigano iena rairuidımacı;

¹⁴ iadedı Jesús raite:

—Uruiaı cue dıne billesa. Naimacına rairuiñeno. Cuen a bie isoide ñnotınodı Jusiñamui ie comınına sedajanomo jainaiıdımacı.

¹⁵ İe jira ie onolli naimacımo jonete. Naimie facaina Jusiñamui diga ñaite, naimacı marena illena. İe mei ie llofueoicaigano diga naimie oni jaide.

Ucuberedımie Jesús diga ñaia rafue

(Mr 10.17-31; Lc 18.18-30)

¹⁶ Jesús oni jaillanona, conirue Jesús dıne bite. Jıcanote:

—Maestro, Jusiñamui diga cue jaca illena, ¿nie isoide mare rafuena finoitıcue?

¹⁷ Jesús dinena uai ote:

—¿Bue ñe cuemo mare rafuena finuana jıcanotıo? Dama damie maremie. Naimiedi Jusiñamui. Naimiemo jıcano; ia jaca o illena, Jusiñamui jai llogacınuaına ñnocana jai.

¹⁸ Uai ote:

—¿Nie llogacınuaına ñnoıtıcue?

Jesús dinena uai ote:

—Comena meineño. O aiñede riño diga iño. Fıiño. Jıaimiena o llogıdoia, tainona lloño.

¹⁹ O moo uaina ñno. O ei uaina ñno. O abına o isiruilla isoi, nana comınına isirui.

²⁰ Naie conirue uai ote:

—Nana iena jai ñnoıtıcue. ¿Nie isoide rafuena nia finoitıcue?

²¹ Jesús dinena uai ote:

—Jusiñamui jitaıllacınodo o jaiacania, o raise marebicaiacania, omo ite raruiaina feca. Naie ucubena dueredınomo feca. Cuen a o ñnuamona, monamo ıco jaca itıo. Cue llofuegamiena o illena, mai cue diga bi.

²² İena naimie cacajano, sunaite. Naimiemo eo ailluena ra illa jira, iena fecaacaiñede.

²³ Jesús ie llofueoicaiganomo llote:

—Uanaicınona omoi lloıtıcue. Ucuberedımiedi Jusiñamui comınına jaillena eo sefuiruite.

²⁴ İena nia lloıtıcue. İgıdo ifodo camello jaca jainide. İe isoide. İe ra isiruillamona, ucuberedımiedi Jusiñamui ie comınına jıaı raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana faimonocaida, o diga jaicabidicai. ¿Ñiese Jusiñamuimona ibana feiñoiticai?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai iite, nainomona omoi judíuai doce nairaiaina omoi sedallena.

²⁹ Cuená naimie isiruillamona, ie jofona bu faimonocaia, ie amatiaina bu faimonocaia, ie miriñuaina bu faimonocaia, ie mooná bu faimonocaia, ie eina bu faimonocaia, ie uruiaina bu faimonocaia, ie eniruena bu faimonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite.

³⁰ Jamai bue isoidomoi. Omoi mona jiaino jamai bue isoñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui díbeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide.

² Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo maijillena, naimacina orede.

³ Jitoma nia oni daidemo, mercadomo naimie jiaínona cide. Jamai itimaci.

⁴ Ie jira naimacimo llote: “Cue illimo maijiai. Raise ibaiticue” llote.

⁵ Ie mei jaidimaci. Jitoma naidai ia, jiaínona cianona, naimacimo maijillena llote. Jitoma oni caidemo, jiaínona cianona, naimacimo maijillena jiai llote.

⁶ Jitoma jasici muido itemo, jiaínona cianona, jicanote: “¿Bue ñellena namonana jamai itomoi?”

⁷ Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote.

⁸ Jitoma edacidemo, naie patrón ie mullaímamo llote: “Maijiraínina uaido. Jinafona maijiaidinona raire nano iba. Ie mei jitiramo maijiaidinona jinafo iba” llote.

⁹ Ie jira jinafona maijiaidinona nano ibade. Dabe ibade.

¹⁰ “Naimaci baifemo feiñoiticai” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñoitimaci.

¹¹ Ie jira naie patrón joreña jeare ñaitimaci:

¹² “Jinafona maijiaidino dallu maijidimaci. Ecasilla facaise maijiñedimaci; iadedi namonana maijidicai. Dani cai ibaja isoi ibadio” ñaitimaci.

¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio.

¹⁴ O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue.

15 Cue ucubena jira, cue jitaille isoi cue ibaia, ¿niese cuena jeare ñaitomoi? Jiaïnona cue duenaïllanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue.

16 Jamai bue isoidomoi. Omoïmona jiaïno jamai bue isoiñedimaci; ia naimie cominina naimaci jaïllamona, Jusiñamuïmona naimaci diga daje isoidomoi. Naimie diga jaca iitomoi.

Jesúdi ie fiodaïllena dane llua rafue

(Mr 10.32-34; Lc 18.31-34)

17 Jerusalémo ie llofueoicaigano diga Jesús jaidemo, dani naimaci diga ñaïllena, naimacina oni uite.

18 Raite:

—Ero, Jerusalémo jai jaidicai. Monamona billanona, imana jaidicue; iadedi omoi illaïcomini cuena gaitaitimaci. Gaitaja mei, cue meinellena lloïtimaci.

19 Judíuiaiñedino illaïcominimo cuena fecaitimaci. Cueri jifanoïtimaci. Cuena faitimaci. Ie mei cuena coraïtimaci; iadedi cue fiodaïlla mei, darui amani illanona, Jusiñamui cuena jillotaite.

Jesús ñine Jacobo Juan iaïmaiaï ei billa rafue

(Mr 10.35-45)

20 Naie facaise Jesús ñine Jacobo, Juan iaïmaiaï ei diga, bitiaïmaiaï. Iaïmaiaï moodi Zebedeo. Jesús ñine iaïmaiaï ei rillanona, naimiena raise uaidollena, caiñici ifodo ana rainadacaida llote:

—Omo daje rafue jïcanoiacadicue.

21 Naiñaiño mo Jesús ñinena jïcanote:

—¿Bue ñiaïbitio?

Naiñaiño uai ote:

—Illaïmana o jaïlla mei, cue jito iaïmaiaï o ecimo illana o llua jitaïdicue. Damie o nabeïmo. Jiaïmie o jarifebeïmo. —Jiaïno baïfemo iaïmaiaï illena, naiñaiño iese llote.

22 Naimacimo eruaïllanona, Jesús ñinena uai ote:

—O jitaïllacinona raise uiñoñedio. Cue duere sefuiticue.

Naiñaiño jito iaïmaiaïmo jïcanote:

—¿Ie isoi duere sefuiacadomico?

Uai otiaïmaiaï:

—Jii.

23 Jesús ñinena raite:

—Cue isoi duere sefuitomico; iadedi cue nabeïmo omico illena, cue jarifebeïmo omico illena itatanidicue. Naie illano jai cue Moo finoca, nainomo iitino iena.

24 Iena jiaïe llofueoicaigano cacajano, naie iaïamaiaïri iciritimaci.

25 Jesús nana naimacina uaiduanona, raite:

—Nana illaïcominidi naimaci anamo itinona ocuicabidimaci;

26 iadedi omoi ñine iese iñena. Omoïmona bu imïena iacania, omoi mullaïmana naimie jaisoïllasa.

27 Omoïmona bu imïena iacania, omoina naimie canocana jaisoïllasa.

28 Cuemona fueo. Biñedicue cominina cue ocuïllena; iadedi cominina canuaïbidicue. Cue jitaïlla jira, nana comini facaina fiodaïsaïbiticue. Naimaci jeacinomona naimaci jillobillena, fiodaïsaïbiticue. Aïlluena comini cuena inuamona jilloïtimaci. Coninina omoi canua —llote.

Jesús mena uisïnidiaïmaiaïna jillotaja rafue

(Mr 10.46-52; Lc 18.35-43)

29 Jericó raïlla naïraïmona jaidimacimo, aïlluena comini naimaci jinaïfona racadimaci.

³⁰ Ie facaiseconi mena uisindiaimaiaí naí fuemo raídiaimaiaí. Jesús naiedo jaillano cacajano, naimiena ado uaidotiaimaiaí:

—David micorí Jitona o illamona, Jusiñamumona o billa jira, cocona duenai. Cocona cano.

³¹ Iaímaiaí llícaillena, Jesús díga jaidino iaímaiaína lletade; iadedí eo cuirioidiaimaiaí:

—Maestro, David micorí Jitona o illamona, cocona duenai.

³² Iaímaiaína Jesús cacajano, ieconi naidadajanona, iaímaiaína uaidote. Jícanote:

—¿Ñiese omicono cue níbaiana jitaídomico?

³³ Uai otiaimaiaí:

—Maestro, coco uisina o cioitajana jitaídicoco.

³⁴ Iaímaiaína duenaillanona, iaímaiaí uisina jetade. Ieconi iaímaiaí uisidí ciode. Iaímaiaí jai cíanona, ie llofueganona iaímaiaí jaillena, Jesús díga jaidiaimaiaí.

21

Jesús illaíma isoi Jerusalémo jailla rafue

(Mr 11.1-11; Lc 19.28-40; Jn 12.12-19)

¹ Oni jaillanona, Jerusalémo iaíreicaídímácimo, Betfagé railla nairaímo Jesús ie llofueoicaigano díga ridímácí. Olivos railla anedumo ite. Ie llofueoicaiganomona Jesús menamiena orede.

² Raite:

—Bie nairaí illa uicomo mai omíco jai. Nainomo cuinaca burrana baitomico. Ie ecímo ie uruena baitomico. Naie iaímaiaína suiñuano bene atí.

³ Omícomo “¿Bue ñellena bie suiñodomíco?” bu jícanoia, llono: “Coco Nama naie iaímaiaína jitaide. Naillí naimíe iaímaiaína raíre abído oretaite” —raite.

⁴ Jusiñamuí facaina lloraíma micorí jaie llua isoi, bie rafue suide.

⁵ Naimíe micorí jaie cuete:

Jerusalén itínomo llono:

“Ero, omoi illaíma omoína sedallena bíite.

Abí iedoñeno bíite.

Burra urue emododo naimíe bíite”

cuete.

⁶ Iaímaiaí jaillanona, Jesús llua isoi finodiaímaiaí.

⁷ Burra ie urue díga atídiaímaiaí. Burra urue emodomo naimíe llofueoicaigano naimácí iníroina jobianona, ie emodomo Jesús raínadate.

⁸ Naimíena iobitallena, illaíma isoi naimíe jaillena, ailluena comíní imácí iníroi díga, naiso motomo jobedímácí. Jiaíno raforono uanona, naiso motomo jobedímácí.

⁹ Dajerie Jesús uicomo jaidímácí. Dajerie naimíe jínafona jaidímácí. Ado cuiríisíte:

—¡Cai Jilloítaraíma billa! ¡Naimíedí David micorí Jito! ¡Jusiñamuí mamecido bitímíe eo mare! ¡Jusiñamuí caína jilloítajasa!

¹⁰ Jerusalémo naimíe ridemo, nana nainomo itíno naie rafuena uíñoiacadímácí.

—¿Buta bite? —jícanotímácí.

¹¹ Jesús díga bitíno dínena uai otímácí:

—Jesús bite. Naimíedí Jusiñamuí facaina lloraíma. Galileamo ite Nazaret imíe.

Jesúdí Jusiñamuí jofomona damieriena dotaja rafue

(Mr 11.15-19; Lc 19.45-48; Jn 2.13-22)

¹² Jerusalémo Jesús rilla meí, Jusiñamuí jofomo naimíe jaide. Naie jofó eo aillue. Díga cuartos nainomo ite. Jusiñamuímo ofomaiaína fecallena, naimíemo toíca llaudaiaína fecallena, nainomo comíní jaisoidímácí. Naie comínína íbatajanona, ofomaiaína, toíca llaudaíai díga, damíerie fecauídímácí. Iena Jesús cíanona, naimácí mesaiaína oní caicode. Ucugína fecauídíno rairacuai jíai oní caicode.

¹³ Naimácímo llote:

—Ie facaina lloraima Jusiñamui llogacino jaie cuega: “Cue jofo ite, nainomo cuemo comini jüllena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁴ Ie facaise uisnidino Jusiñamui jofomo naimie dine bitimaci. Ñuja-ñujacaida macaritino jiai bitimaci. Naimaci billanona, Jesús naimacina jillotate.

¹⁵ Nainomo Jesúsdi diga mare rafuena finode. Diga cominina jillotate. Iena ciuanona, nainomo ite uruiái ado cuiriisite:

—David micori Jitori iobidicai. Jusiñamui lloraini micoriai jaie lua isoi, cai Jilloitaraíma jai ite.

Iena ciuanona, iena cacajanona, judíuai illaicomini iciritimaci.

¹⁶ Naimiemo jicanotimaci:

—¿Bie uruiái cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete: Naimiemo Jusiñamuidi uruiaina mare iobillacinona fecataite.

¹⁷ Naimacina fañonocaida, Betaniamo Jesús jaide, nainomo inillena.

Jesús higuera railla riarana faidua rafue

(Mr 11.12-14, 20-26)

¹⁸ Ie areruido Jerusalémo abido ie llofueoicaigano diga Jesús bia, aimetaite.

¹⁹ Nai fuemo higuera railla riarana ciuanona, iena jibuide. Naiemo naie llisilladi iñede. Dama ie ibena cide. Ie jira naie amenana llote:

—Biemona jaca llisiñeite. —Iese railla dacaiño naie riaradi duide.

²⁰ Ie llofueoicaigano iena ciuanona, rajicaillamona raitimaci:

—¿Niese naie riar raire duide?

²¹ Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoí. Raise omoi ñnoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite.

²² Naimie iena finuana omoi ñnuamona, nie isoide rafue cue Moomo omoi jicajia, iena naimie finoite.

Jesúdi ie siño uaina lua rafue

(Mr 11.27-33; Lc 20.1-8)

²³ Jerusalémo rillanona, Jusiñamui jofomo Jesús fo jailla mei, nainomo ite cominina llofueite. Judíuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

²⁵ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluaña ñnoñedomoi?”

²⁶ “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

²⁷ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi mena jito iaímaiaí illa lua rafue

²⁸ Judíuai illaicomínimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijiai”.

²⁹ Uai ote: “Jaiacaiñedicue” llote. Dallu illanona, ie comecina dane facajano, maijiaide.

³⁰ Jiaie jitomo daje isoi llote. Naimie uai ote: “Jii, maijiaiticue” llote. Iese llote; iadedi maijiaiñede.

³¹ ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoína ñaiticue. Omoimona maraiñedimaci; iadedi Jusiñamui comínina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiai iitimaci; iadedi nainomo jaca iñeitomoi.

³² Marena omoi comeciaina itatallena, Juan micori navui bite; iadedi naimie micorina ñinoñedomoi. Ucube oraini naimie micori rafuena ñnotimaci. Callirediñaiñuái naimie micori rafuena ñnotimaci. Iena uiñotomoi; iadedi omoi comeciái iuailaina mei-doñedomoi. ñinoñedomoi.

*Jesúdi maraiñede maijiraini rafuena llua rafue
(Mr 12.1-12; Lc 20.9-19)*

³³ Judíuai illaicomínimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaínomo fecade. Ie mei jiaie eniruemo jaide.

³⁴ Uvas jai einaila facaise riaraiaina sedaraini dine naie patrón janore mullaiaína orede, naimie facaise iedinona naimie feiñollena;

³⁵ iadedi naie sedarainidi ie mullaiaína duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci.

³⁶ Ie mei patrón jiaie mullaiaína orede. Naimacina jiai duere finodimaci.

³⁷ Ja muidomo ie jitona orede. “Cue jitona jaciruitimaci. Naimie uaina ñnoitimaci” comecina facade.

³⁸ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci.

³⁹ Naimiena jino dotajanona, naimiena meinetimaci.

⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

⁴¹ Judíuai illaicomíni uai otimaci:

—Naie maraiñedinona dueruiñeno meineite. Ie mei jiaie comínimo naie illi fecaite, iena sedallena, naiemona riarana feiñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraíma micori omoína jiaie cuete. Ie cuegafuena raise facañedomoi. Naimie micori cueda:

Jofo finoraini jitaíñena noficidi nana naie jofomo ite nofici baífemo jai uaide.

Jusiñamui iena finotate.

Iena cai uiñuamona, “Eo mare” raiticai

cueda. Jusiñamui comínina damierie jaillana naimie micori cuete. Jusiñamui ore-tagamiena damierie jitaíñenamona, naimie comínina jaiñeitimaci; iadedi Jusiñamui ore-tagamiena ailluena ñnuamona, naimie comínina jaitimaci. Ero, naimie micori caína cuete. Naie jofona finoraini isoidomoi. Naie nofici isoidicue. Cue rafuena omoi jitaíñena jira, naimie comínina jaiñeitomoi.

⁴³ Jusiñamuidi ie cominina sedajanomo omoina itatañeite; iadedi jiaie cominina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu eicaiaia, bofedaite; ia naie nofici bumo ana uaia, naimiena saitaite. Ie isoide. Cue llua omoi jamaia, duere sefuitomoi. Iena omoi iinoñenia, ja muidomo faifitomoi.

⁴⁵ Jesús llua naie judíuai illaicomini cacajanona, naimiedi naimacina ñaiana jai uiñotimaci.

⁴⁶ Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

22

Jesúdi illaíma ie jito aína ua llua rafue

¹ Jusiñamui jofomo Jesús nia illanona, nainomo itinona llofue:

² —Jusiñamui dibeimo comini jailla rafuena omoimo lloiticue. Iena omoi uiñollena, bie rafuedo iena lloiticue. Illaimadi ie jito ai ua rafue finode.

³ Naimie ie mullaini orede, rafuemo llogano uaidollena; iadedi nai llogano biacaiñedimaci.

⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaiai, farediretaiai diga, jai faga. Jai nana fuite. Rafuemo mai bi’ ”.

⁵ Naimaci cacarefiacaiñede. Damie ie illimo jaide. Jiaimie ie chinganamo jaide.

⁶ Jiaíno mullainina gaitadimaci. Gaitajanona naimaciri jifanotimaci. Ja muidomo naimacina meinetimaci.

⁷ Ie jira naie illaíma eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate.

⁸ Ie meinoconi ie fiebide mullainimo llote: “Rafue guille jai nana finoca; ia llogano maraiñedimaci.

⁹ Naiso bojicaillanomo jai. Nana o ciolle diese llono: ‘Rafuemo bi’ llono”.

¹⁰ Ie jira ie mullaini jai naisona jaide. Maraiñedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaíma nainomo fecaca iniroina jítadimaci.

¹¹ Illaíma fo bia, mesamo itino jibuillena, dinomo daje ima rafue ie mare iniroina jitañenana cide.

¹² Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide.

¹³ Ie jira naie illaíma ie mullaíaimo llote: “Naimie cuena iinoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote.

¹⁴ Ero, naie rafuemono omoi fueo. Illaíma ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

Jesúmo gobiernomo ucubena fecajana jicanua rafue

(Mr 12.13-17; Lc 20.20-26)

¹⁵ Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci.

¹⁶ Ie jira naimie dine naimaci cominimona dajerie oredimaci. Herodianuai railla cominina jiai jaidimaci. Jesús dine rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio.

17 Omo rafuena jicanoiacadicaí. Dani Jusiñamuina sedadicaí; iadedi romanos railla nairai anamo biruí cai illa jira, ¿naimaci illaíma Césarmo ucubena cai fecajana rairuidio? Caimo llono –llotimaci.

18 Naimaci comeciaina marañedicinona facajana Jesús uíñuamona, uai ote:

–¿Bue ñellena cuena facacitomoí? Maredinona abi caitadomoí.

19 Ucube cuemo acata –llote. Ie jira acatatimaci.

20 Jesús dinena jicanote:

–¿Bu ie joreño nainomo ite? ¿Bumo jainaiaide bie cuega radi?

21 Uai otimaci:

–César.

Jesús dinena raite:

–César iena itedi Césarmo ille. Jusiñamui iena itedi Jusiñamuimo ille –raite.

22 Naimie llwana cacajano, rajicaidimaci. Naimie jeare uai oñena jira, naimie dinomona oni jaidimaci.

Jesús dine saduceuai railla comini billa rafue

(Mr 12.18-27; Lc 20.27-40)

23 Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

24 –Maestro, Moisés micori jaie cuega: “fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

25 Ero, cai motomo siete amatiaí ite. Nano doforamie ie aina ote. Naimie nia uruiaínide fiodailla. Ie emodo imie ie ama feciñona ote. Uruiaínide jiaí fiodailla.

26 Naie siete digamiedemona iese sefuide.

27 Ja muidomo naie riño jiaí fiodaite.

28 Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede –llotimaci.

29 Jesús uai ote:

–Moisés micori ciegafuiaina raise omoí uíñoñena jira, Jusiñamui uaina raise omoí uíñoñena jira, bie isoide rafuena raise uíñoñedomoí.

30 Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi iitimaci.

31 Fiodaitino jillwana omoímo lloiticue. Jusiñamui omoí jaiagaimo jaie llogacinona inoñedomoí. Naimie llote:

32 “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiaí jillotaite –llote.

33 Nainomo ite comini iena cacajano, naimie llofuari rajicaidimaci; ia saduceuai dinena uainicaidimaci.

Jesús nanoca llogacinona llofuia rafue

(Mr 12.28-34)

34 Saduceuai comini uainicaillana fariseuaidi jai fidiano, Jesús dine ofidimaci.

35 Naimacimona damiedi Moisés micori jaie llogacinona eo uíñote. Jesúsna facacillena, naimiemo jicanote:

36 –Maestro, Moisés micori jaie llogacinuaimona, ¿nie llogacino ua nanoca llogacinona?

37 Jesús dinena uai ote:

–Moisés micori jaie cuega: “Omoí jitailla jira, nana omoí comecimona cai Nama Jusiñamuina isiruí. Naimiemo omoí comeciina eo faca”.

38 Bie ua nanoca llogacino.

³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”.

⁴⁰ Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide —llote.

Jesús dinena fariseuai cominimo jicenua rafue

(Mr 12.35-37; Lc 20.41-44)

⁴¹ Naimie dine nia fariseuai comini ia, Jesús naimacimo llote:

⁴² —Jusiñamui lloraini micoriai jaie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³ Jesús dinena jicante:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona ñnoñedino o anamo itataitue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

Jesúdi judíuai illaicominina ñaia rafue

(Mr 12.38-40; Lc 11.37-54; 20.45-47)

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

² —Moisés micori llogacinuaina llofuerainidi naie rafuedo jai jaicabidimaci. Fariseuai comini iedo jiai jaicabidimaci.

³ Naimaci llofuiacinodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuiacinodo naimaci jaiñena jira.

⁴ Omoi einamaci llogacinuaido raise omoi jaillena, diga rafuena omoi finuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona,

⁵ iena omoi cioillena, nana naimaci finua rafuena marefodo finodimaci. Jiaie cominimo ite Jusiñamuimo jirabe baífemo faitibena uiacacabidimaci. Iniroi fuedadi aillofena jonegana gaidimaci.

⁶ Rafue ia, naimaci jamai bue isoñedonomo comecina facajanona, rafue nama ecimo raíacadimaci. Ofiracomo uicomo raíacadimaci, comini naimaciri acarillena.

⁷ Níne naimaci jaia, nana comini naimacina uaiduana gaidimaci. Maestrodicinona uaiduana jiai gaidimaci.

⁸ Jusiñamuina eo raise naimaci sedajana omoi uiñuana jitaídímaci. Naimaci isoi iñeno. Omoi damacina jira, omoimona damie omoi baífemo faíamo comecina facañeno. Naimiena maestrona raíñeno. Omoi baífemo cue illanona, omoi maestrodicue.

⁹ Omoi Moo Jusiñamui monamo illanona, dama naimiena seda. Jiaimiena sedaño. Jusiñamui isoi jiaimiena “Moo” raíñeno.

¹⁰ Omoi damacina jira, omoimona damiena “Cai illaíma” raíñeno. Omoi illaimana jai iticue.

¹¹ Omoimona bu imiena jaiacania, omoi mullaimana naimie nano jaillamona, omoína naimie canua.

12 Jusiñamuidi “Jiaino afemo iticue” raillano comecina facadimiena jamai bue isoidimiena itataite; ia Jusiñamuidi “Jiaino afemo iñeducue” raillano comecina facadimiena jamai bue isoiñedimiena itataite.

13 Naie facaise Moisés micori llogacinona llofuerañidi fariseuai comini diga illanona, Jesús naimacimo llote:

—Jusiñamui omoina duere finoite. Mareuidinona abi caitadinodomoí. Jusiñamui dibeimo comini illana jitaiñedomoí. Naimie dibeimo omoí illana jiai jitaiñedomoí. Ie muidona Jusiñamuimona duere sefuitomoí.

14 “Jusiñamuina eo sedadimaci” omoimo comini comeciaina facajana jitaídomoí. Ie jira are jiidomoí; iadedi iese iñedomoí. Maraiñede rafuena finocabidomoí. Jifuianona feciñuai rana bairocabidomoí. Ie jira Jusiñamui omoina eo duere finoite.

15 Damiena omoí dibeimo itatallena, omoí isoi Jusiñamui rafuedo naimie jaillena, diga rafuena finodomoí. Omoí dibeimo illa mei, omoí baifemo omoí einamací llogacinodo naimie jaillana jitaídomoí. Omoí diga ico naimie ua faifite. Cominina uanaiñedincinodo jaitatomoí. Iese omoí illa jira, duere sefuitomoí.

16 ‘Omoí llofuiacino diga cominina canoñedomoí. Mareuidinona abi caitadinodomoí. Raicabitomoí: “Cai lloga uai cai finollena jiai comini uiñollena, Jusiñamui jofomo ite oro mamecina llinoticaí; iadedi Jusiñamui jofo mamecina cai llinoia, cai lloga uaina cai finoñenia, caimona mare. Jusiñamuimona duere sefuiñeiticaí” raicabitomoí.

17 Abi uiñoñedomoí. Omoí llofuiacino diga cominina canoñedomoí. Jusiñamui jofomo naie oro jainaiaila jira, naie orodi mare; iadedi naie oro naie jofo baifemo uaiñede. Abina omoí uiñoñena jira, Jusiñamui omoina duere finoite.

18 Jiai raitomoí: “Jusiñamuimo faga toica ocaina jobaisoillano mamecina cai llinoia, cai lloga uaina cai finoñenia, caimona mare; iadedi Jusiñamuimo fecaca toica ocaina mamecina cai llinoia, cai lloga uaina jaca finoiticaí”.

19 Abi uiñoñedomoí. Omoí llofuiacino diga cominina canoñedomoí. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede.

20 Ero, Jusiñamuimo ocaina jobaisoillano mamecina omoí llinoia, nainomo ite ocaina mamecina jiai llinotomoí.

21 Jusiñamui jofo mamecina omoí llinoia, Jusiñamui nainomo illa jira, naimie mamecina jiai llinotomoí.

22 Monamo ite ra mamecina omoí llinoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoí. Omoí llua rafuena omoí finoñenia, Jusiñamui omoina duere finoite.

23 ‘Mareuidinona abi caitadinona omoí illamona, omoimo nia lloiticue. Nana omoí illimo ite ramona, nana omoimo ite ucubemona Jusiñamuimo janore jisa fecacabidomoí. Nana comini omoí isoi illena jitaídomoí. Mare; iadedi nanoca rafuena jaca finoñedomoí. Jiaie cominimo omoí comecina facañedomoí. Jiaie cominina duenaiñedomoí. Omoí lloga uaina finoñedomoí. Nana naie isoide rafuena omoí jiai finua. Iena omoí finoñenia, Jusiñamui omoina duere finoite.

24 Abina uiñoñedomoí. Jallecima jiroracomo ia, iena oni faiga; ia aillue ra nainomo ia, iena cioiñeno namo gutadomoí. Ie isoide. Omoí llofuiacino diga cominina canoñedomoí. Jusiñamui ie eo jitailla rafuedo comini jaillana llofueñedomoí. Nanocafueñededo comini jailla rafuena llofuetomoí. Nanoca rafuedo comini jaillana llofueñedomoí.

25 ‘Omoimo nia lloiticue. Omoí einamací llogacinodo eo jaidomoí; iadedi omoí comeciaina raise finoñedomoí. Eo fiidomoí. Jifuianona comini rana bairodomoí. Jeacinona finocana jaidomoí.

26 Abina uiñoñedomoí. Da pocillos jinafo, da platos jinafo jocodino isoidomoí. Pocillos jerai, platos jerai jocoñedino isoidomoí. Omoí abina finodomoí; iadedi omoí comeciaina

raise finoñedomoi. Nano omoi comecina raise fino. Mare rafue finocana jai. Omoi einamací rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoína duere finoite.

²⁷ 'Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai maraiñede.

²⁸ Ie isoidomoi. Marena eruaidomoi; iadedi maredinona abi eo caitadomoi. Omoi comeciái eo maraisiñede. Omoi comecina raise omoi finoñenia, Jusiñamui omoína duere finoite.

²⁹ 'Omoimo nia lloiticue. Naimacimo birui omoi comeciáina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi,

³⁰ raillano: “Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedicaí. Cai jaiagai isoi birui iñedicaí” raitomoi;

³¹ iadedi omoi llumona Jusiñamui facaina lloraini micoriai meinetino uruaí omoína uiñoticaí.

³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai.

³³ Omoi maraiñena jira, jaio nairaí isoidomoi. Ja muidomo iraimona jillobiñeitomoi. Nainomo duere sefuitomoi.

³⁴ Cue rafuena lollena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraíni omoi dine jiaí oretaiticue. Dajeriena meineitomoi. Naimacina coraitomoi. Omoi ofiracomo dajeriena faitomoi. Diga nairaímo naimacina duere finoitomoi.

³⁵ Abel micori jaie ite. Naimie maremie. Ie ama naimiena meinete. Naimie facaisemona omoi jaiagai ailluena mare cominina meinetimaci. Ie mei omoi jaiagai Zacaríana meinetimaci. Naimiedi Berequíás jito. Jusiñamui jofomo Jusiñamuimo toica ocaina jobaisoillano ecimo naimiena meinetimaci.

³⁶ Uanaicino omoimo lloiticue. Naimacina omoi jaiagai meinia muidona, omoímona Jusiñamui birui ibana oite. Naimaci isoi maraiñede rafuena finocana jaidomoi. Jusiñamui omoína duere finoite.

Jesús Jerusalémo itinomo llua rafue

(Lc 13.34-35)

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruaí sedaja isoi, diga icaiño cue anamo omoína uaidoiacadicue; iadedi omoi dinena cuena jitañedomoi.

³⁸ Iemona Jusiñamuidi omoi illanona jai faionocaide.

³⁹ Cue Moo dine jaiticue. Cue jailla mei, cuena cioñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofu judaiana llua rafue

(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúsna nai jofona eruaítatimaci.

² Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaísite —llote.

³ Ie mei Olivos railla anedu dine rillanona, Jesús naie muidomo raídemo, ie llofueoicaigano naimiemo iena anado llotimaci:

—Jusiñamui jofu judaiana omo jicanoiacadicaí. ¿Niruido iena suite? Caimo llono. O abido billirui iaírei ia, ¿nie isoide rafue suite, o abido billiruina caí uñollena?

⁴Uai ote:

—Omoína bie rafuena bu jifueñellena, omoí abina rairui.

⁵Ailluena comini cue mamecido billanona: “Cristodicue” raitimaci. Diga cominina jifueitimaci. Iemona omoí abina rairui.

⁶Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue.

⁷Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuai suite.

⁸Iese suia, omoí duere sefuillifue omoímo suite.

⁹Cuena ñinoñedino omoína gaitatajanona, omoína meineitimaci. Cue cominina omoí illamona, nana nairaiái omoína enoitimaci.

¹⁰Naie facaise cue dibeimo itinomona ailluena abido danomo jaitimaci. Iemona duere omoí sefuillena, omoína janoñeitimaci; iadedi omoína enoillamona, omoína llogidoitimaci.

¹¹Naie facaise diga comini raitimaci: “Jusiñamui facaina llorainidicaí”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci dibeimo itataitimaci.

¹²Jeacino eo comuicana jailla jira, ailluena comini conini isiruiñeitimaci;

¹³iadedi cuena fainonocaiñedimie ja muidomo monamo jaca iite. Naimiena jil-lotaiticue.

¹⁴Diga cominidi Jusiñamui dibeimo comini ille rafuena nana nairaimo lloitimaci, nana nairaiái iena cacaillena. Ie mei abido biiticue.

¹⁵Cue llamo cacarei. Daniel micori Jusiñamui facaina lloraima. Naimie micoridi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoí ciuanona,

¹⁶naiemona omoí jillobillena, duere omoí sefuiñellena, Judeamo omoí illamona, aneduai dine omoí aisi.

¹⁷Jofu emodomo omoí ia, ana billanona, aneduai dine raire rillena, jofomo jaiñeno. Nainomo ite rana omoí diga uñeno.

¹⁸Aneduai dine raire rillena, illimo omoí ia, abido jofomo biñeno, omoí iniroi omoí diga uillena.

¹⁹Naie rafuemona jillobillena, naie facaise urueside riño duere sefuite. Uruena nia jirode riñodi jiaí duere sefuite.

²⁰Eo duere sefuiñellena, Jusiñamuimo omoí jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano.

²¹Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci.

²²Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²³Te facaise omoímo bu raia: “Jadí, Jusiñamui facaina lloraima benomo birui bairede. Naimiedi Cristo”, iena ñinoñeno. Jiaimie raia: “Oni batine Cristo birui bairede”, iena ñinoñeno.

²⁴Cristona abi caitadino biitimaci. Jusiñamui facaina llorainina abi caitadino jiaí biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

²⁵Ero, bie rafue nia suiñenia, iena omoímo jai lloticue.

²⁶Omoímo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ñinoñeno.

²⁷Mona borillamona mona jillacidi usere ciode. Nana cominimo bairede. Ie isoide. Cue abido bia, nana comini iena uñoitimaci.

28 Urujaisai rifaide ramo ofillana uñua isoi, nana cuena ñnotino cue billena uñnotimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

29 Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuaí llujite. Nana naie radi jaidisite.

30 Ie mei monamo baireiticue. Ieconi nana nairaiaí jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue.

31 Cue jaienisaína cue ecimona oretaiticue. Ado trompeta ficiretajano, cue fetocano diese naganomona ofitaitimaci.

32 'Higuera railla riaramona omoi fueo. Bie enruemo naie riara firuillamona, fiemona raire illana uñnotomoi.

33 Ie isoide. Bie rafue ico suia, cue billirui iaírei illena uñnotomoi.

34 Uanaicinona omoimo lloiticue. Nana bie rafue sulle facaiseconi bie nairaí nia iite.

35 Mona enruue diga fuite; iadedi cue lloga uai jaca suite.

36 Cue abido billirui jaca bu uññoñede. Jusiñamui jaienisaí iena uññoñedimaci. Jusiñamui Jitodicue; iadedi cue abido billiruina jiai uññoñedicue. Dama cue Moo iena uñnote.

37 Abido cue billirui iaírei ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci.

38 Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamaí guicana jaidimaci. Aina ua mei, inina ua mei, jebucana jaca jamaí jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori.

39 Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

40 Naie facaiseconi menamie illimo danomo iitiaímaiaí. Damie Jusiñamui dine jaite. Jiaimie fiebillanona, Jusiñamuimona duere sefuite.

41 Mena riño danomo doberitiaíñuai. Dañaiño Jusiñamui dine jaite. Jiaíñaiño fiebillanona, Jusiñamuimona duere sefuite.

42 Cue billirui omoi uññoñena jira, iemo ocuiri.

43 Bie rafuemo omoi comeciaina omoi faca. Jofo namadi firiraima nie naiona billena uñnotena, ie rana faifñellena, ie jofona raise sedade.

44 Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

Jesúdi patrón ie mullaimana ie jofona sedataja llua rafue

(Lc 12.41-48)

45 Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaíma ñnogamie. Abina uñnotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide.

46 Patrón ico abido bia, ie jofona ie mullaíma raise sedaia, mullaímari naimie iobillamona, ie mullaíma marena iite.

47 Iobillamona, patrón ie mullaimana nana ie raruaína sedatataite;

48 iadedi ie mullaíma marañenia, ie comecina facaite: “Cue patrón are biñeite. Naimie lloga uaina finoñeiticue”.

49 Ie comecina iese facaja jira, naimie anamo ite mullaíaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite.

50 Ie ocuiriñena facaise ie patrón abido billanona, naimiena duere finoite.

⁵¹ Ie isoide. Cue abido bia, cuena inotinori iobiticue; ia cuena inotinona abi caitadino dine cuena inoñedinona dotaiticue. Nainomo duere sefuillano eetitmaci.

25

Jesúdi diez jitañuaína llua rafue

¹ Jesús llote:

—Abido cue bia, Jusiñamui ie cominina sedaite. Cue billemo ocuritinona sedaite. Naie facaise ite cominidi diez jitañuaimo ite rafue isoidimaci. Naiñaiñuai lamparíniai llinuanona, ima ie aina ua meinomo finoca rafuemo jaiacadimaci.

²⁻⁴ Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci.

⁵ Ima diga ie rafue dine jaillemo ocuridimaci. Ima are biñena jira, inidimaci.

⁶ Daje diberuise damie ado lluaana cacadimaci. Llote: “Jadi, naie imadi jai bite. Mai bi, naimie uicomo naimiemo cai dafaillesa”.

⁷ Casillanona, naie jitañuai lamparíniai unedimaci.

⁸ Abi uiñoñediñaiñuai dinena abi uiñotiñaiñuaimo jicadimaci: “Farena caimo feca. Cai lamparíniai boacaiñedesá”.

⁹ Uai otimaci: “Fecaacaiñedicaí. Omoimo cai fecaiadedi, caimo baiñeite. Omoí jitaia, chinganomo ibajai”.

¹⁰ Naiñaiñuai ibajaila mei, naie ima ride. Naimiemo ocuridiñaiñuai diese naimie diga nainomo guillena, rafuemo jaidimaci. Naimaci fo jaiilla mei, nase naie ima ibaide.

¹¹ Ie mei naie farena ibajaidiñaiñuai abido billano, raitimaci: “Nase econo”.

¹² Naie ima uai ote: “Uanaicinona omoimo lloiticue. Omoína uiñoñedicue. Econoñeiticue”.

¹³ Ie isoide. Cue billiruina omoí uiñoñena jira, nagarui cuemo omoí ocuri.

Jesúdi patrón ie mullaiaimo ucubena fecaja llua rafue

¹⁴ Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaína ie ucubena eenotade.

¹⁵ Damieimo cinco diga ucubena fecade. Jiaimieimo menacubena fecade. Jiaimieimo dacubena fecade. Nagamie ie maijille dinori fecade. Ie mei oni jaide.

¹⁶ Cinco diga ucubena feiñotimie jaillanona, iena fecallena, rana ibade. Iemona jiaie cinco diga ucubena ote.

¹⁷ Menacubena feiñotimie iena fecallena, rana ibade. Iemona jiaie menacubena ote.

¹⁸ Daucubena feiñotimie eniruemo naie ucube eenote. Iena fecallena, rana ibañede. Iemona buena oñede.

¹⁹ Digarui illanona, naie patrón abido bite. Naimaci cuentas siadollena, ie mullaiaína uaidote.

²⁰ Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”.

²¹ Patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

²² Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”.

²³ Naimie patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

²⁴ Daucubena feiñotimie bite. Raite: “Patrón, o riirenana uiñotitue. O mullaiaí maijiamona ganacabidio.

²⁵ Ucubena cue faifiñellena ona jaciruiticue. Ie jira eniruemo o cuemo iga ucubena eenotitue. Jadi, iena jai abido atidicue”.

²⁶ Patrón uai ote: “Maraiñedio. Rairaiedio. Cue mullaiaia maijiamona cue ucube uana uiñotio.

²⁷ Bancomo naie ucubena jonetiodena, naie ucubemona jiaie ucube janore uamona, abido cue bia, iena feiñoticue”.

²⁸⁻³⁰ Ie mullaiaimo llote: “Naimiemona ie ucubena bairo. Diez ucube illamiemo iena fecu. Bie maraiñede mullaiaima jitioredinomo cuemona oni dota. Nainomo comini duere sefuillanona eetimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoina duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

Jesúdi cominina duere finolle llua rafue

³¹ Jesús llote:

—Omoina nia llofueiticue. Abido cue bia, nana cue jaienisaí diga biiticue. Illaimana ico cue bia, illaia illa ifomo iiticue. Eo siño uaido biiticue.

³² Cue uicomo nana nairaiái ofitimaci. Toica llauaiaí sedaraiaie ie chivos motomona ie llauaiaí oni fetua isoi, naimacina fetoiticue.

³³ Cue jitaillacinona finodino diese cue fetuanona, cue nabeimo itataiticue. Cue jitaillacinona finoñedino diese cue fetuanona, cue jarifebeimo itataiticue.

³⁴ Cue illaimana jira, cue nabeimo itinomo lloiticue: “Cue Moo omoiri iobillanona, omoina jai caimare itatate. Cue Moo cominina omoi illa jira, cue sedajanomo mai bi. Nainomo duidomoi.

³⁵ Cue jitaillacinona omoi finuamona navui aimetaiticue, cuena ecadomoi. Jiroacadicue, jinui cuemo fecadomoi. Omoi nairai díne cue macaria, cuena omoi uiñoñoeno omoi jofomo cuena feiñotomoi.

³⁶ Iniroinidicue, iniroi cuemo fecadomoi. Duidicue, cuena canollena, cuena jibuisaibidomoi. Cárcelmo iticue, cuena canollena, cuena jibuisaibidomoi”.

³⁷ Cue jitaillacinona finodino dinena cuemo jicanoitimaci: “Nama, ¿niruido aimetaitiomo, ona ecadicaí? ¿Niruido jiroacadiomo, jinui omo fecadicaí?”

³⁸ ¿Niruido ona ciodicaí, caí jofomo ona feiñollena? ¿Niruido iniroina omo fecadicaí?

³⁹ ¿Niruido duidiomo, ona jibuisaidicaí? ¿Niruido cárcelmo itiomo, ona jibuisaidicaí?”

⁴⁰ Uai oiticue: “Uanaicinona omoimo lloiticue. Cuena inotinomona jamai bue isoidimiena canodomoi, cuena jiaí canodomoi” lloiticue.

⁴¹ Temei cue jarifebeimo itinomo lloiticue: “Cuemona oni mai jai. Cue cominiñedomoi. Jai faifidomoi. Duere omoi sefuillena, iraimo mai jai. Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiaí jai finode.

⁴² Cue jitaillacinona omoi finoñenamona, navui aimetaiticue, cuena ecañedomoi. Jiroacadicue, jinui cuemo fecañedomoi.

⁴³ Omoi nairai díne cue macaria, omoi jofomo cuena feiñoñedomoi. Iniroinidicue, iniroi cuemo fecañedomoi. Duidicue, cuena canollena, cuena jibuisaibiñedomoi. Cárcelmo iticue, cue canollena, cuena jibuisaibiñedomoi”.

⁴⁴ Cuemo jicanoitimaci: “¿Niruido aimetaitiomo, ona ecañedicaí? ¿Niruido jiroacadiomo, jinui omo fecañedicaí? ¿Niruido ona ciodicaí, caí jofomo ona feiñollena? ¿Niruido iniroinidomoi, omo fecañedicaí? ¿Niruido duidiomo, ona jibuisaiñedicaí? ¿Niruido cárcelmo itiomo, ona jibuisaiñedicaí?”

⁴⁵ Uai oiticue: “Uanaicinona omoimo lloiticue. Diga comini cuena inotimaci. Naimacimona jamai bue isoidimiena omoi canoñena jira, cuena canoñedomoi” lloiticue.

⁴⁶ Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

26

Judíuái illaicomini Jesúna gaitallena siadua rafue
(Mr 14.1-2; Lc 22.1-2; Jn 11.45-53)

¹ Ie llofueoicaiganona llofuia mei, naimacimo Jesús llote:

² —Pascua railla rafue illena, menarui fiebide. Iena uiñotomoi. Monamona jaie cue billamona, iimana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote.

³ Naie facaiseconi Jusiñamui diga nanoca ñairainidi, jaie illaicomini diga, nanoca ñairaima jofomo ofidimaci Nanoca ñairaimadi Caifás.

⁴ Jesúna jifuiano gaitallena coniniri siadotimaci. Naimiena meinellena jiai siadotimaci.

⁵ Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuititimaci. Nia sedaiticai.

Jesúmo riño caimare soride ra totaja rafue
(Mr 14.3-9; Jn 12.1-8)

⁶ Betania railla nairaimo Jesús jaillanona, Simón jofomo jaide. Simódi jaie efonaitimie.

⁷ Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide.

⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñaiana Jesús uiñua jira, naimacimo llote:

—¿Bue ñellena naiñaiñoña jeare ñaitomoi? Mare rafuena cuemo finode.

¹¹ Omoi diga dueredino jaca itimaci; iadedi omoi diga jaca iñeiticue.

¹² Cue abimo bie caimare soride ra naiñaiño totajamona, cue fiodaillirui facaina naiñaiño iese finode.

¹³ Omoimo uanaicinona lloiticue. Ninomo cue mare finoca rafuena bu lloia, naiñaiñoña ubiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue
(Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide.

¹⁵ Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci.

¹⁶ Naie facaiseconimona Jesúna gaitatalliruimo naimie ocuride.

Jesúdi ie fiodaille rafuena llua rafue
(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua railla rafue ia, siritaga rana guiñedimaci. Dani llomeniconona guitimaci. Egiptomona cai jaiagai jillobillana comebillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

¹⁸ Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaille facaise iaiei ite. O jofomo ie llofueoicaigano diga pascua rafuena finoacade” llono.

¹⁹ Ie muidona ie llofueoicaiganodi ie lluaana finodimaci. Pascua railla rafue guille finodimaci.

²⁰ Nairui jítoma ana ítemo, Jesús íe doce llofueoicaigano díga nainomo guisaide.

²¹ Naimaci mesamo guitimacimo, Jesús llote:

—Omoimona damíe cuena gaitataite —llote.

²² Iena cacajanona, eo sunaitimaci. Damíerie naimíemo jicanoside:

—¿Cuena ñaitío?

²³ Uai ote:

—Omoimona damíe bie platomo cue díga llomenico díga mutade.

²⁴ Jusiñamui facaina lloraíma cuega isoi, monamona jai billamona fiódaitícue; íadedí cuena gaitataítimíe eo duere sefuite. Naimíe jeicíñegadena, cuemona mare.

²⁵ Jesúsna gaitataítimíedi Judas micorí. Naimíe jicanote:

—Maestro, ¿ona íese finotaitícue?

Uai ote:

—Jíi, íese finotaitío.

²⁶ Naimaci nía guitimacimo, llomeniconá Jesús llinuanona, Jusiñamuimo íobillacínona fecaja meí, llomeniconá tairude. Naimacimo fecajano raite:

—Íena llinuano guíño. Bie llomenicodí cue abí facaí íe. Cue abímo omoí comecína facajano, íena guíño.

²⁷ Íe meí naimíe jiroracona jíai llinote. Jusiñamuimo íobillacínona llua meí, naíe jiroracomo jai totaca vino naimacimo fecajano, raite:

—Bíemona nana omoí jíro.

²⁸ Cue fiódailamona, dama cue díailamona, naimaci jeacino anamona ailluena biruímona jilloítimaci. Jusiñamuidí omoímo jíai rafue biruí ítatajanona, omoí jeacino oní dotajana jai llote. Bie vinodí naíe rafue facaí íe. Cue llua isoi bie vinona omoí jíruamona, cue fiódailamo omoí comeci.

²⁹ Omoína bene dane íese caímare nabaiñeítícue. Cue Moo sedajanomo omoí díga cue ía, nainomo omoína dane íese caímare marena nabaitícue. —Íena jírodimaci.

Jesúdí Pedro naimíena januana llua rafue

(Mr 14.26-31; Lc 22.31-34; Jn 13.36-38)

³⁰ Naimaci guilla meí, Jusiñamuimo íobilla ruana rotimaci. Íe meí Olivos railla anedumo jaidímaci.

³¹ Jesús naimacimo llote:

—Cuemo suille rafue muidona, ja naío cuena faínonocaitomoi. Jusiñamui facaina lloraíma micorí íena jaíe cuega: “Toíca llaudaíai sedaraímana meínetaitícue. Naimíe toíníai uaficaída jaitímaci” cuega. Naimíe micorí caína cuete.

³² Ero, fiódailamona cue jillua meí, omoí uicodo Galíleamo jaitícue, nainomo omoí díga dafaífillena.

³³ Pedro uai ote:

—O finolle rafue muidona nana jíaino ona faínonocaía, ona jaca faínonocaiñeítícue.

³⁴ Jesús dínená raite:

—Uanaí omo lloítícue. Ja naío íitava nía ñaiñenia, dacaiño amani cuena janoítío.

³⁵ Pedro uai ote:

—O díga cue fiódaiadedí, ona janoñeítícue.

Nana íe llofueoicaigano daje uaido jíai raitímaci.

Jesúdí Getsemanímo Jusiñamuimo jíia rafue

(Mr 14.32-42; Lc 22.39-46)

³⁶ Oní jaillanona, Getsemaní railla illanomo jaidímaci. Íe llofueoicaiganomo Jesús llote:

—Beno ana raí. Omoimona oní baí janore jaitícue. Cue Moo díga ñaíllena, jaitícue.

³⁷ Pedrona uite. Zebedeo íe jíto íaímaíaína jíai uite. Naimíe sunaícaide. Íe comeci urí íñede.

³⁸ Naimacimo llote:

—Cue comeci sunaicaide. Niadi fioidaiticue. Benomo fiebi; ia nia iniñeno cue facaina omoi jii.

³⁹ Naimie janore bai jaillanona, eniruemo bitadate. Jiiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiiide.

⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo.

⁴¹ Iniñeno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena —llote.

⁴² Ie mei dane jillena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi lliroilla jira, naimaci inisitemo ride.

⁴⁴ Abido jaillanona dane jiiide. Ailli daje isoidiuaido jiiide.

⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fioidaiticue. Cuena ja gaitajanona, Jusiñamui jitailla jira, naimiena inoñedino anamo ja iiticue.

⁴⁶ A naidacai. Maiña. Cue gaitataitimie jai bite.

Jesúna gaitalle rafue

(Mr 14.43-50; Lc 22.47-53; Jn 18.2-11)

⁴⁷ Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci.

⁴⁸ Jesús dine naimaci nia riñenia, Judas micori naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaíta —llote.

⁴⁹ Jesús dine naimaci rillanona, Judas micori Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

⁵⁰ Jesús dinena raite:

—¿Bue ñiaibitio?

Ie mei Judas micori diga bitinodi Jesúsna gaitadimaci.

⁵¹ Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaima jefona jaibonote.

⁵² Jesús naimiemo llote:

—O fuiriacania, o jiai fioidaitio. O lloebi dane eeno. Cue riiduanona, fuiriñeno.

⁵³ Cuena riidollena, cue Moomo cue jicaia, eo ailluena jaienisaie cue dine naimie oretaite;

⁵⁴ iadedi iese cuena riidoia, Jusiñamui facaina lloraini micoriaie cuegafuiaie suiñeite. Cue fiodaile rafuena cuetimaci —llote.

⁵⁵ Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Firiraimadicueta cuena omoi gaitajaibilla. Jusiñamui jofomo nagarui llofuecabiticue; iadedi cuena gaitañedomoi.

⁵⁶ Nana bie rafue suide, Jusiñamui facaina lloraini micoriaie cuegafuiaie suillena —llote. Ie facaise nana naimie llofueoicaigano naimiena faionocaillano, aisidimaci.

Jesúdi judúuai illaicomini dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúna gaitadinodi Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamaci jiai ofidimaci.

⁵⁸ Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uiñollena, nainomo ite jofomo maijiraini diga raide.

⁵⁹ Naimiena meinellena, nana naie illaicomini Jesúmo nicino illana uiñoiacadimaci.

⁶⁰ Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúna ñaitimaci; iadedi taino llotimaci. Ie mei menamie bitiaimaia.

⁶¹ Raitiaimaia:

—Bimie llote: “Jusiñamui jofona judaiedicue. Judaia mei, darui amani illanona, iena dane finoredicue” —llochiaimaia.

⁶² Jusiñamui diga nanoca ñairaima Jesúmo jicanote:

—¿Niese iaimaia uai oitio? ¿Nie isoide rafue ona llogidotiaimaia?

⁶³ Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicinona cai lloñenia, caina duere finoite. Uanaicinona caino llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴ Jesús dinena uai ote:

—Jii, naimiedicue. Iena raise llotio. Monamona jaie cue billamona, imana jaidicue; iadedi ico jairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

⁶⁵ Iena cacajanona, naimiemonona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaiñedica. Ie ñaiaimona dama naimie abina llogidote.

⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fiodaillesa.

⁶⁷ Ie mei naimie uiecona tuallaitimaci. Naimiena ducoidimaci. Jiai bucoidimaci.

⁶⁸ Raitimaci:

—O Cristodiodena, ¿bu o bucoia? caino llono.

Jesús uai oñede.

Pedrodi Jesúna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairaibirimo ite. Naie jofo nama mullaño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite.

⁷⁰ Nana nainomo itinomo Pedro llote:

—O lluana uiñoñedicue.

⁷¹ Nase fuemo Pedro jaidemo, naimiena jiaie mullaño cianona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uiñote. O llogamiena uiñoñedicue.

⁷³ Dallu illanona, nainomo itino Pedro dine billano, naimiemo llotimaci:

—Ua Jesús comini imedio, o uai bairia jira. Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúna uiñoñedicue. —Iecon iitava ñaite.

⁷⁵ Iena cacajano, Pedro Jesús lluana uibiñote. Jaive Jesús Pedromo llote: “Itava nia ñairañenia, dacaiño amani cuena janoitio” llote. Iena uibiñuanona, Pedro jino jaillano, sure eede.

27

Pilato dine Jesús illa rafue

(Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamací diga, Jesúsna siadotimaci. Naimiēna meinellena siadotimaci.

² Siadua mei, Jesúsna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fiodailla rafue

³ Judas micori Jesúsna jai gaitatate. Naie illaicomini Jesúsna meiniana lluana naimie micoridi uinuamona, ie comeci iuaina meidote. Illaicominimo ie treinta diga ucubena abido atide.

⁴ Raite:

—Jesús marañede rafuena jaca finoñede. Naimie fiodañeite. Naimiēna cue gaitatajamona, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaino llirinote raona.

⁶⁻⁷ Jusiñamui diga nanoca ñairaini naie ucubena iraiā mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí.

—Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fodaia, naie eniruemo naimiēna raillena, iena ibadimaci.

⁸ Naie ucube muidona damie fiodailla jira, birui naie enirue mamecidi dirue ie enirue.

⁹ Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiēna meinellena, treinta ucubena fecaitimaci.

¹⁰ Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

Pilato dine Jesús illa rafue

(Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúsna atia mei, Pilato Jesúsno jicanote:

—¿Judíuai comini illaimadio?

Jesús uai ote:

—Jii. Raise llotio.

¹² Ie mei Jusiñamui diga nanoca ñairainidi, einamací diga, naimiēna llogidote; iadedi naimie dinena uai oñede. Ie abina riidoñede.

¹³ Ie muidona Pilato naimiemo llote:

—Diga rafuena ona llogidotimaci. ¿Ñiese uai oñedio?

¹⁴ Jesús nia uai oñede. Ie jira Pilato uainicaide.

Pilatodi Jesús fiodaillana llua rafue

(Mr 15.6-20; Lc 23.13-25; Jn 18.38-19.16)

¹⁵ Naga año pascua railla rafue facaiseconi cárcelmo itinomona Pilatodi comini jicacamiēna jamai jino orede.

¹⁶ Bie año cárcelmo Barrabás raillamie ite. Naimie mameci eo are soride.

¹⁷ Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaïdomoi? Barrabás raillamie ite. Jesús raillamie jiaï ite. Naimiedi Cristona jiaï mamecïrede.

¹⁸ Iese jïcanote; iadedi naimiedi Jusiñamui ðiga nanoca ñairaini Jesúri uradoïllana uiñote. Naimaci Jesúna meineiacanana jiaï uiñote.

¹⁹ Ie maijiracomo naimie nia illanona, naie facaise Pilato ai naimie ðine rabe orede. Cuete: “Bimiedi maraiñede rafuena jaca finoñede. Naimiena duere finoñeno. Jaive naïo cue ñicairillano, naimie muidona cue comeci jarire ite”.

²⁰ Aïlluena comini Pilato ðine ofïllanona, Jusiñamui ðiga nanoca ñairainidi, einamaci ðiga, cominimo llotimaci:

—Pilato caïmo jïcanoïa, Barrabás jino oretallena jïca. Jesús meinellena jïca —llotimaci.

²¹ Comini ofïlla mei, naimacimo Pilato dane jïcanote:

—¿Ñimie cue jino oretajana jitaïdomoi?

Uai otimaci:

—Barrabás.

²² Pilato ðinena jïcanote:

—¿Ñiese Jesúna cue finuana jitaïdomoi? Naimiedi Cristona jiaï mamecïrede.

Nana uai otimaci:

—Naimiena cruzmo corai.

²³ Pilato dane jïcanote:

—¿Ñie isoïde maraiñede rafuena finode?

Naimaci ðinena ado ibi llonoidimaci:

—Naimiena corai.

²⁴ Jesúna jino oretajana jitaïñeðimaci. Iena Pilato uiñuamona, comini jai uri iñenana naimie ciuanona, jinui ðiga ie onollina jocuanona raite:

—Bimie fiodaïllana cue muidonañede. Bie rafue cuemo jai ðuiñede. Naimie fiodaite omoi muidona.

²⁵ Uai otimaci:

—Dama iesede. Naimie fiodaite cai muidona. Jiaï cai uruiaï muidona.

²⁶ Ie mei Pilatodi Barrabás naimaci jitaïlla jira, jino orede; iadedi Jesúna sechedota-janona, naimiena coraïllena orede.

²⁷ Dajerie soldaduaïdi Pilato jofomo Jesúna uite. Nana soldaduaï nainomo ofidimaci.

²⁸ Naimie ñiroi ðuiñuano, naimiemo jiduirede ñiroina jitaðimaci.

²⁹ Eecuaïmona niga nuiciraina naimie ifogïmo jitaðimaci. Ie nabeïllimo radosina jonete, illaïmana naimie illa isoï. Caiñici ifodo raïðimaci, illaïmana naimie illa isoï. Raitimaci:

—Jadi, judíuaï illaïma. —Iese raïllanona naimiena jïfanododimaci.

³⁰ Naimiena tuallaïtimaci. Naimie onollimo ite radosina naimaci llinocaida, naïedo naimie ifogina buta-butadimaci.

³¹ Jesúna naimaci jïfanodua mei, naimie jiduirede ñiroina ðuiñodimaci. Nano naimie ñiroina dane abïdo naimiemo jitaðimaci. Ie mei naimiena coraïllena oni uitimaci.

Jesúna coraïa rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaïllanona, Cirene raïlla eniruemona bitimiemo ðafaïfidimaci. Naimie mameci Simón. Naimiena Jesús uiga cruzna rocatatimaci.

³³ Gólgota raïllanomo jaïðimaci. Ifocoraïna eruaïlla jira, iese mamecïrede.

³⁴ Nainomo rïllanona, ie abi isirena cacaiñellena, vinomo erirede rana faïanona, naimiemo fecadimaci; iadedi iena naimie facajano, iena jiroñede.

³⁵ Naimie coraïa mei, cruzna naïdania mei, naie soldaduaï naimie ñiroi ðani coninimo fecasite. Naie ñiroi bu uille raïllanona uiñollena, jïfanododimaci.

³⁶ Ie mei ana raïðimaci, naimiemo eruaïllena.

³⁷ Naimie ifogí afebeimo ie llogíduafuena jonetimaci. Iese cuega: “Bimiedi Jesús. Judíuai comini illaíma”.

³⁸ Ie mei mena firiruide iaímaiaína coraidimaci. Damie Jesús nabeimo coraíca. Jiaímie Jesús jarifebeimo coraíca.

³⁹ Naisodo jamai jaidino Jesúsna mameritimaci. Mamerillamona, ifogíaina jaididimaci.

⁴⁰ Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micori llogacino llofueraíni naimiena jiaí mameritimaci. Einamací naimiena jiaí mameritimaci. Raitimaci:

⁴² —Jiaíe cominina jillotate; iadedi dama naimie abina jilloitanide. Naimiedi cai judíuai comini illaíma raillamiedena, cruzmona naimie ana niade billasa. Ie mei naimiena ñnoíticai.

⁴³ “Jusiñamui Jitodicue” naimie railla jira, naimiedi Jusiñamuina ja ñnotena, Jusiñamui jitaía, Jusiñamui naimiena jillotaite. —Iese naimiena mameritimaci.

⁴⁴ Naimie diga coraíca iaímaiaí daje isoi naimiena mameritiaímaiaí.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

⁴⁵ Jitoma naidai itemona, daje amani horas mona jitibicaide.

⁴⁶ Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaíñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

⁴⁷ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloaíma Elíana uaidote —raitimaci.

⁴⁸ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade.

⁴⁹ Ieconí jiaíno raitimaci:

—Ína nai. Dallu seda. Elías naimiena jilloitajaíbillena sedaiticai.

⁵⁰ Ieconí Jesús dane ado cuirioita, fodaite.

⁵¹ Naie facaise Jusiñamui jofomo ie fetaca ñniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode.

⁵² Diga raíafuaí econote. Jesús jillua mei, raíafomona, fiodaillamona, ailluena Jusiñamuina ñnotinodi jillodimaci.

⁵³ Ie mei Jerusalémo naimaci jaillanona, diga comini naimacina cioidimaci.

⁵⁴ Nainomo ite capitán, ie soldadauí diga, Jesús fiodaillana eruaidimaci. Ñuisaño ñuillana cacaidimaci. Nana suide rafuena ciuanona, eo jacinallamona, naimie raite:

—Uanai bimiedi Jusiñamui Jito.

⁵⁵ Ailluena riñoniaí naie rafuena aarena cioidimaci. Naimiena canollena, Galileamona Jesús diga navui bitimaci.

⁵⁶ Naimaci motomo María Magdalena ite. Jiaíe María jiaí ite. Naiñaiñodi Jacobo ei. Naiñaiño jiaí José ei. Zebedeo uruaí ei jiaí ite.

Jesús raíafomo jonia rafue

(Mr 15.42-47; Lc 23.50-56; Jn 19.38-42)

⁵⁷ Jitoma ana itemo, eo ucuberedimie Pilato díne jaide. Naimiedi Arimatea nairaí imie. Naimie mamecí José. Jesús díbeimo jaidimie.

⁵⁸ Jesús abina jicallena, Pilato díne jaide. Pilato “Jee” raillanona, Jesús abina naimie ollena llote.

⁵⁹ Ie mei Jesús abina cruzmona ana José uanona, jeanide mare userede iniroi diga naimie abina ferinote.

⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide.

⁶¹ María Magdalena raiafo uico dine jaie María diga rainadatiiañuai.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judíuai illaicomini Pilato dine jaidimaci.

⁶³ Raitimaci:

—Ero, naie abi caitadimie nia fiodaiñenia, navui llote: “Cue fiodaillamona, darui amani illanona, jilloiticue”.

⁶⁴ Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci fianona lloitimaci: “Naimie jai jillode”. Iese suia, cominina eo jifueitimaci.

⁶⁵ Pilato uai ote:

—Soldaduai omoïdo oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaïna nainomo faïnonocaidimaci.

28

Jesús fiodaillamona jillua rafue

(Mr 16.1-8; Lc 24.1-12; Jn 20.1-10)

¹ Sábado fuilla mei, monaiacania, María Magdalena, jaie María diga, raiafona jibuisaidiañuai.

² Ieconi ñuisaño suide. Monamona billanona, Jusiñamui jaïenici raiafomo ibaica noficina oni ñuitade. Naie noficimo raide.

³ Eo queniredena eruaïde. Naimie iniroi eo userede.

⁴ Nainomo ite soldaduai naimiena eo jacinaillamona, abi docaidimaci. Iemona fiodaitino isoi dallu itimaci.

⁵ Ie facaise naie jaïenicidi dinena naie riño iaïñuaimo llote:

—Jaciruiño. Coraïca Jesúna omuiño jenuana uiñoticue.

⁶ Naimie bene iñede. Naimie llua isoi, fiodaillamona naimie jai jillode. Naimie ifo jeraimo billano mai jibuisaïbi.

⁷ Ie mei ie llofueoicaigano dine raïre omuiño jai. Fiodaillamona naimie jilluana naimacimo llono. “Galileamo omoï uicomo naimie jaite” llono. Bie rafue omuiño jai lloticue —llote.

⁸ Ie jira raiafomona rajicaïllanona, eo iobïllanona, raïre jaidiaïñuai. Ie llofueoicaigano dine aisidiaïñuai.

⁹ Ie llofueoicaigano dine iaïñuai nia riñenia, Jesús iaïñuaimo dafaïfillano, raite:

—Itomuiño. —Naimie dine iaïñuai rïllanona, naimiena sedallena, naimie eïllina llinotiaïñuai.

¹⁰ Jesús dinena raite:

—Jaciruiño. Cue llofueoicaiganomo llono: “Galileamo jai. Nainomo omoïna cioiticue” llono.

Soldaduai raiafona sedademo suide rafue

¹¹ Jaidiaïñuaimo, nainomo ite soldaduaïmona dajerie Jerusalémo jaide, nanoca Jusiñamui diga ñairaïnimomo nana naimacimo suide rafue llollena.

¹² Iena cacajano, einamacï diga iena siadotimaci. Ie mei naie soldaduaïmo ucubena fecadimaci.

¹³ Raitimaci:

—Jaïe cominimo llono: “Cai inia mei, ie llofueoicaigano ie abïna fïano uitimaci” llono.

¹⁴ Iena cai gobernador fidiia, naimie diga ñaiticai, omoina naimie duere finoñellena – raitimaci.

¹⁵ Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iraicaiño lloga rafue

(Mr 16.14-18; Lc 24.36-49; Jn 20.19-23)

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci.

¹⁷ Naimiena naimaci ciuanona, naimiena sedadimaci; iadedi dajerie Jesús jilluana raise nia ñnoñedimaci.

¹⁸ Jesús dinena raite:

–Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena.

¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza.

²⁰ Nana omoimo cue lloga rafuena naimaci iena ñnollena, llofue. Nia abido cue biñenia, omoina canollena, omoi diga cue Joreño jaca iite –llote. Mai. Macaibaite. Mateodicue.

MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micorì illa rafue
(Mt 3.1-12; Lc 3.1-9, 15-17; Jn 1.19-28)*

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie llumona, Juan Bautista micorì llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena lollena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

⁴ Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafaifia, naimacimo llote:

—Omoi jeacinona faionocaida, Jusiñamui dibeimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uiñotallena, mai omoi bautizallomoi.

⁵ Diga comini naimie micorì dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micorì bautizaga.

⁶ Juan micorìdi camello itiraiaie ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite.

⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue.

⁸ Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

*Jesús bautizaja rafue
(Mt 3.13-17; Lc 3.21-22)*

⁹ Jordán dine Juan micorì nia ia, Galileamona, Nazaretmona naimie dine Jesús bite. Nainomo Jesúsdi Juan bautizaga.

¹⁰ Bautizaja mei, jinui mona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode.

¹¹ Monamona Jusiñamui llote:

—Cue isiruiga Jitodio. Ori iobidicue.

*Jesúna Taife ramo faia rafue
(Mt 4.1-11; Lc 4.1-13)*

¹² Jesús bautizaja mei, Jusiñamui Joreño jofue iñenanomo naimiena uite.

¹³ Comini nainomo iñede. Difai ocainaiiaie itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisaie naimiena sedadimaci.

*Galileamo Jesús illa rafue
(Mt 4.12-17; Lc 4.14-15)*

¹⁴ Naie facaise Juan Bautista micorìna Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide.

¹⁵ Llote:

—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fañonocaida, omoi comeciai iuaina meido. Bie rafuena mai omoi ñno.

Ie llofueoicaigano jaillena, Jesúsdi nagaamagamiena fetua rafue

(Mt 4.18-22; Lc 5.1-11)

¹⁶ Jiairuido Galilea railla jorai fuemo Jesús macaritemo, menamiena cide. Naga ie ama iaimaiai. Damie Simón. Jiaimie Andrés. Lloijina fairaíma iaímaiai. Iese jaca naie iaímaiaidi maijuidiaímaiai.

¹⁷ Iaímaiaimo llote:

—Cue diga omico jaiocaillena, cue diga mai bi. Cue llofueganona omico jaillena jitaidecue. Lliciaina birui ocabitomico; iadedi cominina oitomico, cue dibeimo naimaci illena.

¹⁸ Iena cacajanona, ieconi iaímaiai lloijina fañonocaida, naimie diga jaidiaímaiai. Ie llofueganona jaillena, jaidiaímaiai.

¹⁹ Lliai bai Jesús jaidemo, jiaie menamiena cide. Naga ie ama iaímaiai. Damie Jacobo. Jiaimie Juan. Iaímaiai moodi Zebedeo. Botemo iaímaiai lloijina sigaidiaímaiai.

²⁰ Jesús iaímaiaina uaidote, ie llofueganona jaillena. Ie maijiraini diga iaímaiai moona fañonocaida, botemona ari billanona, Jesús diga jaidiaímaiai.

Jesúsdi Janaba anamo itimie jillotaja rafue

(Lc 4.31-37)

²¹ Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofue.

²² Moisés micori llogacino llofueraini isoi llofueñede. Illaíma uai isoi naimie llofua jira, nainomo ite comini naimie llofuiamona rajicaidimaci.

²³ Janaba anamo illamie nainomo ite.

²⁴ Jesús llofuiana cacaita, Janabadi imana ado cuirioitate:

—Odi Nazaret ie Jesús. ¿Bue ñeacadio cai diga? Caina duere finuaibidio. Ona uiñoticue. Odi Jusiñamui ie mare fetocamiedio.

²⁵ Jesús naimiena lletade:

—Llicai. Naimiemoni jai.

²⁶ Janaba naimiena docaitajanona, ado cuirioillanona, naimiemoni jaide.

²⁷ Iena cianona, nana nainomo itino rajicaidimaci. Coniniri siadotimaci:

—¿Ñiese ite? Bimie jiaie uaido llofue. Janabamo naimie llua mei, imamona Janaba oni jaide. Janaba Jesús uaina ñnote.

²⁸ Iemona nana Galilea eniruemo Jesús mameci are soride.

Jesús Pedro jifaiña jillotaja rafue

(Mt 8.14-15; Lc 4.38-39)

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiaide. Jacobo, Juan diga jiai fo jaide.

³⁰ Ie facaise Simón jifaiño duide. Abi cuaride. Nainomo itino Jesúsno naiñaiño duillana llote.

³¹ Iena cacajanona, naiñaiño ñine jaillanona, Jesús naiñaiño onollina llñnote. Naiñaiña naidacaitade. Ieconi abi cuarilla fañonocaide. Guille finuanona, ie jofomo itinona ecade.

Jesúsdi ailluena duidinona jillotaja rafue

(Mt 8.16-17; Lc 4.40-41)

³² Navuida, jitibicaidemo, Jesús ñine comini ailluena duidinona atidimaci. Janaba anamo itinona jiai atidimaci.

³³ Nana Capernaum comini naie jofonasemo ofidimaci.

³⁴ Jesúsdi diga duicono ailluena duidinona jillotate. Ailluena comini Janaba anamona jillotate. Naimiena jananiai uñua jira, Jesús naimaci ñaiana rairuide.

Galileamo Jesús llofua rafue

(Lc 4.42-44)

³⁵ Ie areruido nia monañenia, Jesús casillanona, Capernaumona comini iñenanomo Jesús jaide. Nainomo Jusiñamuimo jide.

³⁶ Monaia, casidemo, jofomo Jesús iñena jira, Simón, ie nabaiñiaia diga, Jesúsna jenuaide.

³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie nairaiaia dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judúuai ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue

(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiaidedi, cuena jillotaredio.

⁴¹ Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadícue. Mai o jillo.

⁴² —Ieconí naimie jillode.

⁴³ Ie facaise Jesús naimiena oretaiacanano, naimiemo riire lote:

⁴⁴ —O jilluana bumo lloñoeno; iadedi Jerusalémo Jusiñamui jofomo Jusiñamui diga ñairaiaia dine mai jai. O jilluana comini raise uñollena, naimiemo o abina acatajai. Moisés micorí jaie lloga rana Jusiñamuimo feca.

⁴⁵ Iese Jesús naimiemo lote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

2

Jesús tisitaitimiena jillotaja rafue

(Mt 9.1-8; Lc 5.17-26)

¹ Nigarui illanona, Capernaumo Jesús dane abido ride. Comini iena fidianona,

² ie risoillacomo naimie dine ofidimaci. Ailluena billa jira, fo illino iñede. Nasemo jiaia eo ofidimaci. Jesús naimacimo Jusiñamui rafuena llofuate.

³ Cominina Jesús llofuetemo, naimie dine nagaamagamie ie biramo biide tisitaitimiena atidimaci.

⁴ Ailluena comini illa jira, Jesús dine naimaci rinidimaci. Naie jofu biñanilla jira, jofu emodomo a jaidimaci. Jofu beicimo ite tidabacuido a jaidimaci. Jofu emodo econuano, Jesús ecimo naimiena ie biramo biide diga, rao diga, ana ñuitadimaci.

⁵ Iena Jesús cianona, tisitaitimie jilluana naimaci ñnuana Jesús uñote. Tisitaitimie lote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶ Nainomo itinomona damerie Moisés micorí llogacinona llofuerañi nainomo raidimaci. Comecina facadimaci:

⁷ “¿Ñiese bimiedi iese lote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁸ Naimaci comechiai facajacinona Jesús uñuanona, naimacimo jicanote:

—¿Bue ñellena omoi comeciaina iese facadomoí?

⁹ Bimiemo: “O jeacina jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona, o biira ferinocaida, mai macari” cue lloia, cue uai siñonana uiñoitomoi.

¹⁰ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimiemo lloiticue:

¹¹ “Mai naidacai. O biira ferianona, o jofomo mai jai”.

¹² Iese naimie raillamona, tisitaitimie jillode. Naidacaida, ie biira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedical.

Jesúdi Levína fetua rafue
(Mt 9.9-13; Lc 5.27-32)

¹³ Jiairuido jorai fuemo Jesús dane jaide. Ailluena comini naimie dine ofillanona, naimacina llofuate.

¹⁴ Llofuia mei, Jesús bai macaritemo, Leví raillamena ciode. Levídi Alfeo jito. Gobierno ucube oullanomo naimie maijuide. Nainomo raidena Levína ciode. Naimiemo llote:

—Cue llofuegamena o jaillena, cue diga bi. —Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci.

¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

¹⁷ Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaiddimaci. Ie isoide. Mareuidino cuena jitaiñedimaci; ia maraiñedino cuena jitaiddimaci. Jusiñamui dibeimo mareuidinona uaibiñedicue; iadedi maraiñedino uaibiticue. Omoimona maraiñedino diga nabairiticue; ia naimacina uaibiticue.

Jesúmo comini guiñenana jicanua rafue
(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací lua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

¹⁹⁻²⁰ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

²² Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiaí faifite. Como finoca vino comogomo jonelle. Iemei iena faifiñeite. Ie isoide. Omoi einamací rafue ifomo jiaíe rafue birui ite. Iena omoimo llocabiticue. Iedo jaidicái —llote.

Sábadoruimo Jesús llofueoicaigano maijia rafue

(Mt 12.1-8; Lc 6.1-5)

²³ Jiairuido sábadoruimo Jesús, ie llofueoicaigano diga, trigo illa illi motodo joide naisoná jaide. Ie llofueoicaigano trigona tijiano, guicana jaidimaci.

²⁴ Dajerie fariseuai iena ciuano, llotimaci:

—Rairuica rana finosite. Moisés micorí rairuilla jira, sábadoruimo maijinidicái; iadedi trigona naimaci tijiamona, caimona jai maijidimaci. Iese caí abimo jeacinona jai finodimaci.

²⁵ Ie llofueoicaiganona riiduano, Jesús uai ote:

—Cuemona jeacino finoñedimaci. David micorí jaie finoca rafuemo omoi comeciaí raise facañedomoi. David micorí guille iñenia, naimie aimetaia, ie nabaiñiaí diga, Jusiñamui jofomo fo jaide.

²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconá uanona, guitimaci. Jamai bue isoidino naie llomeniconá guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiaí diga, David micorí iena guite; ia Jusiñamui naimacina duere finoñede.

²⁷ Jusiñamui sábadona finuamona, sábadó ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi.

²⁸ Monamona cue billamona, iimána jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

3

Jesúdi onollina idisarodimiena jillotaja rafue

(Mt 12.9-14; Lc 6.6-11)

¹ Jiaíe sábadoruimo judíuai ofiracomo Jesús dane jaide. Ie facaise onollina idisarodimie nainomo ite.

² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoa, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode.

³ Onollina idisarodimie mo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuena birui omoi meineiadedi, birui marañede rafue finodomoi. Sábadoruimo, ¿nie isoide rafue finuana rairuidomoi?

Comini dinena uai oñedimaci.

⁵ Naimie uaina naimaci iñoñena jira, riicaillanona, Jesús naimacimo erodate. Duidimie mo llote:

—O onolli mai oni ñuita.

Iena oni ñuitajamona jillode.

⁶ Iena ciuanona, fariseuai jino jaidimaci. Naimiena meinellena, illaima Herodes díbeimo itinona baillanona, naimaci diga coniniri siadotimaci.

Jorai fuemo Jesúdi ailluena cominina llofuia rafue

⁷ Naie nairaimona jorai fuemo Jesús, ie llofueoicaigano diga, oni jaide. Galilea railla eniruemona ailluena comini naimie dine bitimaci. Judeamona jiaíno bitimaci.

⁸ Jerusalémona, Idumeamonan, Jordán ruicafabellemona, Tiro jinofemo ite eniruemonan, Sidón jinofemo ite eniruemonan ailluena bitimaci. Nana naimie siño finoca rafuena cacajanona, naimienan cioacadimaci.

⁹ Comini naimienan meetasi raillanona, ie llofueoicaiganomo dajebotemo naimie jaillanoneenogana llote.

¹⁰ Ailluena duidinonan naimie jai jillotaja jira, nana duidino naimiemoriacadimaci. Jilloillenan naimienan jetaacadimaci. Iemonan naimie illa bote eenuana jitaide.

¹¹ Janania anamo itino Jesúsna cioia, Jesús uicomo ana bitadajanona, janania naimacina ñaitatajamona, raitimaci:

—Jusiñamui Jitodio.

¹² —Ia Jesús naimienan naimacilluana rairuide.

Jesúdi ie doce llofueoicaiganona fetua rafue

(Mt 10.1-4; Lc 6.12-16)

¹³ Naie facaise anedumo Jesús jaide. Ie jitaillano diese naimie dine uaidote. Naimie dine billamei,

¹⁴ doce digamienan fetode. Naimie diga jaicabillenan, naimacina fetode. Ie rafuena llollenan, naimacina oretaiacade.

¹⁵ Janaba anamo itinomona Janabanan oni oretallenan, ie uai naimacimo ite.

¹⁶ Iese mameciredimaci: Simón; naimie mameci jiaicidi Jesús jítaca Pedrona.

¹⁷ Jacobo, Juan; iaimaia Zebedeo jito iaimaia. Jiaie mameci iaimaiaina Jesús jonete Boanergesna. Naie mameci oni dobañuamonan mona guruama. Iciriruilla jira, iese mamecirediaimaia.

¹⁸ Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide.

¹⁹ Judas Iscariote micori; naimiedi Jesúsna gaitatatimie.

Fariseuai Jesúsna jeare ñaia rafue

(Mt 12.22-32; Lc 11.14-23; 12.10)

²⁰ Ie llofueoicaiganona fetua mei, ie risoilla jofomona naimacidiga Jesús abido jaide. Ailluena comini naimie dine billa jira, naimie guillenan, naimie abijuanide.

²¹ Naimienan ie comini fidiano: “Naimiedi jai uarico isoi iacade” raillanona, comecina facadimaci. Ie jira naimienan ie ei jofomona isaibiacadimaci.

²² Jerusalémona Moisés micori llogacinona llofueraini naie facaise billanona, raitimaci: —Beelzebúdi Janaba comini. Beelzebú anamo Jesús illamonan, Beelzebú uaido Janaba illa cominimona Jesúsdi Janabanan oni oretate —raitimaci.

²³ Naimaciraillanan naimie cacajanona, naimie dine Jesús naimacina uaidote. Llote:

—Janaba díbeimo Beelzebú illamonan, dama ie abina oretanide.

²⁴ Ero, dajebotemo isoi comeciainan lloñenamo dajebotemo nairai facañenian, danomomañinidimaci. Oni jaidimaci.

²⁵ Dajebotemo isoi comeciainan lloñenamo dajebotemo itino facañenian, danomomañinidimaci. Oni jaidimaci.

²⁶ Ie isoide. Beelzebú uaido jananiaina omoi llua isoi cue oretaiainan, Janaba ie díbeimo itino diga jai nabairiñede. Iemonan naimie comini danomomañinidimaci. Ie uai ieconisaite.

²⁷ Ero, mañinidimie ie jofomona ite rana ñibai fiacadomoi. Iena fillenan, naimienan nano raise omoi maiga. Raise maiga mei, ie rana fiaredomoi. Ie isoide. Janaba anamonan comininan jillotacabiticue. Naimie afemona nano cue iñenian, comininan jillotanidicue. Naimie afemona cue illa jira, iena finoredicue.

²⁸ Ie jira bie omoimomañinidimaci. Jusiñamui nana comini jeacinonan dotarede. Naimiedi naimacijearañinonan dotarede;

²⁹ iadedi naimiedi ie Joreña jeare ñaiacinona jaca dotañeite. Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci raila jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini

(Mt 12.46-50; Lc 8.19-21)

³¹ Jesús comini naimie dine rillanona, naimie diga ñaiacanano jino naidaidimaci.

³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai.

³⁵ Jusiñamui jitaillacinona finodimie cue amana, cue miriñona, cue eina. Imaci ua cue cominina.

4

Jesúdi trigona judaidimienaa llua rafue

(Mt 13.1-9; Lc 8.4-8)

¹ Jiairuido jorai fuemo dane jaillanona, ailluena comini naimie dine ofillamona, Jesús naimacina llofuate. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci.

² Ailluena rafuena naimacina llofuate. Raite:

³ —Omoi fueollena, bie rafuemo raise cacarei. Damie trigona judaiaide.

⁴ Naimie judaiaimona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

⁵ Nofiemmo jiaie iduai juide. Nainomo enirue raise iñede. Sicode; iadedi enirue raise iñena jira,

⁶ raise jainañena jira, ecasillamona duide. Ie jira llisiñede.

⁷ Eecuai illanomo jiaie iduai juide. Eecuai sicuamona riera eecuai ibaica. Ie jira llisiñede.

⁸ Mare eniruemo jiaie iduai juide. Sicode. Llisillamona danademo treinta diga llisillana ote. Jiaenamona sesenta diga llisillana ote. Jiaenamona cien diga llisillana ote.

⁹ Omoi jeforena jira, raise fueollena, cue lluomo cacarei. Iena ñno.

Jesús ie como lloga rafuena llofuiia rafue

(Mt 13.10-23; Lc 8.9-15)

¹⁰ Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiiana jicanotimaci.

¹¹ Uai ote:

—Jusiñamuidi omoína ie sedaacana rafuena jai uiñotade. Jaiie iena uiñoñedomoi. Jiaie cominina iena nia uiñotañede.

¹² Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoñoeno jaitimaci. Cue llofuiiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite.

¹³ Cue como llofuiacinona omoi raise cacaiñenia, dane cue llofuiia, iena jiai raise nibai cacaiñeitomoi;

¹⁴ ia iena omoína llofueiticue. Trigona judaidimiedi Jusiñamui rafue lloraíma isoide.

15 Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaino cacaja uaina inotañede.

16 Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci.

17 Nofiemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci.

18 Jiaie iduai eecuai illanomo juide. Naie iduai sicua mei, iena eecuai ibailla jira, raise llisñede. Dajerie comini comeciai naie illano isoidimaci. Jusiñamui uaina cacadimaci. finotimaci;

19 iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci.

20 Jiaie iduai mare enruemo juide. Dajerie comini comeciai naie enrue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Jesúdi lamparína ñaia rafue

(Lc 8.16-18)

21 Jorai fuedo Jesúdi cominina nia llofue:

—Jai uneca lamparín jiaie illanomona atia mei, jiaie ra bide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade.

22 Ie isoide. Cue rafue llocana jia, comini comeciai iticinona uiñotade. Uanaicino naimaci cacajamona, damierie inotimaci. Damierie inoñedimaci.

23 Omoi jeforena jira, raise fueollena, cue lluomo cacarei. Iena ino.

24 'Cue lluomo raise cacarei. Omoi cacaja diese Jusiñamui omoina uiñotaite.

25 Iena omoi inoia, Jusiñamui omoina canoite. Omoina uiñocana jaitaite. Jiaimie iena janore cacajamona, iena inoñenia, Jusiñamui naimiena faifitaite.

Jesúdi Jusiñamui ie cominina sedaacana llofua rafue

26 Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide.

27 Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede;

28 ia enruemona nano sicode. Monaila mei, lliside. Iemona naicuai comuide.

29 Jai einaia, iena ote. Ie isoide. Jusiñamui rafuena raise cacaiñedomoi; ia iena inocana jaidomoi.

Jesúdi mostaza ido llua rafue

(Mt 13.31-35; Lc 13.18-19)

30 Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

31 Jiaie rafuedo iena omoimo lloiticue. Damie mostaza idona rillamona, naiemona eo aillue riara sicode. Mostaza ido eo janorede;

32 iadedi sicua mei, eo aillue riara jaillamona, ie onogailla; jegairiena jira, icairo anamo manaidinomo sillinai; jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

33 Naie isoide rafuiaido Jesúdi Jusiñamui ie cominina sedaacana rafuena cominimo llote.

³⁴ Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofuede.

Jesúdi jorai baguana llucaitaja rafue

(Mt 8.23-27; Lc 8.22-25)

³⁵ Ailluena comini llofuia mei, jitoma jai sojicaidemo, ie llofueoicaiganomo Jesús llote:
—Ruica enefebeimo mai cai jailli.

³⁶ Cominina fañonocaida, botemo naimie jai illamona, naimie lua isoi, oni jaidimaci. Jiaie botes jiai jaide.

³⁷⁻³⁸ Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinailamona, Jesúsna casitatimaci. Raitimaci:

—Maestro, ¿niese itio inioilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana llucaitade. Ieconí aifi llucaide. Bagoñede.

⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise ñnoñedomoi?

⁴¹ Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina ñnote. Jorai naimie uaina jiai ñnote. —Bai jaillanona, ruica ñine ridimaci.

5

Jesúdi Gadara railla eniruemo illa rafue

(Mt 8.28-34; Lc 8.26-39)

¹ Ruica ñine naimaci ridemo, Gadara railla eniruemo sijidimaci.

² Botemona ari Jesús jaidemo, naimie ñine damie bite. Naimiedi Janaba anamo itimie.

³ Comini raioillanomo noñie moto ifuaimo naimie i-isoide. Janaba anamo naimie illamona, comini ñiga marena jaca irainide.

⁴ Ñiga icaiño lleo ñiga ie onollidi maiga; iadedi oni ecocaida, lloona ticonote. Ie eilli jiai maiga; iadedi saitaicaida, lloona ticonote. Ie jira buna naimiena raise mainide.

⁵ Nagarui noñie motomo ite. Anedumo jaisoide. Cuiricuirisoide. Dama ie abina noñici ñiga jaidode. Iese naimie isoide.

⁶ Noñiemona Jesúsna cianona, aisicana Jesús ñine bite. Naimiena sedallena, ie caiñici ifodo ana rainadate.

⁷⁻⁸ Jesús llote:

—Janaba, bimiemona oni jai.

Janabadi imana ado llotatate:

—Nanoca Jusiñamui Jitodio. ¿Niese cuena ñibaicadio? Jusiñamui mamecido cuena duere finoño.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúsno duere jicanotimaci.

¹¹ Naie facaise nainomo ite anedumo ailluena chanchuai itimaci.

¹² Chanchuai abimo naimaci jaillena Jesúsno duere jicanotimaci.

¹³ Jesús ñinena:

—Jee —raite. Ieconí imabimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

¹⁴ Iena cianona, chanchuai sedaraini naimaci nairai ñine aisicana jaidimaci. Naie rafuena llocana jaidimaci. Ie jira ñiga comini jaide, naie rafuena raise fidillena.

15 Jesús dñe naimaci ridemo, jaive Janaba anamo illamiēna Jesús ecimo raillana ciōdimaci. Naimie iniroina jai jítade. Naimie jai uairicoñede. Iena ciuanona, Jesúsna jaciruitimaci.

16 Naie rafuena ciōdino jaive Janaba anamo illamiē jilluana llotimaci. Chanchuaimo suide rafuena jiai llotimaci.

17 Naie enirue itinodi Jesúsno naimaci eniruemonā oni jaillena duere jīcanotimaci.

18 Botemo Jesús jaiacania, jaive Janaba anamo illamiē Jesúsno jīcanote, naimie dīga jaillena;

19 ia Jesús raite:

—Dama ite. O nabaiñiai dñe jai. Nana Jusīñamui omo finoca rafuena naimacimo llono. Jusīñamui ona duenaillana naimacimo llono.

20 Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

Jesúdi mena duide riñona jillotaja rafue

(Mt 9.18-26; Lc 8.40-56)

21 Ruica dibeimo ie llofueoicaigano dīga Jesús abido rilla mei, ailluena comini naimie dñe ofidimaci. Jorai fuedo naimie nia ia,

22 Jairona mameciredimiedi Jesús dñe bite. Naimiedi judíuai rafue ofiraco sedarīma. Jesúsno duere jīcanollena, ana bitadate.

23 Duere jīcanote:

—Cue jisa jai fiōdaiacade. Cue jofomo cue dīga bi, o onolli naiñaiñomo o jonellena, naiñaiño jilloillena.

24 Iena cacajano, ie llofueoicaigano dīga, naimie dīga Jesús jaide. Ailluena comini Jesúsno ñaijillanona jaidimaci.

25 Bai jaillanona, duidiñaiño Jesús jinafona jaide. Naiñaiño jeraimona doce años jaca diaide.

26 Dīga manorainimona duere sefuide. Jilloñede; ia fodo jaide. Nana ie ucube jiai fuite.

27 Jesús duidinona jilluana naiñaiño fidiamona, jinafo dñena billanona, naimie iniroina jetade.

28 “Naimie iniroi cue jetajamona jilloitīcue” comecina facajamona, naiñaiño naimie iniroina jetade.

29 Ieconī diailladi fañonocade. Ie abī jilluana naiñaiño jai uiñote.

30 Ie abimona ie uai oni jaillana Jesús uiñuanona, dobaicaide. Cominimo jīcanote:

—¿Bu cue iniroina jetade?

31 Ie llofueoicaigano dñena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

32 Raise uiñollena, Jesús ie ecimo itinomo erodate.

33 Duidiñaiño ie jilluana uiñua jira, Jesús dñe jaciruicana bite. Naimie uicomo ana bitadajanona, nana naiñaiñomo ite rafuena llote.

34 Naiñaiñomo Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

35 Naiñaiño dīga Jesús nia ñaitemo, Jairo jofomona jiaino bite. Jairomo llote:

—O jisa jai fiōdaite. Maestrona ñaidoñeno.

36 Iena cacajano, Jairomo Jesús llote:

—O comeci jarire iñeno; ia cuena nia ñno.

37 Ailluena comini naimie dīga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama.

38 Jairo jofomo rillanona, nainomo itino eecuinaillana cacade. Failliñaiñana cacade.

39 Jesús fo jailla mei, nainomo itinomo jīcanote:

—¿Niese itomoi eecuinailla? Cuemona naiñaiño fiodaiñedesa. Jamai inide.

⁴⁰ Iena cacajano, naiñaiño jai fiodaite uiñuamona, Jesúri jaisitimaci. Naimacina Jesús jino oretaja mei, nai jitaíño moo ñiga, naiñaiño ei ñiga, ie llofueoicaigano ñiga, naiñaiño ecimo Jesús jaide.

⁴¹ Naiñaiño onollina llinocaida, judíuai uaido raite:

—Talita, cumi. —Iena oni dobaiñuamona: “Jitaíbici, mai naidacai” raite.

⁴² Ieconí jilluanona naidacaide. Jai jilluano macarite. Naiñaiñomo doce años jai ite. Nana nainomo itino ieri eo rajicaidimaci.

⁴³ —Bumo bie rafuena lloñeno —naimacimo Jesús llote. Guillena naiñaiño ecajana jiai llote.

6

Nazaretmo Jesús illa rafue

(Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano ñiga Nazaretmo ride.

² Rilla mei, sábadoruimo nainomo ite ofiracomo llofue. Iena cacajanona, nainomo itino rajicaidimaci. Raitimaci:

—¿Niese eo abina uiñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie.

³ Naimiedi amederaima. María jito. Ie amatiaidi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate;

⁶ ia naimaci ñnoñenari rajicaide. Ie mei ñiga nairaimo Jesús llofuecana jaide.

Jesúdi ie llofueoicaiganona oretaja rafue

(Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai iñonocai, jananiai anamona cominina jilloitallena. Ie rafuena lloñena, jiaie illanuaimo naimacina menamierie oretaiacade.

⁸ Raite:

—Ailluena rana uiñeno. Omoi abi riidollena, jiguidana uiño. Llomenicono uiñeno. Ailluena rana omoi uiñellena, bolsana uiñeno. Ucubena uiñeno.

⁹ Zapatona jítajano jai. Abi omoi meidolle ñiroina uiñeno.

¹⁰ Nie nairaimo omoi jaia, daacomo omoi ri. Naie nairaimo omoi ille ñinori, daacomo omoi i.

¹¹ Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹² Jesús naimacimo llua mei, jaidimaci.

—Omoi jeacinona fañonocailanona, Jusiñamui ñibeimo omoi comeciai iuai meiduana omoi jai —llofuecana jaidimaci.

¹³ Janaba anamo ite cominimona Janabana oredimaci. Duidino abimo farena gia mei, naimacina jillotate.

Juan Bautista micori fiodailla rafue

(Mt 14.1-12; Lc 9.7-9)

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

¹⁶ Jesúsna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

¹⁷⁻¹⁸ Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías dinena Juan Bautista micorina jearuite. Naimiena meinetaiacade;

²⁰ ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori lluaana cacade. Iena gaide; ia iena raise cacaiñede. Ie muidona Herodías naimie micorina meinetanide;

²¹ ia ja muidomo naiñaiño sedallirui ride. Herodes cumpleaños ie rafuena finode. Ailluena illaicominina ie rafuemo uaidote. Eo ucuberedinona jiai uaidote.

²² Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue.

²³ Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴ Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacañede.

²⁷ Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade.

²⁸ Bandejamo naimie ifogi jonecaida, iena atiano, Herodías jisamo fecade. Ieconi ie eimo fecade.

²⁹ Iena fidianona, Juan micori llofueoicaigano naimie micori abina uaibitimaci. Iena raitimaci.

*Jesús cinco mil iñiaina ecaja rafue
(Mt 14.13-21; Lc 9.10-17; Jn 6.1-14)*

³⁰ Jesús llofueoicaigano abido bia, Jesúsno nana naimaci finoca rafuena llotimaci.

³¹ Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo dani jaidimaci.

³³ Ailluena comini naimaci oni jaillana cioidimaci. Naimacina uiñuamona, diga nairaiaimona aisicana jaidimaci. Jesús nia riñenia, uicodo ie jaillanomo ridimaci.

³⁴ Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofue.

³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade.

³⁶ Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹ Iena cacajano, cominimo raitie illanomo dajerise ana raillena Jesús llote.

⁴⁰ Naimaci cien digamierie ana raisite. Jiaino cincuenta digamierie ana raisite.

⁴¹ Naie cinco llomenicono, naie mena lliciai diga, Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade.

⁴² Nana guillanona monidimaci.

⁴³ Monillamona, fiebide guillena iraidimaci. Doce cirigaiaimo oruitatimaci.

⁴⁴ Cinco mil iñiaia diese guitimaci. Naimaci ainiaia, imaci uruiaia diga, jiaia guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote.

⁴⁶ Cominina facadua mei, aneduaimo dane jaide, Jusiñamui diga ñaillena.

⁴⁷ Jitibicaidemo, nainomo dama ite. Ie llofueoicaigano jorai motomo jai itimaci.

⁴⁸ Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide;

⁴⁹ ia naimiena naimaci ciuanona, comecina facadimaci: “¿Bu joreño caimo billana ciodicai?”

⁵⁰ Naimiena ciuamona, nana jacinaillamona cuirioidimaci. Naie dacaiño Jesús naimacimo llote:

—Omoi joreñonicañeno. Cuesa. Jaciruiñeno.

⁵¹ Botemo Jesús jaide. Ie facaise aifi lliciaide. Ieri eo rajicaidimaci.

⁵² Janore guillemona ailluena cominina naimie eajana jaive ciodimaci; ia naimie uai siñonana nia raise uiñoñedimaci. Naimiena nia raise iñoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci.

⁵⁴ Botemona ari jaidemo, nainomo itino Jesúsna uiñotimaci.

⁵⁵ Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuidimaci.

⁵⁶ Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaideo. Ie iñiroi fueda jetallena naimiemo duere jicanotimaci. Nana naimie iñiroina jetadino diese jillodimaci.

7

*Jesúdi comini comeciaina ñaia rafue
(Mt 15.1-20)*

¹ Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci.

² Jesús llofueoicaiganomona damierie naimaci isoi guiñenana ciodimaci.

³⁻⁵ Fariseuai dinena Jesúmo jicanotimaci:

—¿Bue ñellena omoi llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi, raise jocoñedimaci. Ie jira cai abimo jeacino finodomoí.

Iese jicanotimaci, naimaci einamací rafuedo naimaci jailla jira. Maraiñede rafue naimacimo suiñellena, iese ailluena judíuai jaidimaci. Naimaci guiacania, naimaci einamací llua isoi, onollina diga icaiño jocuano, guitimaci. Mercadomona bia, naimaci einamací llua isoi, abina lleredimaci. Naimaci einamací llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona maraiñede. Naimie caina duere finoite”. Jearede rafue naimaci abimo oñellena, iese finoidimaci.

⁶ Jesús uai ote:

—Mareuidinona abi caitauidinodomoí. Isaías micori jaie omoína raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeciái cue dibeimo raise iñede.

⁷ Cue uai itena, jamai comini llucacinona naimaci llofuecabilla jira, tainona cuena sedadimaci

cuete.

⁸ Isaías micori llua isoi itomoí. Jusiñamui llogacinona fainonocaida, omoi einamací rafuedo jaidomoí.

⁹ ¿Bue ñellena nana Jusiñamui llogacinodo jaiñedomoí? Omoi einamací llogacinodo jaidomoí; iadedi nana Jusiñamui llogacinodo raise jaiñedomoí.

¹⁰ Moisés micori jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

¹¹⁻¹² Iese Moisés micori llote; iadedi omoi einamací llotimaci: “Jusiñamuimo cai ucubena cai fecajamona, cai moona, cai eina jai canonicicaí”.

¹³ Iese omoi finocabilla jira, omoi einamací llogacinodo omoi jaillamona, Jusiñamui uaina jamaidomoí. Bie isoide rafuedo jaca jaidomoí.

¹⁴ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llua mo cacarei.

¹⁵ Omoi einamací isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoí. Omoi guillamona, omoi onollina jocuamona. Jusiñamuina nabaiñedomoí. Omoimo jeacino illa jira, Jusiñamuina nabaiñedomoí. Omoi comeciái jearena jira, jeacinona finocabidomoí.

¹⁶ Omoi jeforena jira, raise fueollena, cue llua mo cacarei. Iena ñno.

¹⁷ Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci.

¹⁸ Uai ote:

—¿Ñiese cue llua jiai nia cacaiñedomoí? Ñie isoide ra guitomoína, omoi comeciaino jeare iñede.

19 Omoï comeciaïmo jaiñede; ia omoï jebemo jaide. Ie mei omoï abiaïmona jino bite. Jesús llua mona, nana guille radi mare uiñoticaï.

20 Jesús llote:

—Omoï comeciaï jearena jira, jearede rafuena finocabidomoï.

21 Omoï comeciaï jearena jira, jeare comeciaïna facacabidomoï. Omoï aiñede riño diga icabitomoï. Omoï iniñede iima diga icabitomoï. Fñricabitomoï. Cominina meinecabitomoï.

22 Jiaï comini rana nicidocabitomoï. Jearede rafuena finocabidomoï. Iena ebiruitomoï. Jifuericabitomoï. Abina uradoicabitomoï. Jiaïe comini joreña jeare ñaicabitomoï. Abina iedocabitomoï. Ebena jaicabitomoï.

23 Bie isoidicinuai omoï comeciaïmo illa jira, jearede rafuena finocabidomoï; iadedi omoï einamacï llua isoi, omoï onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue
(Mt 15.21-28)*

24 Nainomona Jesús jaillanona, Tiro railla eniruemo jaide. Sidón railla eniruemo jiaï jaide. Nainomo jofomo jaillanona, iena buna fidiana jitañede; ia iena janonide.

25-26 Ie facaise judío iñaiñoñediñaiño ñaño bite. Naiñaiño di sirofenicia nairaï iñaiño. Ie jisa Janaba anamo ite. Jesúna fidiana, naimie ñine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade.

27 Judíuainedina naimie canoñenana naiñaiño uiñollena, naiñaiño mo Jesús llote:

—Uruiaï guillamona jiconiaïna eadicaïdena, marañede. Uruiaï nano eadicaï.

28 Naiñaiño ñinena uai ote:

—Jii, maestro; iadedi jiconiaïdi uruiaï guillamona fiebide guillemona guitimaci. — Iese llote; ia jiaïe rafuemo comecina facade. Uruiaïna llote; iadedi judíuaino comecina facade. Jiconiaïna llote; ia judíuainedino mo jiaï comecina facade. Comecina facade: “O cominimo o rafue duide; ia cai Namana o illa jira, ñibaï o rafue caïmo janore duide”.

29 Jesús uai ote:

—Raise llotio. O jofomo mai abido jai. O jisamona Janaba oni jaide.

30 Naimie llua isoi jofomo jaide. Ie jisa biramo bidena cide. Janaba naiñaiño mona oni jaillana jai uiñote.

Jesús jefona cacaiñedimiena jillotaja rafue

31 Tiro railla eniruemonona Jesús oni jaide. Jaillanona, Sidón railla eniruemo jaide. Decápolis railla eniruemo jiaï jaide. Ja muidomo Galilea railla jorai fuemo ride.

32 Iena fidiano, naimie ñine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci.

33 Ailluena comini naimie ñine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade.

34 Jusiñamui ñine monamo eruaita, naimiena duenailamona, jafaicina faite. Judíuain uaido naimiemo llote:

—¡Efata! —Oni dobañuamona: “¡Ecoricaï!” raite.

35 Ieconi ie jefodi ecoricaide. Jai raise cacade. Jai raise ñaite.

36 Cominimo:

—Bimie jai jilluana bumo lloño —Jesús diga icaiño llote; ia naimie uaina iñoñedimaci. Iena llocana uitimaci.

37 Naimieri eo rajicaidimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

*Jesúdi cuatro mil iñiaina ecaja rafue**(Mt 15.32-39)*

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci bai raillano. Naimacina cue duenaila jira, naimacina canoiacadiecue.

⁴ Jicanotimaci:

—¿Niese naimacina bene ecaiticai? Jofue iñenanomo iticai.

⁵ Jesús jicanote:

—¿Niga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci.

⁷ Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote.

⁸ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

⁹ Nainomo cuatro mil iñiaia guitimaci. Naimaci ainiaia, imaci uruiaia diga, jiai guitimaci.

¹⁰ Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

*Fariseuai comini Jesúmo siño rafuena finuana jicanuano billa rafuena**(Mt 16.1-4; Lc 12.54-56)*

¹¹ Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

¹² Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeitiecue.

¹³ Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

*Jesús siritate rana llofua rafue**(Mt 16.5-12)*

¹⁴ Ruica dine rilla mei, Jesús llofueoicaigano llomeniconona feillana uibiñotimaci. Naimacimo daje llomenico ite.

¹⁵ Iena naimie uiñuamona, naimacimo Jesús llote:

—Fariseuai siritate ramona abina rairui. Illaia Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

¹⁶ Jesús iese llua jira, iena naimaci raise cacaiñena jira, daní coniniri siadotimaci:

—Llomeniconona cai atañena jira, caimo iese llote.

¹⁷ Naimaci siaduna Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Niese cuena ñinoñedomoi? Cuemo siño uai illana nia raise cacaiñedomoi.

¹⁸ Uisiredomoi. Jeforedomoi. ¿Niese cue navui siño finoca rafuemo comeciaina facañedomoi?

¹⁹ Navui cinco mil iñiaí cinco diga llomeniconona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

²⁰ Jesús llote:

—Jiaicaiño cuatro mil iñiaí siete diga llomeniconona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

²¹ Jesús dinena jicanote:

—¿Niese cuena nia raise inoñedomoi? Siño uai cuemo illana nia raise inoñedomoi.

Jesús uisnidimiena jillotaja rafue

²² Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisnidimiena atide. Naimiena jilloitallena, naimiena jetallena, Jesúsno jicanote.

²³ Iena Jesús cacajanona, ie onollina llinuanona, nairai illa jinofemo uisnidimiena uite. Ie mei ie uisina tuade. Ie uisina jiaí jetade. Naimiemo jicanote:

—¿Buena ciodio?

²⁴ A eruaillanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

²⁵ Ie uisina Jesús dane jetade. Iemona oni erocaillamona, jai jillode. Jai raise cide.

²⁶ Jai jillua jira, ie jofomo naimiena abido orede. Jesús llote:

—Betsaidamo itino o jilluana lloño; ia nainomo jaiño o jofomo mai abido jai.

Pedro Jesúsna llua rafue

(Mt 16.13-20; Lc 9.18-21)

²⁷ Cesarea Filipo eniruemo ite nairaiaimo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaíno raitimaci: “Jusiñamui facaina jaie ite llorainimona damie jai jillode. Imiedio”.

²⁹ Jesús dane jicanote:

—¿Niese omoi cuena raitomoi?

Pedro uai ote:

—Odi cai jilloitaramadio. Jusiñamui facaina lloraini micoriai o billena jaie llotimaci

³⁰ Jesús iena bumo llua rairuide.

Jesús ie fiodaillena llofuia rafue

(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofuate. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloño. Bie isoide rafuena lloño.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiño, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

³⁴ Naimie dine ailluena comini uaidua mei, ie llofueoicaigano nainomo jiaí illanona, naimacimo llote:

—Cue cominina bu jaiacania, ie jitaille rafuedo jaiña. Cue díbeimo naimie jaillamona, duere sefuicana jaite. Nibaí naiemona fiodaite. Bu iese jaiacania, cue díbeimo naimie iite.

35-37 Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jaia, jaca faifiñeite. Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite.

38 Birui ite comini Jusiñamuina jitañedimaci. Naimiena jai fañonocaidimaci. Jeacinona finocana jaidimaci. Cuen a bu meiruia, cue rafuena bu meiruia, dane cue bia, naimiena meiruiticue. Cuen a meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biiticue. Cue Moo uai cuemo illanona, ebire biiticue.

9

1 'Omoimo uanaicinona lloticue. Omoimona dajerie nia fioldañeitomoimo, illaimana ebire cue bairellena cioitomo.

Jesús abi meidocaila rafue
(Mt 17.1-13; Lc 9.28-36)

2 Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uiñede. Nainomo rilla mei, naimaci uicomo naimie abi meidocaide.

3 Naie dacaiño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede.

4 Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraíma. Jesús diga ñaitiaímaia.

5 Iaímaiaí jaiacania, Pedro Jesús lote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

6 Eo jaciruilla jira, naimie ñaia rafuena raise uiñoño jamai ebena ñaite.

7 Ie facaise uillie billamona, naimacina ibaide. Uilliemona Jusiñamui lote:

—Bimie cue isiruiga Jito. Naimie llamo cacareillanona, iena ñno —lote.

8 Ieconí oni erodajanona, dama Jesúsna cioidimaci. Jiaínona cioñedimaci.

9 Anedumona bitimacimo, naimacimo Jesús lote:

—Omoi ailli cúa rafuena bumo lloñoño, cue fioldaimona cue jillua dinori.

10 Jesús llua isoi finodimaci. Iena bumo lloñedimaci; ia fioldaimona naimie jilluana naimaci raise nia cacaiñena jira, iemo comecina facadimaci.

11 Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamuimona o billana ñnoticai. Odi cai Jilloitaraimana ñnoticai. Odi cai Jilloitaraimadimomo, ¿bue ñelli iese raitimaci?

12 Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llollena. Jusiñamui díbeimo naimaci illena, comini imaci comeciái meiduana lote. Jusiñamui facaina lloraíni micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca.

13 Elías isoidimie jai bite; iadedi Jusiñamui facaina lloraíma micori jaie cuega isoi, naimaci jitailla jira, naimiena jai meinetimaci.

Jesúdi Janaba anamo itimiena jillotaja rafue
(Mt 17.14-21; Lc 9.37-43)

14 Ie jiaie llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraini dinena ie llofueoicaigano uaina uaitaside.

15 Jesús billana comini ciuanona, jacinaisidimaci. Naimiena feñollena, naimie dine aisida jaidimaci.

16 Moisés micorí llogacínona llofuerainimo Jesús jìcanote:

—¿Ñiese cue llofueoicaigano uaina uaitatomoí?

17 Uai oñedimaci; ia cominimona damie uai ote:

—Maestro, Janaba anamo cue jito illa jira, o ñine naimiena atidicue. Cue jito Janaba anamo illamona ñainide.

18 Nagarui Janaba bille ñiese, naimiena eniruemo uaitate. Iemona fueði mullede. Ie isidodí murude. Ie abi jaiare jaide. O llofueoicaiganomo jìcadicue, Janabana oni oretallena; ia oretanidimaci. Ie jira Moisés micorí llogacínona llofuerainí bie rafuena, o llofueoicaigano ñiga, uaina uaitatimaci.

19 Iena cacajanona, Jesús ie llofueoicaiganomo llote:

—Cue uai siñonana ñia ñnoñedomoi. Omoi ñiga are iticue. Raise omoi ñnollena, ¿ñie ñinori omoi ñiga iiticue?

Naie duidimie moomo llote:

—O jito cue ñine mai ati.

20 Naie urue Jesús ñine atianona, Janaba naimiena naillitate. Iemona urue eniruemo uaide. Jabí-jabíde. Fue mullede.

21 Jesús ñinena naie urue moomo jìcanote:

—¿Ñie ñinori o jítodí bie isoi ite?

Uai ote:

—Naimie uruenamona.

22 Janabadi, ñiga icaiño iraimo usillena, naimiena uaitate. Corobaillena, ñiga icaiño jinuimo jiaí uaitate. Janaba oni o oretarenia, cocona duenaillamona, cocona cano.

23 Jesús uai ote:

—“O oretarenia” raitio. Ero, o jito jillotaredicue. Cuen a o ñnoia, o jito jilloite.

24 Naie urue moo ieconi llote:

—Ona ñnoticue. Raise ñia cue ñnoñenia, cuena raise ñnota.

25 Naie facaise ailluena cominí naimie ñine raire ofillana naimie cìuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie ñine dane ñiñeno.

26 Ado cuirioillanona, naimiena eo raire naillitajanona, Janaba oni jaide. Iemona naie urue fiodaitimie isoi ero caide. Naimiena cìuanona, nainomo itino raitimaci:

—Naimie jai fiodaite;

27 —ia Jesús naimie onollina llinocaida, naimiena a naidanete.

28 Iemona oni jaillanona, damie jofomo Jesús nailli ria, naimiemo ie llofueoicaigano anado jìcanotimaci:

—¿Bue ñellena Janabana oni oretanidicai?

29 Jesús uai ote:

—Jusiñamuimo omoi jiaimona, naimiena raise omoi ñnuamona, bie isoide Janabana oretaredomoi. Naimiena omoi raise ñnoñena jira, bie uruemona Janabana oni oretañedomoi.

Jesús ie fiodaillena dane llofuia rafue

(Mt 17.22-23; Lc 9.43-45)

30-31 Ie llofueoicaigano ñiga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie cominí fidiana jitañede. Naimacimo llote:

—Monamona billanona, ñimana jaidicue. Jusiñamui jitailla jira, cuena jiaie cominí gaitajanona, illaicominimo fecaitimaci. Naie illaicominí cuena meineitimaci; iadedi darui amani illanona, jilloiticue.

32 Ie llofueoicaigano iena raise cacaiñedimaci; ia naimiemo iena jìcanuana meiruitimaci.

*Jesús ie llofueoicaigano moto imiēna ille rafue
(Mt 18.1-5; Lc 9.46-48)*

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴ Uai oñedimaci. Naimaci moto imiēna illena, naisodo siadocana bitimaci. Meiruillanona, uai oñedimaci.

³⁵ Naimie ana rainadaja mei, ie ecimo naimacina uaidote. Raite:

—Omoi moto imiēna bu iacania, jamai bue isoidimiēna naimie illa. Omoi muillaimana naimie jailla isoilla.

³⁶ Iena naimaci raise uiñollena, nainomo ite cominimona daje urue bai jainanocaida, naimaci motomo naimiēna jonete. Naimiēna menioita, naimacimo llote:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiēna feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

*Jesúdi ie díbeimo itinona llua rafue
(Mt 10.42; Lc 9.49-50)*

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiēna cidicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiēna rairuiñeno. Cue mamecido siño rafuena bu finoia, cuena jeare raire ñaiñeite.

⁴⁰ Cai díbeimo itimiedi cai facaisena ite.

⁴¹ Ero, cuemo omoi duillamona, omoina bu janore canoia, Jusiñamuimona ibana feiñoite. Omoimo nibai jamai jinuina fecaite; iadedi omoina naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

*Jesúdi jeacinona finoñenana llofua rafue
(Mt 18.6-9; Lc 17.1-2)*

⁴² Jesús nia llofueite:

—Cuena como inotinona jeacinona finotaiacadimie iena finoñellena, naimie cimaimo aillue nofici maianona, joraimo corobaillena naimiēna dotacadena, mare.

⁴³⁻⁴⁸ Biena ñaiticue. Nie isoide rafue omoina jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoñeno. Naimacimo ite aiai fioidañena jira, naie irai jaca duiñenamona, nainomo itino jaca duere sefuitimaci.

⁴⁹ Ero, birui omoi duere sefuillamona, cue cominina jai jaidinona uiñoiticue.

⁵⁰ Guille caimaretallena, sal mare; iadedi ie caimano jai iñenia, iena dane caimaretañedicai. Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

*Jesús iima ie aina dotaja rafuena llofua rafue
(Mt 19.1-12; Lc 16.18)*

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica dibeimo jaide. Ailluena comini naimie dine ofillamona, naimie llofueuilla isoi, naimacina llofuate.

² Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Ñiese Moisés micori llote?

⁴ Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñaona dotaite”.

⁵ Jesús uai ote:

—Jusiñamui uaina raise omoi ñnoñena jira, Moisés micori iima ie aina dotajana rairuiñede;

⁶ Iadedi nano dofoconi iese iñede. Enirue finua facaiseconi Jusiñamuidi come iaiaiaiaina finode. Imana finode. Riñaona jiai finode.

⁷ Ie jira Jusiñamuidi jaie llote: “Ie ai diga illena, iima ie moona fañonocaite. Ie eina jiai fañonocaite. Ie ai diga illamona, menade comedi daamiena jai jaide” llote.

⁸ Menade come jai daamiena jai ite.

⁹ Jusiñamui iese iaiaiaiaina itataja jira, iima ie aina dotajana rairuidicue. Riño ie inina dotajana rairuidicue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci.

¹¹ Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode.

¹² Ie inina fañonocaillanona, jiaimiena nie riño uamona, naiñaiño jeacino jai finode.

Jesúdi naimie dine uruiai billana jitailla rafue

(Mt 19.13-15; Lc 18.15-17)

¹³ Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaidimaci. “Naimacina raise cano” ie Moomo lollena jitaidimaci. Ie llofueoicaigano iena rairuidimaci;

¹⁴ Iadedi iena cacajano, Jesús icirite. Jesús raite:

—Uruiai cue dine billesa. Naimacina rairuiñeno. Cuena bie isoi ñnotinodi Jusiñamui cominidimaci.

¹⁵ Bie uruiai abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

¹⁶ Naie uruiai dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

Ucuberedimie Jesús diga ñaia rafue

(Mt 19.16-30; Lc 18.18-30)

¹⁷ Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano.

¹⁹ Moisés micorí llogacínuaína ñnocana jai. Jaie cuete: “Comena meineño. O aiñede riño diga iño. Fiiño. Jiaimiena o llogidoia, tainona lloño. O moo uaina ñno. O ei uaina ñno”.

²⁰ Uai ote:

—Maestro, uruena cue illa facaisemona nana bie llogacínuaína ñnotícue.

²¹ Jesús dinena naimiemo eruaíllanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacínodo o jaiacania, o raise marebicaia-cania, omo ite raruiaina feca. Naie ucubena dueredinomo feca. Cueno o ñnuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide.

²³ Naimie jailla mei, ie llofueoicaiganomo eruaíllanona, naimacimo llote:

—Ucuberedinodi Jusiñamui comínina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue comínidomoi. Ero, ucuberedimiedi Jusiñamui comínina jaillena eo sefuiruite.

²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie comínina jiai raise jainide.

²⁶ Iena ie llofueoicaigano cacajano, Jusiñamui comínina ucuberedino raise jainina jira, “¿Ñiese dueredinodicaidi Jusiñamui comínina jaiticai?” raillamo comeciaina facadimaci. Raijicaíllanona, coniniri raitimaci:

—Nana comíni rana jitailla jira, ¿buca jillobiti?

²⁷ Naimacimo eruaíllanona, Jesús raite:

—Nana comíni daní jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodicai. Nana cai rana faínonocaida, o diga jai jaicabidicai.

²⁹ Jesús uai ote:

—Uanaicino lloiticue. Cueno naimie isiruillamona, cue rafuena naimie lluamona, ie jofona bu faínonocaia, ie amatiaina bu faínonocaia, ie miriñuaina bu faínonocaia, ie moonu bu faínonocaia, ie eina bu faínonocaia, ie uruiaina bu faínonocaia, ie eniruena bu faínonocaia,

³⁰ Jusiñamuimona birui ailluena íbana feiñoite. Duere sefuite; ia naimie isoi cue comínina ailluena jaillamona, naimie jofue iite. Ie amatiái, ie miriñuai, ie eitái, ie uruiái, ie enirue birui iite. Monamo naimie ico caímare íocire jaca iite.

³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoíñedimaci; ia Jusiñamuimona ico jamai bue isoítimaci. Jiaínomo ailluena ra birui iñede; ia Jusiñamuimo comecina facadimaci. Naimacimona jamai bue isoídímaci; ia Jusiñamuimona ico jamai bue isoíñeitímaci.

Jesús ie fiodaillena dane llua rafue

(Mt 20.17-19; Lc 18.31-34)

³² Jerusalémo nia jaíllanona, Jesús uicodo jaide. Nainomo naimie jacíruiño jaíllamona, ie llofueoicaigano raijicaídímaci. Naimaci diga jaidino jacíruiocaida jaidímaci. Naimacina jiai meiniana jacíruitímaci. Ie llofueoicaigano diga ñaianona, naimiemo suille rafuena llote:

³³ —Ero, Jerusalémo jai jaidicai. Monamona billanona, íimana jaidícue; iadedi omoi illaícomíni cuena gaitaitímaci. Gaitaja mei, cue meinellena lloítímaci. Judíuainédino illaícomínimo cuena fecaitímaci.

³⁴ Cueri jifanoítímaci. Cueno tuallaítímaci. Cueno faitímaci. Cueno meineítímaci; iadedi cue fiodailla mei, darui amani illanona, jilloítícue —llote.

Jesús díne Jacobo Juan íaímaiaí billa rafue

(Mt 20.20-28)

³⁵ Naie facaise Jesús dine Jacobo, Juan diga bitiaimaia. Iaimaia moodi Zebedeo. Raitiaimaia:

—Omo coco jicalle rafue cocoena finuana jitaídico.

³⁶ Jesús uai ote:

—¿Nie isoide rafuena jitaídico?

³⁷ Uai otiaimaia:

—Illaimana o jailla mei, o ecimo coco illena o llwana jitaídico. Damie o nabeimo. Jaimie o jarifebeimo. —Jaino afemo iaimaia illena, iese llotiaimaia.

³⁸ Jesús dinena llote:

—Omico jicanuana raise uiñoñedomico. Cue eo duere sefuiticue. Llegi cacaiticue. ¿Ie isoi duere sefuiacadomico? ¿Ie isoi llegi cacaiacadomico?

³⁹ Uai otiaimaia:

—Ji. Sefuiacadico.

Jesús dinena raite:

—Cue isoi duere sefuitomico. Llegi cacaitomico;

⁴⁰ iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹ Iena jiaie llofueoicaigano cacajano, naie iaiaiairi iciritimaci.

⁴² Jesús nana naimacina uaiduanona, raite:

—Nana illacominidi naimaci anamo itinona ocuicabidimaci;

⁴³ iadedi omoi dine iese iñena. Omoimona bu imiēna iacania, omoi mullaimana naimie jaisoillasa.

⁴⁴ Omoimona bu imiēna iacania, omoina naimie canocana jaisoillasa.

⁴⁵ Cuemona fueo. Biñedicue, cominina cue ocuillena; iadedi cominina canuaibidicue. Cue jitailla jira, nana comini facaina fioldaisabiticue. Naimaci jeacinomona naimaci jillobillena, fioldaisabiticue. Ailluena comini cuena inuamona, jilloitimaci. Coninina omoi canua —llote.

Jesúdi Bartimeona jillotaja rafue

(Mt 20.29-34; Lc 18.35-43)

⁴⁶ Oni jaillanona, Jericó railla nairaimo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisinidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena.

⁴⁷ Nazaret ie Jesús jaillana naimie cacajano, ado cuirioide:

—David micori Jitona o illamona, Jusñamuimona o billa jira, cuena duenai. Cuena cano.

⁴⁸ Naimie llicaillena, Jesús diga jaidino naimiēna lletade; iadedi eo cuirioide:

—Maestro, David micori Jitona o illamona, cuena duenai.

⁴⁹ Naimiēna cacajano, Jesús naidadajanona, llote:

—Naimiēna cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

⁵⁰ Iena cacajano, ie emodomo itiroina duiñuanona, raire naidacaida, Jesús dine bite.

⁵¹ Naimiemo Jesús jicanote:

—¿Niese ona cue nibaiana jitaídico?

Uai ote:

—Maestro, cioacadico.

⁵² Jesús dinena uai ote:

—Cuena o inua jira, jai jillodio. Mai jai. —Iecon naimie jai cide. Jesús diga jaidino diga naimie jiai jaide.

11

Jesús illaïma isoi Jerusalémo jailla rafue (Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iaïreicaidimacimo, Betfagé railla nairaimo ie llofueoicaigano diga Jesús ride. Betania nainomo jiaï ite. Olivos railla anedumo naga nairai iaïmaiaï ite. Ie llofueoicaiganomona Jesús menamiëna orede.

² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati.

³ Omicomo: “¿Bue ñellena iena suiñodomico?” bu jïcanoia, llono: “Coco Nama iena jitaide. Nailli iena raïre abido oretaite llote”.

⁴ Naimie llua isoi, jaidiaïmaiaï. Naisomo jofo nasemo burritona baillanona, iena suiñodïaïmaiaï.

⁵ Ie facaise nainomo itino jïcanote:

—¿Bue ñellena burritona suiñodomico?

⁶ Jesús llua isoi uai otiaïmaiaï. Ie muidona:

—Jee —raitimaci.

⁷ Burritona atidiaïmaiaï. Ie emodomo naimie llofueoicaigano naimaci ñiroi jobianona, ie emodomo Jesús rainadate.

⁸ Naimiëna iobitallena, illaïma isoi naimie jaillena, diga comini, imaci ñiroi diga, naiso motomo jobedimaci. Jiaïno nai fuemona raforona uanona, naiso motomo jobedimaci.

⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraïma billa! Jusiñamui mamecido bitimie eo mare.

¹⁰ Cai illaïma David micori ifomo caina sedallena, damie billemo birui ocuiridicaï. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo ñillena jaide.

Jesús higuera railla riarana faidua rafue (Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite.

¹³ Arena higuera railla riarana cïuanona, iena jïbuide. Como firuide; ia naie llisilladi ñede. Ie llisilla facaise nia ñede.

¹⁴ Ie jira naie riarana llote:

—Biemona jaca llisiñeite. —Ie llofueoicaigano naimie lluaana cacadimaci.

Jesúdi Jusiñamui jofomona damieriëna dotaja rafue (Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaïaïna fecallena, naimiëmo toïca llaudaïaïna fecallena, nainomo comini jaisoidimaci. Naie comina ibatajanona, ofomaïaïna, toïca llaudaïaï diga, damierie fecauidimaci. Iena Jesús cïuanona, naimaci mesaïaïna oni caicode. Ucugina fecauidino rairacuai jiaï oni caicode.

¹⁶ Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide.

¹⁷ Naimacina llofujete:

—Ie facaina lloraima micori Jusiñamui llogacino jaie cuela: “Cue jofo ite, nainomo nana comini cuemo jïllena” cuela. Ero, ailluena omoi ibataja jira, naimie jofona firiruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana ebiruillanona, rajjicaidimaci. Ie jira judíuai illaicomini naimiena jaciruillamona, naimiena nia meinenidimaci.

¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riaru duilla rafue

(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riaru duillana ciotimaci. Nana ie jainao diga duillana ciotimaci.

²¹ Jesús navui are llwana Pedro uibiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina inocana jai.

²³ Uanaicinona omoimo lloiticue. Jusiñamui llwana raise bu inoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite.

²⁴ Nie isoide rafue Jusiñamuimo omoi jicajia, naimie iena finuana omoi inuamona, iena naimie finoite.

²⁵ Jusiñamuimo o jiacania, jiaimie diga o rafue ia iena feita. Ie isoi cai Moo Jusiñamui omoimo ite jeacino jiai feitaite;

²⁶ Iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamac. Diese billanona,

²⁸ jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

³⁰ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llwana inoñedomoi?”

³² “Comini” cai fairioia, bene itino caina nibai meineitimaci, Juan micoridi Jusiñamui facaina lloraíma naimaci railla jira.

³³ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

12

Jesúdi marañede maijiraini rafuena llua rafue

(Mt 21.33-46; Lc 20.9-19)

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaité. Jiairuido uvas ijina eenollena, eniruemo ifona raite. Naie illina raise

eruaillena, tidacana finode. Iena sedallena, ibatajanona, jiaïnomo fecade. Ie mei jiaïe eniruemo jaide.

² Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riara llisilla ollena;

³ iadedi naie sedarainidi ie mullaimana fatimaci. Ie mei naimiemo riara fecaño naimiena abido oredimaci.

⁴ Ie mei patrón jiaïe mullaimana orede. Naimie ifogina bofedimaci. Naimiena jeare finodimaci.

⁵ Ie mei patrón jiaimiena orede. Naimiena meinetimaci. Ie mei ailluena mullaïaina orede. Damieriena fatimaci. Damieriena meinetimaci.

⁶ Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiena oretaiticue” patrón comecina facade.

⁷ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci.

⁸ Naimaci dine naimie rilla mei, naimiena meinetimaci. Ie mei ie abina illimona jino dotadimaci.

⁹ Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jiaïnona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoïna jaie cuete. Ie cuegafuena raise facañedomoi. Naimie micori cuega:

Jofo finoraini jitaiñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona: “Eo mare” raiticai

cuega. Jusiñamui cominina damierie jaillana naimie micori cuete. Jusiñamui ore-tagamiena damierie jitaiñenamona, naimie cominina jaiñeitimaci; iadedi Jusiñamui ore-tagamiena ailluena ñnuamona, naimie cominina jaitimaci. Ero, Jusiñamui facaina lloraima micori caïna cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

¹² Judíuai illaïcomini iena cacajanona, Jesús naimacina ñaïana naimaci uiñuamona, naimiena gaitaacadimaci; ia cominina jaciruitimaci. Ie jira naimiemoni jaidimaci.

Jesúmo gobiernomo ucubena fecajana jïcanua rafue

(Mt 22.15-22; Lc 20.20-26)

¹³ Judíuai illaïcomini jailla mei, dajerie fariseuai cominina Jesús dine oredimaci. Illaïma Herodes dibeïmo itinona oredimaci. Naimie raise uai oñenia, naimiena duere finollena, Jesúsna facaciacadimaci.

¹⁴⁻¹⁵ Naimiemo llotimaci:

—Maestro, uanaicïnona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jïcanoiacadicai. Dani Jusiñamuïna sedadicai; iadedi romanuai railla nairai anamo birui cai illa jira, ¿naimaci illaïma Césarmo ucubena cai fecajana rairuidio? Caïmo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoi? Ucube cuemo acata.

¹⁶ Ie jira acatatimaci. Naimacimo jïcanote:

—¿Bu ie joreño nainomo ite? ¿Bumo jainaïaide bie cuega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuïmo ille —raite.

Naimie lluaana cacajano, naimie raise uai ua jira, ieri rajicaïdïmaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

¹⁸ Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

¹⁹ —Maestro, cai facaina Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

²⁰ Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiaínide fiodailla.

²¹ Ie emodo imie ie ama feciñoona ote. Naimie uruiaínide jiaí fiodailla. Naie siete digamiedemona iese sefuide.

²² Uruiaínide nana fiodailla. Ja muidomo naie riño jiaí fiodaite.

²³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁴ Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

²⁵ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi naie siete amatiaí iitimaci.

²⁶ Fiodaitino ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

²⁷ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiaí jillotaite. Fiodaillamona jilluana omoi raise uiñoñedomoi —llote.

Jesús nanoca llogacinona llofuia rafue

(Mt 22.34-40)

²⁸ Naie facaise Moisés micori llogacinona llofueraíma Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaímona, ¿nie llogacino ua nanoca llogacinona?

²⁹ Jesús dinena uai ote:

—Moisés micori jaie cuega: “Israel comini, bie rafuemo cacarei. Cai Nama Jusiñamui jaca dajede.

³⁰ Omoi jitailla jira, nana omoi comeciaí diga, cai Nama Jusiñamuina isirui. Naimiemo omoi comeciaina eo faca”.

³¹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiaí isirui”. Bie mena llogacino jiaie llogacinuai baifemo faite.

³² Naie llofueraíma dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

³³ Cai jitailla jira, nana cai comeciaí diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicaí. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o inocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

Jesús dinena fariseuai cominimo jicanua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Niese Moisés micorí llogacinona llofueraini Cristona raitimaci? ¿Niese naimiedi David micorí jitona raitimaci?

³⁶ Jusiñamui Joreñodi David micorína ñaitatajanona, David micorí llote:

Jusiñamuidi cue Namamo llote: “Illaimana o illamona, cue nabei dine ana rai.

Ona ñinoñedino o anamo itataiticue”.

³⁷ “Cristodi cue Nama” David micorí raite. Iese naimie micorí railla jira, Cristo David micorí afemo faite. Naimiedi jamai David micorí jitoñede; ia jiai ie Nama. —Nainomo itino naimie llofuiana iocire cacareidimaci.

Jesúdi judíuai illaicomínina ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micorí llogacinona llofuerainimona abina rairui. Illaicomínina naimaci itimacidena, naimacina comíni cioillena, eo mare iniroina jitaacacabidimaci. Níne naimaci macaria, naimaci jamai bue isoiñedinona itimacidena, comíni naimacina uaiduana gaidimaci.

³⁹ Comíni naimacimo acarillena, ofiracomo uicomo raiaacadimaci. Rafue ia: “Jamai bue isoiñedicaí” raillamo comecina facajanona, rafue nama ecimo raiaacadimaci.

⁴⁰ Feciñuaimona rana ocabillanona, naiñaiñuaina duere finodimaci. Naimiena eo sedadimacidena, Jusiñamuimo are jicabidimaci. Iese naimaci icabilla jira, Jusiñamui naimacina jiaie comíni baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comíni ucubena joniamo eruaide. Ailluena ucuberedino ailluena ucubena jonetimaci.

⁴² Ie facaise eo duerede feciño menaruñu jonete.

⁴³ Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comíni jonia baifemo jonete.

⁴⁴ Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaíno baifemo jonete.

13

Jesúdi Jerusalémo ite Jusiñamui jofo judaiana llua rafue

(Mt 24.1-2; Lc 21.5-6)

¹ Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiai co ebirede. Bico eo ebire ciode.

² Jesús dinena uai ote:

—Bie jofo birui eo mare; ia nana bie jofomo ite noficiai ico judaisite —llote.

³ Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoína bie rafuena bu jifueñellena, omoi abina rairui.

⁶ Ailluena comíni cue mamecido billemona: “Cristodicue” raitimaci. Diga comínina jifueitimaci. Iemona omoi abina rairui.

⁷ Jobaimiaí illena fidiitomoi; iadedi jaciruiño. Iese suite; iadedi abido nia biñeiticue.

⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime guitimaci. Iese suia, omoi duere sefuillifue omoimo suite.

⁹ Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci. Cuemo omoi duilla jira, omoina gaitajanona, omoina duere finollena, illacomini dine omoina uitimaci; ia naimacimo cue rafuena lloito moi.

¹⁰ Diga comini cue rafuena nana nairaimo lloitimaci, nana nairai iena cacaillena. Ie mei abido biiticue.

¹¹ Naie illacomini dine omoi ia, juez dine omoi ia, omoi abi ridollicinomo omoi comeciaina jarire facañeno. Naie facaise omoi ñaillicinona uiñoitomoi. Dani omoi comeci icinodo ñaiñeitomoi; ia Jusiñamui Joreño uaido ñaitomoi.

¹² Cuen a ñnotomoi; ia ailluena cuena ñnoñeitimaci. Cuen omoi ñnua jira, omoina enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruaidi naimaci moon, naimaci eina meinetallena, naimacina llogidoitimaci.

¹³ Cue cominina omoi illamona, nana nairai omoina enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue.

¹⁴ Cue lluomo cacarei. Jusiñamui facaina lloraimadi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omoi cianona, naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi.

¹⁵ Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno.

¹⁶ Aneduai dine raire rillena, illimo omoi ia, abido jofomo biñeno, omoi iniroi omoi diga uillena.

¹⁷ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite.

¹⁸ Eo duere sefuiñellena, Jusiñamuimo omoi jicano, rollime facaiseconi bie rafue suiñellena.

¹⁹ Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitimaci.

²⁰ Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ 'Te facaise omoimo bu raia: "Jadi, Jusiñamui facaina lloraima benomo birui bairede. Naimiedi Cristo", iena ñnoñeno, Jiaimie raia: "Oni batine Cristo birui bairede", iena ñnoñeno.

²² Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

²³ Ie jira omoi abina rairui. Ero, bie rafue nia suiñenia, iena omoimo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

²⁴ Naie duere sefuilla facaise meinocni, jitoma lligaiñoñeite. Fivui jiai lligaiñoñeite.

²⁵ Monamona ucuai ana llujite. Nana naie radi jaidisite.

²⁶ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

²⁷ Cue jaienisaia cue ecimona oretaiticue. Cue fetocano diese naganomona ofitaitimaci.

²⁸ 'Higuera railla riaramona omoi fueo. Bie eniruemo naie riara firuillamona, fiemona raire illana uiñotomoi.

²⁹ Ie isoide. Bie rafue ico suia, cue billirui iairei illena uiñoitomoi.

³⁰ Uanaicinona omoimo lloiticue. Nana bie rafue suille facaiseconi bie nairai nia iite.

³¹ Mona enirue diga fuite; iadedi cue lloga uai jaca suite.

³² Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote.

³³ Abina rairuicana jai. Naimie omoina canollena, Jusiñamuimo jiai jicabi. Cue billirui omoï uiñoñena jira, iemo ocuiri.

³⁴ 'Iena omoï raise uiñollena, bie rafuena lloiticue. Patrón jiaie eniruemo jaide. Nia jaiñenia, ie mullaiaina ie jofona sedatate. Nagamie ie maijille ocuide. Jofo nasena sedadimie mo naimie billemo raise ocuirillena llote.

³⁵ Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite.

³⁶ Ebena naimie biite. Inidimacimo naimaci baisaibi raillanona, naimaci jaca ocuirilla.

³⁷ Ie isoide. Ebena biiticue. Cue abido billirui omoï uiñoñena jira, iemo jaca omoï ocuiri.

14

Judíuai illaicomini Jesúna gaitallena, siadua rafue (Mt 26.1-5; Lc 22.1, 2; Jn 11.45-53)

¹ Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana começillena, naie rafue ite. Judíuai illaicomini Jesúna jifuiano gaitaacadimaci. Naimiena meineiacadimaci. Iena siadua mei,

² raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuiritimaci. Nia sedaiticai.

Jesúmo riño caimare soride ra totaja rafue (Mt 26.6-13; Jn 12.1-8)

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁴ Damierie iena cianona, iciritimaci. Coniniri dani ñaitimaci:

—Naie ra jamai dotade. Jai faifide.

⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

⁶ Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode.

⁷ Omoï diga dueredino jaca itimaci. Niruido o jitaia, naimacina canoredomoi; ia omoï diga jaca iñeiticue.

⁸ Cue facaina naiñaiño finoacana diese jai finode. Nia fioidañedicue; ia cue fioidaillirui facaina naiñaiño iese finode.

⁹ Omoïmo uanaicinona lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue (Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini dine jaide.

¹¹ Iena cacajano, iobidimaci.

—Iena o finoia, omo ucubena fecaiticai —lloitimaci. Iemona Jesúna gaitatalliruimo Judas ocuiride.

Jesúdi ie fiódaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaia fajarui illanona, Jesúmo ie llofueoicaigano jicanote:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca.

¹⁴ Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ”

¹⁵ Ie mei omicomoo afebebamo ite aillue cuartona acataite. Na raruii diga ite. Nainomo cai guille fino.

¹⁶ Jesús llua isoi jaidiaimaia. Jerusalémo rilla mei, naimie llua isoi baitiaimaia. Pascua rafue guille finodiaimaia.

¹⁷ Nairui jitoma ana itemo, ie llofueoicaigano diga, Jesús nainomo guisaide.

¹⁸ Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

¹⁹ Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰ Uai ote:

—Omoimona damie bie platomo cue diga llomenico diga mutade.

²¹ Jusiñamui facaina lloaia micori cuega isoi, monamona jai billamona, fiódaiticue; iadedi cuena gaitaitimie eo duere sefuite. Naimie jeicinegadena, cuemona mare.

²² Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

²³ Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci.

²⁴ Naimie raite:

—Cue fiódailamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie.

²⁵ Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue.

Jesúdi Pedro naimiena januana llua rafue

(Mt 26.30-35; Lc 22.31-34; Jn 13.36-38)

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide.

²⁷ Naimacimo llote:

—Cuena faionocaitomoi. Jusiñamui facaina lloaia micori iena jaie cuega: “Toica llaudaia sedaraimana meinetimaci. Naimie toinaia uaficaida jaitimaci” cuega. Naimie micori caina cuete.

²⁸ Ero, fiódailamona cue jillua mei, omoi uicodo Galileamo jaiticue, nainomo omoi diga dafaifillena.

²⁹ Pedro uai ote:

—Nana jiaino ona faionocaia, ona jaca faionocaiñeiticue.

³⁰ Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuena janoitio.

³¹ Pedro dinena riire llote:

—O diga cue fiódaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue

(Mt 26.36-46; Lc 22.39-46)

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede.

³⁴ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jide:

³⁶ —Ore Moo, nana rana finoredio. Cuenallegi cacaitañeno. Cue jitailla isoi cuena finoñeno; iadedi o jitailla isoi cuena fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo.

³⁸ Iniñeno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena —llote.

³⁹ Ie mei dane jillena jaide. Ailli naimie jia isoi, dane jide.

⁴⁰ Ie llofueoicaigano dine dane billanona, naimaci uisi lliroilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede.

⁴¹ Dane jia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaille facaise jai ite. Jusiñamui jitailla jira, cuena ja gaitajanona, naimiena inoñedino anamo ja iticue.

⁴² A naidacai. Maiña. Cue gaitataitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci.

⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

⁴⁶ Ie jira Jesúna gaitadimaci.

⁴⁷ Iena cuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote.

⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuenallegi gaitallena, firiraimadicueta cuemo omoi billa.

⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuenajai omoi gaitajamona, Jusiñamui facaina lloraini micoriai cufagua suite.

⁵⁰ Ie facaise nana naimie llofueoicaigano naimiena fainonocaillano, aisidimaci.

Jesús jinafona conirue racaja rafue

51 Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci;

52 ia ie iniroina fainonocailanona, taimiena aiside.

Jesúdi judíuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

53 Jesúna gaitaja mei, Jusiñamui diga nanoca ñairaíma dine naimiena uitimaci. Nana judíuai illaicomini itimaci. Nanoca ñairaini itimaci. Einamací jiaí itimaci. Moisés micorí llogacinona llofueraini jiaí itimaci.

54 Pedro naimaci jinafona aarena racade. Jusiñamui diga nanoca ñairaíma nairaibirimo jaide. Jofono sedadino diga nainomo ite iraimo agaide.

55 Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci.

56 Diga comini Jesúna llogidotimaci; ia tainona llotimaci. Daje isoi lloñedimaci.

57 Damierie billanona, tainona llogiduanona, raite:

58 —Bimie llwana cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiaie finoiticue. Comini iena finoñeitimaci”.

59 —Iese llotimaci; ia daje isoi lloñedimaci.

60 Naimaci motomo Jusiñamui diga nanoca ñairaíma naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

61 Jesús dinena uai oñede. Naie ñairaíma jicanote:

—¿Odi Cristodio? ¿Odi Jusiñamui Jitodio?

62 Jesús uai ote:

—Jii, naimiedicue. Monamona jaie cue billamona, imana jaidicue; ia ico jiairuido illaímana cue illena, Jusiñamui ecimo cue raillena, omoi nairaí cioitimaci. Mona uillie mo cue abido billena jiaí cioitimaci.

63 Iena cacajanona, icirillanona, naie nanoca ñairaíma dama ie iniroina cuaranote. Raite:

—Jiaíno naimiena llogidollena jai jitañedicaí.

64 Jusiñamuina naimie jeare ñaiana jai cacadomoi. ¿Niese naimiena raitomoi?

Jiaie illaicomini dinena:

—Naimie fiodaillesa —llotimaci.

65 Ie facaise damierie naimiena tuallaítimaci. Ie uiecona íbaila mei, naimiena ducoídimaci. Raitimaci:

—Bu o ducoia caimo llono.

Naimiena gaitadino dinena naimiena jiaí ducoídimaci.

Pedrodi Jesúna janua rafue

(Mt 26.69-75; Lc 22.56-62; Jn 18.15-18, 25-29)

66 Naie facaise Pedro nairaibirimo ite. Naie nanoca ñairaíma mullaíñuaimona dañaiño nainomo billanona,

67 Pedro agaillana ciode. Raite:

—Nazaret ie Jesús cominidio.

68 Pedro iena januano, raite:

—O llwana uiñoñedicue. Iena raise cacaiñedicue.

Ie mei nase fuedo jaide. Naie facaise itava dacaiño ñaite.

69 Naie mullaíño naimiena dane ciuanona, nainomo jamai itinomo llote:

—Bimiedi Jesús ie llofueoicaigano imie.

70 Iena Pedro dane janote. Dally illanona, nainomo jamai itino Pedromo llote:

—Odi Galilea imiedio. Jesús diga jaicabidio.

71 Uai ote:

—Uanai cue lloñenia, Jusiñamui cuena duere finoite. Uanaicinona cue llwana naimie uiñote. Ero, omoi llogamiena uiñoñedicue.

⁷² Ieconí iitava dane ñaite. Iena cacajano, Pedro Jesús llwana uibiñote. Jaive naio Jesús Pedromo llote: “Hitava menacaiño nia ñaiñenia, dacaiño amani cuena janoitio”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

¹ Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

² Pilato naimiemo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llostimaci.

⁴ Pilato dinena naimiemo jicanote:

—¿Ñiese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fiodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamiena jamai jino orede.

⁷ Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite.

⁸ Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci.

⁹ Pilato jicanote:

—¿Bu jino cue oretallena jitaidomoi? Omoi judíuai railla illaimana nibaí jitaidomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúsni uradoillana uiñote. Naimaci Jesúsna meiniacanana jiai uiñote.

¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci.

¹² Iena cacajano, Pilato naimacimo jicanote:

—¿Ñiese bimiena cue finuana jitaidomoi? Naimiedi omoi judíuai illaima raillamie.

¹³ Ado llostimaci:

—¡Naimiena corai!

¹⁴ Pilato dane jicanote:

—¿Ñie isoide marañede rafuena finode? —Iena cacajano, ado ibi llonoidimaci:

—¡Naimiena corai!

¹⁵ Naimacina iobitallena, naimaci jitailla jira, Barrabás jino orede; iadedi Jesúsna sechedotaja mei, naimiena coraillena orede.

¹⁶ Soldaduai naimiena gobernador jofo fo uillanona, nana soldaduai nainomo ofidimaci.

¹⁷ Jiduirede iniroi naimiemo jitadimaci. Eecuaimona niga nuiciraina naimie ifogimo jitadimaci.

¹⁸ Naimiena jifanoduanona, naimiena uaidotimaci:

—¡Jadi, judíuai illaíma!

¹⁹ Radosi díga ie ifogímo buta-butadímaci. Naimiena tuallaitímaci. Naimie illaímana itena, naimiena sedallena, caiñici ifodo raiedímaci.

²⁰ Jesúna naimaci jifanodua mei, naimie jiduirede iniroina duiñodímaci. Nano naimie iniroina dane abído naimiemo jítadímaci. Ie mei naimiena coraíllena oni uitímaci.

Jesúna coraía rafue

(Mt 27.32-44; Lc 23.26-43; Jn 19.17-27)

²¹ Jerusalémona naimaci jaillanona, jamai bitímiemo dafaífidímaci. Naimiedi Simón. Cirene railla enirue imie. Naimie jito iaímaiaídi Alejandro iaímaiaí Rufo díga. Jerusalén onifemona naimie billanona, naimiemo dafaífidímaci. Naimiena Jesús uiga cruzna rocatatímaci.

²² Gólgota raillanomo jaidímaci. Ifocoraina eruaílla jira, iese mamecírede.

²³ Nainomo rillanona, ie abí isirena cacaiñellena, vinomo erírede rana faianona, Jesúmo fecadímaci; iadedí naimie iena jiroñede.

²⁴ Ie mei naimie cruzmo coraía mei, cruzna naidania mei, naie soldaduai naimie iniroi daní coninímo fecasite. Naie iniroi bu uille raillanona uíñollena, jifanododímaci.

²⁵ Jitoma nia fuirí daidemo, naimiena coraídímaci.

²⁶ Cruzmo ie llogíduafuena jonetímaci. Jai cueba: “Judíuai cominí Illaíma”.

²⁷ Ie mei mena firiruide iaímaiaína coraídímaci. Damie Jesús nabeímo coraíca. Jiaímie Jesús jarifebeímo coraíca.

²⁸ Iemona Jusiñamui facaina lloráima micorí jaie cueba rafue suide. Cueba: “Maraiñedíno isoi naimie jai ite”.

²⁹ Naisodo jamai jaidíno Jesúna mameritímaci. Mamerillamona, ifogíaina jaidídímaci. Raitímaci:

—Navui raisoidío: “Jusiñamui jofona judaíticue. Darui amani illanona, iena dane finoíticue” raisoidío.

³⁰ Ie muidona dama o abína mai jillota. Cruzmona ana bí.

³¹ Ie facaise Jusiñamui díga nanoca ñairainí naimiena jifanododímaci. Moisés micorí llogacino llofuerainí naimiena jiaí jifanododímaci. Raitímaci:

—Jiaíe comínina jillotate; ia dama naimie abína jillotanide.

³² Naimiedi Cristodena, naimiedi cai judíuai cominí illaíma raillamiedena, dama niadedí cruzmona ana ie billa. Iena cai cioia, naimiena ñnoíticai. —Iese naimiena jifanododímaci. Naimie díga coraícamie iaímaiaí naimiena jiaí jeare ñaitiaímaiaí.

Jesús fiodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitíbicaide.

³⁴ Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena faínonocaidío?” raite.

³⁵ Iena cacajano, nainomo jamai itinomona damierie raitímaci:

—Naimie jaie Jusiñamui facaina lloráima Elíana uaidote —raitímaci.

³⁶ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticai. Elías naimiena jillotajaíbillena uíñoiacadícaí.

³⁷ Ie facaise ado cuirioita fiodaite.

³⁸ Naie facaise Jusiñamui jofomo ie fetaca iniroife ana anaba jillacímo motodo menafe cuararide.

³⁹ Jesúna sedallena, nainomo capitán ite. Jesúmo eruaíllanona, Jesús fiodaillana cíode. Raite:

—Uanai bimiedi Jusiñamui Jito.

⁴⁰ Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiaí ite. Naiñaiñodi Jacobo ei. Naimiedi jamamie. Naiñaiñodi jiaí José ei. Salomé jiaí ite.

⁴¹ Galileamo Jesús navui illa facaise naie riñoniai naimie diga jaisoidimaci. Naimiena canoidimaci. Jerusalémo Jesús billanona, ailluena riñoniai naimie diga jiaí bitimaci. Ie fiodaillana jiaí cioidimaci.

Jesús raiafomo jonia rafue
(Mt 27.57-61; Lc 23.50-56; Jn 19.38-42)

⁴² Jitoma ana itemo, sábado rille jai iaírei illanona,

⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade.

⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

⁴⁵ —Jesús jai fiodaite —capitán railla mei, Pilato Jesús abina Josémo fecallena llote.

⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade.

⁴⁷ María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue
(Mt 28.1-10; Lc 24.1-12; Jn 20.1-10)

¹ Sábadoruimo jitoma sojicaidemo, María Magdalena caimare soride rana ibade. Jacobo ei, María jiaí ibade. Salomé jiaí ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade.

² Domingo jitiramo jitoma como bairedemo, Jesús raiafo dine naiñaiñuai jaide.

³ Jaillanona, coniuaimo jicanote:

—¿Bu noficina caina oni ñuitalle raiafomona?

⁴ Raiafo dine rillanona, iemo eruaillanona, nofici oni ñuitacana ciode. Naie nofici eo aillue.

⁵ Raiafomo jaillanona, naiñaiñuai coniruena eruidimiena nabeimo raillana ciode. Naimie are userede iniroina jitade. Naimiedi Jusiñamui jaienici. Naiñaiñuai jacinaite.

⁶ Nainomo itimie dinena raite:

—Jacinañeno. Nazaret ie Jesúna jenodomoí. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda.

⁷ Naimie llofueoicaiganomo iena lluai. Ua Pedromo llono. Galileamo omoi uicomo naimie jaite. Omoi naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumo lloñede.

Jesús María Magdalenamo bairia rafue
(Jn 20.11-18)

⁹ Domingo jitiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede.

¹⁰ Naiñaiño naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaiño llua mei, iena iñoñedimaci.

Mena llofueoicaiganomo Jesús bairia rafue

(Lc 24.13-35)

¹² Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiaia naisomo macaria, iaimaiaimo bairede.

¹³ Jerusalémo abido iaimaiaia rilla mei, jiaie llofueoicaiganomo iena llotiaiaiaia; ia ñnoñedimaci.

Jesús ie once llofueoicaiganomo bairia rafue

(Mt 28.16-20; Lc 24.36-49; Jn 20.19-23)

¹⁴ Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote.

¹⁵ Naimacimo llote:

—Nana nairaiaimo jai. Nana cominimo cue mare rafue llocana jai.

¹⁶ Cuen a ñnuamona, bautizagano diese Jusiñamuimona duere sefuiñeitimaci; iadedi Jusiñamui cuena ñnoñedinona duere finoite.

¹⁷ Cuen a ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci.

¹⁸ Jaiona naimaci llinoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

Jesús monamo jailla rafue

(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide.

²⁰ Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cuega rafue jai fuite. Marcodicue.

LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

¹⁻⁴ Teófilo, cue isirui ga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciotimaci. Iena llocana jiai jaidimaci. Naimacimona bie rafue raise uñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uñua jira, uanaicinona o raise uñollena, bie cartana jai cueticue. Iese birui cue comeci jitaide.

Jusiñamui jaienici Juan Bautista micori jeicillena llua rafue.

⁵ Jesucristo nia jeicinenia, Zacarías illa facaise Herodena mameciredede illaimadi. Judea railla eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijuide. Naimie aidi Elisabet. Naiñaiño jaie ite usumadi Aarón micori. Aarón micoridi Jusiñamui diga nano ñairaima.

⁶ Jusiñamuimona iaimaiaia mare, nana naimie lloga uaina raise iaimaiaia inua jira.

⁷ Naiñaiño oiniñona jira, uruenidiaimaiaia. Jiai jai uaicima iaimaiaia.

⁸ Zacarías facai ite comini maijia facaise ia, Jusiñamui jofo dine naimie maijiaide.

⁹ Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona dan Jusiñamui diga ñairaini naimiena fetodimaci. Iemei naimie fo jaide.

¹⁰ Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci.

¹¹ Ieconí cai Nama Jusiñamui jaienici di naie ra boano nabeimo Zacaríamo bairede.

¹² Naimiena cianona, Zacarías jacinaite.

¹³ Jaienici naimiemo llote:

—Zacarías, jacinañeno. Jusiñamui o jiacinona jai cacade. Iemona o ai uruesite. Himana jocoite. Juan o jitalle naimie mamecidi.

¹⁴ Iemona o comeci caimare iite. Iobitio. Ailluena comini naimie jeiciari iobitimaci.

¹⁵ Jusiñamuimona naimie jamai bue isoñeitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite.

¹⁶ Cai Nama Jusiñamui dibeimo ailluena Israel cominina naimie itataite.

¹⁷ Jusiñamui jitaillacinona finocana jaite. Elíamo Jusiñamui Joreño jaie siño uai illa isoi, naimiemo iite. Jusiñamui rafuena naimie llumona, damierie, naimaci jaiagai isoi, Jusiñamuina inoitimaci. Ailluena Jusiñamui uaina jai inoñedimaci; ia damierie birui inoitimaci. Naimaci comeci Jusiñamui dibeimo meidoitimaci. Iemona cai Nama Jesucristo bia, naimiena inoitimaci.

¹⁸ Zacarías dinena jicanote:

—¿Ñiese o llua suillena uñoticue? Jai uaicimadicoco.

¹⁹ Jusiñamui jaienici dinena uai ote:

—Gabrieldicue. Jusiñamuimona biticue. Cuen a oretate, bie mare rafuena omo llollena.

²⁰ Ero, cue uaina o inoñena jira, uainitio, o jito jeicille dinori. Jiairuido bie rafue suite.

²¹ Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci.

²² Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua uñotimaci. Naimie ñaiñeno ite.

²³ Jusiñamui jofomo naimie maijia facaise fuilla mei, ie jofomo abido jaide.

²⁴ Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona:

²⁵ “Cue uruesilla jira, iena nia buna lloiacaiñedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreñaona jai ñaiñeitimaci”.

Jusiñamui jaienicí Jesús jeicillena llua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienicí Gabrielna orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiño lote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Iena cacajanona, naiñaiño jacinaita. Iena naiñaiño raise cacaiñena jira, iemo comecina facade.

³⁰ Gabriel dinena lote:

—Jacinaiño. Jusiñamui ona duenaite.

³¹ Birui uruesitio. Himana jocoitio. Naimie mamecina jitaitio Jesúsna.

³² Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite.

³³ Illaimana illamona, Israel railla nairaia jaca sedaite. Naimie ifomo jiaimie jaca iñeite.

³⁴ María uai ote:

—Hima diga nia iñedicue. ¿Niese bie nibaille?

³⁵ Gabriel lote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiaí marenite. Naimiedi Jusiñamui Jito.

³⁶ O comini iñaiño, Elisabet, ie uacitaila facaise jiaí jai urueside. Naiñaiño jai jionaide; ia jai seis fivui naiñaiño uruesilla ite.

³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucino cuemona mare.

Ie facaise Gabriel naiñaiño mona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide.

⁴⁰ Zacarías jofomo rillano:

—Itio —raillanona, Elisabetna uaidote.

⁴¹ Elisabet naiñaiño uaina cacajano, ieconi naiñaiño jeraimo ite urue iena jiaí uiñuamona, niraide. Ie facaise Jusiñamui Joreño anamo Elisabet jai ite.

⁴² Iese illamona, María uruesillana uiñote. Naiñaiño ado lote:

—Jusiñamui ona eo marena canoite. O uruena marena itataite.

⁴³ Jamai bue isoidicue; ia, odi cue Jilloitaraíma ei illanona, cue dine bitio. Iena cuemo nia lloñedio;

⁴⁴ ia, cuena o uaiduanona, iobillamona cue jeraimo ite uruedi niraide.

⁴⁵ Cai Nama omo llotataga uaina suillana o ñnua jira, Jusiñamui ona eo marena canoite. —Jusiñamui Joreño naiñaiño illamona, iena lote.

⁴⁶ María dinena uai ote:

Caiñai Nama eo mare. Naimiemo iobillacinona fecaacadicue.

⁴⁷ Naimiedi cue Jilloitaraímana jira, naimieri iobidicue.

⁴⁸ Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

49 Naimiedi siño. Naimiedi mareuidimie. Cue facaina eo mare rafuena finode.
 50 Naimiena inotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena inotinona duenaite.
 51 Diga siño rafuena finoite. Abi iedotino comeciai facajacinona llucaitaite.
 52 Naimiedi illaicominina oni dotaite; ia jamai bue isoidinona jamai bue isoinedinona itataite.
 53 Dueredinona eo canoite; ia duenidinomo buena fecañeite.
 54 Duenaillamona, cai Israel cominina feitañeite.
 55 Cai jaiagamomo naimie jaie llua isoi, birui caina canoite.
 Abraham micorimo jaie llote: “Ona duenaiticue. O cominina jaca duenaiticue”
 María llote.
 56 Elisabet diga davui amani naiñaiño fiebide. Ie mei ie jofomo abido jaide.

Zacarías jito jeicia rafue

57 Elisabet jocularui jai ridemo, imana jocode.
 58 Naiñaiño ecimo ite comini, naiñaiño comini diga, iena fidiamona, cai Nama naiñaiñona eo duenailmana uinotimaci. Naiñaiño diga iobidimaci.
 59 Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci;
 60 iadedi Elisabet llote:
 —Dama ite. Jitaiñedicue. Naimie mamecidi Juan cai jitalle.
 61 Uai otimaci:
 —¿Bue ñellena iese raitio? O cominimona jaca bu Juan mameciredimiena iñede.
 62 Jefona cacaiñena jira Zacaríamo onolli diga jicanotimaci, ie jito mamecina jitallena.
 63 Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitade?” comeciaina facadimaci.
 64 Ieconí Zacarías jai dane ñaite. Ie jira Jusiñamuimo iobillacino fecade.
 65 Nana iaiaiaia ecimo itino rajicaidimaci.
 —Jusiñamui muidona naie rafue suide —llotimaci. Bie rafuena fidiano, nana Judea railla aneduaimo itinodi iena ñaoidimaci.
 66 Iena cacajano, comeciaina facadimaci: “Bimie jamai bue isoineitimiena jaite”. Cai Nama naimiena marena jaca canua jira, iese llotimaci.

Zacarías Jusiñamuimo iobillacinona fecaja rafue

67 Ie facaise Jusiñamui Joreño Zacaríana llotatajanona, Zacarías llote:
 68 Cai Nama Jusiñamuidi mare.
 Cai Israel comini dine biite, caina jilloitallena.
 69 David micori Jusiñamuina jaie sedade.
 David micori cominimona siño Jilloitaraimana cai dine oretaite.
 70 Ie facaina llorañido naimie jaie llua isoi, cai Jilloitaraimana oretaite,
 71 Taifemona, Janabamona cai jilloillena.
 72-73 Cai usumatiaia micoriaimo: “Omoina duenaiticue” llote.
 Cai usuma Abraham micorimo jaie llogacinona feitañede.
 74-75 Taifemona cai jilloillena, cai Jilloitaraimana oretaite.
 Nana cai ille dinori Jusiñamuina jaciruiño sedajana jitaide.
 Naimie jitailla isoi cai illena, naimie jitaillacinona cai finollena, cai Jilloitaraimana oretaite.
 76 Cue jito, ona lloticue. Jusiñamui ie lloraimana jaitio.
 Cai Nama uicomo jaitio, comini comeciai o raise finollena.
 77 Ie cominimo jeacinomona jilluacinona lloitio.
 Iena naimaci inoia, Jusiñamui naimaci jeacinona feitaite.
 78-79 Jeacino anamo jai cai illa jira, jitiñedinomo iticai isoidicai.
 Jusiñamuina cai nia inoñenia, fiodaillana jaciruiticai.

Naimie caina duenaillamona, cai Jilloitaraïma billena o llofuellena, ona oretate. Naimiena cai ñnoia, jitiredinomo iñeiticai; ia Jusiñamui diga cai comeciai uri iite.

⁸⁰ Zacarías jito sairide. Jusiñamuina ñnocana jaide. Cominimo naimie nia marefodo lloñenia, jofue iñenanomo ite.

2

Jesús jeicia rafue

(Mt 1.18-25)

¹⁻² Jesús jeicia facaise César Augusto anamo ailluena nairaiai ite. Romamona naimacina sedauide. Naie facaise Siria raila enirue gobernadori Cirenio. César Augusto, nie diese comini naga nairaïmo illana naimie uiñollena, nana comini mameciai cuellena ocuide. Jaca bu iese jaie finoñede.

³ Naimaci jaiagai illanomo mameciai cuiana ocuide.

⁴ Ie jira José Galileamona Nazaretmona jaide. Judeamo Belémo jaide. David micori cominimo naimie jainaiailla jira, David micori illanomo jaide.

⁵ Ie ai María diga jaide. Naiñaiño fenaï jai eo aillue.

⁶⁻⁷ Belémo iaïmaiai rillanona, naie facaise comini jofomo inillino iñena jira, jurareta jofomo ridiaïmaiai. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisai toïca llaudaïai sedaraini dine jailla rafue

⁸ Jesús jeicia facaise naie naïo Belén ecimo ite pastomo damierie toïca llaudaïaina sedaraini itimaci. Naimaci toïnaïna sedadimaci.

⁹ Ieconï cai Nama Jusiñamuimona daje jaienicï naimacimo ebena bairede. Jusiñamui ie siño uai diga naimacina quetiñote. Jacinaitimaci.

¹⁰ Jaienicï llote:

—Jacinaïñeno. Mare rafue lloiacadicue. Nana cominina iobitallena, iena lloiacadicue.

¹¹ David micori illanomo damie como jeiciga. Jusiñamui facaina lloraïni micoriai naimie billena jaie llouidimaci. Naimiedi Cristo cai Nama. Naimie omoï Jilloitaraïma. Jecinomona omoïna jillotaite.

¹² Naimiena jibuisai. Iniroina ferinoga urue jurareta jofomo imaci ecaranomo bait-omoï. Iemona cue llwana uanaicïnona uiñoïtomoi —llote.

¹³ Ie facaise naie jaienicï dine ailluena jaienisai bitimaci. Jusiñamuimo iobillacïnona fecajano rotimaci:

¹⁴ Monamo Jusiñamui illanona, naimiemo iobillacïnona feaacadïcai.

Cominina naimie duenaillamona, naimie diga uri itimaci rotimaci. Ie mei abïdo jaidimaci.

¹⁵ Monamo jaienisai jailla mei, toïca llaudaïai sedaraini coniniri ñaitimaci:

—Belémo mai cai jailli, cai Nama caïmo como lloga rafuena cai jibuisaïllena.

¹⁶ Ieconï raïre jaidimaci. María José diga baitimaci. Iaïmaiai urue jurareta ecaranomo billana cioidimaci.

¹⁷ Naimiena ciua mei, nana naimacimo jaienicï lloga rafuena llotimaci.

¹⁸ Nana naie rafuena cacadinodi ieri rajicaidimaci.

¹⁹⁻²⁰ Iaïmaiai uruena ciua mei, llaudaïai sedaraini imaci toïnaïai dine abïdo jaidimaci. Naimacimo jaienicï llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacïnona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaïmaiai uilla rafue

²¹ Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienicï naimie lloga mamecina jitade. Jusiñamui jaienicï llua isoi, Jesúna ie mamecina jitade.

22-24 Moisés micorí jaie llua isoi Jerusalémo Jesúna uitiaimaiaí. Moisés micorí jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jiaí cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaiaí.

25 Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie comina Cristo jilloitallena, Cristo billemo ocuride. Naie facaise Jusiñamui Joreño anamo naimie ite.

26 Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote.

27 Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode.

28 Naimaci dine jaillanona, Jesúna meniñote. Jusiñamuimo iobillacinona fecajano jüde:

29 Nama, o anamo iticue.

Cuemo o lloga uai jai suilla jira, uri fioidaiticue.

30 O oretaga jilloitaraimana jai ciodicue.

31 Naimiena oredio, nana comini jilloillena.

32 Naimiedi judíuainñedinona uanaicinona uiñotaite.

O comina iobitaite jüde.

33 Iena cacajamona, iaimaiaí jitona lloga uairi rajicaidiaimaiaí.

34-35 Simeón iaimaiaímo caimaredicinona llote:

—Jusiñamui omoína raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comeciaina facajacinona uiñotaite. Naimiemo suille rafuemona o comeci sure iite. Cai cominimona ailluena naimiena jitaiñeitimaci. Ailluena jitaitimaci.

36 Nairuido Jusiñamui jofomo Ana railla feciño ite. Jusiñamui naiñaiñomo lloga rafuena llouide. Naiñaiño moo Fanuel micorí. Naiñaiño nairaidi Aser. Jitaiño facaisemona ie ini diga siete años illanona, naimie fioidaite.

37 Naiñaiño jai eo uaciño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedauide.

38 Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocurilla jira, naiñaiño naimaci jilloitaraimana nainomo itinomo llocana uite.

Nazaretmo abido naimaci jailla rafue

39 Moisés micorí lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaimaiaí.

40 Nainomo Jesús sairicana mairicana jaide. Eo abina uiñote. Naimieri iobillamona, Jusiñamui naimiena canouide.

Jerusalémo Jusiñamui jofomo Jesús illa rafue

41 Naga año Jerusalémo pascua railla rafue dine Jesús moo iaimaiaí jaisoidiaimaiaí. Egiptomona naimaci jaiagai jillobillana comecillena, naie rafue ite.

42 Naimiemo doce años illa facaise Jerusalémo iaimaiaí jaisoilla isoi, jaidiaimaiaí. Naimie doce años illa jira, Jesúna uitiaimaiaí.

43-44 Rafue fuilla mei, abido bitiaimaiaí. Ailluena comini jiaí billa jira, Jesús billana raise uiñoñediaimaiaí. “Cai comini diga naimie bite” raillanona comecina facadiaimaiaí; ia Jesús Jerusalémo fiebide. Darui raifi billa mei, iaimaiaí cominimo naimiena eo jenodiaimaiaí.

⁴⁵ Baiñena jira, inia mei, Jerusalémo darui jaillanona, abido jaidiaimaia.

⁴⁶ Ie are Jusiñamui jofomo naimiena baitiaimaia. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jia siadote.

⁴⁷ Nana cacadino naimie uiñogacinori rajicaidimaci. Naimie raise siadogacinori jia rajicaidimaci.

⁴⁸ Naimiena iaimaia baia, rajicaidiaimaia. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Ñiese bene cue illana uiñoñedomico?

⁵⁰ Naimie llua raise cacaiñediaimaia.

⁵¹ Iemei iaimaia diga Nazaretno naimie abido jaide. Iaimaia uai ñnuanona, iaimaia anamo ite. Ie ei María nana naie rafue ie comecimo facauide.

⁵² Naimie sairicana abina uiñocana jaide. Jusiñamui naimieri iobide. Comini dinena naimiena jia gaidimaci.

3

Jofue iñenanomo Juan Bautista micori illa rafue (Mt 3.1-12; Mr 1.1-8; Jn 1.19-28)

¹⁻² Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abiliniá railla enirue gobernadori Lisantias. Jusiñamui diga nanoca ñairaima iaimaiaidi Anás, Caifás diga.

³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fañonocaida, Jusiñamui ñibeimo omoi comeciá iuai meido. Iemona Jusiñamui omoi jeacinona feitaite. Omoi comeci iuai omoi meidoia, comini iena uiñollena, mai omoi bautizallomoi.

⁴ Isaías micori ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Caí Nama biite. Naimie jaillino atona fino.

⁵ Nana iconi oruita.

Naga aneduai diese eniruena judai.

Neicairuai joide naisona atona fino.

Naimo itaicuai illa diese eniruena oruita, daje facai illena.

⁶ Nana comini Jusiñamui naimacina jillotaicanana uiñoitimaci”

cuete; ia naimaci comeciaina ñaite. Caí Namana ñnuana ñaite. Abina iedoñenana ñaite. Jeacino finocana jaiñenana ñaite. Caí Nama Jesús bia, Jesús uaina naimaci feiñollena, naimaci comeciá marena finuana ñaite.

⁷ Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jaio nairai isoidomoi. ¿Ñiese jilloitomoi? Cue dine omoi billena, ¿bu omoimo lloga?

⁸ Omoi comeciá iuailai meido. Omoi jeacinona fañonocai. Iemona Jusiñamui jitaillacinona fino. Mare rafuena finocana jai. Naimona omoi comeciá iuailai meiduana uiñoiticaí. Ie mei bautizallomoi. Omoi comeciaina facañeno: “¿Bue ñellena o llua isoi fnoiticaí? Jusiñamui Abraham micorina jaie eo raise nabaide. Abraham micori caí moo illamona, Jusiñamui ricaiñifue mona jilloiticaí”. Ero, omoimo lloiticue: Cue llua isoi omoi fnoñenia, naimie ricaiñifue mona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noñicimona naimiedi Abraham micori facaina uruiaina comuitarede.

⁹ Ero, llisiñede riana tiedomoi. Tia mei, marañena jira, iena jobaidomoi. Ie isoidomoi. Omoi marañena jira, Jusiñamui omoína jai duere finoacade. Ie riicaillafue anamo jai itomoi. Omoi comeciái iuai omoi meidoñena, omoína duere finoite.

¹⁰ Iena cacajanona, comini dinena naimiemo jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

¹¹ Juan uai ote:

—Ailluena iniroiredimiedi iniroinidimie mo iniroina feca. Guilleredimiedi guil-lenidimie mo guillena feca.

¹² Naimacina bautizallena, gobierno ucubena oraini jiai bitimaci. Jicanotimaci:

—Llofueraíma, cai bautizaja mei, ¿niese iiticaí? ¿Nie isoide mare rafuena finoiticaí?

¹³ Uai ote:

—Gobierno facaina omoi ibataia, cominimona gobierno llua baífemo oñeno.

¹⁴ Naimie dine billanona, soldaduai jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

Uai ote:

—Cominimona rana bairoñeno. Riicinodo rana oñeno. Tainona llogidua mona, cominimona rana oñeno. Omoi ucube illa diese feiño. Ie baífemo ucubena nicidoñeno.

¹⁵ Juan llofuia mona naie facaise cominidi Cristo billemo ocuirilla jira, “Juandi nibai Cristo” raillanona, Juanmo comeciaina facauidimaci.

¹⁶ Iena fidiano, Juan llote:

—Cristoñedicue. Jusiñamui dibeimo omoi illamona, jinui diga omoína bautizadicue. Cai baífemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciái iuai omoi meidoñena, omoína duere finoite.

¹⁷ Trigona omoi betaia, mare trigona eenotomoi. Marañede ra oni dotajanona, iena jobaitomoi. Ie isoide. Naimie rafuena lluanona, naimiedi comeciái iuaillai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

¹⁸ Bie isoidicinodo cominimo ie mare rafuena llofueuide.

¹⁹ Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade.

²⁰ Marañede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue (Mt 3.13-17; Mr 1.9-11)

²¹ Ailluena cominina Juan bautizaja facaise, Jesúna jiai bautizade. Bautizaja mei, Jesúdi ie Moo diga ñaianona, mona bojode.

²² Ieconí Jusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesu Cristo ie usumatiai (Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito.

²⁴ Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito.

²⁵ José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito.

²⁶ Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito.

²⁷ Judá micorí Joana micorí jito. Joana micorí Resa micorí jito. Resa micorí Zorobabel micorí jito. Zorobabel micorí Salatiel micorí jito. Salatiel micorí Neri micorí jito.

²⁸ Neri micorí Melquí micorí jito. Melquí micorí Adi micorí jito. Adi micorí Cosam micorí jito. Cosam micorí Elmodam micorí jito. Elmodam micorí Er micorí jito.

²⁹ Er micorí Josué micorí jito. Josué micorí Eliezer micorí jito. Eliezer micorí Jorim micorí jito. Jorim micorí Matat micorí jito. Matat micorí Leví micorí jito.

³⁰ Leví micorí Simeón micorí jito. Simeón micorí Judá micorí jito. Judá micorí José micorí jito. José micorí Jonam micorí jito. Jonam micorí Eliaquim micorí jito.

³¹ Eliaquim micorí Melea micorí jito. Melea micorí Mainán micorí jito. Mainán micorí Matata micorí jito. Matata micorí Natán micorí jito. Natán micorí David micorí jito.

³² David micorí Isaí micorí jito. Isaí micorí Obed micorí jito. Obed micorí Booz micorí jito. Booz micorí Salmón micorí jito. Salmón micorí Naasón micorí jito.

³³ Naasón micorí Aminadab micorí jito. Aminadab micorí Aram micorí jito. Aram micorí Esrom micorí jito. Esrom micorí Fares micorí jito. Fares micorí Judá micorí jito.

³⁴ Judá micorí Jacob micorí jito. Jacob micorí Isaac micorí jito. Isaac micorí Abraham micorí jito. Abraham micorí Taré micorí jito. Taré micorí Nacor micorí jito.

³⁵ Nacor micorí Serug micorí jito. Serug micorí Ragau micorí jito. Ragau micorí Peleg micorí jito. Peleg micorí Heber micorí jito. Heber micorí Sala micorí jito.

³⁶ Sala micorí Cainán micorí jito. Cainán micorí Arfaxad micorí jito. Arfaxad micorí Sem micorí jito. Sem micorí Noé micorí jito. Noé micorí Lamec micorí jito.

³⁷ Lamec micorí Musalén micorí jito. Musalén micorí Enoc micorí jito. Enoc micorí Jared micorí jito. Jared micorí Mahalaleel micorí jito. Mahalaleel micorí Cainán micorí jito.

³⁸ Cainán micorí Enós micorí jito. Enós micorí Set micorí jito. Set micorí Adán micorí jito. Adándi Jusiñamui comuitagamie.

4

Taife ramo Jesús faia rafue (Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede.

² Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite.

³ Jesús aimetaillana Taife uiñuamona, naimiemo llote:

—Jusiñamui Jitodiódena, naimiemo llono: “Ore Moo, bie noficina llomeniconna jaita”.

⁴ Jesús uai ote:

—Iena lloñeiticue. Jusiñamui facaina lloraíma micorí iena jaie cueda: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúsna uillano, dallu illanona, naimiemo nana nairaiaína acatate.

⁶⁻⁷ Llote:

—Nana bie nairaiaí cue anamo ite. Iena cue iacagamie mo itataredicue. Cuena o sedajamona, iobillacinona cuemo o fecaia, nana bie nairaiaí omo fecaiticue. Bie nairaiaí illaímana jaitio.

⁸ Jesús uai ote:

—Dama ite. Ona sedañeiticue. Moisés micorí jaie cueda: “Cai Nama Jusiñamuina seda. Dama naimiemo iobillacinona feca”.

⁹ Ie mei Jerusalémo Jusiñamui jofo muidomo Taife Jesúsna uite. Raite:

—Jusiñamui Jitodiódena, eniruemo mai ana uai.

¹⁰⁻¹¹ David micorí ona jaie cueda:

Ona eenollena Jusiñamuidi ie jaienisaïmo lloite.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O llwana finoñeiticue.

¹³ Taife naimiena ramo faia mei, naimiemoni ie jitaille dinori oni jaide.

Galileamo Jesús ie rafue llole jillaci

(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride.

¹⁵ Ailluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

Nazaretmo Jesús illa rafue

(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiai adofacallena, naimie a naidadate.

¹⁷ Naie lloraco nama mullaïmadi Isaías micori jaie cuegafuiai jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredonomo mare rafuena lollena, cuena fetode.

Taife anamo ailluena comini illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comini uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenaillana birui uiñuana jitaide.

Naimacimo mare rafue lollena, cuena jai oretate.

²⁰ Naie rafue facaja fuillamona, cuegafuiai abido fecade. Naimacina llofuellena, dane ana raide. Nana nainomo ite comini naimiemo eo eruaidimaci.

²¹ Iemei naimie naimacina llofueite. Raite:

—Omoi como cacaja cuegafuiai omoi motomo jai suide. Cuena ñaite.

²² Naimie llwana comini cacajano, coninina raitimaci:

—Naimie fue mare. Naimie marena llofueite. —Iemona rajicaillamona, coniniri raitimaci—, Naimiedi jamai José jito. ¿Ñiese naie rafue birui suide?

²³ Iena uiñuamona, Jesús dinena llote:

—Cue llwana ñnoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiai finoa, naimiena ñnoiticai. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi.

²⁴ Uanaicinona omoimo lloiticue. Naimie comini nairaïmo Jusiñamui facaina lloraïma ia, ie comini naimie uaina feiñoiacasiñede. Iena jamaisite. Ie isoide. Cue nairaïmo cue illa jira, cue uaina ñnoñedomoi.

²⁵ Jaie ie isoide. Elías facaiseconi daje amani años abimo atomonado noci deiñede. Aime guitimaci. Naie facaiseconi bie eniruemo cai comini dine ailluena feciñuai itimaci; iadedi omoi jaiagai Jusiñamui uaina ñnoñedimaci.

²⁶ Jusiñamuidi Elíana cai comini dine oreñede; iadedi jiaie eniruemo ite feciño dine naimiena orede. Sarepta railla nairaïmo orede. Sidón railla eniruemo naie nairaï ite. Cai cominiñede feciñomo orede.

²⁷ Jiaie rafuena lloiticue. Eliseo micoridi Jusiñamui facaina jaie llote. Eliseo micoridi facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina inoñena jira, Eliseo micoridi duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina inoiacaiñedomoi —llote.

²⁸ Jesús lluaa cacajano, naie ofiracomo itino eo iciritimaci.

²⁹ Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci.

³⁰ Naimiena meineiacadimaci; iadedi naimaci motomo naimie jaillanona, naimacimona naimie jillobillano oni jaide.

Jesúdi Janaba anamo itimie jillotaja rafue

(Mr 1.21-28)

³¹ Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofuite.

³² Illaíma uai isoi naimie llofuia jira, nainomo ite comini naimie llofuiamona rajicadimaci.

³³ Janaba anamo illamie nainomo ite. Jesús llofuiana cacaita, Janabadi imana ado cuirioitate:

³⁴ —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uñoticue. Odi Jusiñamui ie Mare Fetocamedio.

³⁵ Jesús naimiena lletade:

—Llicai. Naimiemona oni jai. —Iena cacajanona, naimaci motomo Janaba imana ana dotade; ia naimiedi bofedaiñede. Ie mei Janaba naimiemona oni jaide.

³⁶ Iena cianona, nana nainomo itino rajicadimaci. Coniniri siadotimaci:

—¿Ñie isoide Jesús uai? Janabamo naimie llua mei, imamona Janabadi oni jaide.

³⁷ Jesús finoca rafue muidona, naimie mamecidi nana naie eniruemo soride.

Jesúdi Simón Pedro jifaiña jillotaja rafue

(Mt 8.14-15; Mr 1.29-31)

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiña jilloitallena, nainomo itino Jesúmo jicanote.

³⁹ Naiñaiño dine Jesús jaillanona, ie uai lluaa, naie duicodi oni jaide. Ieconi naiñaiño jillode. Abi cuariñede. Naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Mr 1.32-34)

⁴⁰ Nairuido jitoma ana itemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate.

⁴¹ Jananiaina jiai oni oretajano, jananiai dinena raite:

—Odi Jusiñamui Jitodio. —Naimiena naimaci uñua jira, Jesús naimaci ñaiana rairuide. Naimiedi Jusiñamui Jitona uñoticimaci.

Judeamo Jesús llofuia rafue

(Mr 1.35-39)

⁴² Ie areruido jiteramo jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci.

⁴³ Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lollena, Jusiñamui cuena orede. Oni jaiticue. Omoi diga fiebiñeiticue.

⁴⁴ Ie mei Judeamo ite ofiracuaimo Jesús llocana jaide.

5

*Jesús muidona, naimaci ailluena lliciaina ua rafue**(Mt 4.18-22; Mr 1.16-20)*

¹ Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci.

² Ie facaise jorai fuemo Jesús mena sijide botena ciode. Naimaci lloijina naimaci jocua jira, naie botemo lloiji fairaini iñede.

³ Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raíta, botemona cominina llofujete.

⁴ Llofua mei, Simómo llote:

—Aforedinomo jai. Nainomo omoi lloijina faíno.

⁵ Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicaí. ¿Ñiese ja oiticaí? Iadedi o llua jira, lloijina faiticue.

⁶ Iena naimaci faia mei, ailluena lliciaina jiatatimaci. Ie jira naimaci lloiji cuaranoiacade.

⁷ Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade.

⁸ Iena ciuano, Simón Pedro Jesúsno íobillacino fecallena, caiñici ífodo rainadate. Raite: —Odi siño Jitodio; ia cue jamai bue isoilla jira, cuemona oni jai. Jecinona finouidimedicue.

⁹ Ailluena lliciaina naimaci ua jira, naimaci rajicaillamona, iena naimie llote.

¹⁰ Naimie nabaiñiaimona Zebedeo jito iaímaiaí ite. Juan diga Jacobo iaímaiaí. Simómo Jesús llote:

—Cuen a jaciruiñeno. Lliciaina birui ocabitomoi; iadedi cue díbeimo naimaci illena, biruimona cominina oitomoi.

¹¹ Eníruemo sijiano, naimaci raruaí faínonocaida, Jesús diga jaidimaci.

*Jesúdi efonaitimiena jillotaja rafue**(Mt 8.1-4; Mr 1.40-45)*

¹² Jiairuido Jesúsdi jiaie nairaimo ia, efonaitimie naimie dine bite. Naimie eo fodo jaide. Jesúsna naimie ciuano, naimiena raise uaiduamona, ana bitadate. Llote:

—Maestro, o jitaíadedi, cuena jillotaredio.

¹³ Jesús ie onolli oni ñuitajanona, naimiena jetade. Raite:

—Ona jillotaiacadicue. Maí o jillo. —Ieconí jillode.

¹⁴ Jesús naimiemo llote:

—Omo suide rafue jaca bumo lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micorí jaie lloga rana feca lemona comini o jilluana uiñoitimaci.

¹⁵ Iese Jesús naimiemo llote; iadedi Jesús finoca rafue llocana eo uite. Ie muidona naimie lluaana cacaillena, duidinona Jesús jillotallena, ailluena comini naimie dine bitimaci.

¹⁶ Bitimaci; iadedi Jusiñamui diga ñaíllena, jofue iñenanomo Jesús jaide.

*Jesúdi tsitaitimiena jillotaja rafue**(Mt 9.1-8; Mr 2.1-12)*

¹⁷ Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micorí llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate.

¹⁸ Ie facaise ie bíramo bíde tsitaitimiena Jesús dine damierie atidimaci;

19 iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biramo bide diga, comini motomo Jesús ecimo ana ñuitadimaci.

20 Iena Jesús cianona, tisitaitimie jilluana naimaci ñnuana Jesús uiñote. Tisitaitimiemo lloste:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

21 Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”.

22 Naimaci comeciaina facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi?

23 Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi.

24 Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimiemo lloiticue: “Mai naidacai. O bira ferianona, o jofomo mai jai”.

25 Iese naimie raillamona, tisitaitimie jillode. Iecon naimaci motomo naimie naidaide. Ie bira feriano, Jusiñamuimo iobillacino fecajano, ie jofomo jaide.

26 Nana naiena ciodino eo rajicaidimaci. Iemona Jusiñamuimo iobillacinona fecadimaci. Eo rajicaillamona, raitimaci:

—Bie isoide siño comena jaca cioñedicaí.

Jesúdi Levína fetua rafue

(Mt 9.9-13; Mr 2.13-17)

27 Jesús jino macarillano, gobierno facaina ucube oraimana cide. Naimie mameci Leví. Ie ucubena ouillanomo raide. Jesús naimiemo lloste:

—Cue llofuegamiena o jaillena, cue diga bi.

28 Naidacaida, Jesús diga jaillanona, ie maijiana fañonocaide.

29 Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci.

30 Nainomo fariseuai cominidi, Moisés micori llogacino llofueraini diga, jamai bitimaci. Jesúsna cianona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacino ucube oraini raise jaiñenamona, naie isoidino diga fariseuai comini nabairiñena jira, iese jicanotimaci.

31 Jesús iena cacajano, lloste:

—Ecairedino médicona jitaiñedimaci; iadedi duidinodi médicona jitaídímaci.

32 Jusiñamui dibeimo mareuidinona uaibiñedicue; iadedi maraiñedinona uaibiticue.

Jesúmo comini guiñenana jicanua rafue

(Mt 9.14-17; Mr 2.18-22)

33 Naie facaise fariseuai dinena Jesúsno lloste:

—Cai einamaci llua isoi, Jusiñamuina cai raise iobitallena, guiñenaruillai illa facaiseconi guiñedicaí. Jusiñamuimo jicabidicaí. Cai jeacino facaina sunaicabiticaí. Cai einamaci rafuedo Juan Bautista llofueoicaigano jaidimaci. Cai llofuegano iedo jiai jaidimaci; iadedi o llofueoicaigano jaca guitimaci. ¿Bue ñellena cai einamaci rafuedo jaiñedimaci?

34 Jesús uai ote:

—Jiaie rafuedo iena lloiticue. Coniruedi ie aina uarui ia iobilla jira, ie nabaiñiaí sunaiñedimaci. Iobillamona guitimaci.

35 Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira,

iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

³⁶ Jiaie rafuedo iena lloiticue: Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

³⁷ Jacagomona finoca bolsa como finoca vino joneñega. Jonegadena, mairiñena jira, sirillamona goi raire cuararite. Vino faifite. Igoi jiaie faifite.

³⁸ Como finoca vino comogomo jonelle. Iemei iena faifñeite.

³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamací rafue ifomo jiaie rafue birui ite. Iena omoiimo llocabiticue. Iedo jaidicai; ia omoi einamací rafuemo omoi fibilla jira, jiaie rafuedo birui jaiacaiñedomoi —llote.

6

Sábadoruimo Jesús llofueoicaigano maijia rafue (Mt 12.1-8; Mr 2.23-28)

¹ Jiairuido sábadoruimo Jesús, ie llofueoicaigano diga, trigo illa illi motodo joide naisonajaide. Ie llofueoicaigano trigona tijiano, golluano, guicana jaidimaci.

² Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijindicai; iadedi trigona naimaci tijiamona, caimona jai maijidimaci. Caimona jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiaie diga Jusiñamui jofomo fo jaide.

⁴ Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede.

⁵ Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaie rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue (Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaillanona, llofujete. Ie facaise nainomo nabellimo idisarodimie ite.

⁷ Moisés micori llogacinona llofueraini, fariseuai diga, Jesús mo eruaidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode.

⁸ Naimaci comeciaina facajacinona Jesús uñuamona, onollina idisarodimieimo llote:

—Cue ecimo naidada. —Iemei Jesús ecimo naidadate.

⁹ Jesús nainomo itinomo jicanote:

—¿Ñie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuena birui omoi meineiadedi, birui maraiñede rafue finodomoi. Sábadoruimo ¿ñie isoide rafue finuana rairuidomoi?

¹⁰ Naimacimo eruaillanona, duidimieimo llote:

—O onolli mai oni ñuita. —Iena ñuitajanona jillode.

¹¹ Nainomo itino iena ciuanona, eo iciritimaci.

—¿Ñiese Jesúsna nibaitica? —naiemona coniniri siadotimaci.

*Jesúdi ie doce llofueoicaiganona fetua rafue**(Mt 10.1-4; Mr 3.13-19)*

¹² Nairui aneduaimo Jesús jaide, Jusiñamui diga ñaillena. Namona naio jüide.

¹³ Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode.

¹⁴ Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé,

¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide.

¹⁶ Judas; naimiedi Jacobo jito. Judas Iscariote micori; naimiedi Jesúna gaitatimie.

*Jesúdi ailluena cominina llofuia rafue**(Mt 4.23-25)*

¹⁷ Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiaie ite. Naimie lluamo cacareillena bitimaci. Naimaci duicomona jiaie jilloiacadimaci.

¹⁸ Jananiai anamo itinomona Jesús jananiaina oni orede.

¹⁹ Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

*Jesús lloga rafue**(Mt 5.1-12)*

²⁰ Ie llofueganomo eruaillanona, Jesús llote:

—Naimie anamo omoi jai illamona, Jusiñamui omoina sedaacana rafuena omoina llofueitícue. Naimiena jitaídomoina, omoina sedaite. Comeciaina facadomoi: “Jusiñamui jitaillacinona dani finonidicai; ia Jusiñamui caina canuamona, iena finoiticaí”. Naimie comini omoi illamona, naimie omoina canoite. Iemona caimare iitomoi.

²¹ Naimie jitaillacino omoi finuamona, Jusiñamui omoina sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoina sedaite. Ailluena comini jeacino finocana jaidimaci. Iena uíñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoi.

²² Cuemo omoi duia, duere sefuitomoi. Jiaie comini omoina enoitimaci. Omoina oni dotaitimaci. Omoina jeare ñaitimaci. Cuemo omoi duilla jira, omoina jamaitimaci; ia Jusiñamui omoina caimare itataite.

²³ Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uíñuamona, monamo Jusiñamuimona ailluena ibana íco omoi feiñua jira, birui omoi duere sefuia, iocire omoi jai.

²⁴ Iese iitomoi; ia Jusiñamuina jitaíñedino íco duere sefuitimaci. Comeciaina facadimaci: “Jusiñamuina jitaíñedicai. Marena birui iticai. Nana cai comeciai jitaillacino birui caimo ite”. Iese birui itimaci; ia Jusiñamui naimacina íco duere finoite.

²⁵ Jusiñamuimona buena birui jitaíñedino íco duere sefuitimaci. “Nana cai comeciai jitailla rafue caimo birui illa jira, Jusiñamuimona buena jitaíñedicai” raitimaci. Iese birui itimaci, ia Jusiñamui naimacina íco duere finuamona, buenitimaci. “Cai comeciaina iocire itatallena, Jusiñamuina jitaíñedicai” damierie birui raitimaci. Naimaci jeacino facaina sunaiñedimaci. Birui ite rafuena ebiruitimaci. Iese birui itimaci; ia Jusiñamui naimacina íco duere finuamona, sunaitimaci. Eeitimaci.

²⁶ Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damierie birui daje isoidimaci. Jusiñamuina iobitaiacaiñedimaci; ia

cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

Jesúdi iba oñenana llua rafue

(Mt 5.38-48; 7.12)

²⁷ Jesús llote:

—Cue lluana cacajamona, iena ñno. ñnuamona omoina enoidinona isirui. Naimacina cano.

²⁸ Omoí jeare ñaitinona marena ñaino. Omoína jeare ñnodino facaina Jusiñamuimo omoí jii.

²⁹ Omoí cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoí ñiroina bu bairoiaciona, omoímo naimie nia jicañenia, naimie jitailla ñiroi baifemo naimiemo feca.

³⁰ Omoímo ite rana bu jicaia, iena caidiñeno feca. Omoímona rana bu bairoia, iena abido jicañeno.

³¹ Jusiñamui jitaillacinona omoí ñnuamona, jiaie cominina marena fino. Jiaie comini omoína ñnuana omoí jitailla isoi, naimacina fino. Naimaci omoína marena ñnuana omoí jitaia, naimacina marena fino. Naimaci omoína maraiñeno ñnuana omoí jitaia, naimacina ie isoi maraiñeno fino. O ñnoacaga ra isoi jiaie cominimo fino.

³² Naimie cominina omoí illamona, nana comini daje isoi isirui. Omoína isiruitinona omoí isirua, mare; iadedi omoína gaiñenanona omoí isiruiñenia, Jusiñamui omoína: “Mare” raiñeite. Maraiñede rafuena ñnoraini naimacina isiruitinona isiruitimaci. Nana cominina omoí isiruiñenia, maraiñede rafuena ñnoraini baifemo faiñedomoi. Naimaci isoi itomoi.

³³ Naimie cominina omoí illamona, nana comini daje isoi cano. Omoína canodinona omoí canoia, mare; iadedi omoína canoñedinona omoí canoñenia, Jusiñamui omoína: “Mare” raiñeite. Maraiñede rafuena ñnoraini naimacina canodinona canodimaci. Nana cominina omoí canoñenia, maraiñede rafuena ñnoraini baifemo faiñedomoi. Naimaci isoi itomoi.

³⁴ Naimie cominina omoí illamona, nana cominimo daje isoi rana feca. Omoímo ra fecadinomo rana omoí fecajia, mare; iadedi omoímo rana fecañedinomo rana omoí fecañenia, Jusiñamui omoína: “Mare” raiñeite. Maraiñede rafuena ñnoraini naimacimo rana fecadinomo rana jiai fecadimaci. Nana cominimo rana omoí fecañenia, maraiñede rafuena ñnoraini baifemo faiñedomoi. Naimaci isoi itomoi.

³⁵⁻³⁶ Omoína gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuirñeno; ia Jusiñamui omoí raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoí duenai. Naimie isoi omoí illamona, maraiñedinodi naimie cominina omoí illana uiñoitimaci. Jusiñamuidi cominina duenaila isoi, cominina omoí jiai duenai.

Jesúdi jiaie cominina mameriñenana llua rafue

(Mt 7.1-5)

³⁷ Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoí mameria, omoímo ite maraiñede rafue facaina Jusiñamui omoína duere finoite. Omoímo maraiñede rafuena bu ñnoia, iena feita. Iena omoí feitañenia, Jusiñamui omoímo ite maraiñede rafuena feitañeite.

³⁸ Jiaie rafuedo iena lloiticue. Rana omoí fecaia, iena raise omoí gaieia, ico ibana omoí oia, raise gaiecana feiñoitomoi. Ie isoide. Jiaínomo maraiñede rafuena ñnoñeno; ia naimacina duenailamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicinodo omoi jaiñenia, uisnidimie isoi itomoi. Uisnidimie jiaie uisnidimiena ifonide. Ifo iade, nagamaiaia dafomo uaidiaimaiaia.

⁴⁰ Fueotimie ie llofueraima baifemo uaiñede; iadedi naimie raise fueoia, ie llofueraima isoi jaite. Raise fueollena, cue uaimo cacarei.

⁴¹ Omoi ecimo itimiero janore maraiñedicino illana omoi uiñoia, iemo comecina facañeno; iadedi omoi ailluena ite maraiñedicinomo nano omoi comecina faca.

⁴² Omoi maraiñedicino illamona, ¿niese omoi ecimo itimiena mameritomoi? Omoi ite maraiñedicinomo omoi comecina facacaiñena jira, maredinona abi caitadinomoi. Omoi comeciaina nano raise fino. Iemei omoi ecimo itimiena canorenitomoi. Naimie comecina raise canorenitomoi.

Jesúdi riará llisilla lilla llua rafue

(Mt 7.17-20; 12.34-35)

⁴³ Jesús nia llofue:

—Mare riará maraiñede riará isoi llisiñede. Maraiñede riará mare riará isoi jiaia llisiñede.

⁴⁴ Llisillamona nie isoide riará illana uiñoticaia. Amena ie llisilla llillamona amena marena uiñoa. Llillamona, amena maraiñenana jiaia uiñoa. Eecuaimona uvas railla riarana oñedicaia. Monaigimona higos railla riarana jiaia oñedicaia.

⁴⁵ Ie isoide. Naimaci comeciaino iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesúdi naimiena ñnuana ñaia rafue

(Mt 7.24-27)

⁴⁶ Jesús nia llofue:

—Omoimona damerie cuena: “Cai Nama” raitomoi; iadedi cue llogacinona finoñedomoi.

⁴⁷ Diga comini cue dine bitimaci. Cue uaina cacadimaci.

⁴⁸ Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faifiñede. Ie isoide. Cue llua ñnotimie faifiñeite.

⁴⁹ Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raiñede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifide. Ie isoide. Cue llua ñnoñedimie faifite —llote.

7

Jesúdi capitán mullaimana jillotaja rafue

(Mt 8.5-13)

¹ Ie llua fuillamona, Jesús Capernaumo jaide.

² Nainomo romanos railla nairaimo duide illaima ite. Cien soldaduaina sedauide. Naimiedi capitán. Judíuñedimie. Ie mullaima eo duide. Niade fiadaicade. Capitán naimiena eo gaide.

³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaimana jillotajaibillena jitaide.

⁴ Jesús dine naimaci rillano, capitán dine naimie billena, naimiero duere jicanotimaci. Raitimaci:

—Naimiedi caimona maremiena jira, naimiena o canuana jitaidicaia.

⁵ Cai nairaia isiruite. Ie ucube diga cai ofiracona finotate.

⁶ Iena cacajamona, Jesús naimaci diga jaide. Capitán jofomo iairei Jesús ria, capitádi Jesús dine ie nabaiñaia orede, Jesúsno llollena:

—Maestro, biñeno. Jamai bue cue isoilla jira, cue jofomo biñeno.

⁷ Jamai bue cue isoilla jira, o dine jiaí jaiñedicue. O illanomona o uaido cue mullaíma jilloita.

⁸ Jiaíe illaicomini anamo iticue. Naimaci lloga uaina ñnoticue. Cue anamo jiaíe soldadauí illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina bene o lloia, cue mullaíma jilloite.

⁹ Iena cacajano, Jesús raijicaide. Oni dobaidajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Cai judíuai cominimona bie isoidimiena jaca iñede. Mai abido jai.

¹⁰ Capitámona bitino abido capitán jofomo rillano, mullaíma jai jilluana cioidimaci.

Jesúdi feciño jitona jillotaja rafue

¹¹ Jiaíruido Naín railla nairaimo Jesús jaide. Ie llofueoicaigano jiaí jaidimaci. Ailluena comini jiaí jaidimaci.

¹² Naie nairai ie nasemo naimie iaíreicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fioidaite. Ailluena Naín itino naie feciño diga jaidimaci.

¹³ Jesús naiñaiñona ciuanona, naiñaiñona duenaite. Naiñaiñona raite:

—Mai eeñeno.

¹⁴ Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimie mo Jesús llote:

—Mai a rainada.

¹⁵ Iena Jesús llua mei, naie fioidaitimie ie uiga ramona a rainadate. Ie meinocni naimie ñaite. Jesús naimiena ie eimo abido ite.

¹⁶ Naieri nana jacinaitimaci. Jusiñamui iobillacinona fecadimaci. Raitimaci:

—Jusiñamui facaina lloaíma cai motomo ite. Naimie uai eo siño. Naimiena Jusiñamui oretaja jira, Jusiñamui caína birui canoacana jira, iobidicai.

¹⁷ Nana Judeamo itino Jesús finoca rafuena fididimaci. Judea enirue fuemo ite nairaiaidi jiaí fididimaci.

Jesús dine Juan Bautista micori ie llofueoicaiganona oretaja rafue

(Mt 11.2-19)

¹⁸ Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote.

¹⁹ Llote:

—Jofue iñenanomo navui cue ia, jiaímie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaímie bille mo nia ocuriticaí?” naimie mo jicano.

²⁰ Jesús dine iaímaiaí rillano, Jesús mo llotiaímaiaí:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiena o illana uiñoiacadicaí. Imieñediodena, jiaímie bille mo nia ocuriticaí. Cocomo llono.

²¹ Jesús dine iaímaiaí billa facaiseconi, Jesús diga isoide duicuaí illanona jillotate. Jananiaí anamo itinomona jananiaína oni jiaí orede. Uisínidinona uisína dane ciotate.

²² Ie jira Jesús iaímaiaí mo llote:

—Cue lluana cacadomico. Cue finoca rafuena ciodomico. Juan dine abido omico jaillanona, iena naimie mo llono. “Uisínidino jai cioidimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fioidaillamona damerie jai jillodimaci. Dueredino mare rafuena jai cacadimaci”. Iese naimie mo llono.

²³ Jiaí llono: “Ñibaí nana cue rafuena raise cacaiñedio; ia cuena jaca nia ñnocana o jaia, camare iitio”.

²⁴ Iaimaia abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena começina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoifede. Nie isoide rafue naimiemo ia, cue rafuena llocana jaide.

²⁵ ¿Bue ñellena naimie dine jaidomoi? Mare iniroina jítadimiena cioifedomoi. Mare iniroina jítadinona omoi cioacaniadedi, illaicomini dine jaidomoi. Naimacimo ailluena ra ite.

²⁶ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoi naimie llua jira.

²⁷ Malaquías micori naimiena jaie cuela: “Jusiñamui raite: ‘Ero, o uicodo cue rafuena lollena, damiena oretaiticue, comini começina marecinona duiñollena’” cuela. Malaquías Juan Bautistana cuete.

²⁸ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuede; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioifede. Iemona naimie baifemo faitomoi.

²⁹ Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadimaci. Gobierno ucube orainidi jiaie fecadimaci;

³⁰ iadedi fariseuai iobillacinona fecañedimaci. Moisés llogacinuaina llofueraini jiaie fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede.

³¹ Jesús llote:

—Cuen a ñnoñedinona lloiticue: Ero, omoi ñaificue.

³² Jifanote uruiaie isoidomoi. Uruiaie jifanoiacania, naimaci nabairiñaina uaiduanona, raitimaci: “Omoi diga jifanoiacadicaie; iadedi caie diga jifanoiacañedomoi. Caimarede rafuena caie jifanoiacania, sunailla rafuena jifanoiacadomoi. Sunailla rafuena caie jifanoiacania, caimarede rafuena jifanoiacadomoi. Coninina nabairiñedicaie” raitimaci.

³³ Ie isoidomoi. Juan jirorainide. Caimare guifede; ia naimie diga nabairiñedomoi. Naimiena gaiñedomoi. Ie jira omoi mona dajerie naimiena raitimaci: “Janaba anamo naimie illamona, naimie uairico isoi ite” raitimaci.

³⁴ Monamona billanona, iimana jaidicue. Omoi isoi guiticue. Caimataidicue; ia cue diga nabairiñedomoi. Cuen jiaie gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimidio”.

³⁵ Iese raitomoi; iadedi Jusiñamuina inotinodi cue finoca rafuena marenana uifnotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite.

³⁷ Jesús guitemo, daje riño fo jaide. Naiñaiñodi marañede rafuena finoraiño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga.

³⁸ Judíuai aciata jaca guisoidimaci. Jinafo dine eilli jonesuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociaie diga Jesús eillina jocode. Safenaillena, naimie eillina ie ifotie diga dote. Ie eillina jiaie llibanote. Ie mei ie eillimo frascomona soride rana totade. Naimiena naiñaiño isiruillamona, iese naiñaiño finode.

³⁹ Iena cuanona, Simón dama começina facade: “Bimie Jusiñamui facaina lloraimadena, nie isoide naimiena jetade riñoña niade uifnote. Naimiedi naiñaiño

maraiñede rafuena finorañona uiñote. Iena naimie uiñuamona, naiñaiñona jino raire orede. Naimiedi Jusiñamui facaina lloaiañede”.

⁴⁰ Jesús naimie comecina facajacina uiñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damie mo quinientos diga ucubena fecade. Jaiiemo cincuenta diga ucubena fecade.

⁴² Ie iade, naiena abido meidonidiaimaia. Ie jira ucubena fecadimiedi raite: “Dama omico meidoñega. Naiena jai feitatadicue”. Ero, Simón, ¿naimieca ucubena fecadimiena eo isiruite?

⁴³ Simón dinena uai ote:

—Cue comeci raite: Ailluena ucube feitata jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴ Iemei Jesúdi riño dine dobaidajanona, Simómo llote:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, janui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote.

⁴⁵ Naiñaiño cue ecimo fo billanona, cue eillina diga icaiño llibanote.

⁴⁶ Naiñaiño cue eillimo soride rana totade.

⁴⁷ Naiñaiñomo eo jeacino ite; ia cuena naiñaiño eo isiruillamona, nana ie jeacina jai oni dotajana uiñotica. “Jeacino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiñomo llote:

—O jeacino jai oni dotaca. Iena jai feitatadicue.

⁴⁹ Jiaino nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riñomo llote:

—Cuena o ñnua jira, o jeacinomona jai jillodio. Mai uri o jaillano o i.

8

Dajerie riñoniai Jesúna canua rafue

¹ Ie facaise diga nairaimo Jesúdi mare rafuena llocana jaide. Naimie anamo comini illana Jusiñamui jitailla jira, Jesúdi Jusiñamui dibeimo naimaci comeciai iuaina meiduana llofuate. Ie doce llofueoicaigano naimie diga jaidimaci.

² Dajerie riñoniai jiai jaidimaci. Naiñaiñuamona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate.

³ Juana ite. Naiñaiño inidi Chuza. Herodes raila illaima ecimo naimie maijiuide. Susana ite. Jiaie riñoniai jiai itimaci. Naiñaiñuai ramona Jesúna canouidimaci.

Jesúdi trigona judaiaidimiena llua rafue

(Mt 13.1-9; Mr 4.1-9)

⁴ Diga nairaiaimona ailluena comini Jesús dine billanona, naimacimo llote:

—Jusiñamui omoina sedaacana omoi fueollena, bie rafuena lloiticue.

⁵ Damiedi trigona judaiaide. Naimie judaiaimona naisomo janore iduai juide. Comini nainomo jaillano, iena saitaadimaci. Bai jailla mei, sillinai iena jiai guisaibite. Ie jira sicoñede.

⁶ Nofiemo jiaie iduai juide. Sicode; iadedi jinui raise iñena jira, duide.

⁷ Eecuai illanomo jiaie iduai juide. Eecuai sicuamona, riarra eecuai ibaica. Ie jira lliñede.

⁸ Mare eniruemo jiaie iduai juide. Sicode. Llisillamona danademo cien diga lliñillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena ñno.

Jesús ie como lloga rafuena llofua rafue

(Mt 13.10-23; Mr 4.10-20)

⁹ Jesúmo ie llofueoicaigano ie como lloga rafuena jicanotimaci:

—¿Bue ñllena bie isoide rafuedo cominina llofuetio?

¹⁰ Uai ote:

—Jusiñamuidi omoína ie sedaacana rafuena jai uiñotade. Jiaie iena uiñone domoi. Jiaie cominina iena nia uiñotañede. Ie jira bie isoidicinodo naimacimo lloticue. Cue siño finoca rafuena cidimaci; iadedi iena naimaci ñnoñena jira, uiñone jaidimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñone dimaci.

¹¹ Omoína cue como lloga rafuena llofueiticue. Naie iduaidi Jusiñamui uai.

¹² Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci comeciaino cacaja uaina ñnotañede.

¹³ Jiaie iduai nofiero juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feñotimaci. Nofiero riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci.

¹⁴ Jiaie iduai eecuai illanomo juide. Naie iduai sicua mei, iena eecuai ibailla jira, raise lliñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaile rafuena finocana jaiñedimaci.

¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciaino ñnocana jaidimaci. Eo lliside isoidimaci. Jusiñamui jitailla rafuena sefuiruiñeno ñnocana jaidimaci.

Jesús ie rafue llocana jailla llua rafue

(Mr 4.21-25)

¹⁶ Jesús nia llote:

—Lamparín bu unia meinoconi, jiaie ra bide anamo rainañega; iadedi jofa jeraimo lligaiñollena, nainomo bite comini raise cioillena, ie rairanomo rainaca.

¹⁷ Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñedimaci.

¹⁸ Cue lluomo raise cacarei. Iena omoi ñnuamona, Jusiñamui omoína canoite. Omoína uiñocana jaitaite. “Jusiñamui rafuena uiñoticue” raitimiedi ñnoñenia, Jusiñamui naimiena faifitaite.

Jesús dibeimo itinona ñaia rafue

(Mt 12.46-50; Mr 3.31-35)

¹⁹ Cominina Jesús nia llofua, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci.

²⁰ Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena ñnotino ieca cue eidi, cue amatiaidi.

*Jesúdi jorai baguana ll#caitaja rafue
(Mt 8.23-27; Mr 4.35-41)*

²² Jiairuido botemo Jesús jailla mei, ie llofueoicaiganomo lloste:

—Ruica díbeimo mai cai jailli. —Ie mei jaidimaci.

²³ Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci.

²⁴ Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina ll#caitade. Ieconi aifi ll#caide. Bagoñede.

²⁵ Naimacimo jicanote:

—¿Bue ñellena cuena ñnoñedomoi? —Naimiena jacinailamona uai oñedimaci. Raijicailamona, coniniri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

*Jesúdi Gadara railla eniruemo illa rafue
(Mt 8.28-34; Mr 5.1-20)*

²⁶ Ruica díbellemo ridemo, Gadara railla eniruemo sijidimaci. Galilea facaisemo ite.

²⁷⁻²⁹ Botemona ari Jesús jaidemo, damie Jesús díne bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raiouillanomo nofie moto ifuaimo i-soide. Ebena cominina naimie faei raillanona, lloeo díga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Ñiese cuena ñbaiaacadio? Cuena duere ñnoño.

Iese raite, Janaba naie imamona oni jai oretajana Jesús lua jira.

³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite.

³¹ Jesúmo duere jicanoside, iraimo naimacina nia oretañellena.

³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite.

³³ Ieconi imamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Dinomo corobaiside.

³⁴ Iena ciuanona, chanchuai sedaraini naimaci nairai díne aisicana jaidimaci. Naie rafuena llocana jaidimaci.

³⁵ Ie jira díga comini jaide, naie rafuena raise fidillena. Jesús díne naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jitade. Naimie jai uairicoñede. Iena ciuanona, Jesúna jaciruitimaci.

³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica díbeimo abido jaillena.

³⁸ Ieconi jaive Janaba anamo illamie Jusúmo jicanote, naimie díga jaillena; iadedi Jesús raite:

—Dama ite.

³⁹ Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

*Jesúdi mena duide riñona jillotaja rafue
(Mt 9.18-26; Mr 5.21-43)*

⁴⁰ Ruica díbeimo Jesús abido ria, naimie abido billemo naimaci ocurilla jira, ailluena comini naimiena feñotimaci.

⁴¹ Jairona mameciredimiedi Jesús dine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote.

⁴² Dañaiñode ie jisa. Doce años naiñaiñodi ite. Niadedi fiodaiacade. Ie jira Jesúmo jicanuaibite. Iena cacajano, naimie diga Jesús jaide. Ie llofueoicaigano jiai jaidimaci. Jesús jaillano, diga comini naimiemo ñajjisaide.

⁴³ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiñona jaca buna jillotanide.

⁴⁴ Jinafo dinena billanona, Jesús iniroi fueda jetade. Iemona diailladi fainonocaide. Jillode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicai.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñajjidimaci.

⁴⁶ Jesús uai ote:

—Damie cuena jetade. Cue abimona cue uai jaillamona, naimie jai jillode.

⁴⁷ Jaive duidiñaiñodi Jesús naiñaiñona uiñuana uiñote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconi jilluana llote.

⁴⁸ Jesús dinena naiñaiñona raite:

—Ñoo, cuena o ñnua jira, jai jillodio. Mai jaillanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fodaite. Maestrona ñaidoñeno.

⁵⁰ Iena Jesús cacajano raite:

—O comeci jarire iñeno; ia cuena nia ñno. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide.

⁵² Nana nainomo itino eecuinaidimaci. Failliñaidimaci. Jesús dinena raite:

—Omoi eeñeno. Cuemona naiñaiñodi fiodaiñedesa. Jamai inide.

⁵³ Jai fiodaitedi: “¿Bue ñelli inide raitio?” raillanona jaisitimaci.

⁵⁴ Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵ Ieconi naiñaiño joreño abido bite. Naidacaide. Jesús llote:

—Guillena naiñaiñona eca.

⁵⁶ —Naiñaiño moo, ie ei diga, rajicaidiaimaiai. Jesús iaimaiaimo llote:

—Bie rafuena bumoo lloñeno.

9

Jesúdi ie llofueoicaiganona oretaja rafue

(Mt 10.5-15; Mr 6.7-13)

¹ Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaína oni oretallena, iena jiai iñonocaide.

² Naimacimo llote:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie díbeimo omoi comeciai iuaina meido”. Duidinona jillota.

³ Omoi jaia, buena uiñeno. Omoi abina riidollena, jiguídana uiñeno. Ailluena rana omoi uiñellena, bolsana uiñeno. Llomeniconna uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno.

⁴ Nie nairaímo omoi jaia, daacomo omoi ri. Naie nairaímo omoi ille dinori, daacomo omoi i.

⁵ Omoína comini feiñoñenia, naimaci nairaímona omoi jaia, omoi eilliaímo ite jearacuaina oni jaidino. Nicino naimacimo illana naimaci uiñollena, omoi eilliaína oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaímo jaidimaci. Diga comini imaci duicomona jillotatimaci.

Juan Bautista micori fiodailla rafue

(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede.

⁸ Jiaie comini raisoidimaci:

—Elías jai bairede.

Jiaíno raisoidimaci:

—Fiodaillamona Jusiñamui facaina jaie lloraíma micori jai jillode.

⁹ Jesúsna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúsna cioacade.

Jesús cinco mil iñiaína ecaja rafue

(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairaí dine jaide;

¹¹ Iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciaí iuaina meiduana llofujete. Duidinona jiaí jillotate.

¹² Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaíáimo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caímo ite cinco llomenico mena lliciaí diga. Nana naimaci guillena, ¿guille caí iballena nibaí jitaídio?

¹⁴ Cinco mil iñiaí nainomo illa jira, ailluena guille jitaillana uiñotimaci. Naimaci ainiaí, imaci uruiaí diga, jiaí itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci.

¹⁶ Naie cinco llomeniconna, naie mena lliciaí diga Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena.

¹⁷ Nana guillanona monidimaci. Monillamona, fiebide guillena iraidimaci. Doce cirigaíáimo oruitatimaci.

Pedro Jesúsna llua rafue

(Mt 16.13-19; Mr 8.27-29)

¹⁸ Jiaíruido Jesús ie Moomo jia facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”.
Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁰ Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai jilloitaramadio. Jusiñamui facaina lloraini micoriai o billena jaie llotimaci.
Jusiñamui ona orede.

Jesús ie fiodaillena llofuia rafue

(Mt 16.20-28; Mr 8.30-9.1)

²¹ Jesús naimaci como llogacino bumo lluana rairuide.

²² Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite.

²⁴ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiñeite.

²⁵ Cue cominina bu jaiñenia, nibai eo duere sefuiñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite.

²⁶ Cuena bu meiruia, cue uaina bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisaí siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue.

²⁷ Uanaicinona omoimo lloticue. Omoimona dajerie nia fiodaiñeitomoimo, illaimana cue bairellena cioitomoi.

Jesús abi meidocaila rafue

(Mt 17.1-8; Mr 9.2-8)

²⁸ Ocho digarui illanona, Jusiñamuimo jillena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uiñede.

²⁹ Naimie jiamona naimie abi meidocaide. Naimie iniroi naie dacaiño eo userecaide.

³⁰ Ieconí menamie bairiano, Jesús diga ñaitiaimaiai. Moisés micori joreño ite. Elías jiai ite.

³¹ Ebire bairediaimaiai. Jesús Jerusalémo fiodaille rafuena ñaitimaci.

³² Ie facaiseconi Pedro ie nabaiñiai diga jai inidimaci; ia casillamona, Jesús ebirenana cioidimaci. Jesús ecimo itiaimaiaina jiai cioidimaci.

³³ Iaimaiai jaiacania, Pedro Jesúsomo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie. —Iese raite; ia ie ñaia rafuena raise uiñoño jamai ebena ñaite.

³⁴ Iena naimie nia lluanona, uillie billamona, naimacina ibaide. Uillie ibaibillaconi jacinaitimaci.

³⁵ Uilliemona Jusiñamui naimacimo llote:

—Bimiedi cue jito. Naimiena fetodicue, cue jitaille rafue finollena. Naimie lluana omoi cacareillanona, iena ñno —llote.

³⁶ Jusiñamui llua mei, dama Jesúsna dane cioidimaci. Jesús diga itino naimaci cúa rafuena naie facaiseconi jaca bumo lloñedimaci.

Jesúdi Janaba anamo itimiena jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitimacimo, ailluena comini naimacimo dafaifide.

³⁸ Cominimona damie ado llote:

—Maestro, cue dajede cue jito duillana jibuisaibi.

³⁹ Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede.

⁴⁰ Janabana oni oretallena, o llofueoicaiganomo jicanoticue; ia oretanidimaci.

⁴¹ Iena cacajanona, Jesús ie llofueoicaiganomo llote:

—Cue uai siñonana nia inoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi inollena, ¿nie dinori omoi diga iiticue? —Naie duidimie moomo llote—, O jito cue dine mai ati.

⁴² Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade.

⁴³ Comini iena cianona, Jusiñamui siño uai naimiemo illari rajicaidimaci.

Jesús ie fiodaillena dane llofuia rafue

(Mt 17.22-23; Mr 9.30-32)

Naimaci nia rajicaia, Jesús ie llofueoicaiganomo llote:

⁴⁴ —Cue llwana feitaño. Monamona billanona, imana jaidicue; ia Jusiñamui jitailla jira, jairuido illacomini cuena meineitimaci.

⁴⁵ Jesús llwana raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiai meiruitimaci.

Jesús ie llofueoicaigano moto imiëna ille rafue

(Mt 18.1-5; Mr 9.33-37)

⁴⁶ Ie facaise Jesús llofueoicaigano conini uaitajanona raitimaci:

—¿Bu cai moto imiëna ille?

⁴⁷ Jesús naimaci comeciái facajacinona uiñuamona, nainomo ite cominimona daje urue bai jainanocaida, naimaci motomo naimiena jonete.

⁴⁸ Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiëna ille.

Jesúdi ie dibeimo itinona llua rafue

(Mr 9.38-40)

⁴⁹ Naie facaise ie llofueoicaiganomona Jesús Juan llote:

—Maestro, o mamecido jananiaina oretacabitimiena cidicai. Cai diga naimie jaicabiñena jira, iena finuana rairuidicai.

⁵⁰ Jesús dinena uai ote:

—Naimiena rairuiño. Cai dibeimo itimiedi cai facaisena ite. Ie jira naimie isoidinona rairuiño.

Jesús dinena Jacobo, Juan iaímaiaí lletaja rafue

⁵¹ Monamo abido Jesús jaillirui iaírei ia, Jerusalémo jaiacanamo naimie comeciina facade.

⁵² Ie jira dajeriëna uicodo oretate. Ie inillinona jenollena, Samaria raila nairaímo jaidimaci;

⁵³ iadedi Jerusalémo naimaci jailla jira, judíuaiñedinona samaritanodi gaiñena jira, Jesús llofueoicaiganona feiñoiacaiñedimaci.

⁵⁴ Iena fidianona, Jacobo, Juan diga, Jesús jicanotiaímaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaídió?

⁵⁵ Iaímaiaímo eruaillanona, Jesús dinena iaímaiaímo riire lletade:

—Dama ite. Iena jitañedicue.

⁵⁶ Ie mei inillena jiaie illanomo jaidimaci.

*Jesús ie llofuegamiena damie jaillena ie rafue
(Mt 8.19-22)*

⁵⁷ Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadicue. O llofuegamiena jaiacadicue.

⁵⁸ Jesús uai ote:

—Janorede ocainaiadi joforedimaci. Silliñiai jillainiairedimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

⁵⁹ Jiaimieo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fioldañena jira, o diga nia jaiñeiticue.

⁶⁰ Jesús naimieo dane llote:

—Dama ite. Cue diga mai bi. Cuena inoñedinodi o moona canoredimaci. Naimie fioldaa, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie dibeimo naimaci comeciai iuaina meiduana llocana cue diga mai o bi.

⁶¹ Jiaimie Jesús llote:

—O llofuegamiena jaiacadicue: iadedi cue jofomo nano jaiacadicue, cue cominina facadollena.

⁶² Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

10

Ie rafuena lollena, Jesús setenta digamiena oretaja rafue

¹ Ie llofueganona llofua mei, naimacimona Jesús setenta digamiena fetode. Naga naimie jaiacana nairaimo menamieriena oretate.

² Naimacimo llote:

—Diga comini ite, naimacina Jusiñamui rafuena inotallena; iadedi eo janore lloraini ite. Jusiñamui jicano, jiaie llorainina naimie oretallena.

³ Mai jai; iadedi abi rairuicana jai. Toica llaudaiai janallari illanomo illa isoi, omoina oredicue.

⁴ Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoimo dafaifia, are ñañeno.

⁵ Bu ie jofomo omoi ria, jofomo itinomo marena uaido.

⁶ Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimieo lloñeno.

⁷ Nie nairaimo omoi ria, daacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno.

⁸ Nie nairai omoi ria, omoina naimaci feiñoia, omoi ecalle rana uaitañeno guiño.

⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comeciai iuaina meido”.

¹⁰ Nie nairaimo omoi ria, omoina naimaci feiñoñenia, ie naiso motomo jaillanona llono:

¹¹ “Omoi naisomo cai eillimo ite jearacuai jai jaidinotica, marañede rafue omoimo illana omoi uiñollena. Jusiñamui omoina sedaacade; ia iena jitañedomoi” llono.

¹² Sodoma nairai jaie eo maraiñede. Jusiñamui iena jaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

*Jesús ie #noñedinona llua rafue
(Mt 11.20-24)*

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi #noñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuai meiduana jiaie comini uiñotallena, ebinide iniroina jitajanona, jusefo naimaci ifogiaimo jonetimaci.

¹⁴ Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci.

¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci.

¹⁶ Omoi llua naimaci cacaacania, cuena cacadimaci. Omoi llua naimaci jitaiñenia, cuena jitaiñedimaci. Cuena jitaiñedinodi cuena oretagamiena jiai jitaiñedimaci. —Jesús naie fetocanomo iese llua mei, oni jaidimaci.

Ie setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana ciodicue. Iemona cue uai naimie uai baifemo faiana uiñoticue.

¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedinono omoi anamo jai itataticue. Omoina niese nibaiñeitimaci;

²⁰ iadedi omoi uaina jananiai #nua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

*Jesús ie Moo diga ñaia rafue
(Mt 11.25-27; 13.16-17)*

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoina naimiena uiñotadicue. Ie muidona naimiena uiñotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie #notino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesús cai ecimo itimiena isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúsna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Ñiese Moisés micorí llogacinuai iena raite?

²⁷ Uai ote:

—Moisés micorí jaie cuega: “O jitailla jira, o começina facajamona, cai Nama Jusiñamuina nana o começi jitaillamona naimiena eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca iitio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiena fatimaci. Niade ie meinianona ie ecimona jaisite.

³¹ Dallu illanona, Jusiñamui diga ñairaima naie naisona jaide. Fagamiena cide; iadedi ecido jaide.

³² Dallu illanona, Jusiñamui jofomo maijiraïma jiaï jaide. Fagamiena cïuanona, ecido jiaï jaide.

³³ Ja muidomo Samaria nairai imie jaide. Naie nairaina enoidomoi. Fagamiena naimie cïuanona, naimiena duenaite. Iemona naimie canoacade.

³⁴ Naimie dine jaillano, ie bofellañona manode. Jiaï maitade. Ie burro emodomo jonecaida, naimiena uite. Inillinomo rilla mei, nainomo naimiena sedade.

³⁵ Ie areruido ie ñia jofo namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide.

³⁶ —Naie llofueraïmamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiena duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iaññuai María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiena feiñote.

³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacarellena;

⁴⁰ iadedi Martamo maijille eo illa jira, naiñaiño naimie llofuiacinona cacarefiñede. Ie jira Jesúmo llote:

—Nama, cue euiño cuena canoacaiñena jira, daño maijidicue. “O euiñona cano” naiñaiño lono.

⁴¹ Jesús uai ote:

—Ero, Marta, jarire itio. Diga o ramo começina facadio; ia Jusiñamui rafuemo começina faca.

⁴² María iemo começina jai facade. Naiñaiño cue llofuiana nano cacaiacade. Ona canollena naiñaiño lloñeiticue.

11

Jusiñamuimo Jesús jia rafue

(Mt 6.9-15; 7.7-11)

¹ Jiairuido ie Moo diga Jesús ñaia, ie llofueganomona damie naimiemo llote:

—Nama, jiana caina llofue, ie llofueoicaiganona Juan Bautista micorí llofui isoi.

² Jesús uai ote:

—Omoi jiiia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisa o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai inoñellena.

⁵ Iena naimacina nia llofuellena, Jesús jiaie rafuena llote:

—Naina mona moto llomenicono jicallena, o nabai dine o jaia, ado lloito: “Nabai, daje amani llomenicono jitaidicue.

⁶ Jiaie nabai cue jofomo como ride. Jaca cuemo buedi inede, naimiena cue ecallena”.

⁷ Ie jofo jeraimona o nabai fairioite: “Cueno uaidoñeno. Cue nasedi jai cue ibaicasa. Cue uruia jai inidimaci. Jia inidicue. Llomenicono omo fecallena casiacañedicue”.

⁸ Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitailla rana fecaite.

⁹⁻¹⁰ Daje ra omoi fafia, iena jenodomo. Raise jenoia, iena baitomo. Daimena omoi jenoia, naimie illanomo jaidomo. Nainomo naimiena baillamona, omona feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite.

¹¹ 'Ero, omoimona ie moomo llomenicono ie jito jicaia, noficina fecañede. Lliciaina jicaia, jaiona fecañede.

¹² Jigina jicaia, acaidona fecañede.

¹³ Jeacinona finocabidomo; iadedi omoi uruiaimo mare rana fecacabillana uiñotomo. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreña itataite.

Comini Jesúsna jeare ñaia rafue

(Mt 12.22-30; Mr 3.19-27)

¹⁴ Jiairuido Janaba anamo illamimona Jesús Janabana oni orede. Janabana nia oretañenia, Janaba anamo naimie illamona, naie ima ñainide. Janaba oni jailla mei, naimie ñaite. Ie jira comini rajicaidimaci;

¹⁵ iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

¹⁶ Jiaino naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo majinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainainidimaci. Oni jaidimaci.

¹⁸ Ie isoide. Beelzebú uaido jananiaina, omoi llua isoi, cue oretaia, Janaba ie dibeimo itino diga jai nabairiñede. Iemona naimie comini danomo ineitimaci.

¹⁹ Omoi comini jananiaina oni oretacabitimaci; iadedi naimaci finoca rafuena uaitañedomo. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomo.

²⁰⁻²² Jiaie rafuedo iena lloiticue. Ero, ie rana raise riiduamona, maividimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana finide; iadedi naimie baifemo maividimie bia, naimiena emodofillamona, ie rana firede. Ie isoide. Janaba anamona cominina jillotacabiticue. Naimie afemo nano cue

iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue llwana uiñotomoi.

²³ 'Cue dibeimo iñedimie cuena enoide. Cue dibeimo cominina itatañedimiedi naie cominina cuena inotañede.

Janaba anamo illamie rafue

(Mt 12.43-45)

²⁴ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comecina facade: “Navui cue anamo illamie dine abido jaiticue”.

²⁵ Abido naimie bia, naie ima comeci namanidena naimie baite.

²⁶ Iemei oni jaillanona, jiaie siete jananiaina naimie diga atide, naimaci anamo naie ima illena. Naie siete jananiaina naimie baifemo maraiñedimaci. Iemona naie ima eo fodo jaide. Ie isoide birui ite maraiñede comini. Cue rafue naimaci inoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesúsomo llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena inuamona, jiaino eo caimare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise diga comini Jesús dine biñoidimaci. Naimacimo llote:

—Birui ite cominidomoi maraiñedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca.

³⁰ Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci.

³¹ Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena inoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena inoñedomoi?” omoina ico ñaite.

³² Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoina raiñeiticue. Jonás micori baifemo birui uaidicue; iadedi cuena inoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofu anamo bainino rainañega. Cirigai anamo rainañega. Ie rairanomo rainaca, comini nainomo bia, jofu jerai lligaiñollena.

³⁴ Omoi uisi diga rana ciodomoi. Omoi uisi maraiñenia, rana raise cioiñedomoi. Ie isoide. Omoi comeci maraiñenia, maraiñedicinona finocana jaidomoi. Jusiñamuina uiñoñedomoi. Ie rafuena jiai uiñoñedomoi.

³⁵ Ie jira omoi comeciaina raise fino, cue rafuena omoi raise inollena.

³⁶ Nana omoi comeciái marena ia, cue rafuena inocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

*Jesúdi judúuai illaicomínina ñaia rafue
(Mt 23.1-36; Mr 12.38-40; Lc 20.45-47)*

³⁷ Comínina Jesús llofuia mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide.

³⁸ Naimie nia guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comecina facade: “Naimie eo mare llofueraima. ¿Ñiese cai einamaci llogacinodo jaiñede?”

³⁹ Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciái jearede.

⁴⁰ Abi uiñoñedomoi. Jusiñamui omoi abiaína omoi comeciái diga finode. Omoi finoca rafuena uiñote. Omoi comeciaina facajacinona jiaí uiñote.

⁴¹ Omoi comeciái marena ia, jiaie comínina canodomoi. Iemona Jusiñamuimona omoi abi jiaí mare.

⁴² Fariseuai, omoiimo rafuena lloiticue. Nana omoi illimo ite ramona Jusiñamuimo janore jisa fecacabidomoi; iadedi jiaie comínimo mare rafuena raise finoñedomoi. Jusiñamuina jiaí raise isiruiñedomoi. Nana naie isoide rafuena omoi jiaí finua.

⁴³ Comíni omoiiri acarillena, ofiracomo uicomo raíacadomoi. Ñine omoi macaria: “Jamai bue isoíñedícaí” omoi comeciaina facajamona, jiaie comíni omoína uaiduana gaidomoi. Iese omoi jailla jira, Jusiñamui omoína duere finoite.

⁴⁴ “Bainino ite raírafo emodomo comíni uiñoñeno macarillamona, naimaci abi jai jearede” raitomoi. Bainino ite raírafo isoidomoi. Omoi diga jiaie comínidi omoiimo ite jeacinona uiñoñeno nabairillamona, jeacinona jiaí finodimaci. Iese omoi finocana jiaí, Jusiñamui omoína duere finoite.

⁴⁵ Naie facaise Moisés llogacinuaina llofueraínimona damie Jesúmo llote:

—Iese o lloia: “Jeacono finodomoi” caina jiaí llotio.

⁴⁶ Jesús uai ote:

—Jusiñamuimona jiaí duere sefuitomoi. Omoi einamaci llogacinuaído raise naimaci jaillena, diga rafue comíni finuana jitaidomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadicaí” comecina facadomoi.

⁴⁷ Omoi jaiagaidi Jusiñamui facaina llorainina meinetimaci. Naie lloraini micoriai raíafuai birui marena finodomoi;

⁴⁸ iadedi naimaci micoriai llogacinuaído omoi birui jiaí jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoína duere finoite.

⁴⁹ Omoína Jusiñamui abi uiñuamona jai llote: “Cue rafuena llollena, naimaci dine cue facaina llorainina oretaiticue. Cue rafuena eo uiñotínona jiaí oretaiticue. Dajeriena meineitimaci. Jiainona duere finoitimaci”.

⁵⁰ Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite.

⁵¹ Abel micori jaie ite. Ie ama naimiena meinete. Naimie facaisemona omoi jaiagaidi diga llorainina meinetimaci. Zacaríana jiaí meinetimaci. Jusiñamui jofomo Jusiñamuimo toíca ocaina jobaisoillano motomo naimiena meinetimaci. Omoimona Jusiñamui birui iba oite.

⁵² Omoï llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaïno iena raise uiñuana jitañedomoi. Iese omoï jailla jira, Jusiñamui omoïna duere finoite.

⁵³ Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micorï llogacino llofueraini daje isoi uai uaitatimaci.

⁵⁴ Naimie raise uai oñedena, naimiena duere finoacadimaci.

12

Jesúdi mareuidinona abi caitadinona llofuia rafue

¹ Ie facaiseconi eo ailluena comini Jesús dine ofidimaci. Ailluena illa jira, conini eilliaïmo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicai” raitimaci; iadedi mareuidinona abi caitadimaci. Naimacimona abina rairui.

² Naimaci birui finoca rafuena birui bainino finodimaci; ia Jusiñamui naimaci comeciã iticinona ico uiñoñotaite.

³ Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiñeno llofuia rafue

(Mt 10.28-31)

⁴ Ie llofueganomo Jesús llote:

—Cue nabaiñiaïdomoi. Omoïna meineiacadinona jaciruiñeno. Omoï abina meinedimaci; ie iadedi omoï joreñoña meinedimaci. Omoïna naimaci meinia, omoï joreño Jusiñamui dine jaite. Iena uiñuamona, omoï meineiacadinona jaciruiñeno.

⁵ Cue rafuedo omoï raise jaiñenia, Jusiñamuina jacirui. Omoï fiodailla mei, omoï abina omoï joreño diga iraimo ie dotalle uai naimiemo ite. Ie jira naimiena jacirui.

⁶ Ero, dabecuiro janorede sillina fecadomoina, eo janore ibaca. Silliñiaï eo janore raifide; iadedi Jusiñamui naimaci illana uiñoñote.

⁷ Ero, niga ifotirai omoïmo illana Jusiñamui jiaï uiñoñote. Naimiedi omoïna sedajana jiaï uiñoñote. Silliñiaï baifemo Jusiñamui isiruigaomoi. Omoï duere finoacadinona jaciruiñeno. Jusiñamui jitañenia, omoïmo jaca buena suiñoite.

Jesús naimiena janoñenana llofuia rafue

(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoï lluamona, jiaïno omoïna duere finoitimaci. Cuenã birui omoï janoñenia, nana comini Jusiñamui jaienisaï uicomo ico ia, nainomo omoïna janoñeiticue. “Cue cominidomoi” omoïna raiticue.

⁹ Cuenã birui omoï janoia, nana comini Jusiñamui jaienisaï uicomo ico ia, nainomo omoïna janoiticue. “Cue cominiñedomoi” omoïna raiticue.

¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreñoña jeare ñaitimie jeacinona feitañeite.

¹¹ Cue rafuena omoï llua muidona, duere sefuitomoi. Illaïcomini dine omoïna llogidollena comini uia, omoï abi riidollicinomo omoï comeciãna jarire facañeno.

¹² Naie facaiseconi Jusiñamui Joreño omoï abi riidollicinona uiñoñotaite.

Jesúdi raruiã eo uamona abi rairuillana llofuia rafue

¹³ Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi.

¹⁶ Iena omoi raise uiñollena, jiaie rafuedo iena lloiticue. Ucuberedimiedi ie illimona ailluena rana ote.

¹⁷ Ie jira comecina facade: “Cue illimona ailluena rana oticue; iadedi ¿ninomo iena eenoiticue?”

¹⁸ Birui cuemo ite eenoracona judaiticue. Ie mei aillue eenoracona finoiticue. Nainomo cue rana eenoiticue”.

¹⁹ Ie comecina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caimare iiticue”.

²⁰ Iese comecina facade; iadedi Jusiñamui naimiemo llote: “Abi uiñoñedio. Cue llua jira, ja naiona fioidaitio. Ie mei omo ite ra omo fiebiñeite”.

²¹ Dama ramo ie comecina bu facaia, Jusiñamui jitaillacinomo ie comecina bu fa-cañenia, faifite.

Jesúdi Jusiñamui cai sedajana llua rafue

(Mt 6.25-34)

²² Ie llofueoicaiganomo Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno.

²³ Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite.

²⁴ Silliñaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite.

²⁵ Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoina a sairitarede.

²⁶ Omoi comeciaina facajamona omoi a sairíñena jira, jiaie ramo omoi comeciaina jarire finoñeno.

²⁷ Safiamo omoi comeciaina faca. ¿Niese sicodimaci? Maijiñedimaci. Iniroina tiforiñedimaci; iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

²⁸ Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi.

²⁹ Omoi comeciaina jarire icana jaiñeno. “¿Buena guiticaí?” raiñeno. Iemo comeciaina eo facañeno.

³⁰ Jusiñamuina inoñedino iemo comecina facacabidimaci. Nana omoi jitaillacinona omoi Moo Jusiñamuidi uiñua jira, naimaci isoi iñeno.

³¹ Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jiai iite.

Jesúdi Jusiñamuimo comecina facaja rafue

(Mt 6.19-21)

³² Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajamona, omoina sedaite.

³³ Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Firiraima nainomo jaiñede. Gíreco nainomo jiai iñede.

³⁴ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús ie abido billemo ocurillana llofuia rafue

³⁵⁻³⁸ Jesús nia llofue:

—Monamona ico cue abido billemo ocuri. Iena omoi raise cacaillena, bie rafuedo iena lloiticue. Damie ie nabai ie ai ua rafue dine naiona jaide. Ie mullaia naimie abido billemo ocurillana ocuide. Naimie billemo naimaci raise ocuria, iniroina jitanajona, lamparínai unianona, ocuritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci iniñeno ocuria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uiñoñena jira, jaca ocuricana naimaci illa.

³⁹ Ero, firiraima bille facaiseconi jofo namadi uiñotena, nia caadote, ie ra faifi raillanona.

⁴⁰ Monamona ico abido biiticue. Omoi ocuriñena facaisemo biiticue. Ie jira cue billemo raise ocuri.

Jesúdi patrón ie mullaimana ie jofona sedataja llua rafue
(Mt 24.45-51)

⁴¹ Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiai ecade.

⁴³ Ie mei patrón oni jaide. Jofomo abido naimie bia, ie nanoca mullaima raise maijiana fidia, naimiena raise ibaite.

⁴⁴ Iobillamona, nana ie raruiaina sedataite;

⁴⁵ iadedi naie mullaima marañenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite.

⁴⁶ Ie ocuriñena facaise ie patrón abido billanona, naimiena meinetaite. Ie uaina ñinoñedino isoi, duere finoite.

⁴⁷ Naie mullaima ie patrón jitailla rafuena finuana uiñote; iadedi iena finoñede. Ie jira eo duere sefuite;

⁴⁸ iadedi marañede rafuena raise uiñoñeno jiaie mullaima finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

Jesús muidona nana comini uri iñena rafue
(Mt 10.34-36)

⁴⁹ Jesús llote:

—Cuena naimaci ñnollena, eniruemo comini dine biticue. Cuena dajerie ñnuamona, cue cominina jaitimaci. Cuena jiaino ñnoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue.

⁵⁰ Cue nia eo duere sefuiticue. Iena raire suillena jitaidicue.

⁵¹ Nana cominina uri itatallena eniruemo biñedicue. Cuena ñnoñedinodi cuena ñnotinona enoitimaci. Enoillamona, cuena ñnotinona duere finoitimaci.

⁵² Cue billamona, daje jofomo itino diese danomo iñeitimaci. Dabecuiro comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite.

⁵³ Cue lloga rafuena damierie inua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

Jesúdi monamo ite rana llofuia rafue
(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide.

⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite.

⁵⁶ Abina uiñotinona abi caitadinodomo. Monamo eruaillamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi.

⁵⁷ Iemo omoi comeciaina raise facañedomoi.

⁵⁸ Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina jonetaite.

⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

13

Jesúdi comeciái iuai meiduana dana llua rafue

¹ Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernador di soldaduaina orede, naie cominina fallena.

² Jesús uai ote:

—¿Ñiese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi.

³ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiaí faifitomoi.

⁴ Siloé railla tidacana navui ana goillamo, dieciocho digamie saitabidimaci. Iena fididomoi. ¿Ñiese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi.

⁵ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiaí faifitomoi.

Jesúdi ie Moo comini comeciái iuai meiduamo fecuise ocurilla llua rafue

⁶ Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede.

⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”.

⁸ Ie illina sedaraima uai ote: “Dama ite. Daje año nia seda. Riarana abina caigiticue. Eniruena caimaretaiticue.

⁹ Jiaie año llisia, mare. Llisiñenia, iena tieiticoco”. Ie isoide. Jusiñamui omoi comeciái iuai meiduamo are ocurite; ia meidoñenia, omoina duere finoite.

Jesúdi jicaidiñaiña jillotaja rafue

¹⁰ Jiairuido sábadoruimo judíuai ofiracomo Jesús llofue.

³⁰ Naga nairaïmona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoño cuena ñnocana omoi jailla.

Jesús Jerusalémo itinomo llua rafue
(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaïma Herodes ona meineiacade.

³² Jesús uai ote:

—Herodedi eo jifueraiïma. Naimie dine jai. Naimiemo llono: “Janaba anamo ite cominimona Janabana oni orecabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite.

³³ Nia oni jaiticue. Ailluena Jusiñamui facaina lloraïni micoriai nainomo jai fiodailla isoi, Jerusalémo cue rafue jiai raïre fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoiïmo rafuena lloiacadicue. Jusiñamui facaina lloraïnina jaie meinetomoi. Naimie omoi dine oretaganona noficina fairinuano, naimacina meinetomoi. Omoïna cue sedallena, atava ie uruiaï sedaja isoi, diga icaiño cue anamo omoiïna uaidoiacadicue; iadedi omoi dinena cuena jitaïñedomoi.

³⁵ Iemona Jusiñamuidi omoi illanona jai faïnonocade. Cue Moo dine jaiticue. Cue jailla mei, cuena cioïñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiaïruido sábadoruïmo Jesúdi fariseo imie jofomo guisaide. Naie fariseo imiedi illaïcomini. Nainomo itino Jesúmo eo eruaïdimaci.

² Guille facaise naie jofomo duidimie bite. Naimie abina siridimie.

³ Nainomo itinomona damieriedi fariseuai comini. Moisés micori llogacïnuaina llofueraini jiai itimaci. Naimacimo Jesús jïcanote:

—Sábadoruïmo comena cue jillotaïa, ¿omoiïmona jeacino finodicue? ¿Ñiese Moisés micori llogacïnuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede.

⁵ Nainomo itinomo llote:

—Sábadoruïmo maijicabidomoi. Sábadoruïmo omoi jurareta pozomo uaidena, iena jillotallena, nairuïmo iena ari otomoi. Omoïmona naie isoide maijïa mare. Bimiïna cue jillotaja jira, ¿ñiese cuena jeare ñaitomoi?

⁶ Iena cacajanona, uainicaïdimaci.

Jesúdi guillena uaidoganona llua rafue

⁷ Jesúdi naimaci guisaïbillana cïode. Jiaïno baïfemo illena, jofo nama abïmo nana raïacadimaci. Iena ciuamona, naimacimo Jesús rafuena llofueite:

⁸ —Rafue dine guillena omoiïna bu uaidoïa, jofo nama abïmo raïñeno, omoi baïfemo itimie bi raillano.

⁹ Jofo nama abïmo omoi raïa, omoi baïfemo itimie bia, jofo nama omoiïmo lloite: “Bimiïmo omoi raïllanona fecã”. Meidaïllanona, oni raïnadaïtomoi.

¹⁰ Ie jira rafue dine omoiïna uaidoïa, naie jofomo omoi ria, oni raï. Ie mei jofo nama jitaïa, omoiïmo lloite: “Cue abïmo raï”. Ie mei nana naie itino omoi iobillana cioïtimaci.

¹¹ Ie isoide. Jusiñamuidi jiaïmie afemo iacadimiena jiaïmie afemo iñenana itataite. Jusiñamuidi jiaïmie afemo iacaiñedimiena jiaïmie afemo itataite.

¹² Naimiena uaidotimieïmo Jesús llote:

—Guille rafuena o finoia, naga icaiño o nabaiñiaina uaidoño. Naga icaiño o cominina uaidoño. Naga icaiño o ecimo itino ucuberedinona uaidoño. Naimacina o uaidotona, jiaruido guillena ona uaidotimaci, naie iba o ollena;

¹³ ia rafuena o finoia, dueredinona uaido. Ñuja-ñujacaida macaritinona uaido. Uisnidinona uaido.

¹⁴ Naimacimona iba ico o oñenamona, Jusiñamui ona caimare itataite. Jiaruido fiodaillamona mareuidino jilloia, monamo Jusiñamui ona ibaite.

Jesúdi ailluena guille finoia rafuena llua rafue

¹⁵ Jesús abimo itinomona Jesús lluaña damie cacajano, raite:

—Monamo Jusiñamui illanomo itimiedi marena iite.

¹⁶ Jesús uai ote:

—Iena omoi raise uñollena bie rafuena lloiticue. Damie aillue rafuena finode. Ailluena cominina uaidote.

¹⁷ Rafue illaruimo ie mullaimana orede, cominina dane uaidollena. Raite: “Mai bi. Nana guille finuadi jai fuite”;

¹⁸ ia biacaiñedimaci. Damie llote: “Enruena como ibadicue. Iena jibuisaiacadie. O rafuemo jaiñeitie. Ie jira cue joreña icineitiosa”.

¹⁹ Jaiñie llote: “Diez diga juraretana como ibadicue. Naimacina jibuisaiacadie. O rafuemo jaiñeitie. Ie jira cue joreña icineitiosa”.

²⁰ Jaiñie llote: “Riño como otie. Ie jira o rafuemo jaiñeitie”.

²¹ Ie nama dine naie mullaima abido jaide. Comini biacaiñenana llote. Iena cacajano, rafue namadi icirite. Ie mullaímamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisnidinona uaido”.

²² Ie mei naie mullaima jaide. Abido naimie bia, ie namamo llote: “O lluaña finodie. Ailluena comini jai bitimaci. O jofomo illino nia ite”.

²³ Rafue namadi uai ote: “Naisomo itinona bene atillena, cue jofona oruitallena, cai nairaimona jino jai.

²⁴ Cue nano uaidogano cue guillena guiñeitimaci”. Ie isoide. Jusiñamui rafuena feñotino monamo Jusiñamui illanomo ico itimaci; ia naimie rafuena jitañedino nainomo ico ñeitimaci.

Jesúdi naimie llofueganona jaiacadino rafue

²⁵ Naie facaise ailluena comini Jesús diga jai jaisoidimaci. Naimacimo llote:

²⁶ —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruia baifemo isiruilla. Cuena ie amatai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruñenia, cue llofuegamiena raise jainide.

²⁷ Cue llofuegamiena bu jaillamona, duere sefuicana jaite. Nibañi naiemona fiodaite. Bu iese jaiacaiñenia, cue llofuegamiena naimie raise jainide.

²⁸ 'Ero, jaiie rafuedo iena lloiticue. Jofona bu finoacania, ie ucubena bailla diese uñollena: “¿Ñiga raifite?” comecina nano facade.

²⁹ Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci.

³⁰ Raitimaci: “Ie jofo finua tainede; iadedi fuidonide”.

³¹ 'Ero, jaiie rafuedo iena lloiticue. Illaíma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Ñiese emodofitie?” Comecina facaja mei: “Emodofitie” naimie comecina facaja,

³² nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacadicue”.

³³ Biemo comecina omoi faca. Ie raruaímo bu comecina eo facaia, cue llofuegamiena jainide.

³⁴ Sal mare; iadedi ie caimano jai iñenia, ¿dane niese nibaiamona caimarenite?

³⁵ Jai marañede. Eniruemo jonegadena, jiai marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluomo cacarei. Iena ñno.

15

Jesúdi naimiena ñnotinomona damie faifillana jitaiñena rafue (Mt 18.10-14)

¹ Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiai ofidimaci.

² Iena ciuano, fariseuai cominidi, Moisés micori llogacinuaina llofueraini diga, Jesús joreña ñaitimaci:

—Bimie marañedicinona finorainina feiñote. Naimaci diga jiai guite.

³ Naimaci ñaiana uiñuanona, Jesús naimacimo bie rafuena llote:

⁴ —Omoimona damiemo cien toica llaudaiai nibai ite. Naimacimona daje feiraite. Ie noventa y nueve llaudaiaina fañonocaida, iena jenuaite, ie baille dinori.

⁵ Baillanona, ie fecanicomo rocanocaida, iobicana biite.

⁶ Jofomo naimie ria, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue feiraite llaudana jai baiticue”.

⁷ Ie isoide. Cue rafuena cue lluamona, damie ie comeci jeacinona fañonocaillamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori.

⁹ Iena naiñaiño baia, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”.

¹⁰ Ie isoide. Cue rafuena cue lluamona, damie ie comeci jeacinona fañonocaillamona, ie comeci iuai meiduamona, Jusiñamui jaienisaie eo iobidimaci.

Jesúdi damie ie moo fañonocaila llua rafue

¹¹ Jesús llote:

—Jiaie rafuena omoimo lloiticue. Damiemo mena jito ite.

¹² Ie moomo jamamie llote: “Moo, o fiodailla mei, o raruaiaimona janore feiñoiticue. O fiodaillana sedaacaiñedicue. O raruaiaina cue facaina birui jitaidicue. Cuemo ine”. Ie jira ie moo naimiemo fecade.

¹³ Ie mei nano nie dinori illamona, nana ie raruaia iraianona, jiaie eniruemo jaide. Nainomo ie ucube jamai buruemo faiaide.

¹⁴ Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite.

¹⁵ Ie jira nainomo ite patrón dine maijaide. Naie patrón ie chanchuaina sedallena naimiena orede.

¹⁶ Naimiena jaca buna ecarainina jira, chanchuai guillemona guiacade.

¹⁷ Iese naimie duere sefuilla jira, ja muidomo abina uiñoocaillamona, comecina facade: “Cue moo jofomo nana naimie mullaiaie raise guitimaci. Guille fiebicabite; iadedi bene aimeri fiodaicue.

¹⁸ Cue moo dine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiai finodicue.

¹⁹ Odi: ‘Cue jito’ cuena raiño. O mullaiaie illa isoi, cuena abido feiño”.

²⁰ Ie facaise ie moo dine jai jaide. Nia aare naimie ia, ie moo naimiena ciode. Ie jitona duenailanona, naimie dine aiside. Naimiena caimadote. Jiai llibanote.

²¹ Ie jito naimiemo llote: “Moo, Jusiñamuimo jeacinona finodicue. Omo jeacino jiai finodicue. Odi: ‘Cue jito’ cuena raiño”.

²² Ie moo iena cacajano, ie mullaiaimo llote: “Cue jitona naimie eruaillena, eo mare iniroina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jiai ati.

²³ Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaí.

²⁴ Navui cuemona cue jito fodaite isoide. Cajе cuemo dane abido rilla. Navui cuemona naimiedi faifide; iadedi birui naimiena dane ciodicue”. Naimie llua isoi, rafuena finodimaci.

²⁵ Naie facaise nano doforamie illimo ite. Jofomo abido naimie bia, comini iraisillana cacade.

²⁶ Daje mullaimana uaiduanona, naie rafuena jicanote.

²⁷ Naie mullaíma uai ote: “O ama abido jai bite. O ama ramo jiriño abido billa jira, o moo ie janoreta farediretana jai fatatate”.

²⁸ Iena cacajano, icirite. Fo jaiacaiñede. Ie jira ie moo jino bite. Naimiena fo uaidote.

²⁹ Ie moomo llote: “Ero, diga años o diga maijidicue. O uaina jaca inoticue; iadedi cue nabaiñiaí diga, rafuena cue finollena, chivo cuemo jaca fecañedio.

³⁰ O jito jamamie ie ucube callirediñaiñuaímo fuidode; iadedi abido naimie billano, naimie facaina janoreta farediretana fatatatio”.

³¹ Ie moo uai ote: “Moo, nagarui cue diga itio. Nana cue radi oienite.

³² Cuemona o ama navui fodaite isoide; iadedi naimiena dane ciodicue. Naimie navui faifide raiticue; iadedi caje cuemo dane abido rilla. Cue iobillanona rafuena finodicue”. Bie rafuemono omoi fueollena, iena jai lloticue –Jesús llote.

16

Jesúdi patrón ie mullaíma finoca rafuena llua rafue

¹ Ie llofueoicaiganomo Jesús jiaie rafuena llote:

–Ucuberede patrón ie mullaimana ie rana sedatate. Naie patrón eneno oni illanona, ie mullaíma ie rana raise sedañenana fidide.

² Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijiñeítio”.

³ Iena cacajano, naie mullaíma comecina facade: “¿Niese nibaiticue? Cue nama cuena jai dotaacade. Maijiana ocuinidicue. Jiaie cominimona ucube jamai jicajana meiruiticue.

⁴ Cue finuana jai uiñoticue. Naimaci jofomo comini cuena íco feiñollena cue dotaja mei, nana cue patrón debedinona uaidoiticue”.

⁵ Ie jira naimacina uaidote. Damiemo jicanote: “¿Cue patrómo niga debedio?”

⁶ Uai ote: “Cien bidones raifi aceitunamona oga aceitena debedicue”. Naie mullaíma raite: “O rabemo jarire ja cueno: cincuenta bidones”.

⁷ Jiaimie mo jicanote: “¿Niga debedio?” Uai ote: “Cien digagai trigo raifi debedicue”. Naie mullaíma dinena raite: “O rabemo ochentana cueno”.

⁸ Iena fidiano, naie mullaímamo ie patrón raite: “Jiaíruido marena o illemo o comecina raise facadio. Eo abina uiñotimedio” raite. Ero, Jusiñamuina inoñedinodi naimiena inotino baifemo ra fecajana baitadimaci.

⁹ Naiemona omoi fueollena, omoímo lloiticue. Omoímo ite ra diga dueredinona cano. Iemona omoi nabaiñiaína jaitimaci. Omoi fodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoína marena ñaitimaci.

¹⁰ Janore ra omoimo illamona, Jusiñamui facaina birui omoï raise maijia, ailluena ra omoimo itedena, Jusiñamui facaina jiaï raise maijïtomoi. Janore ra omoimo illamona, maraiñede rafuena birui omoï finoia, ailluena ra omoimo itedena, maraiñede rafue nia jiaï finoïtomoi.

¹¹ Omoimo birui ite ra diga Jusiñamui facaina omoï raise maijïñenia, naimiemona jiaïe rana feiñoñeitomoi.

¹² Omoï anamo ite ra diga Jusiñamui facaina omoï raise maijïñenia, Jusiñamui ie rafue omoimo itatañeite.

¹³ Mena patrones diga daruido buna jaca maijinide. Mena diga bu maijiacania, damiena jiaïmie baifemo gaita. Ie gaiamie ocuica rana finoite. Jiaïmie ocuica rana raise finoite. Ie isoide. Raruiaï ollemo comecina omoï eo facaia, Jusiñamui jitaillacinomo comecina raise facañeitomoi.

Jesúdi fariseuai comini diga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamaidimaci.

¹⁵ Naimacimo Jesús llote:

—Omoï finoca rafuemona comini omoïna: “Mare” raillana jitaïdomoi; iadedi Jusiñamui omoï comeciaï maraiñenana uiñote. Iese omoï illana Jusiñamui gaiñede.

¹⁶ Jusiñamui facaina lloraini micoriaï ciegafuiaïmona Jusiñamui rafuena cacacabidomoi. Moisés micori ciegafuiaïmona iena jiaï cacacabidomoi. Juan Bautista micorimona naimie anamo omoï illana Jusiñamui jitaillana cacadomoi. Jusiñamui ðibeimo omoï comeciaï iuaina meiduana cacadomoi. Iena jiaï llocabiticue. Iena ailluena ðinuamona, Jusiñamui ðibeimo birui duere iacadimaci.

¹⁷ Mona enirue diga nia ia, nana Jusiñamui llogacinuaï suicana jaite.

Jesús ñima ie aina dotaja rafuena llofuia rafue

(Mt 19.1-12; Mr 10.1-12)

¹⁸ Jesús llote:

—Naga aina dotadimiedi, jiaïñaiño ollena, jeacinona jai finode. Dotacañaiño bu oia, jeacinona jai finode.

Jesúdi ucuberedimie iaïmaiaï Lázaro ie rafuena llua rafue

¹⁹ Jesús jiaïe rafuena llote:

—Cue llogacinona omoï raise uiñollena, bie rafue lloiticue. Ucuberedimie ite. Eo mare ñiroina jítade. Eo caïmare raise guicabite.

²⁰ Naimie nasemo Lázaro raillamie jamai bïide. Naimiedi dueredimie. Efonaitimie.

²¹ Naimiedi ucuberedimie guiga allamona guiacade; ia guiñede. Jiconiaïdi naimie efociaïna mecabite.

²² Ie mei naimie fodaite. Jusiñamui cominina naimie illamona, Jusiñamui jaienisaï naimie joreño monamo Abraham micori joreño illanomo uitimaci. Ucuberedimie jiaï fodaite. Comini naimiena raitimaci.

²³ Jusiñamui cominina naimie ñenamona, naimie joreño iraimo jaide. Nainomo naimie duere sefuillamona, Abraham joreñoa aarena ciode. Naimie ecimo Lázaro micori ie joreñoa jiaï ciode.

²⁴ Abraham joreñoa uaidote: “Cue moo Abraham, cuena duenai. Lázarona cue ðine oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo legi cacadicue”.

²⁵ Abraham joreñoði uai ote: “Moo, o illa ðinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuïðio.

²⁶ O ðine jainidicai. O enefebetuemo itio. Cai enefebetuemo jiaï iticai. Caïmona omoï ðine bu jaiñellena, omoïmona cai ðine bu biñellena, iese ite”.

²⁷ Ucuberedimie micori joreño ðinena uai ote: “Cue moo jofomo Lázarona oreta.

²⁸ Cuemo cinco amatai ite. Naimacimo riire lollena, bie iraimo naimaci riñellena, naimiena oreta”.

²⁹ Abraham joreñodi uai ote: “Naimacimo Moisés micori ciegafuiai ite. Jusiñamui facaina jaie lloraini micoriai ciegafuiai jiai ite. Iemo naimaci comeciaina facallesa”.

³⁰ Uai ote: “Iese lloñeno. Iemo comeciaina facañeitimaci; iadedi fiodaillamona jillu-anona, naimaci dine bu jaia, naimiena ñnoitimaci. Naimaci comeciiai iuai meidoitimaci”.

³¹ Abraham joreñodi uai ote: “Moisés micori ciegafuiai, Jusiñamui facaina jaie lloraini micoriai ciegafuiai naimaci ñnoñenia, fiodaillamona bu jilloia, naimiena jiai ñnoñeitimaci” —Jesús llote.

17

Jesúdi jeacinona fñoñenana llofuia rafue

(Mt 18.6-7, 21-22; Mr 9.42)

¹ Ie llofueoicaiganomo Jesús llote:

—Diga ramo omoi faicana uitinomo riitomoí. Omoi ramo faitimie duere sefuite. Jusiñamui omoi ramo faitimiena duere finoite.

² Como creyentena jaidimiena ramo bu faia, naimie cimaimo aillue nofici maianona, joraimo corobaillena naimiena dotacadena, mare.

³ Como creyentena jaidimiena ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoca rafuena feita.

⁴ Nagarui diga icaíño ona jeare naimie finoia, naga icaíño o diga naimie marena dane ñaiacania, naie rafuena feita.

Jesúdi naimiena ñnuana llua rafue

⁵ Ie doce llofueoicaigano Jesúmo llote:

—Ona ñnoticai; ia caina o uaina eo ñnota.

⁶ Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemono omoi fueollena, iena lloiticue. Illimo ie mullaíma maijiamona, ie toñiai sedajamona jofomo abido naimie ria, ie patrón naimiemo lloñeite: “Mai nano guisaíbi”;

⁸ iadedi naimiemo lloite: “Cueiena guillena nano fino. Cueno eca. Ie mei guitío”.

⁹ Naie mullaíma ocuica rana finua muidona, mullaímana naimie illa jira, ie mullaímamo patródi iobillacinona fecañeite.

¹⁰ Ie isoide. Nana cue llua omoi finodomoina, dani omoi maijadi, cue cominina omoi illa jira, cuemona iobillacinona feiñoñeitomoi.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite.

¹² Nairai dine naimie riacania, diez efonaitinodi naimiemo dafaífidimaci. Eneno oni naidaidimaci.

¹³ Naimiena ado uaidotimaci:

—Jesús, Maestro, caina duenai. Caina ja jillota.

¹⁴ Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci.

¹⁵ Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade.

16 Naimiemo iobillacinona jiai fecallena, Jesús uicomo ana bitadate. Naimiedi judíuñedimie. Samaritano imie.

17 Jesús llote:

—Diez digamiedomoi. Omoína jai jillotaticue. ¿Ninomo jianodi nueve digamie itimaci?

18 ¿Niese Jusiñamuimo iobillacinona feacaaiñedimaci? Dama bimie fecade. Naimiedi judío imieñedimie.

19 Jesús naimiemo llote:

—A naidada. Mai jai. Cuen a inua jira, jai jillodio.

*Jesúdi Jusiñamui ie cominina sedajana llofua rafue
(Mt 24.23-28, 36-41)*

20 Naie facaise fariseuai comini Jesúmo jicanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoína sedallena uiñoñeitomoi.

21 Buena ciuamona raíñeitomoi: “Jai, Jusiñamui bene caina jai sedade”. “Jai, batine caina jai sedade”; iadedi omoi motomo itinomona Jusiñamui dibeimo damierie illamona, Jusiñamui omoi motomo jai illana uiñoitomoi.

22 Ie llofueoicaiganomo llote:

—Jairuido duere sefuillamona cue diga janore jisa iacanitomoi; iadedi iese nia iñeitomoi.

23 Damierie raia: “Ero, batine Cristo jai bairede” nainomo jaiño. Naimaci raia: “Ero, bene Cristo jai bairede” iena inoño.

24 Mona borillamona mona jillacidi usere cide. Ie isoide. Cue abido bia, nana comini iena uiñoitimaci.

25 Birui iese nia suiñeite. Nano duere sefuiticue. Birui ite comini cuena jiai feiñoñeitimaci.

26 Abido cue billirui iaírei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci.

27 Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

28 Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauuidimaci. Iena fecauuidimaci. Illimo maijuidimaci. Jofona finouuidimaci. Naimaci isoilla isoi icana jaidimaci.

29 Dani iemo comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci.

30 Ie isoide. Abido cue billiruimo comini iitimaci. Cue bia, ebena biiticue.

31 Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena.

32 Iemona fueollena, Lot ai micori rafuemo comeciaina faca. Naiñaiño ie raruiaimo daño comeciaina facajamona, na ie abi diga faifide.

33 Dama ie raruiaimo ie comeciaina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comeciaina bu facaia, monamo cue diga jaca iite.

34 Cue bille facaise menamie daje cuartomo iniano iitiaimaia. Damie jaite. Jiaimie fiebite.

35 Mena riño danomo doberillanona iitiaiñuai. Dañaiño jaite. Jaiñaiño fiebite.

36 Menamie illimo maijiano iitiaimaia. Damie jaite. Jiaimie fiebite.

³⁷ Ie llofueoicaigano jìcanotimaci:

—¿Ñine jaitimaci?

Uai ote:

—Urujaisai rifaide ramo ofillana uiñua isoi, nana cuena ñnotino cue abido billena uiñoitimaci. Cuemo duillamona, cue diga jaitimaci.

18

Jesúdi feciñona llua rafue

¹ Ie llofueoicaiganomo Jesús rafuena dane llote:

—Jusiñamuimo jìcabi, omoi jìcaca rafue omoi feiñolle ñnori. Raire feiñoñenia, abina jafueño.

² Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede.

³ Nainomo naimie ñine daje feciño jai-jaicabillanona, raite: “Cuena duere finodimiemona cuena cano”.

⁴ Naimie ñinena raite: “Dama iesede. Ona canoñeiticue”. Ie mei ie comecina facade: “Jusiñamuina jaciruiñedicue. Cominina jiai isiruiñedicue;

⁵ ia naiñaiño cuemo sefuire bi-bina jira, naiñaiño canoiticue, cue rairaiñellena”.

⁶ Jesús llote:

—Maraiñede juez lluaana cacadomoi. Ja muidomo naiñaiño canode.

⁷ Ero, biemo omoi comeciaina faca. Jusiñamui naie juez isoiñede. Nagarui Jusiñamuimo naimaci jicaia, ¿ñiese naimie ie fetocanona canoñeite? Jaca canoite.

⁸ Raire fairiuanona, naimacina raire canoite; iadedi abido cue bia, ¿niga cuena ñnotino iitimaci? Nibai ailluena cuena ñnoñeitimaci.

Jesúdi Jusiñamuimo menamie jia llua rafue

⁹ “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

¹⁰ —Jusiñamui jofomo, nainomo jillena, menamie jaidiaimaia. Damie fariseo imie. Jiaimie gobierno ucubena oraíma.

¹¹ Fariseo imie naidadacaida, dama anado jide: “Jusiñamui, jiaie comini isoiñedicue. Fuidimaci. Maraiñedimaci. Naimaci aiñede riño diga itimaci. Cue ecimo ite ucubena oraíma isoi iñedicue.

¹² Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide.

¹³ Gobierno ucubena oraíma eneno naidadacaida, jide. Monamo eruaiñede; iadedi jamai bue isoillanona, jogobena farode. Raite: “Jusiñamui, jeacina finoraímadicue. Cuena duenai. Macaibaite” jide.

¹⁴ Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite. Ie jira gobierno ucubena oraíma ie jofomo Jusiñamuimona jai marebicaillanona jaide; ia fariseo imie iese jaiñede.

Jesúdi naimie ñine uruiai billana jitailla rafue

(Mt 19.13-15; Mr 10.13-16)

¹⁵ Naie facaise Jesús ñine comini naimaci eisaiaia atisite. Ie onolli naimacimo naimie joniana jitaídimaci. “Naimacina raise cano” ie Moomo lollena jitaídimaci. Iena ciuanona, ie llofueoicaigano cominina Jesús ñine billana rairuidimaci;

¹⁶ iadedi Jesúdi eisaiaia uaiduano raite:

—Uruiai cue ñine billesa. Naimacina rairuiño. Cuena bie isoi ñnotinodi Jusiñamui cominidimaci.

17 Bie uruiaí abina íedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

Ucuberedimie Jesús diga ñaia rafue

(Mt 19.16-30; Mr 10.17-31)

18 Ie facaise illaicominimona damie Jesúmo jicanote:

—Maestro, odi mareuidimiedio. Jusiñamui diga íco monamo cue jaca illena, ¿nie isoide rana finoiticue?

19 Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano.

20 Moisés micori llogacinuaina ñnocana jai. Jaie cuete: “O aiñede riño diga iñeno. Comena meineñeno. Rana fññeno. Jiaimiena o llogidoia, tainona lloñeno. O moo uaina ñno. O ei uaina ñno”.

21 Uai ote:

—Cue uruena illa facaisemona nana bie llogacinuaina ñnoticue.

22 Iena cacajano, Jesús raite:

—Daje rana nia finoñedio. O raise marebicaiacania, omo ite raruiaina feca. Naie ucubena dueredinomo feca. Cuena o ñnuamona, monamo íco jaca iitio. Cue llofueoicaiganona o illena, mai cue diga bi.

23 Jesús llwana naimie cacajano, sunaicaide. Naimiemo eo ailluena ra illa jira, iena fecaacaiñede.

24 Naimiemo eruaillano, Jesús raite:

—Ucuberedinodi Jusiñamui cominina jaillena eo sefuiruite.

25 Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

26 Jesús llwana cacadino jicanote:

—¿Iemona buca jillobiti?

27 Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

28 Pedro raite:

—Ero, o llua isoi cai jofuena fainonocaida, o diga jaisoidicai.

29 Uai ote:

—Uanaicinona lloticue: Jusiñamui cominina naimie jaillamona, ie jofona bu fainonocaia, ie aina bu fainonocaia, ie amatiaina bu fainonocaia, ie moonu bu fainonocaia, ie eina bu fainonocaia, ie uruiaina bu fainonocaia,

30 Jusiñamuimona ailluena ibana birui feiñoite. Monamo íco jiai jaca iite.

Jesúdi ie fiodaillena dane llua rafue

(Mt 20.17-19; Mr 10.32-34)

31 Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jaie cuetimaci. Nana naie rafue ja suite.

32 Judíuaiñedinomo judíuai illaicomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci.

33 Cuena faitimaci. Cuena meinitimaci; ia darui amani illanona, cue fiodaillamona jilloiticue.

34 Naimie llwana raise cacaiñedimaci. Naimacina iena Jesús nia raise llofueñena jira, iena raise uiñoñedimaci.

Jesúdi uisnidimiena jillotaja rafue

(Mt 20.29-34; Mr 10.46-52)

³⁵ Jericó railla nairaimo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade.

³⁶ Ailluena comini Jesús diga jaillana naimie cacajano, naie cominimo nie isoide rafue illana jicanote.

³⁷ Uai otimaci:

—Nazaret ie Jesús como bene bite.

³⁸ Ie jira naimie cuirioide:

—David micori Jitona o illamona, cuena duenai. Cuena cano.

³⁹ Uicodo jaidino naimiena lletade, naimiena llicaitallena; iadedi naimie eo cuirioide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

⁴¹ —¿Niese ona cue nibaiana jitaideo?

Uai ote:

—Maestro, cioacadie.

⁴² Jesús raite:

—Mai eroda. Cuena o inua jira, jai jillodio.

⁴³ Iecon naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo,

² naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede.

³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide.

⁴ Ie jira uicodo aisicana jaide, amenamo a jaillena, naimiena cioillena.

⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaiticue.

⁶ Ie jira raire ana bite. Ie jofomo Jesúsna iocire feiñote.

⁷ Iena jiaie comini ciuanona, Jesús joreñaona jeare ñaianona raitimaci:

—Mariñedinona finoraíma jofomo naimie jaide.

⁸ Jesúsna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruiaina dueredinomo biruimona fecaiticue. Bumona navui cue fia, cuatro diga ra abido iiticue.

⁹ Jesús uai ote:

—Iese o llua jira, o comini diga Jusiñamuina jai o inuana uiñoticaí. —Jamai bitinomo llote:

—Zaqueodi Abraham micori jito; ia Jusiñamuina navui inoñede.

¹⁰ Naimie isidino jillobitallena, biticue. Monamona billanona, imana jaie jaidicue. Jusiñamuina inoñedinona jenuaibidicue, naimacina jillobitallena.

Illaima ie mullaiaimo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”.

¹² Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaimo jaide. Ie cominina sedallena, nanoca illaimamona ie uaina feiñoiacade. Iemei abido biacade.

¹³ Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide.

¹⁴ Ie comini naimiena enoidimaci. Jiañona nanoca illaima dine oretajano, raitimaci: “Bimie caina sedajana jitañedica”; ia nanoca illaima dinena naimaci lluaña jaca cacaiñede. Ie jira naie nanoca illaima naie illaima jitomo ie uaina ite.

¹⁵ Ie uaina feiñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote.

¹⁶ Nano bitimie raite: “Nama, o cuemo dabe fecadio. Dabedemona jai cuemo ite diez digabe”.

¹⁷ Naie illaima naimiemo llote: “Eo mareña maijidio. Mare mullaimadio. Janore ra raise o sedaja jira, ona diez nairaiaina sedataitice”.

¹⁸ Ie mei jiaie mullaima billanona, raite: “Nama, o cuemo fecaca dabedemona jai cuemo ite cinco digabe”.

¹⁹ Illaima llote: “Ona cinco nairaiaina sedataitice”.

²⁰ Ie mei jiaie mullaima bite. Raite: “Nama, jadi, o cuemo iga o ucube. Iniroimo tilliano, iena eenotice”.

²¹ Ona cue jaciruillano, odi eo rimienna jira, iena jamai eenotice. Jiaie cominimona ie rana bairocabidio. O maijiñena ramona ocabitio”.

²² Illaima dinena raite: “Eo marañede mullaimadio. Cueno o llua isoi, ona duere finoitice. Cue rimiennana uiñotio. Jiaie comini ie rana cue bai ruana uiñotio. Cue maijiñena motomo ra cue uana uiñotio; ia buena maijiñedio”.

²³ ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feiñotice”.

²⁴ Nainomo itinomo llote: “Naie ucube naimiemo bai ruano, diez digabe itimiemo feca”.

²⁵ Uai otimaci: “Naimiemo ailluena ucube jai ite. ¿Bue ñellena dane jiaie fecaitio?”

²⁶ Illaima dinena uai ote: “Ailluena raredimie jiaie rana feiñoite; iadedi janore raredimie ie rana faifite”.

²⁷ Cueno enoidinona bene ati. Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoimo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

Jesús Jerusalémo jailla rafue

(Mt 21.1-11; Mr 11.1-11; Jn 12.12-19)

²⁸ Naie rafuena llofuia mei, Jerusalén dine comini uicodo ie llofueoicaigano diga Jesús jaide.

²⁹ Jerusalén iaieicaidemo, mena nairaimo riacade. Betfagémo railla nairaimo ride. Betania nainomo jiaie ite. Olivos railla anedumo naga nairaie iaiaiaie ite. Ie llofueoicaiganomona mena orede.

³⁰ Raite:

—Bie nairaie illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati.

³¹ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

³² Naimie llua isoi jaidiaiaiaiaie. Naimie llua isoi burritona baitiaiaiaiaie.

³³ Ie facaise ie nanaie iaiaiaimo jicanote:

—¿Bue ñellena caie burritona suiñodomico?

³⁴ Uai otiaiaiaiaie:

—Coco Nama iena jitaide.

³⁵ Ie mei Jesús mo iena atidiamaia. Burrito emodomo iniroina jobianona, ie emodomo Jesús di rainadate.

³⁶ Jesús iese jaidemo, naimiena iobitallena, illaima isoi naimie jaillena, comini imaci iniroi diga, naiso motomo jobedimaci.

³⁷ Jerusalémo joide naiso ite nafai muidomo naimie rillanona, naie ituemo ana jailanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci.

³⁸ Raitimaci:

—¡Cai Illaima billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

³⁹ Naie cominimona dajerie fariseuai raitimaci:

—Maestro, o diga jaidinona lliscaillena, naimacina lleta.

⁴⁰ Uai ote:

—Naimaci lliscaia, biso fuemo ite noficidi cuena marena ñaite.

⁴¹ Jerusalémo Jesús iaiei ria, iena ciuano, eede.

⁴² Raite:

—Jerusalén itino, Jusiñamui diga omoi uri illena jai biticue. Omoina naimie cominina itataiacadicue; iadedi iena jitaiñedomoi. Iena jitaيدomoidena, ico duere sefuiñeitomoi.

⁴³ Jiairuido omoi bacauai jobaimena finuanona, omoina cirinoitimaci. Omoi ecido llaitimaci.

⁴⁴ Omoina meineitimaci. Omoi uruiaina meineitimaci. Omoi illanona judaítimaci. Jusiñamui omoi motomo birui illana omoi uiñoña jira, iese omoimo suite.

Jesúdi Jusiñamui jofomona damieriena dotaja rafue

(Mt 21.12-17; Mr 11.15-19; Jn 2.13-22)

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecauidimaci. Iena ciuanona, naimacina jino orede.

⁴⁶ Raite:

—Ie facaina lloraima micori Jusiñamui llogacino jaie cuega: “Cue jofo ite nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

⁴⁷ Jusiñamui jofomo nagarui Jesús llofuate. Judíuai illaicominidi Jesúsna meineiacadimaci;

⁴⁸ iadedi niese nibaiñedimaci, nana comini naimie llofuiana eo jitailla jira.

20

Jesúdi ie siño uaina llua rafue

(Mt 21.23-27; Mr 11.27-33)

¹ Jusiñamui jofomo Jesúsdi cominina llofuate. Jusiñamui rafuena llofuate. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamac. Diese billanona,

² jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

³ Jesús dinena uai ote:

—Omoimo nano jicanoiticue.

⁴ Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵ Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina ñinoñedomoi? ¿Bue ñellena naimie micori llua isoí bautizañedomoi?”

⁶ “Comini” cai fairioia, bene itino caina meineitimaci, Juan micoridi Jusiñamui facaina lloraima naimaci railla jira.

⁷ Ie jira Jesús uai otimaci:

—Uiñoñedicai.

⁸ Jesús dinena raite:

—Ie muidona cuemo ñie isoide uai illana omoimo lloñeiticue.

Jesúdi marañede majiraini rafuena llua rafue

(Mt 21.33-44; Mr 12.1-11)

⁹ Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ñbatajanona jiaínomo fecade, iena sedallena. Ie mei jiaie eniruemo are illena jaide.

¹⁰ Uvas jai einaila facaise riaraiaina sedaraini dine daje mullaimana orede, naimie facaise iedínona naimie feñollena; iadedi naie sedaraini naie mullaimana fatimaci. Uvas naimiemo fecaño abido oredimaci.

¹¹ Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecaño abido oredimaci.

¹² Naie patrón jiaimiena orede. Naimiena eo bofedaitajanona jino dotadimaci.

¹³ Iemei patrón comecina facade: “¿Ñiese ñibaiticue? Cue isiruiga jitona oretaiticue. Naimiena ñibai jaciruitimaci. Naimie uaina ñinoitimaci”.

¹⁴ Riaraiaina sedaraini naimiena cianona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci.

¹⁵ Naimiena jino dotajanona, naimiena meinetimaci. Iena fidia mei, ¿ñiese naie patrón ñibaiite?

¹⁶ Naimie biite, naie sedarainina meinellena. Ie mei jiaínona ie illina sedataite.

Naie rafuena cacadino raitimaci:

—Bie isoide rafue suillana jitaiñedicai.

¹⁷ Naimacimo Jesús eruaillano, llote:

—Naie illi sedaraini isidomoi. Jusiñamui facaina lloraima micori omoína jaie cuete. Ie cuegafuena raise facañedomoi. Naimie micori cueba:

Jofo finoraini jitaiñena nofici nana naie jofomo ite nofici baifemo jai uaide.

cuega. Jusiñamui cominina damerie jaillana naimie micori cuete. Jusiñamui oretagamienna damerie jitaiñenamona, naimie cominina jaiñeitimaci; iadedi Jusiñamui oretagamienna ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isidomoi. Naie nofici isidicue. Cue rafuena omoi jitaiñena jira, naimie cominina jaiñeitomoi.

¹⁸ Naie noficina nia ñaiticue. Noficimo bu eicaitaia, bofedaite; ia naie nofici bumo ana uaia, naimiena saitaite. Ie isoide. Cue llua omoi jamaia, duere sefuitomoi. Iena omoi ñinoñenia, ja muidomo faifitomoi —llote.

Jesúmo gobiernomo ucubena fecajana jicanua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaiana uiñotimaci. Ie jira naie facaiseconi judíuai illaicomini naimiena gaitaacadimaci; iadedi cominina jaciruitimaci.

²⁰ Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadormo naimiena llogidoiacadimaci.

²¹ Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio.

22 Omo rafuena jıcanoiacadıcaı. Dama Jusiñamuina sedadıcaı; iadedı romanos railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —llotımacı.

23 Naimiena naimaci jıfuiana uiñuanona, Jesús dinena uai ote:

24 —Ucube cuemo acata. ¿Bu ie joreño nainomo ite? ¿Bumo jainaiaide bie cuega radi?

Uai otımacı:

—César.

25 Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

26 Jesúdi uai raise ua jira naimie llumona jeare rafuena uiñoñedımacı, naimiena llogıdollena. Naimie lluari rajicaillamona, llıcaıdımacı.

Jesús dıne saduceuai railla comıni billa rafue

(Mt 22.23-33; Mr 12.18-27)

27 Naie facaise dajerie saduceuai railla comıni naimie dıne bitımacı. “Fiodaillamona jaca buna jilloñeite” raisoidımacı.

28 Jesúmo llotımacı:

—Maestro, cai facaina Moisés mıcorı jaie cuega: “İima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

29 Bie rafuena uiñoıacadıcaı. Siete amatıai ite. Nano doforamie ie aina ote. Naimie nia uruiainide fiodailla.

30-31 İe emodo imie ie ama feciñona ote. Naimie uruiainide jıai fiodailla. Naie siete digamiedemona iese sefuide.

32 Ja muidomo naie riño jıai fiodaite.

33 Fiodaillamona, ıco naimaci jilloıadedı, ¿bu naie riño ienite? Naiñaiño siete digamiena inirede —llotımacı.

34 Jesús uai ote:

—Birui aina otomoi. İnina otomoi;

35 iadedı fiodaillamona, Jusiñamui diga jaca itıno jillua mei, aınitımacı. İnınitımacı;

36 ia Jusiñamui jaienisaı isoi illanona, dane fiodaiñeitımacı.

37 Fiodaitıno jilluana omoımo lloitıcue. Moisés mıcorı jofue iñenanomo illa facaise, amena boode motodo Moisés mıcorımo Jusiñamui ñaia facaise, naimie mıcorımo comıni ıco jilloillena Jusiñamui llote: “Abraham ie Jusiñamuidıcue. Isaac ie Jusiñamuidıcue. Jacob ie Jusiñamuidıcue” llote.

38 Jai fiodaitımacı; ia naimaci joreñuai nia itımacı. Jusiñamuidı dani cajedıno imaci Jusiñamuina jira, naimaci joreñuai naimie dıne itımacı. İco naimaci abıaina jıai jillotaite. Naimiemo naimaci duillamona, naimaci abıai diga jilluanona, naimie diga jaca iitımacı —llote.

39 İena cacajano, Moisés mıcorı llogacınuaına llofueraınimona dajerie raite:

—Maestro, raise llotıo.

40 İe facaise naimiemo nie isoide rafuena dane jıcanuana jacıruitımacı.

Jesús dınenı farıseuai comıniımo jıcanua rafue

(Mt 22.41-46; Mr 12.35-37)

41 İemei naimie ecımo itınomo Jesús jıcanote:

—¿Nıese Moisés mıcorı llogacınona llofueraıni Cristona raitımacı? ¿Nıese naimiedi David mıcorı jıtına raitımacı?

42 Salmos railla cuegafuiaımo David mıcorı jaie cuega:

Jusiñamuidı cue Namamo llote: “İllaımana o illamona, cue nabeımo ana rai.

43 Ona iñoñedıno o anamo itataıtıcue”.

44 “Cristodı cue Nama” David mıcorı raite. İese naimie mıcorı railla jira, Cristo David mıcorı afemo faite. Naimiedi dama David mıcorı jitoñede; ia jıai ie Nama.

*Jesúdi judúuai illaicomínina ñaia rafue
(Mt 23.1-36; Mr 12.38-40; Lc 11.37-54)*

⁴⁵ Nana comini cacajano, ie llofueganomo Jesús llote:

⁴⁶ —Moisés micori llogacinuaina llofuerainimona abina rairui. Illaicomínina naimaci itimacidená, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoiñedinona itimacidená, comini naimacina uaid-uana gaidimaci. Comini naimaciri acarillena, ofiracomo uicomo raiacadimaci. Rafue ia, naimaci jamai bue isoiñedinona comecina facajanona, rafue nama ecimo raiacadimaci.

⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

21

*Jesúdi Jusiñamui jofomo duerede feciño ucube fecajana ciua rafue
(Mr 12.41-44)*

¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode.

² Eo duerede feciño menaruñu joniana jiaie ciode.

³ Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete.

⁴ Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoite ite ucubena jai jonete. Janore jonete; ia Jusiñamuimona naiñaiñoite jiaie baifemo jonete.

*Jesúdi Jerusalémo ite Jusiñamui jofo judaiana llua rafue
(Mt 24.1-28; Mr 13.1-23)*

⁵ Naie facaise Jesús llofueoicaiganomona dajerie Jusiñamui jofona eruailanona, raite: —Mare nofici diga finoca. Eo mare ra nainomo jiaie ite.

⁶ Jesús llote:

—Birui bie rana ciodomoi; iadedi ico jiairuido nana bie jofomo ite noficiái oni judaisite.

⁷ Jicanotimaci:

—Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoína bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairede” raitimaci. Naimaci dibeimo iñeno.

⁹ Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue.

¹⁰ Daje nairai jiaie nairai diga jobairite. Daje gobierno jiaie gobierno diga jobairite.

¹¹ Eo aillena ñuisañuai suite. Diga illanomo cominidi aime guitimaci. Duicuai eo iite. Monamo comini diga jacirede rana cioitimaci.

¹² Bie isoide rafue nia suiñenia, cuena ñnoñedinomo omoína llogidoitimaci. Omoína gaitatajanona, omoína duere finoitimaci. Naimaci ofiracomo omoína uitimaci. Cárcelmo omoína jonetimaci. Cuemo omoi duilla jira, omoi duere sefuillena, illaicomini dne omoína uitimaci.

¹³ Naie facaiseconi cue rafuena naimacimo lloitomoi.

¹⁴ Omoi abina omoi ridoia, omoi llua uicodo jarire iñeno.

¹⁵ Omoi raise llollena, omoína canoiticue. Uñoracinona omoimo iiticue. Iemona omoi dibeimo iñedino o uaina uaitanitimaci.

¹⁶ Cuena ñnotomoi; ia ailluena cuena ñnoñeitimaci. Cuemo omoi duilla jira, omoína enoitimaci. Iemona dajerie mootiaí, dajerie eitiaí, dajerie amatiaí, dajerie nabaiñaí omoína llogidoitimaci. Omoimona dajeriena meineitimaci.

17 Cue cominina omoï illamona, nana nairai omoïna enoitimaci; iadedi cuena faïnonocaiñedimie ja muidomo monamo jaca iite. Naimiena jillotaiticue.

18 Omoï ille dinori Jusiñamui omoïna raise sedaite.

19 Duere omoï sefuiã, cuena faïnonocaiñeno jai. Ja muidomo monamo jaca iitomoï.

20 Jerusalén fuedo ruicabene icaifona soldadaui ia, ie judaïlle facaiseconi iaïrei iite.

21 Naiemona omoï jillobillena, duere omoï sefuiñellena, Judeamo omoï illamona, aneduai ðine aisi. Jerusalémo omoï ia, naiemona oni jino omoï jai. Jino omoï ia, Jerusalémo omoï jaiñeno.

22 Ie facaina lloraini micoriai cuegafuiaï suillanona, naie facaiseconi naimiena ñnoñedinomona Jusiñamui ðbana oite.

23 Naie rafuemona jillobillena, naie facaise urueside riño duere sefuite. Uruena nia jirode riñodi jiaï duere sefuite. Naie facaise comini duere sefuitimaci. Llegi cacaitimaci.

24 Lloebi diga meinecana uitimaci. Jiaie nairai ðine naimacina jaiadoitimaci. Judíuaiñedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

25 Jesús nia llofujete:

—Jitoma nagarui illa isoi iñenamona, fivui nagarui illa isoi iñenamona, ucuaï nagarui illa isoi iñenamona, comini jiaie rafue suillena uiñoitimaci. Monaillaï eo baguamona, comini comeciãï eo jarire iitimaci.

26 Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fiodaitimaci isoi iitimaci.

27 Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

28 Bie isoide rafue sua, omoïna cue jilloitajaïbillirui iaïrei illa jira, cue billiruimo raise ocuiri.

29 Iena omoï raise uiñollena, bie rafuena omoïmo lloiticue. Higuera railla riaramo omoï comeciãina faca. Nana amenamo comeciãina faca.

30 Bie eniruemo amena firuillamona, fiemona raïre illana uiñotomoï.

31 Ie isoide. Bie rafue ico sua, Jusiñamui ie cominina raïre sedajana uiñoitomoï.

32 Uanaicinona omoïmo lloiticue. Nana bie rafue suille facaiseconi bie nairai nia iite.

33 Mona fuite. Enirue jiaï fuite; iadedi cue lloga uai jaca suite.

34 Jifaillacinona omoï ebirui raillano, omoï ecimo ite rana ebirui raillano, abina rairuicana jai. Cuena ñnoñedinona duere finollena, ebena abido biiticue.

35 Cue bia, illaimana cue illamona, nana cominimo juez isoi lloiticue.

36 Ie jira nagarui abi rairuicana jai. Naie duere sefuille facaise omoï jilloillena, Jusiñamuimo jii. Ja muidomo monamo cue diga jaca iitomoï —llote.

37 Jusiñamui jofomo Jesús nagarui llofueuide. Naïona Olivos railla anedumo, nainomo ñillena, jaisoide.

38 Nagarui jitiramo naimiena cacareillena, Jusiñamui jofomo comini bisoidimaci.

22

Judíuai illaïcomini Jesúna gaitallena siadua rafue

(Mt 26.1-5, 14-16; Mr 14.1-2, 10-11; Jn 11.45-53)

1 Naie facaise pascua railla rafue iaïrei ite. Naie facaise llomenico guille rafue jiaï ite. Naie rafue ia, siritate rana jaca guiñedimaci. Egiptomona naimaci jaiagai jillobillana comecillena, naie rafue ite.

2 Judíuai illaïcomini Jesúna meineiacadimaci; iadedi cominina jaciruillanona, naimiena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie.

⁴ Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúsna gaitatallena, naimaci diga ñaiaide.

⁵ Iobillanona, naimiemo ucubena feacaadimaci.

⁶ Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fiodaille rafuena llua rafue

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Llomenico guille rafue illanona, judíuai comini toica llauda fauillarui ride.

⁸ Jesúdi Pedro iaiaiaia Juan diga oretajano, raite:

—Cai rafue guille uicodo finollesa omico jai.

⁹ Naimiemo jicannotiaiaiaia:

—¿Ninomo naiena coco finuana jitaidio?

¹⁰ Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca.

¹¹ Jofo namamo llono: “Coco llofueraima cocona omo jicannotade: ‘¿Nimai cue guiraco? ¿Ninomo guticue, cue llofueoicaigano diga?’ ” Iese llono.

¹² Ie mei omicomo afebebamo ite aillue cuartona acataite. Na raruaia diga ite. Nainomo cai guille fino.

¹³ Jaidiaiaiaia. Naimie llua isoi baitiaiaiaia. Pascua rafue guille finodiaiaiaia.

¹⁴ Guille facaiseconi ia, Jesús ie llofueoicaigano diga nainomo guisaide.

¹⁵ Mesamo gutimacimo, ie llofueoicaiganomo llote:

—Nia cue fiodañenia, omoi diga bie rafue guillena eo jitaidicue.

¹⁶ Ie cominina cue Moo ico sedalle facaise ia, nana bie rafue fuite.

¹⁷ Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro.

¹⁸ Omoina bene dane iese caimare nabaiñeiticue. Cue Moo sedajano omoi diga ico cue ia, nainomo omoina dane iese caimare marena nabaiticue. —Iena jirodimaci.

¹⁹ Llomeniconona llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fiodaiticue. Cue abimo omoi comecina facajano, iena guiño.

²⁰ Naimaci guilla fuilla mei, jiroracomo vino diga dane oruitajanona, naimacina jirotrate. Raite:

—Cue fiodaillamona, dama cue diaillamona, jeacino anamona jilloitomoi. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹ Jesús llote:

—Ero, cuena gaitataitimie cai diga guite.

²² Monamona billanona imana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

²³ Iemei: “¿Nimie Jesúsna gaitatalle?” dani coniniri siadoside.

Naimaci moto imiena bu ille rafue

²⁴ Ie facaise coniniri siaduana raitimaci:

—¿Cai moto imiena bu ille?

²⁵ Iena cacajanona, Jesús raite:

—Naimaci jitailla ra finollena, judíuainfedino illaimaiaidi naimaci anamo itinona ocuicabide. “Cai anamo itinona canocabidicai” raitimaci;

²⁶ iadedi omoimo iese ifede. Omoi moto itimie omoi moto imieñedimiena jailla. Omoimona bu imiena iacania, omoi mullaimana naimie jaicabillasa. Omoimona bu imiena iacania, omoina naimie canocana jaicabillasa.

²⁷ Ero, jiaie rafuedo iena lloiticue. Naimiena ecallena, naimiena canollena, patrón anamo ie mullaiai itimaci. Naimaci baifemo patrón illamona, naimacina canollena, ie mullaiai facaina maijiñede. Cue anamo itomoi; ia omoina canollena, omoi mullaima isoi iticue.

²⁸ Birui duere cue sefuidicue, cuena faimonocaiñedomoi.

²⁹ Cue Moo cuena illaimana jai itatate. Omoina fetodicue,

³⁰ jiairuido cue illaima illa facaiseconi cue ecimo omoi caimare marena iocire illena. Nainomo omoi judíuai doce nairaiaina sedaitomoi.

*Jesúdi Pedro naimiena januana llua rafue
(Mt 26.31-35; Mr 14.27-31; Jn 13.36-38)*

³¹ Jesús llote:

—Simón Pedro, ero, Taifedi Jusiñamuimo ona jicanote, o ramo faillena;

³² iadedi ori jai jüdicue, cuena nia inocana o jaillena. Ico cuena raise o inoñena mei, cue dibeimo o comeci iuai dane o meidoia, iemona jiaie creyentiai comeciaina ocuiñotaitio.

³³ Pedro uai ote:

—Nama, cárcelmo o ia, nainomo jiai iiticue. O fiodaia, jiai fiodaiticue. Ona faimonocaiñeiticue.

³⁴ Jesús uai ote:

—Pedro, jitiiramo itava nia ñaiñenia, dacaiño amani cuena janoitio.

Jesús fiodailla facaise iairei illa rafue

³⁵ Ie llofueoicaiganomo Jesús llote:

—Omoimo ite rafuena uiñoiacadicue. Cue rafue lollena, navui omoina oredicue. “Ucubena uiño, bolsa uiño, meidolle zapatos uiño” omoimo lloticue. Naie facaiseconi omoi, ¿bue rana jitaiddomoi?

Uai otimaci:

—Cai buena jitaifedica.

³⁶ Jesús raite:

—Biruimona omoi duere sefuitomoi. Ie jira abina rairuicana jai. Birui ucube omoimo ia, nine omoi jaia, iena uiño. Bolsa bumo ia, iena uiño. Abina ridollena, omoimo lloebi iñenia, janore iniroina feca, lloebi ollena.

³⁷ Cuena jaie ciegafuia ja suite. Isaías micori cuena jaie ciega: “Maraiñede rafue finoraima isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

*Jesúdi Getsemanímo Jusiñamuimo jia rafue
(Mt 26.36-46; Mr 14.32-42)*

³⁹ Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide.

⁴⁰ Nainomo ria, naimacimo llote:

—Taife omoina ramo fai raillano, iena omoi inoñellena, Jusiñamuimo jii —llote.

⁴¹ Naimie janorede nofici bai faia uaila dinori bai jaide. Caiñici ifodo ana raia, Jusiñamuimo jide:

42 —Ore Moo, o jitaia, cue duere sefuillamona cuena jillota. Cue jitailla isoi cuena finoñeno; iadedi o jitailla isoi cuena fino.

43 Naimie comecina ocuiñotallena, ie facaiseconi monamona Jusiñamui jaienici bite.

44 Jesús comeci jarire illamona, naimie rioci faitemo, difai diruena eniruemo uaide.

45 Jia mei, ie llofueoicaigano dine abido bite. Ocosinaillamona, jai inidimaci.

46 Naimacimo jicanote:

—¿Bue ñellena inidomoi? Mai casi. Taife ramo omoina fai raillano, iena omoi inoñellena, Jusiñamuimo jii.

Jesúna gaitalle rafue

(Mt 26.47-56; Mr 14.43-50; Jn 18.2-11)

47 Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús dine iairei bite.

48 Jesús raite:

—Judas, cuena llibanuanona, cuena gaitataiacadio.

49 Ie llofueoicaigano naie rafuena jai cioidimaci. Jicanotimaci:

—Nama, ¿cai atica lloebi diga ona riidoitici?

50 Ie facaise naimacimona damiedi Jusiñamui diga nanoca ñairaima ie mullaïma ie nabei jefona jaïbonote.

51 Jesús dinena raite:

—Dama ite. —Ie jefona naimie jetajamona, naimiena jillotate.

52 Diga illaicomini Judas diga Jesús dine bitimaci. Naimacimo Jesús llote:

—Fïriraïmadicuenta cuena omoi gaitajaïbilla. Omoi lloebina atidomoi. Omoi butaral-luna jiaï atidomoi.

53 Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedroï Jesúna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

54 Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade.

55 Nairaïbiri motomo irai bonua mei, ana raïdimaci. Pedro naimaci diga jiaï raïde.

56 Nainomo ite mullaïñodi irai bouamona, Pedromo eruaïllano raite:

—Bimiedi Jesús diga jaisoidimie.

57 Pedro abi janote:

—Naimiena uiñoñedicue.

58 Dallu illanona, jiaïmie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

59 Daje hora illanona, jiaïmie raite:

—Bimie galileo imiena jira, bimiedi Jesús diga ua jaisoidimie.

60 Pedro dinena raite:

—O lluana uiñoñedicue. —Ieconï naimie ñaitemo, ïitava ñaite.

61 Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Ïitava nia ñaïñenia, dacaiño amani cuena janoitio”.

62 Pedro jino jaïllanona, eo sunaillamona, eo eede.

Jesúna jifanodua rafue

(Mt 26.67-68; Mr 14.65)

63 Ie facaise Jesúna gaitadino naimiena jifanododimaci. Naimiena jiaï fatimaci.

64 Ie uisina maïtimaci. Llotimaci:

—Siño jitodiosa, ¿bu o faja? caïmo llono.

⁶⁵ Iese jifanodocana uitimaci.

Jesúdi judíuai illaicomini dine illa rafue
(Mt 26.59-66; Mr 14.55-64; Jn 18.19-24)

⁶⁶ Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofueraini ofidimaci. Naimaci dine naimiena gaitadino Jesúna uitimaci. Naie illaicomini dinena raitimaci:

⁶⁷ —Ua Cristodiona, iena caimo llono.

Jesús uai ote:

—Omoimo iena cue lloia, ñnoñeitomoi.

⁶⁸ Buena omoimo cue jicanoia, cue uaina oñeitomoi.

⁶⁹ Monamona jaie billanona, ñimana jaidicue. Cuenamoi meiniamona, illaíma isoi Jusiñamui ecimo raire iitícue.

⁷⁰ Nana jicanotimaci:

—“¿Jusiñamui Jitodícue” raitío?

Uai ote:

—Raise cacadomoi. Imiedicue.

⁷¹ Iena cacajano, raitimaci:

—Naimie lluanamoi jai cacadicaí. Jiaie comini naimiena llogiduana jai jitañedicai. “Jusiñamui Jitona itícue” naimie llua jira, Jusiñamuina jai jeare ñaite. Naimie Jusiñamui jitoñede.

23

Pilato dine Jesús illa rafue
(Mt 27.1-2, 11-14; Mr 15.1-5; Jn 18.28-38)

¹ Judíuai illaicomini naidacaillanona, Pilato dine Jesúna uitimaci.

² Naimiena llogidotimaci:

—Cai cominimo marañedifuenamoi llote. Gobiernomoi ucubena cai fecajana rairuide. Naimie jiaí raite: “Cristodícue. Illaimadícue”.

³ Pilato dinena naimiemo jicanote:

—¿Judíuai comini illaimadio?

Uai ote:

—Jí, judíuai illaimadícue.

⁴ Jusiñamui diga nanoca ñairainimoi Pilato llote. Nainomoi bite cominimo jiaí llote:

—Ñicinodí naimiemo iñede.

⁵ Uai otimaci:

—Gobierno joreño comini comeciaí jeare feidocana naimie uite. Nana Judeamoi uite. Galileamoi tainede. Bene jai caimo ride.

Herodes dine Jesús illa rafue

⁶ Iena cacajano, naimie llogidotinomoi Pilato jicanote:

—¿Naimiedi Galilea imie?

⁷ —Jí —raitimaci. Galilea enirue illaíma Herodes. Naie facaiseconi Jerusalémo naimie illa jira, naimie dine Pilatodí Jesúna orede.

⁸ Jesúna Herodes cüanona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiaí cioacade.

⁹ Jesúmo ie finoca rafuena are jicanote; iadedí Jesús dinena uaina oñede.

¹⁰ Ie facaiseconi judíuai illaicomini Jesúna riire llogidotimaci.

¹¹ Herodes ie soldaduai diga naimiena eo jeare ñaitimaci. Illaíma jítaiuga ñiroina jítatitimaci. Ie mei Pilato dine naimiena abido orede.

¹² Iemona nairuido Herodes Pilato diga nabairite. Jiaie conimamoi enoidiaímaiaí.

*Pilatodi Jesús fiodaillana llua rafue
(Mt 27.15-26; Mr 15.6-15; Jn 18.39-19.16)*

¹³ Pilatodi judíuai illaicomínina, nainomo ite comini diga, uaidote.

¹⁴ Raite:

—Bimie cue dine atídomoi. Raitomoi: “Comini comeciai feidocana naimie uite”. Naimiemo jai jicanoticue; ia naimiemo nicinodi ñede.

¹⁵ Herodes cue dine naimiena como abido orede. “Naimiemo nicinodi ñede” jiai raite. Naimiena cue meinetallena, naimie jaca nicinona finoñede.

¹⁶ Ie jira naimiena cue sechedotajanona, naimiena oni oretaiticue.

¹⁷ Naie rafue facaiseconi naga año cárcelmona damiena jino jamai oretauide.

¹⁸ Pilato llua cacaiano, nana comini ado cuiriidimaci:

—¡Naimiena oni uiño, naimiena meinellena! ¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite.

²⁰ Jesúsna naimie jamai oretaiacana jira, comini diga Pilato dane ñaite;

²¹ iadedi cuiriidimaci:

—¡Naimiena corai! ¡Naimiena meine!

²² Pilato dane jicanote:

—¿Ñie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiriidimaci:

—¡Naimiena corai! —Ja muidomo Pilato dinena:

—Jee —raite.

²⁴ Naimaci jitailla isoi Pilato fairiote. Jesúsna meinellena llote.

²⁵ Ie mei Barrabásna cárcelmona jino oretate, naimiena comini jicaja jira; iadedi Jesúsna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúsna soldaduai oni uitemo, Simón raillamie diga dafaifidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaicaida sonotate.

²⁷ Ailluena comini Jesúsna racadimaci. Ailluena riñoniai eo eecana jaisite.

²⁸ Iena cacaiano, Jesús naiñaiñuai dine dobaidacaida, naiñaiñuaimo llote:

—Jerusalén itañaiñuai, cue facaina eeño; iadedi omoi facaina mai omoi ee. Omoi uruiai facaina mai omoi ee.

²⁹ Ero, jiairuido duere sefuillemona comini raitimaci: “Oñiñuai jiaie riñoniai baifemo duere sefuiñena jira, marena itimaci”.

³⁰ Jusiñamui ricaiillafuemona jilloiacanamona, comini jiai raitimaci: “Aneduai caimo jaicorillana jitaicai”.

³¹ Marañede rafuena finoñedicue; iadedi jai duere sefuidicue, Marañede rafuena finodimaci. Ie jira cue baifemo eo duere sefuitimaci.

³² Naie iaiaiaina meinellena, mena marañede imana jiai uitimaci. Gobierno llogacinona ñoñediiaiaiaia.

³³ Ifocoraina eruaila illanomo naimaci ria, Jesúsna coraidimaci. Naie marañede iaiaiaia jiai coraidimaci. Damie Jesús nabeimo. Jiaimie Jesús jarifebeimo.

³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanu soldaduai facasite.

³⁵ Ailluena comini eruaidimaci. Judíuai illaicomínidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldaduai naimiena jiai jifanododimaci. Ie abi isirena cacaiñellena, naimiemo vino fecajanona,

³⁷ raitimaci:

—Judíuai illaimadiodena, fiodaillamona dama o abina jillota. —Naie vino Jesús jiroñede.

³⁸ Jesús ifogi afeconi rabicimo Pilato cuetatate: “Bimiedi judíuai comini illaima”.

³⁹ Jesús diga coraica iaimaiaimona damie naimiena taigode:

—Jusiñamuimona bitiodena, nia fiodaiñenamona dama o abina jillota. Cocona jiai jillota.

⁴⁰ Jiaimiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadio? Ja fiodaitio. Iemei Jusiñamui uicomo ja iitio. ¿Niese Jusiñamui uicomo o illena jaciruiñedio?

⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúmo llote:

—Illaimana o illa facaise cuena começi.

⁴³ Jesús uai ote:

—Uanaicino lloticue. Birui cue diga cue Moo illanomo iitio.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitibicaide.

⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide.

⁴⁶ Jesús ado llote:

—Ore Moo, cue joreña feiño. —Ie mei naimie jai fiodaite.

⁴⁷ Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci.

⁴⁹ Jesús nabaiñiai bie rafuena aarena ciodimaci. Galileamona bite riñoniai bie rafuena aarena jiai ciodimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. Inogamie. Jesúna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride.

⁵³ Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu rañenafomo jonete.

⁵⁴ Nairui viernes. Sábadorui rille jai iairei illa jira, Jesús abina raiafomo raire jonete.

⁵⁵ Galileamona navui bite riñoniai racadimaci. Raiafona ciodimaci. Naimie abi finuana ciodimaci.

⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

24

*Jesús fiodaillamona jillua rafue
(Mt 28.1-10; Mr 16.1-8; Jn 20.1-10)*

¹ Domingo jítiramo monaidemo, naie riñoniai raiafomo jaidimaci, iñaiñuai finoca soride rana uillena.

² Raiafo ibailla nofici oni joillana cioidimaci.

³ Fo jaidemo, Jesús abina cioiñedimaci.

⁴ Uainicaidimaci. Ieconí menamie naiñaiñuai ecimo bairediaimaiaí. Iaimaiaí iniroi eo quenirede.

⁵ Iaimaiaína jacinaillamona, ifogi ana jítadacaidimaci. Naie iaimaiaí dinena jicante:

—¿Bue ñellena fiodaitimie illanomo cajedimiena jenodomoí?

⁶ Galileamo navui naimie omoimo llogacinona comeciñedomoí.

⁷ Naimie raite: “Monamona billanona, imana jaidicue. Jusiñamui jitailla jira, marañede rafue finoraini anamo iiticue. Cuená coraitimaci. Darui amani illanona, fiodaillamona jilloiticue” raite.

⁸ Iemona ie llogacinona jai comecitimaci.

⁹ Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiaí llotimaci.

¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei.

¹¹ Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuena ñaitomoí —raitimaci.

¹² Iena cacajano, Pedro aisicana raiafomo jaide. Nainomo ria, ana jítadacaida, fo erodate. Useroi joillana ciode. Iemo ie comecina facajano, jofomo abido jaide.

*Mena llofueoicaiganomo Jesús bairia rafue
(Mr 16.12-13)*

¹³ Jesús jilluarui mena llofuega iaimaiaí Emaús raila nairaímo jaidiaimaiaí. Jerusalémóna níbaí once kilómetros ite.

¹⁴ Nana Jesúmo suide rafuena ñaiano jaidiaimaiaí.

¹⁵ Iaimaiaí ñaianona, Jesús iaimaiaí diga dafaífillanona, iaimaiaí diga jaide.

¹⁶ Jusiñamuidi iaimaiaína naimiena uiñotañena jira, naimiena uiñoñediaimaiaí.

¹⁷ Iaimaiaímo Jesús jicante:

—¿Buena ñaitomico? —Ieconí naidatitiaimaiaí. Sunaititiaimaiaí.

¹⁸ Naie iaimaiaímona damiedi Cleofas. Naimie uai ote:

—¿Ñiese Jerusalémo birui suide rafuena uiñoñedio? Níbaí como ridio. Nana jiaí comini iena uiñotimaci.

¹⁹ Uai ote:

—¿Ñie isoide rafue suide?

Uai otiaimaiaí:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofue. Jusiñamui mona naimiedi maremie. Cominimona naimie maremie;

²⁰ iadedi caí illaicomini naimiena gaitatatimaci. Naimiena cruzmo coraitatimaci.

²¹ Jusiñamui naimie caí dine orecamiemo comecina facadicoco. Naimie caí illaimana illemo ocuiridicoco; ia naimie jai fiodaite. Naimie fiodaillamona darui amani jai ite.

²² Caí cominimona dajerie riñoniaibirui caína jacinaitadimaci. Jítiramo Jesús raiafomo jaidimaci;

²³ iadedi naimie abina cioiñedimaci. Abido naimaci bia: “Jusiñamui jaienisaina ciodicai” raitimaci. Naie jaienisai naimacimo llote: “Naimiedi caje”.

²⁴ Iemei caímona dajerie raiafomo jaidimaci. Riñoniaí llua isoí cioidimaci. Jesús abina cioiñedimaci.

²⁵ Jesús dinena uai ote:

—Abi uiñoñedomico. Nana Jusiñamui facaina lloraini micoriai ciegafuiaina ñinoiacaiñedomico.

²⁶ Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

²⁷ Iemei Jesús iaiaiaina llofuate. Moisés micori ciegafuiaina llofuate. Jusiñamui facaina lloraini micoriai ciegafuiaina jiai llofuate. Nana Cristona ciegafuiaina llofuate.

²⁸ Emaús dine iairei naimacia, Jesús nia jaiacademo,

²⁹ naimiena caididiaiaiaia. Raitiaiaiaia:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaiaiaia diga fiebillena fo jaide.

³⁰ Nailli guitimacimo, llomenicono Jesús llinuano, Jusiñamui iobillaciona fecade. Iena tairuano, iaiaiaimo fecade.

³¹ Jusiñamui jitailla jira, ieconi Jesúna uiñotiaiaiaia. Iemei iaiaiaiaimona naimiena jai cioicaiñena.

³² Daiaiaia ñaitiaiaiaia:

—Coco diga naimie ñaia, coco comeci caimare ite.

³³ Naie dacaiño Jerusalémo abido jaidiaiaiaia. Jesús llofueoicaigano naimacia nabaiñiaia diga danomo illana baitiaiaiaia.

³⁴ Iaiaiaiaimo llotimaci:

—Cai Nama fiodaillamona jai jillode. Simón Pedromo jai bairede.

³⁵ Ie mei naisona iaiaiaia jaiilla rafuena llotiaiaiaia:

—Cai guitacimo, naimiena uiñoticoco —llotiaiaiaia.

Jesús ie llofueoicaiganomo bairia rafue

(Mt 28.16-20; Mr 16.14-18; Jn 20.19-23)

³⁶ “Jesúna ciodicoco” llotiaiaiaiaimo, ie llofueoicaigano motomo Jesús bairede. Llote:

—Jai biticue. Uri omoi i.

³⁷ Naimiena ciuamona, jacinaitimaci. “Joreña ciodicai” comeciaina facajanona, jiai jaciruitimaci.

³⁸ Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana ñnoñedomoi?

³⁹ Cue onollimo eruai. Cue eillimo eruai. Jesúsicue. Cuena jeta, raise uiñollena. Cuemo llicisi ite. Cuemo illaici ite. Jamai joreño isoiñedicue.

⁴⁰ Iena llua mei, coraiafona naimacia cioillena, ie onolli ie eilli diga acatate.

⁴¹ Iobiacadimaci; iadedi nia raise ñnoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaia fecadimaci.

⁴³ Iena feiñuanona, rite. Iena ciodicimaci.

⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie ciegafuiaina raise uiñotade.

⁴⁶ Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite.

⁴⁷ Naimie muidona comeci iuai meiduamona, Jusiñamui naimacia jeaciona oni dotaite. Naimie rafue nana nairaimo damierie lloitimaci”. Omoimo biena lloiticue. Cue rafuena lollena, Jerusalémo taineitomoi.

⁴⁸ Bie rafuena ciodomoi. Iena lloitomoi.

⁴⁹ Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

Jesús monamo jailla rafue

(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote.

⁵¹ Iena naimacimo lluanona, monamo jaide.

⁵² Jerusalémo eo caimare abido jaidimaci.

⁵³ Jusiñamui iobillacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui.

² Jusiñamui diga jaca nano ite.

³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede.

⁴ Naimie muidona iticai. Naimiena cai #nuamona, jaca iiticai. Lligaiñora diga rana cai cúa isoi, caina Jusiñamuina uiñotade.

⁵ Naimiena #noñedino jitiredinomo itimaci isoidimaci. Naimaci comeciai jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena lollena, Juan micori llucacino Jusiñamuina nana comini #nollena, Jusiñamuidi Juan Bautista raillamie micorina oretate.

⁸ Juan naie lligaiñoñedimie; iadedi Juan naimiena luuibite.

⁹ Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote.

¹⁰ Naimie muidona comini comuidimaci; iadedi naimie bene billa meinocni, comini dinena naimiena uiñoñedimaci.

¹¹ Ie nairai illanomo naimie ride; iadedi nana cai nairai naimiena feiñoñedimaci.

¹² Damierie naimiena feiñotimaci. Naimiena #notimaci. Ie uaido naimiedi naimacina Jusiñamui uruiaina itatate.

¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai.

¹⁵ Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶ Jesucristo caina eo duenaillamona, birui caina eo canocabide.

¹⁷ Moisés micori Jusiñamui uaina jaie llote; iadedi iemona Jusiñamui caina duenailana jaie raise uiñoñedicai. Jesucristo lluamona Jusiñamui caina duenaillana jai raise uiñoticaí. Naimiemona uanaicinona jai raise cacadicai.

¹⁸ Jaca buna Jusiñamuina cioñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúna llua rafue

(Mt 3.11-12; Mr 1.7-8; Lc 3.15-17)

¹⁹ Jerusalémona Juan micori dine judíuai illaicominidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraima biite raillamie mo ocuridicai. Cristo raillamie billemo ocuridicai.

¿Odi naimiedío? —raillanona jicanotimaci.

²⁰ Naimie dinena janoñede; ia:

—Imieñedicue —raite.

²¹ Dane naimiemo jicanodosite:

—¿Budío? ¿Elías?

Juan micorí dinena uai ote:

—Elíañedicue.

Raitimaci:

—Moisés micorí Jusiñamui facaina lloraíma ico billena jaie llote. ¿Odi naimiedio?

Juan dinena raite:

—Ieñedicue.

²² Dane jicanotimaci:

—¿Budío? Cai mo lono, cai oretatinomo cai llollena. ¿Niese naimacimo ona lloiticai?

²³ Juan dinena raite:

—Jofue iñenanomo ado llotimiedicue. Isaías micorí jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciái raise finollena ñaiticue.

²⁴ Juan dine bitinodi fariseuai comini.

²⁵ Nia jicanoiacadimaci:

—Odi cai Jilloitaraímañenia, o Elíañenia, o Moisés micorí llotimieñenia, ¿bue ñellena cominina bautizadio? ¿Nie isoide uai omo ite? ¿Ninomona o uaina otio?

²⁶ Juan dinena uai ote:

—Cominina bautizadicue; iadedi omoi motomo omoi uiñoñegamie jai ite.

²⁷ Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimiena canonidicue.

²⁸ Naie rafuedi Betábaramo suide. Jordán railla ille ruicafebeimo ite. Nainomo Juan bautizauide.

Juan micorí Jesúna dane llua rafue

²⁹ Ie areruido Juan micorídi Jesús naimie dine billana ciuano, naimiena raite:

—Ero, Jusiñamui Jito toica llauda mamecido jai bite. Cai jeacino facaina faga llauda ifomo Jusiñamui ie Jitona jai orede. Naimie fallemona comini jeacinona dotaite.

³⁰ Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoíñede. Cue nia jeiciñenia, naimiedi jaca ite”.

³¹ Cue dine naimie nia biñenia, naimiedi cai Jilloitaraímana uiñoñedicue; iadedi cominina bautizallena bene iticue, cai cominimo naimiena llollena.

³² Juan jiai llote:

—Monamona ucugi isoi Jusiñamui Joreño ana billana ciodicue. Jesúmo baite.

³³ Naimiedi cai Jilloitaraímana nia uiñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaite”.

³⁴ Naie rafuena ciodicue. Iemona naimiedi Jusiñamui Jitonana lloticue.

Jesús ie fetocaga comini ie rafue

³⁵ Ie areruido Juan micorí llofueoicaiganomona menamie Juan micorí diga ia,

³⁶ Juan micorí Jesús macarillana ciuano, raite:

—Ero, Jusiñamui Jito toica llauda mamecido jai bite.

³⁷ Juan micorí diga itiaímaiaí niena cacajano, Jesúna racadiaímaiaí.

³⁸ Jinafo dine erodajanona, Jesús iaímaiaína ciode. Iaímaiaímo jicanote:

—¿Buena jitaídomico?

Iaímaiaí dinena uai otiaímaiaí:

—Rabbí, ¿ni o jofo? ¿Ninomono itio? —uai otiaímaiaí. Rabbí oni dobaiñuamona: “Llofueraíma raillamie”.

³⁹ Jesús nai iaímaiaí uaina ote:

—Mai. Cue diga bi, omico uiñollena. —Ie jira jaidiaímaiaí. Jesús illanona ciodiaímaiaí. Jitoma nia a illa jira, nairuido naimie diga fiebidiaímaiaí. Jitirecaidemo oni jaidiaímaiaí.

40-41 Naie iaímaiaímona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai comina Jilloitaraimana baiticue. Cristo raillamiena baiticue.

42 Ie mei Jesús dine naimiena uite. Jesús naimiena eo eruaillanona, raite:

—Birui o mamecidi Simón. Juan ie jitodio. Biruimona Cefana jiaí mamecirenitio — raite. Oni dobaiñuacidi Pedro.

Jesús menamie uaidua rafue

43 Ie areruido Jesús Galileamo jaiacade. Felipe na baillanona raite:

—Cue llofuegamiena o jaillena, cue diga coco jaillesa, mai cue diga bi.

44 Felipedi Betsaida nairai imie. Andrés iaímaiaí Pedro diga daje nairai iaímaiaí.

45 Jesús naimiemo llua mei, Felipedi Natanaelna oni jenuaide. Higuera railla riarana amo naimiena baillanona, raite:

—Moisés micori jaie cuegamiena jai baiticue. Jusiñamui lloraini micoriaidi naimiena jaie jiaí cuetimaci. Naimiedi Jesús. Nazaret imie. Ie moodi José.

46 Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

47 Jesúsmona iaímaiaí aire ia, Jesús dinena llote:

—Ero, buna jifueñegamie billa. Nanoca Israel imie bite.

48 Natanael dinena uai ote:

—¿Bu cuena llogao? ¿Niese cuena uiñotio?

Jesús uai ote:

—Felipe ona ailli nia baiñenia, higuera railla riarana amo o illana jai uiñoticue.

49 Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

50 Jesús dinena uai ote:

—Amena anamo o illana cue uiñua jira, cuena ñnotio. Diga siño rafuena ciojitio. Bie rafue baifemo finuana ciojitio.

51 Jusiñamuimona billanona, imana jaidicue. Uanaicino omo lloticue. Mona ecorillana o cioia, Jusiñamui jaienisaí cue dine billena cioitio. Cuemona abido jaillena jiaí cioitio.

2

Jinuimona Jesús vino finua rafue

1 Menarui illanona, Galileamo Canámo ima ie ai uarafue ite. Rafue nama uaidua jira, nainomo Jesús ei jaide.

2 Jesús jiaí uaidoga. Ie llofueoicaiganodicaí jiaí uaidogacaí.

3 Vino cueillamona, Jesús ei Jesúsmona llote:

—Vino jai iñede.

4 Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

5 Iemei ie eidi rafue nama mullaiaimo llote:

—Naimie omoimo llua fina.

6 Jinui nainomo eenollena, nainomo seis noficimona finoca llerodana raísoide. Naiemona jinuína ouidimaci. Marena illena, cai einamací llua isoi, jofomo naimaci ría, naimaci abiaína llereuidimaci. Naga lleroda níbaí cinco latas totaca.

7 Mullaiaimo Jesús llote:

—Naie llerodaiaína jinuí diga oruita. —Pozomona jinuí atiano, naie llerodamo toidimaci.

Iena finua mei,

8 Jesús naimacimo llote:

—Llerodamona janore jisa uanona, rafue nama dine uiño.

⁹ Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaí uiñotimaci. Jirua mei, ai otimie uaiduano,

¹⁰ raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúdi siño rafuena nano finode. Iemona caina ie uai siñona uiñotade. Ie muidona naimie siño Jitonana ñnoticaí.

¹² Rafue fuilla mei, Capernaumo Jesús ie ei diga, ie amatiaí diga, ie llofueoicaiganodicaí diga jaide. Nano nigarui nainomo iticaí.

Jusiñamui jofomona Jesúdi rana fecarainina dotaja rafue

(Mt 21.12-13; Mr 11.15-18; Lc 19.45-46)

¹³ Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite.

¹⁴ Rillano, Jusiñamui jofomo diga rana fecarainina ciode. Ucube ollena, nainomo juraretaiaí, toica llaudaiaí, ucugiaí fecauidimaci. Ucubena meidorainidi jiaí itimaci.

¹⁵ Naimaci ocainaiaí diga naimaci jino jiullena, rao Jesús uanona, iena lleride. Naimaci ucubena judaide. Mesaiaina oni caitade.

¹⁶ Ucugiaína fecarainimo llote:

—Omoi ucugiaína jino uiño. Cue Moo jofomo ra feca-fecajana jitaiñedicue —llote.

¹⁷ Iemo Jusiñamuina lloraini micoriaí cuegafuiaína jai comeciticaí. Iese jaie cuega: “O jofona cue riduamona, jiaíno cuena meinetaitimaci”.

¹⁸ Nainomo ite judíuaí illaicomini dinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uiñollena.

¹⁹ Jesús uai ote:

—Bicono judaí. Darui amani maijiamona iena dane nillana fuidoitice.

²⁰ Dane raitimaci:

—Cuarentiséis años bicomos maijidimaci, iena finollena. ¿Ñiese iena darui amani illanona, iena dane nillana fuidoitice?

²¹ Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite.

²² Jesús fiodaillamona naimie jillua mei, ie llofueoicaiganodicaí bie lluacinona comeciticaí. Ie jira naie cuegafuena ñnoticaí. Jesús lluacinona jiaí ñnoticaí.

Jesúdi comini comeciaino iticino lluana jitaiñena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina ñnotimaci. Coniniri raitimaci:

—Naimiedi cai jilloitaraíma.

²⁴—Naganomo comeciaina naimaci facaja jira, naie cominina naimie uiñuamona, Jesús naimaci motomo iacañede.

²⁵ Naimaci comeciaino iticinuaina naimie eo raise uiñua jira, comini rafuena naimiemo bu lluana jitaiñede.

3

Nicodemo Jesús diga ñaia rafue

¹⁻² Judíuaí illaicomini mona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

³ Jesús dinena uai ote:

—Raise llotio; ia daje rafue omo lloticue: Uanai omo lloticue. Dane abido comonori o jeiciñenia, Jusiñamui ie cominina sedajanomo jaca initio.

⁴ Nicodemo abido jicante:

—¿Ñiese eimie ie ei jeraimo dane iite? ¿Ñiese dane comonori jeiciite?

⁵ Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeiciñellio. Jusiñamui Joreño bu dane comonori comuitañenia, Jusiñamui ie cominina sedajanomo jaca iñeite.

⁶ Comemona cai comuitaia, jaca comedica; iadedi Jusiñamui Joreño cai comuita-
iadedi, Jusiñamui uruedica.

⁷ Omo dane lloticue: Comonori jeicia. Ieri rajicaiñeno.

⁸ Iena o raise cacaillena, jiaie rafuedo iena lloticue. Afidi ie jitailla dine sairide. Iena cacadio; iadedi ninena billana uiñoñedio. Nine jaillana jia uiñoñedio. Ie isoide. Niese Jusiñamui Joreño cominina comuitajana jia uiñoñedio.

⁹ Nicodemo dane jicante:

—¿Ñiese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio.

¹¹ Uanaicinona omo lloticue. Abi uiñuamona omo lloticue. Cue ciua rafuena lloticue; iadedi cue lluaña ñnoñedio.

¹² Bene ite rafuena cue lloia, iena ñnoñediota, monamo ite rafuena cue lloia, iena jia raise ñnoñeitio.

¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñotocue.

¹⁴ Monamona biticue; ia amenamo fiodaiticue. Jofue iñenanomo Moisés micori jaio joreño amenamo jaie cuinade. Jaionia ainillamona comini fiodaiñellena iena cuinade. Comini ie isoi jilloillena, ie isoi cuena coraitimaci.

¹⁵ Cue fiodaillamona bu cue uaina ñnoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede Jitona orede. Ie Jitona naimaci ñnollena, naimiena orede. Naimiena ñnuamona, monamo jaca iitimaci. Jia faifñeitimaci.

¹⁷ Naimacina duere finotallena ie Jitona oreñede; iadedi naimaci jeacinomona jilloil-
lena, naimiena orede.

¹⁸ Jusiñamuidi Jesús uaina ñnotinona jaca duere finoñeite; iadedi ie dajede Jitona uaina naimaci ñnoñena jira, Jusiñamui duere finollicino anamo jai itimaci.

¹⁹ Comini comeciaina lligaiñollena, Jusiñamui Jito bite. Jeacino comeciaino il-
lana naimaci uiñollena, naimaci comeciaina lligaiñuabite; iadedi naimaci comeciaino
jitiredinomo iacana jira, jearede rafue naimaci finua muidona, naimiena jitañedimaci.
Ie jira Jusiñamui naimacimo duere finollicinona anamo jai itimaci.

²⁰ Naimie finoca rafue bai raillano, naga jeacino finoraima ie comeci lligaiñuana
jitañede;

²¹ ia Jusiñamui jitaillacinona finodino naimaci finoca rafue baillena, lligaiñotimie dine
marefodo bitimaci.

Juan micoridi Jesúna dane ñaia rafue

²² Digarui illanona, Jesús ie llofueoicaiganodica; diga, Judea railla eniruemo macari-
cana jaidica. Nainomo diga irui fiebidica. Llofuiamona ñnotinona bautizacana uitica.

²³⁻²⁴ Nia cárcelmo iñenia, ailluena jinui nainomo illa jira, Enón railla nairaimo bautizajano Juan micorí jiaí ite. Salim railla nairai iaírei ite.

²⁵ Naie facaise Juan micorí llofueoicaigano judíuai imie diga bautizajana siadotimaci.

²⁶ Ie muidona Juan micorí dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaoidimaci. O dine jai raise biñedimaci.

²⁷ Juan uai ote:

—Jusiñamui ie uai fecañedena, Jusiñamui facaina buna jaca buena finonide.

²⁸ Cue llwana navui cacadomoi. Lloticue: “Cai comini Jilloitaraímañedicue. Cristoñedicue. Naimie billena cue lollena, Jusiñamuidi naimie uicomo cuena orede”.

²⁹ Jiaie rafuedo iena lloiticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiaí iobide. Ie isoide. Comini cue dine navui biñoidimaci. Birui Jesúmo jaoidimaci. Naimiemo jai duidimaci. Iena cue cacajamona, ieri iobidicue.

³⁰ Comini naimie uai siñona uiñuana jitaídicue. Comini cue jamai bue isoidimiena uiñuana jiaí jitaídicue.

³¹ Jamai comedicue. Ie jira eniruemo ite rafuena llocabiticue. Jusiñamuimona Jesús billa jira, cai baífemo faite.

³² Ie Moo illanomo ciua rafuena llote. Ie Moo illanomo cacaja rafue jiaí llote; iadedi eo janore comini naimiena inotimaci.

³³ Naimiena inotimiedi Jusiñamui uanaicinona llwana raise uiñote.

³⁴ Jusiñamuidi ie Joreño ie Jitomo caidíñeno fecaja jira, naimie Jusiñamui uaina llocabite.

³⁵ Jusiñamuidi ie Jitona isiruite. Ie jira naga rafue naimiemo fecade.

³⁶ Bu Jusiñamui Jitona inoia, Jusiñamui illanomo jaca iite; iadedi bu naimiena inoñenia, Jusiñamui illanomo jaca iñeite. Jusiñamui ricaillafue anamo jai ite.

4

Galileamo Jesús jailla rafue

¹⁻² Naie facaise ailluena comini Jesúmona fueotimaci. Iemei naimie díbeido bautizadimaci. Naimacina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicaí bautizadicaí. Fariseuai bie rafuena fidiano, iena Jesús uiñua jira,

³ Judeamona Galileamo Jesús cai diga dane abido jaide.

Samaria iñaiño diga Jesús ñaia rafue

⁴ Galileamo jaillena, Jesúsdi Samaria railla enirue díbeido jaiacade.

⁵ Samarimo cai ria, Sicar railla nairaimo iaírei rillano, daje pozomo ridicaí. Naie pozodi Jacob micorí jaie finoca. Jacob micorí naie pozo illano ie jito José micorimo jaie fecade.

⁶ Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote.

⁷⁻⁸ Jesús pozomo fiebicailla meinona, Sicarmo jaidicaí, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirollasa.

⁹ Naiñaiñodi uai ote:

—Judío imiedio. Samaria iñaiñodicue. ¿Ñiese cuemo jinuina jicadio? —Naiñaiño iese raite, judíuai Samaria comini diga ñairainina jira.

¹⁰ Jesús dinena dane uai ote:

—Jusiñamui omo feaacalle ra uiñotiodena, o diga ñaitimiena uiñotiona, cuemo jaca itataite jinuina cuemo jicadio. Iemei omo iena fecadicue.

¹¹ Naiñaiño uai ote:

—¿Niese bie pozomona jinuina oitio? Eo ana ite. ¿Ninomona jaca itataite jinuina oitio?

¹² Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruia micoriai jiai naiemona jirodimaci. Ie ocainaia dajemona jiai jirodimaci. Cai usuma micori baifemo fañedio —raite.

¹³ Jesús uai ote:

—Nagamia bie jinui jirua mei, dane jiroacanite;

¹⁴ iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jai. O ini diga abido bene bi.

¹⁷ Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidio.

¹⁸ Cinco diga inina jai faicaidio. Birui o diga itimiedi jiai o iniñede. Uanaicinona ua llotio.

¹⁹ Iemona abina uiñocaillamona, naiñaiño dinena uai ote:

—Odi Jusiñamui ie lloraimadio. Iena uiñoticue.

²⁰ Cai jaiagai bai bene ite anedumo Jusiñamuina sedaidimaci. Ie jira nainomo Jusiñamuina nia sedadica; iadedi omoi judíuai dinena raitomoi: “Jerusalémo Jusiñamuina cai sedauilla”.

²¹ Jesús dinena dane uai ote:

—Cuen aino. Jiairuido bai bene ite anedumo cai Moona sedañeitomoi. Jerusalémo naimiena jiai sedañeitomoi.

²² Raise uiñoño Jusiñamuina biruido sedadomoi; iadedi cai nairaimona cai Jilloitaraima illa jira, naimiena raise uiñuana sedadica.

²³ Jiairuido, ua birui, cominidi: “¿Ninomo Jusiñamuina sedaitica?” raillamo comeciaina facañeitimaci. Naimaci comeci jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide.

²⁴ Jusiñamui comeñede. Naimiedi jafaici. Omoi comeci jitaillamona naimiena omoi sedajana jitaide.

²⁵ Riño uai ote:

—Cai Jilloitaraima billena uiñoticue. Naimiedi Cristo. Naimie bia, nana bie isoide rafuena caina raise uiñotaite.

²⁶ Jesús raite:

—Naimiedicue.

²⁷ Ieconí abido ridica. Riño diga Jesús ñaia jira, rajicaidica; iadedi: “¿Buena naiñaiño jitaide?” raillano jicanoñedica. “¿Buena ñaitomico?” raillano jiai jicanoñedica.

²⁸ Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

²⁹ —Ailli pozo fuemo cue jaca cioraininamie diga dafaifidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

³⁰ Ie jira Jesús dine ailluena comini bitimaci.

³¹ Naie riño ie nairai dine jailla mei, abido cai dine nia riñenia, Jesúsna raitica:

—Maestro, mai guiño.

³² Naimie uai ote:

—Cuemo guille illana uifioñedomoi.

³³ Coniniri siadotica:

—Jai nibai bu ecajaibiga.

³⁴ Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guticue isoidicue.

³⁵ Comecina facadomoi: “Jusiñamui uaina nia lloñeitica. Ico iena lloitica”. Ie isoide. Illimo riará nia llisiñenia, comeciaina facadomoi: “Riará einaillena, naga amaga fivui fiebite. Naie facaise maijiticai”. Omoimo lloticue: Omoi ecimo eruai. Riará jai einaite isoide. Naimacimo Jusiñamui rafue llollena, iena naimaci inollena, ailluena comini jai itimaci.

³⁶ Naie llisillamo maijitimiedi ie ucubena feiñoite. Ie isoide. Jusiñamui rafuena damerie llocabillamona, comini iena cacadimaci. Jiaño billamona, iena dane cacajamona, iena inotimaci. Naie mare rafue lloraini ibana feiñoitimaci. Jusiñamui dibeimo naimaci dajena maijia jira, dajena iobitimaci.

³⁷ Cai comini iena raicabitimaci: “Damie iduaina rite; ia jiaimie llisillana ote”.

³⁸ Ie isoide. Omoína oredicue, comini cue dibeimo itatallena. Naimacimo cue uaina nano lloñedomoi; iadedi nano jiaño naimacimo cue uaina llotimaci. Ie jira nana omoi llofuiamona cue uaina inoitimaci.

³⁹ Samaria iñaiño llumona, naiñaiño nairaimona ailluena comini Jesúsna inotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraíma” raillanona Jesúsna inotimaci.

⁴⁰ Jesús dine naimaci rillanona, naimaci diga naimie fiebillena, Jesúsno jicanotimaci. Ie jira Jesús menarui naimaci dinomo fiebide.

⁴¹ Naimie llofuiamona, jiaie ailluena comini naimiena inotimaci.

⁴² Riñoimo llotimaci:

—Daño o llumona, navui inotica; iadedi naimie uaina cai cacajamona, birui raise inotica. Naimiedi comini ua Jilloitaraíma.

⁴³ Menarui illanona, nainomona Galileamo Jesús cai diga jaide.

⁴⁴ Caimo llote:

—Jusiñamuina lloraímadí ie nairaí illanomo ia, naie comini naimie llumamo cacarefiacaiñedimaci;

⁴⁵ iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalémo nana naimie finoca rafue navui naimaci ciua jira, naimiena caimare feiñotimaci.

Jesúdi illaicomini jitona jillotaja rafue

⁴⁶ Galileamo Jesús cai diga macaria, dane Canámo ridica. Nainomo jinuimona vino navui finode. Nainomo cai ia, Capernaum railla nairaímo itimie jito duide. Duidimie moodi gobierno diga maijuide.

⁴⁷ Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodiacana jira, ie jitona jillotallena Jesúsno duere jicanote.

⁴⁸ Jesús naimiemo llote:

—Siño rafuena omoi cioiñenia, cuena inoñedomoi.

⁴⁹ Uai ote:

—Maestro, cue diga bi, cue jito fiдайñellesa.

⁵⁰ Jesús uai ote:

—Mai jai. O jito jai fiдайñeite —llote. Naie ima Jesús uaina inuano, ie jofomo abido jaide.

⁵¹ Naisona naimie jaidemo, ie mullaíai diga afeedo beici dafaífide. Llotimaci:

—O jito jai jillode.

⁵² Ie jira naimie jicanote:

—¿Nino jítoma ítemo, jillode?

Uai otímaci:

—Navui are jítoma oni lluai caidemo, abí cuarilladí faínonocaide.

⁵³ Ie comecina facade: “Navui are naie facaise Jesús cuemo llote: ‘O jito jai jillode’ ”. Ie mullaíai lluaana cacajamona, naimíedi Jesúsí cai Jilloítaraimana ínote. Nana naimíe jofomo itíno jiaí ínotímaci.

⁵⁴ Judeamona Galileamo Jesús abído billano, síño rafuena íese jai finode.

5

Joraíbimo tísítaitímie jillua rafue

¹ Dígarui illa mei, cai judíuai rafue íacana jira, Jerusalémo Jesús abído jaide.

² Jerusalémo toíca llaudaíai jaisoilla nase facaimo joraíbí íte. Cai judíuai uaimona nai joraíbí mamecídi Betesda. Naie jorai fueo íte cinco jífocotíai.

³ Nainomo díga dúidíno bíidímaci: uisínidímaci, ñuja-ñujacáidíno, tísítaitíno. Jínuina begollena sedadímaci.

⁴ Feide ísoidemona dacaiño Jusiñamui jaíenícídi jínuina begotallena bite. Iemei nai jínuimo nano jaídímie íe dúicomona jillode.

⁵ Dúidíno motomo tísítaitímie íte. Treintíocho años dúide.

⁶ Naimíena cíuano, naimíe are dúillana uíñuamona, Jesús naimíemo jícanote:

—¿Jilloíacadío?

⁷ Dúidímie uai ote:

—Jí; íadedí jínuina begoía, jaca buna íñede cue canoítana. Ie jira jaímíedi cue uicodo jínuimo jaide. Ie jírarí nía jilloñédícue.

⁸ Jesús uai ote:

—Mai naídacai. O bíira ferínocáida macarí.

⁹ Íeconí naimíe jillode. Ie bíira feríanona oni jai macaríte.

Sábadoruimo dúidímie jilloítajana síadua rafue

Sábadoruimo, judíuai jafaicí ouíllaruimo, naimíe jillode.

¹⁰ Ie jira judíuai illaícomínídi jíllodímíemo llote:

—Biruí sábado. O bíira abínocáida o uílla jira, Moisés mícorí rairuica rana jai finodío. Sábádomo maíjínídícaí. Biruí jafaicí uaruimo jaca buena jetanídícaí.

¹¹ Naimíe uai ote:

—Cúena jíllóítatímie cuemo llote: “O bíira maí ferínocáida macarí”.

¹² Judíuai dínená jícanote:

—¿Bu íena omo llote? —Naimíe uíñoñena jira, uai oñede.

¹³ Jesúsí comíní motomo ítabílla jira, ailluena comíní ílla jira, jai jíllodímie íe jíllóítatímíena uíñoñede.

¹⁴ Ie meínoconí dallu íllanona, Jusiñamuí jofomo Jesús dínená naimíena baíte. Llote:

—Jai jíllodío. Abído dane eo dúere o sefúisa, dane jeacínona fínoñeno.

¹⁵ Ie mei judíuai illaícomínímo jíllodímíe lluaíde. Llote:

—Jesús raíllamíe cúena jíllotate.

¹⁶ Sábadoruimo Jesús bíe rafuena fínua jira, judíuai illaícomínídi naimíena dúere fínoacasíte.

¹⁷ Jesúsí abína ríiduano llote:

—Cue Moodí íe jítaílla rafue jaca fínode. Ie ísoí cue jítaílla rafue fínocana jaca jaídícue —llote.

¹⁸ Sábadoruimo naimacímóna Jesús maíjía jira: “Jusiñamuídí cue Moo” naimíe raílla jira: “Jusiñamuídícue” naimíe raílla jira, judíuai illaícomíní naimíe meínellena eo jítaídímaci.

Jesús íe Moo ísoí fínua rafue

¹⁹ Naimacímó Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodidicue.

²⁰ Cue Moo cuena isiruillanona, nana ie finoca rafuena cuena jai uifnotade. Naimie Jitona cue illa jira, bie imana cue jilloitaja baifemo jiaie siño rafuena finoitidicue, omoi rajicaillena.

²¹ Fiodaitinona jilloitallena, cue Moomo ie uai ite. Naie uai cuemo jiaie ite.

²² Cue Moo juez isoi naimie inoñedinomo lloñeite; iadedi naimacimo juez isoi cue lollena, naimaci duere sefuillena, ie uai cuemo iga.

²³ Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuena omoi iobitañenia, cue Moona jiaie iobitañedomoi.

²⁴ Uanaicinona llotidicue. Cue uaina bu cacaia, cuena oretatimiena bu inoia, monamo jaca iite. Jearede rafue naimie finua facaina duere sefuiñeite. Faifñeite; ia monamo Jusiñamui diga jaca iite.

²⁵ Uanaicino llotidicue. Jusiñamui Jitodidicue. Ua birui cuena inoñedino cue uaina cacareitimaci. Cuena cacajamona, cuena inuamona, jaca iitimaci.

²⁶ Cominina jaca itatallena, cue Moomo uai ite. Comini jaca itatallena, cuemo ie uai jiaie iga.

²⁷ Cuena inoñedinomo juez isoi cue lollena, naimiemo cue duillamona, ie uai cuemo jiaie iga.

²⁸ Ieri rajicaiñeno. Jiairuido nana jai fiodaitino diese cue llwana cacaitimaci.

²⁹ Fiodaillamona naimaci abiaie jilloitimaci. Ie mei cue jitaillacinona finodino jaca illena llotidicue. Cue jitaillacinona finoñedino diese duere sefuillena llotidicue.

³⁰ Naimacimo cuena oretatimie jitailla isoi llotidicue. Dama cue comecimo ite rafuena cue lloñena jira, bie llucacino di uanaicino.

Jusiñamui ie Jito uaina comini inoñena rafue

³¹⁻³² Jesús nia llote:

—Dama cue abina cue lloiadedi, bu cuena jaca inoñede; iadedi Jusiñamui cue facaina jiaie llote. Naimie llucacino uanaicino. Iena uifnotidicue.

³³ Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoi lollena, naimacina oretatomo. Juan llucacino di uanaicino.

³⁴ Naimie micori cue rafuena llouide; iadedi naimie micori llogacino omoi comeci eo facajana birui jitañidicue. Cuena omoi inollena, naimie mamecina jai llinotidicue.

³⁵ Lamparín raise lligaiñua isoi, ie rafuedo Juan micori omoi comeciaino iticinona raise uifnotade. Dally ieri iobidomo.

³⁶ Cue finoca rafue Juan micori finoca rafue baifemo faite. Cue siño finoca rafuena ñaitidicue. Cuena naimie oretajamona, cue Moo uaido iena finodidicue. Ie jira naiemona naimie dinena cue billana jai uifnotomo.

³⁷ Cue finoca rafue muidona cuena uifnotomo; iadedi naimie llwana jaca cacaiñedomoi. Naimiena jiaie jaca cioñedomoi.

³⁸ Cuena omoi inoñena jira, naimie uaina feiñoñedomoi.

³⁹ Jusiñamui dine omoi rillena, Jusiñamui facaina lloraini micoriaie ciegafuiaina facacabidomo. Naifuiaidi cuena ñaite;

⁴⁰ iadedi Jusiñamui dine omoi rillena, cue uaina inoiacaiñedomoi.

⁴¹ Cuemo iobillacinona omoi fecallena sedañidicue.

⁴² Jusiñamuina isiruiñedomoi. Iena uifnotidicue.

⁴³ Cue Moo mamecido cue billanona, cuena feiñoñedomoi; iadedi dama ie mamecido jiaimie bia, naimiena feiñoitomo.

⁴⁴ Jaca inoiacaiñedomoi. Iobillacino coninimo fecadomo; iadedi ua Jusiñamuidi omoina “Mare” raillana jitañedomoi.

⁴⁵ “Cue Moomo omoi marañede finoca rafuena lloiticue” raillanomo comeciaina facañeno. Moisés micorí ciegafuiai omoi llogidua fue jai ite. Moisés micorí ciegafuiai muidona Jusiñamui dine omoi jaca illemo ocuridomoi.

⁴⁶ Moisés micorí ciegafuiai ina innotomoina, cuena naimie micorí cuia jira, cuena jiai innotomoi.

⁴⁷ Naimie ciegafuiai ina innoñedomoi. Ie jira cuena jiai innoñeitomoi —llote.

6

Jesús cinco llomenicomona ailluena cominina ecaja rafue

(Mt 14.13-21; Mr 6.30-44; Lc 9.10-17)

¹ Jiairuido Galilea railla jorai ie ruica díbeimo Jesús ie llofueoicaiganodicai díga jaide. Naie joraidi jiai Tiberiana mameciredede.

² Duidinona naimie jillotaullana naimaci ciua jira, ailluena comini naimiena racadimaci.

³⁻⁴ Naie facaiseconi pascua railla rafuedi jai iaire ite. Jesús cai díga anedumo a jaillanona, dinomo ana raide.

⁵ Oni erodatemo, ailluena comini naimie dine billana cide. Felipe mo jicanote:

—Naimaci guillena, ¿ninomona llomenicona oiticaí?

⁶ Naimiena facacillena, iena jicanote; iadedi Jesús ie finolle rana jai uiñote.

⁷ Felipe uai ote:

—Janore naimaci guillena, doscientos dígarui ie maijia ucube díese llomenico oticaina, baiñede.

⁸ Naie facaise caimona damie iena cacade. Naimiedi Simón Pedro ama. Andréna mameciredede. Naimie raite:

⁹ —Cinco cebadamona finoca jenide llomenico daje uruemo bene ite. Mena lliciai jiai naimiemo ite; ia ¿niese nibaiticaí? Baiñeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil iñiaí itimaci.

¹¹ Llomenicona Jesús ua meinomoni, Jusiñamuimo iobillacinona fecajano, Jusiñamuimo jide. Iemei cominimo caina naie llomenicona fecatate. Comini jitailla díerise lliciai daje isoi fecatate.

¹² Naimaci monillamona, caimo Jesús llote:

—Buena jaca faifiñellena, fiebide guille danomo irai.

¹³ Ie jira iena iraidicaí. Naie cinco llomenicomona, comini guigamona fiebidemona, doce cirigaiamo oruitaticaí.

¹⁴ Jesús finoca rafuena naie cominidi ciuanona, llotimaci:

—Jusiñamui facaina lloraini micoriaidi cai Jilloitaraima ico billena jaie llotimaci. Bimiedi naimie.

¹⁵ Naimaci illaimana naimie illena, naimiena gaitacadimaci. Iena naimie uiñua jira, iena naimie jitañena jira, aneduaímo naimie oni jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana itemo, jai navuidemo, ie llofueoicaiganodicai joraimo jaidicaí.

¹⁷ Cai botemo cai jaillano, ruica Capernaumo jaiacadicaí; iadedi Jesús nia biñede. Jesúsna sedadicaímo, naimie biñena jirari, jai jitreña facaiseconi jai jaidicaí.

¹⁸ Riire aifi illa jira, jorai eo bagode.

¹⁹ Nibai cinco, nibai seis kilómetros jaidicaímo, damie cai dine jinui emododo billana ciodicaí. Bote dine naimie billana ciuanona, jacinaiticaí.

²⁰ Jesús caimo llote:

—Jesúdicuesa. Jacinañeno.

21 Iena cacajanona, botemo naimiena a billana jitaídicaí. Ieconí ruica díne caí jaiacananomo ridícaí.

Comini Jesúna jenua rafue

22-24 Caí jailla mei, daje bote nairuido illa jira, jinafomo fiebidino Jesús caí diga jaiñenana uiñotimaci. Caí Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúna naimaci cioñena jira, caí jiaí iñena jira, naie botiaído Capernaumo Jesúna jenollena, jaidimaci.

Jesús: “Llomenicodícue” railla rafue

25 Ruica díne Jesúna comini baillanona, jicanotimaci:

—¿Niruido bene ridío?

26 Jesús uai ote:

—Navui are omoína cue ecajamona, iemona omoí monillamona, cuena jenodomoí. Siño rafuena cue finuana ciodomoi; iadedi cuena nia ñnoñedomoi.

27 Guille raíre cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoí jaca illemo comeciaina eo faca. Cue Moo Jusiñamui, ñmana cue jaillena, cuena oretate. Ie uai cuemo illanona, cue uaina omoí ñnuamona, Jusiñamui diga jaca iitomoí.

28 Jicanotimaci:

—Nia Jusiñamui díbeimo iticaina, ¿nie isoidífue finodicaina mare?

29 Jesús uai ote:

—Naimie oretagamie uaina omoí ñnuana jitaide.

30 Naimaci dínena dane jicanotimaci:

—¿Nie isoide rafuena finoitío? iena caí ciuano, o uaina caí ñnollesa.

31 Caí jaiagai jofue iñenanomo Jusiñamuimona bite guilla ra guisoidimaci. Moisés micorí iena jaie cueba: “Jusiñamuimona bite guiga ra naimacimo nagarui fecauide”. Iemo jiaí birui ocuridícaí. Naie isoide siño rafuena o finuana jiaí cioacadícaí —llotimaci.

32 Jesús uai ote:

—Uanai llotícue. Moisés micorí naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoímo jai fecaacade.

33 Jusiñamui fecaacalle llomenico monamona jai bite. Comini iena guillamona, jaca iitimaci.

34 Llotimaci:

—Nagarui caimo bie isoide llomeniconona feca.

35 Jesús uai ote:

—Llomenico guillamona itícaí. Omoí llomenico isoidícue. Cuena ñnuamona, monamo jaca iitomoí. Cuena ñnotimie dane aimetañeite. Cuena isiruitimie jaca dane jiroacaiñeite. —Iese lloté; ia naimaci comeciaina ñaite. Naimaci comeciái jitaillacino naimacimo jaca illena ñaite—.

36 Cuena ciodomoi; iadedi cuena ñnoñedomoi.

37 Nana cue díbeimo cue Moo itatallínodi cuena ñnoitimaci. Cuemona naimacina jaca oni dotañeítícue.

38 Cuena oretatimie ie jitailla rafuena finollena, monamona jai bitícue. Dama cue jitailla rafuena finoitícuena biñedícue.

39 Cuena oretatimiedi cue díbeimo itatallínomona buna faífillana jitañede. Jusiñamui lluaruimo fiodaillamona nana naimaci abiaína cue jilloitajana jiaí jitaide.

40 Jusiñamui Jitona cue illana bu ñnoia, cuena bu ñnoia, monamo jaca iite. Jusiñamui lollíruimo fiodaillamona naimie abina jillotaitícue. Iese cue Moo jitaide.

41 Jesúsdi: “Monamona bite llomenicodícue” railla jira, judíuai illaícominidi naimie uaina jamaillano ñnosiñede.

⁴² Raitimaci:

—Bimiedi Jesús. José jito. Ie moona uiñoticaí. Ie eina jiaí uiñoticaí. ¿Niese naimiedi: “Monamona biticue” raite?

⁴³ Jesúsdi uai ote:

—Iese omoi naiñeno.

⁴⁴ Naimiena cue Moo ñnotañenia, bu cuena ñnonide. Cuena bu ñnoñenia, Jusiñamui lolliruimo fiodaillamona naimie abina jillotaiticue.

⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiaí ñnoite.

⁴⁶ Buna cue Moona jaca cioiñede. Naimiemona cue billamona, dama cue ciua.

⁴⁷ Uanaicinona lloticue. Cue uaina ñnotimie monamo jaca iite.

⁴⁸ Jesús dane llote:

—Llomenico guillamona iticaí. Omoi llomenico isoidicue. Cuena ñnuamona, monamo jaca iitomoí.

⁴⁹ Jofue iñenanomo omoi jaiagai Jusiñamuimona bite rana guisoidimaci; iadedi fiodaitimaci.

⁵⁰ Birui jiaie guille ra ite. Monamona ite. Iena bu guia, monamo jaca iite.

⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicono guia, jaca iite. Bie llomenicodi cue abi. Comini facaina fiodaiticue.

⁵² Iena cacajano, judíuai illaicomini coniniri naiena siadotimaci. Raitimaci:

—¿Niese bimie abina riiticaí?

⁵³ Ie jira Jesús dinena raite:

—Uanaí lloticue. Cue abina omoi riñenia, cue diruena omoi riñenia, cue Moo diga jaca iñeitomoí.

⁵⁴ Bu cue abina ríia, bu cue diruena ríia, cue Moo diga jaca iite. Fiodaillamona naimie abi irairuimo jillotaiticue.

⁵⁵ Cue abidi ua rille. Cue diruedi ua rille.

⁵⁶ Bu cue abina ríia, bu cue diruena ríia, cuena nabaide. Naimiena jiaí nabaidicue.

⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina ríia, cue illamona, naimie jiaí iite.

⁵⁸ Bie isoide guille ra monamona jai bite. Omoi jaiagai jaie guiga ra isoíñede. Jaie fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini ñnuamona, Jusiñamui diga naimaci jaca illena ñaite.

⁵⁹ Capernaumo judíuai ofiracomo Jesús biena llote.

Jesús diga jaisoidino naimie llua na siadua rafue

⁶⁰ Jesús diga jaisoidino naimie llua na cacajano, coniniri siadotimaci:

—Bie llua eo irirede. Bu iena cacaiñede.

⁶¹ Jesúsdi naimaci iese siaduana uiñote. Ie jira llote:

—Cue llua na raise ñnoñedomoi.

⁶² Jusiñamuimona ñmana jaillena jai biticue. Monamo abido ico cue jaillena cioitomoína, iena jiaí nibai raise ñnoñeitomoí.

⁶³ Cai joreño caimo illamona, iticaí. Dani cai abi diga iñedicaí. Ie isoide. Cue llogacino Jusiñamuimo duide. Iena omoi ñnuamona, jaca iitomoí;

⁶⁴ ia omoimona nana ñnoñedomoi —llote. Nano dofoconimona Jesúsdi naimiena ñnoñedinona uiñote. Naimiena gaitaitimiena jiaí uiñote.

⁶⁵ Jesús dane llote:

—Ie jira omoimo lloticue: Cue Moo jitañenia, cuena jaca bu ñnonide.

⁶⁶ Iena cacajano, Jesús diga jaisoidinomona, diga comini naimiena fañonocaidimaci.

⁶⁷ Ie jira ie doce llofueoicaiganodicaímo Jesús jicanote:

—¿Jiai cuena fainonocaida, abido jaitomoi?

⁶⁸ Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi Jillotaraíma iñede. Jiaimie mo jaca itatajaracinodi iñede.

⁶⁹ O lluana jai iñotícaí. Jusiñamui mare Jitodio. Iena uiñotícaí.

⁷⁰ Jesús dane uai ote:

—Doce digamie fetocaomoi; iadedi omoimona damie Taifemo jainaiide —llote.

⁷¹ Caímona Judas Iscariote micorina ñaite. Judas micori Jesúsna gaitataiacadimie.

7

Jesús amatiaí naimiēna iñoñēna rafue

¹ Jiairuido Galileamo ite nairaíamo Jesús macarite. Judíuai illaicomini naimiēna meineiācana jira, Judeamo jaiñede.

² Jifocotiaíai railla rafue iaire ite. Judíuai ie rafue.

³ Ie jira Jesús amatiaí naimiēmo llote:

—O diga jaicabidino o finua rafuena raise cioillena, beno fainonocaida, Judeamo jai.

⁴ Bu ie mameci are soriācana, bainino majirainina. Ie isoide. Siño rafuena o finoa, ailluena comini illa motomo iena fino.

⁵ Jesús amatiaí naimiēna iñoñēna jira, iese raite.

⁶ Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai.

⁷ Comini omoína enoiñedimaci. Naimaci finoca jearede rafuena cue llua jira, cuena jaca enoidimaci.

⁸ Jerusalémo rafuemo jai. Cue jaillirui nia riñena jira, nia jaiñeiticue.

⁹ —Iese lluano, Galileamo naimie fiebide.

¹⁰ Naimie amatiaí rafuemo jailla mei, Jesúsdi naimaci jinafona dama bainino jaide.

¹¹ Nai rafuemo judíuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uiñoñēna jira, comini uai oñedimaci.

¹² Nainomo ailluena comini itimaci. Comini illa motomo naimiēna anado siadoside. Jiaíno dinena: “Naimiedi mare” raitimaci. Jiaíno dinena: “Naimiedi cominina jifuate” raitimaci.

¹³ Judíuai illaicominina iciana comini jaciruillanona, anado siadoside. Jesúsna marefodo buna ñaiñede.

Sábadoruimo Jesús majia raufe

¹⁴ Jifocotiaíai railla rafue atuedo fuitemo, Jesús Jusiñamui jofomo jaillano, llofuate.

¹⁵ Illaicomini naimie llofuiamona rajicaidimaci:

—¿Niēse naimie abi uiñote? Eo rafuena uiñotimie mona jaca fueoñede —raitimaci.

¹⁶ Jesús uai ote:

—Dama cuemona oñega cue llofuiacinodi. Cuena oretatimie ie.

¹⁷ Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuimona cue uana uiñoite. Dama cue comecimona cue oñenana jiai uiñoite.

¹⁸ Bu dama ie comecimona ie llofuiacinona uanona lloia, naimiedi comini naimiēmo iobillacinona fecajana jitaide; iadedi bu ie oretatimie na iobitaia, uanaí llote. Maraiñedicinona finoñede.

¹⁹ Moisés micori Jusiñamui uaina jaie llote; iadedi birui naie llogacinuaina nia raise iñoñedomoi. Iena raise iñotomoidena, cuena niade meineiācañedomoi.

²⁰ Comini dinena uai ote:

—Nibai uairitaidio. ¿Bu ona meineiācade?

²¹ Jesús uai ote:

—Dacaiño sábadoruimo damiēna jillotaticue. Ie jira cue uaina uaitatomoi.

22 Sábadoruimo jiaí maijicabidomoi. Moisés micorí isaiaí abiaí diana omoimo jaie llote; iadedí naimie micorí naiena nano lloñede. Naimie micorí usumatiaí naiena nano llotimaci. Sábadoruimo isana abi dellirui ia, detomoi.

23 Moisés micorí llogacinona inollena, sábadoruimo isaiaína detomoi. Sábadoruimo imana raise jillotaticuemo, ¿bue ñellena cue diga iciritomoi?

24 Cominimo jamai eruaillanona, naimacina jeare ñaiñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

25 Ie jira Jerusalémo itino coniniri siadotimaci:

—Illaicomini bimiena meineiacadimaci;

26 iadedí beno marefodo naimie llofuede. Jaca buena lloñedimaci. Illaicominidi: “Bimiedí cai Jilloitaraíma” raillano nibaí comeciána facadimaci.

27 Bimie ie billanona cai uiñua jira, naimiedí cai Jilloitaraímañedimie. Cai Jilloitaraíma baireia, jaca budí naimie billanona uiñoñeite —siadotimaci.

28 Ie jira Jesús Jusiñamui jofomo naimie llofuiano llote:

—Cuena uiñotomoi. Ninena cue billana jiaí uiñotomoi. Cue jitailla jira biñedicue; iadedí jiaimie cuena oretate. Naimiedí uanaí llote. Naimiena uiñoñedomoi.

29 Naimiemona cue billa jira, naimiena uiñotícue. Cuena oretate —llote.

30 Ie jira illaicomini Jesúna gaitacadimaci; iadedí naimie fiódaille facaise nia riñena jira, buna naimiena gaitañede.

31 Nairui ailluena comini naimie uaina inotimaci. Raitimaci:

—Cai Jilloitaraíma bia, ¿ñiese naimiedí bimie baífemo jiaíe rafuena finoite?

Jesúna gaitaiacana rafue

32 Fariseuaidí comini iese ñaiana cacajano, Jesúna gaitallena, Jusiñamui diga nanoca ñairainidí ailluena policiana orede.

33 Ie jira naimacina Jesús dinena raite:

—Dallu omoi diga nia iitícue. Ie mei cuena oretatimie dine abido jaitícue.

34 Cuena jenoitomoi; iadedí cuena baiñeitomoi. Cue dine binitomoi.

35 Ie jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticaí? Judíuainedínona llofuellena, jiaíe eniruemo cai comini dine nibaí jaite.

36 ¿Ñiese naimie raite: “Cuena jenoitomoi; iadedí cuena baiñeitomoi”? ¿Ñiese raite: “Cue dine binitomoi”? —iese siadotimaci.

Jesúdi Jusiñamui Joreña ñaia rafue

37 Jifocotiaiaí railla rafue fuillaruímo, ua rafue ie nairuímo, Jusiñamui jofomo itinomo Jesús ado llote:

—Bu jiroacania, cue dine bi.

38 Jusiñamui facaina lloraíni micoriaí jaie cuela: “Naimiena inotimie comecimo jaca itatate jinui isoi iite, torafomona jinui tonooilla isoi”.

39 Jesúdi iese llote; ia Jusiñamui Joreña ñaite. Jusúna inotinomo Jusiñamuidí ie Joreña ico illena ñaite. Jesús nia fiódaiñena jira, iena nia iñega.

Comini Jesúna dane siadua rafue

40 Jesús lluana comini cacajano, raitimaci:

—Jsiñamui facaina lloraíni micoriaí Jusiñamui facaina lloraíma ico billena jaie llotimaci. “Cristo nia baireñena, naimie biite” llotimaci. Bimiedí naimie.

41 Jiaíno raitimaci:

—Naimiedí cai Jilloitaraíma. Naimiedí Cristo.

Jiaíno raitimaci:

—Cai Jilloitaraíma Galileamona biñeite.

⁴² Jusiñamui facaina lloraima micori cuela: “Cai Jilloitaramadi David micori jito. Belémo David micori illanomo jeicille”.

⁴³ Ie jira daje isoi naimiemo comeciaina facañedimaci.

⁴⁴ Jiaíno naimiena gaitacadimaci; iadedi buna naimiena jetañede.

Judíuái illaicomini Jesúna ñnoñena rafue

⁴⁵ Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

⁴⁶ Policías dinena uai ote:

—Naimie llofuiá isoi jaca buna llofueñede. Iena jacinailanona, naimiena atiñedicaí.

⁴⁷ Fariseuai dane llotimaci:

—Cominina jifuiá isoi, omoína jiaí jifuate.

⁴⁸ Cai illaicomini dinena naimiena jaca ñnoñedicaí. Moisés micori llogacinodo raise jaidicaí;

⁴⁹ Ia Jesús llofuiána cacadino Moisés micori llogacinuaido jaca raise jaiñedimaci. Ie jira jaca faifitimacisa.

⁵⁰ Naie illaicomini mona Nicodemo raillamie ite. Naimie naiona Jesús dine navui jaide. Fariseo imie.

⁵¹ Jesúna riiduanona, naimie llote:

—Cai einamací llocabitimaci: “Bu duere cai finoacania, nano naimie llamo cacarefiticaí. Jearede rafue naimie finuana cacareillano, naimiena duere finoiticaí”. Iena cai cacaiñenia, naimiena duere finoñeiticaí.

⁵² Nicodemomo llotimaci:

—Galileamona bitino isoi ñaitio. Naimie llofuegamiena nibaí jai jaiacadío. Jaié cuela-fuiána raise faca. Jusiñamui facaina lloraini micoriaidi cai nairaina Jilloitarama Galileamona billena jaié cueñedimaci. Bie Jesús raillamiedi cai nairaina Jilloitaramañedimie.

⁵³ Ie meinoconi damierie imaci jofomo jaidimaci.

8

Ie ñiñede iima diga riñodi rafuetaila ie rafue

¹ Naie facaise Jesúdi Olivos railla anedumo jaide.

² Ie areruido jitaramo Jusiñamui jofomo abido dane jaide. Ailluena comini naimie dine billa jira, naimie ana raíta, naimacina llofuate.

³ Naie facaise Moisés micori llogacinona llofuerainimona dajerie bitimaci. Fariseuaimona dajerie jiaí bitimaci. Daje riño atidimaci. Ie ñiñede iima diga naiñaiñona jai eidatimaci. Comini illa uicomo atiano,

⁴ Jesúmo llotimaci:

—Llofueraima, biñaiño ie ñiñede iima diga eidaticai.

⁵ Moisés micori jaié cuela: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

⁶ Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jítadacaida, eniruemo ie onocai diga cuete.

⁷ Naimiemo diga icaiño jica-jicanuano, naimie naidacaida, naimacimo llote:

—Omoimona jeacino iñedimie naiñaiño nano noficina fairino.

⁸ Dane ana jítadacaida, eniruemo dane cuete.

⁹ Naimie lluaña cacajano, dajerie jino jaidimaci. Nano eo einamacidi jino jaidimaci. Ie mei conrueni jino jaidimaci. Nana comini tuua mei, nainomo Jesús fiebide, naie riño diga ñaillena.

¹⁰ Eruaillano naiñaiño jicanote:

—¿Ni nai o llogidotino?

11 Naiñaiño uai ote:

—Jaca iñedimaci. Cuen a jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoño.

Jesúdi comini comeciai lligaiñua rafue

12 Jesúdi cominina dane llofuianona, raite:

—Jeacino oni jaillena, comini comeciaina lligaiñotícue. Cuen a ñnotimie jítiredinomo jaca iñeite. Jeacino anamo jai iñedimie Jusiñamui diga ico jaca iite.

13 Fariseuai dinena uai otimaci:

—Dama o abina ñaitio. Ie jirari uanaicinona lloñedio.

14 Jesús uai ote:

—Dama cue abina llotícue; iadedi uanaicinona llotícue. Ninena cue billanona uiñotícue. Nine cue jaillinona jiai uiñotícue. Ninena cue billanona uiñoñedomoi. Nine cue jaillinona jiai uiñoñedomoi.

15 Abi raise uiñoño cuena jeare ñaitomoi. Iese omoina ñaiñedicue;

16 iadedi omoina cue ñaia, uanaicinona llotícue. Dama cue uaina omoina lloñedicue. Cuen a oretatimie omoina jiai llote.

17 Moisés micori iena jiai jai euega: “Menamie daje isoi lloia, naie iaiaiaia llucacinoi omoi ñnua” euega.

18 Cue facaina llollena, menamie jai ite. Cue facaina llotícue. Cue Moo cue facaina jiai llote.

19 Fariseuai dinena jicanote:

—¿Ñi o moo?

Jesúdi uai ote:

—Cuen a uiñoñedomoi. Cue Moona jiai uiñoñedomoi. Cuen a uiñotomoi, cue Moona jiai uiñotomoi.

20 Jusiñamui jofomo ucube eenoracomo bicinona siadotimaci. Jesús fiodaille facaise nia riñena jira, jaca buna naimiena gaitañede.

Jesúna comini ñnoñenia, naie jeacino diga fiodailla rafue

21 Naimacimo Jesús dane llote:

—Ico oni jaiticue. Cuen a jenoitomoi; iadedi cuena baiñeitomoi. Na omoimo jeacino nia itemo, fiodaitomoi. Cue jaillinomo jainitomoi.

22 Ie jira judíuai illaicomini dinena iena siadotimaci:

—Dama ie abina meineite.

“Cue jaillinomo jainitomoi” Jesús railla jira, iese siadotimaci.

23 Jesúdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie díbeimo iñedomoi; ia naimie díbeimo iticue.

24 Cue Jusiñamui Jitonana omoi ñnoñena jira, na omoi jeacino diga fiodaitomoi.

25 Jicanoside:

—¿Budío?

Jesús uai ote:

—Nano omoi motomo cue illamona bumiedicuena omoina raicabiticue.

26 Diga rafue omoimo lloiacadicue. Marañede rafuena omoi finuana omoimo nia lloiacadicue; iadedi omoimo cuena oretatimie uaina dama llotícue. Nai uaidi uanaicino llote.

27 Naimiedi ie Moo Jusiñamuina llote; iadedi cacaiñedimaci.

28 Ie jira Jesús llote:

—Cuen a omoi meinia mei, bumiedicuena uiñoitomoi. Cue uaido dama lloñedicue; iadedi cue Moo cue llofuia uaido llocabiticue.

29 Cuená oretatimie cue diga ite. Naimie jitailla rafuena cue finua jira, cuena fañonocaiñede.

30 Iese Jesús llotemo, diga illaicomini naimie uaina como ñnoiacadimaci.

Comini Taife anamo illa rafue

31 Jesúsdi naimie uaina como ñnoiacadinomo llotte:

—Cue lluaña ñnocana omoi jaia, cue ua cominidomoi.

32 Uanaicinona uññoitomoi. Ie mei jiaimie anamo dane iññeitomoi.

33 Uai otimaci:

—Abraham micori ie uruiaidicai. Jiaimie anamo jaca iññedicai. ¿Bue ññellena llotio: “Jiaimie anamo iññeitomoi”?

34 Jesúsdi uai ote:

—Uanaí lloticue. Jeacino finocabidomoi. Naga jeacino finoraíma ie jeacino anamo jai ite. Omoi jeacino anamo omoi illana ññaiticue.

35 Jiaie rafuedo iena lloticue. Ie patrón anamo itimie mo ie patrón rafuedi duiñede; iadedi naie patrón jítomo ie rafuedi duide.

36 Ie isoide. Jusiñamui Jitona cue illamona, naimie rafuemo duidicue. Ie jira omoímo cue lloia, omoi jeacino anamo ua iññeitomoi.

37 Abraham micori ie uruiaidomoi. Iena uññoticue; iadedi cue lluaña omoi raise ññoñena jira, cuena meineiacadomoi.

38 Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomoi.

39 Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiaññedomoi. Ie jira Abraham micori finoca rafue isoi finoñedomoi.

40 Uanaí cue llua jira, cuena meineiacadomoi; iadedi Abraham micori iese finoacaiñede. Cue llucino Jusiñamuimona oticue.

41 Jusiñamui uruiaí finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaññedicai. Cai Moodi Jusiñamui.

42 Jesús dane llotte:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biññedicue; iadedi cuena oretate.

43 ¿Bue ññellena cue lluaña cacaiñedomoi? Cacareirañnidomoi.

44 Omoi moodi Taifena jira, cue lluaña ññoñedomoi. Naimie jitailla rafuena finoacacabidomoi. Nano dofomona naimiedi comena meinaíma. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llotte. Naimiemona taino llucinodi comuicabide. Naimie isoidomoi.

45 Uanaí cue llua jira, cuena ññoñedomoi.

46 ¿Ñie isoide jeacino finodicue? Cuemo llono. Uanaí cue lia, ¿bue ññellena cuena ññoñedomoi?

47 Jusiñamuina mooredimiedi Jusiñamui uaina cacade. Jusiñamui uruiaññedomoi. Ie jira cue lluaña cacaiñedomoi.

48 Naimiena jearuillanona, naie illaicomini ññinena iese raitimaci:

—Samaritano nairai imiedio. Janaba illamiedio. Uairitaidio.

49 Jesús uai ote:

—Janaba illamieññedicue. Cue finoca rafuemona cue Moona iobitadicue; iadedi iese cuena omoi ññaiamona cuena iobitaññedomoi.

⁵⁰ Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi ñnoñenia, cuemo iobillacinona omoi fecañenia, cue Moo omoína duere finoite;

⁵¹ ia bu cue llwana ua ñnoia, jaca ua fioidañeite.

⁵² Naie illaicomini dinena uai otimaci:

—Janaba illamiediona jai uñoticaí. Abraham micori jaie fioidaite. Jusiñamuina lloraini micoriai jiai jaie fioidaitimaci; iadedi: “Bu cue llwana ñnoiadedi, fioidañeite” raitio.

⁵³ Cai usuma Abraham micori baífemo fañedio. Jusiñamuina lloraini micoriai baífemo fañedio. ¿Bumiediota?

⁵⁴ Jesúsdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi;

⁵⁵ iadedi naimiena uññoñedomoi. Naimiena uññoticue. “Naimiena uññoñedicue” cue raia, omoi isoi taino lloticue. Naimiena uññoticue. Naimiena jiai ñnoticue.

⁵⁶ Omoi usuma Abraham micori eniruemo cue ico billena jaie uññote. Iena uññuamona, naimie iobide.

⁵⁷ Illaicomini dinena uai otimaci:

—Odi cincuenta años nia ññedio. ¿Ñiese Abraham micorina ciodio?

⁵⁸ Jesúsdi uai ote:

—Abraham micori nia ññena facaiseconi jaca iticue.

⁵⁹ Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

9

Jesús uisimidimiena jillotaja rafue

¹ Jiaíruido ie llofueoicaiganodicaí diga Jesús macaria, uisimidimiena ciode. Iese nanomona jaca naimiedi jeiciga.

² Jesúmo jicanoticaí:

—Llofueraima, ¿bue ññellena naimiedi iese jeiciga? ¿Ñie isoide ra ie moo jetajamona, naimie iese jeiciga? ¿Ñie isoide ra ie ei jetajamona, naimie iese jeiciga? Caimo llono.

³ Jesúsdi uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusiñamui uai siñonana comini uññollena, iese jeiciga.

⁴ Nia userena jira, cuena oretatimie ie jitailla rafuena finoacadicaí. Raire jitirenite. Ie mei bu jaca maíjinite.

⁵ Eniruemo cue nia ia, comini comeciaina lligaiñoticue. —Iese Jesús llote; iadedi jiaie rafuena ñaite. Naimie nia fioidañenia, Jusiñamui rafuena llocana naimie jaillana ñaite. Ie fioidaillirui jai iaire iacanana ñaite. Comeciaina lligaiñuana llote, jeacino oni jaillena.

⁶ Iena llwanona eniruena tuajano, enirue idiaí finuanona, uisimidimie uisina naie enirue diga riginote.

⁷ Raite:

—Siloé railla joraibimo mai noisai —raite. Siloé oni dobaiñuamona: “Oretarabi”.

Ie jira naimie noisaide. Uisi jai ciodigo, abido bite.

⁸ Billa mei, naimie ecimo itino, jiai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

⁹ Jiaíno raitimaci:

—Jii, naimie.

Jiaíno raitimaci:

—Ieñede. Naimiena eruaide isoide.

Naimie dinena raite:

—Uisínidimedicue; iadedi jai ciodicue.

¹⁰ Naimiemo jicanotimaci:

—¿Niese jai birui ciodio?

¹¹ Uai ote:

—Jesús raillamie enirue idiai finuano, cue uisina riginote. Cuemo llote: “Siloé railla joraibimo noisai”. Ie jira noisaidicue. Jai ciodicue.

¹² Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisínidimie jai jilluana siadua rafue

¹³ Navui uisínidimie jai jillua mei, fariseuai dine comini naimiena uitimaci.

¹⁴ Sábadoruimo Jesúdi naimiena jillotaja jira,

¹⁵ fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finouidimiedi uisínidimiena jillotate? —Ie jira daje isoi comeciaina facañedicue.

¹⁷ Ie jira navui uisínidimiemo dane jicanotimaci:

—Naimie ona jillotaja jira, ¿niese odi Jesúsna raitio?

Uai ote:

—Naimiedi Jusiñamui uai lloraíma.

¹⁸ Naimie moo, naimie ei iaímaiaímo nia jicanoñenia, judúuai illaicomini nai ima jaca cioñenano inosiñede. Ie jira iaímaiaína uaiduanona,

¹⁹ jicanotimaci:

—¿Bimiedi omico jito? ¿Naimie jaca uisínino jeiciga?

²⁰ Uai otiaímaiaí:

—Jii, bimie coco jito. Jaca uisínino jeiciga. Iena uiñoticoco.

²¹ Niese jai naimie uisina ciuana uiñoñedicoco. Bu naimiena jilloitajana jiaí uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaímaiaí.

²² Bie rafue nia suiñenia, judúuai illaicomini navui llotimaci: “Jesúdi cai jilloitaraíma bu lloia, cai ofiracomo naimiena fo billana rairuiticai”. Iena jaciruillanona,

²³ llotiaímaiaí: “Naimie jai eimiesa. Naimiemo jicano”.

²⁴ Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúsno fecaño. Naimie jearede rafuena finouidimiena uiñoticai.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi ciorainidicue. Birui jai ciodicue. Iena uiñoticue.

²⁶ Jicanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷ Uai ote:

—Omoímo jai lloticue; iadedi cacaiacañedomoi. ¿Bue ñellena omoímo dane lloticue? ¿Ie llofueganona jaiacadomoi?

²⁸ Raire uai otimaci:

—Naimie ie llofuegamiedio. Caidi Moisés micori ie llofueganodicai.

²⁹ Jusiñamui Moisés micorimo jaie llwana uiñotica; iadedi bimiena uiñoñedica. Naimie ninena billana jia; uiñoñedica.

³⁰ Nai ima uai ote:

—Jadi, naimie ninena billana uiñoñedomoi; iadedi cuena jillotate.

³¹ Jusiñamuidi jearede rafuena finodino ñaia uaina cacarefiñede. Naie isoidino siño rafuena finoñenana uiñotica; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñotica.

³² Enirue finua facaisemona jaca buna uisninino jeicigamiena jilloitañede.

³³ Jesús Jusiñamuimona biñedimiedena, jaca buena finonide.

³⁴ Uai otimaci:

—Jamai cai nairai imiedio. ¿Ñese caina llofueitio?

Ie jira naimaci ofracomona naimiena jino dotadimaci.

Jesús uisnidimie diga ñaia rafue

³⁵ Uisnidimiena jino dotajana fidianona, Jesús naimiena jenode. Baillano, jicanote:

—¿Omoi cominina Jilloitaraimana inotio?

³⁶ Uai ote:

—¿Bumai naimie? Cuemo llono, naimiena cue inollesa.

³⁷ Jesús uai ote:

—Naimiena ciodio. O diga ñaite. Cue.

³⁸ Caiñici ifodo rainadajanona, iobillacinona fecallena, uai ote:

—Nama, jai o uaina inoticue.

³⁹ Jesús uai ote:

—Uisnidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedica” raitinona jillotajabite. Jesús “Jai maredica” raitinomo ite jeacino naimaci uiñollena bite.

⁴⁰ Naimie ecimo ite fariseuai iena cacajano, jicanotimaci:

—¿Uisnidomoi caina raitio?

⁴¹ Jesús uai ote:

—Uisnidino isoi itomoina, omoimo ite jeacino omoi muidonañede; ia “Jai ciodica” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiacañena jira, iese ñaite. Naimaci jeacino oni dotajana jitañedimaci.

10

Toica llaudaia; sedaraima rafue

¹⁻² Jesús dane llofujete:

—Cue rafuena omoi raise uiñollena, toica llaudaia; ñaiticue. Llaudaia; jino uicabilla isoi, llaigafomo nasedo fo jaidimiedi naie llaudaia; sedaraima; ia jinofebai dinena bitimiedi firiraima.

³ Llaigafu llaudaia; sedaraima fo jaillena, nase sedaraimadi nase econote. Llaudaia; naimie uaina uiñotimaci. Imaci mameciaido uaiduamona, llaigafomona jino bitimaci.

⁴ Nana ie llaudaia; jino bia, naimacina ifode. Naimie uaina uiñuanona, naimiena racadimaci.

⁵ Naimaci uiñoñegamiena racañedimaci; iadedi naimie uaina naimaci uiñoñena jira, naimiemona oni aisidimaci.

⁶ Bie isoidicinona Jesús llofujete; iadedi naie comini iena cacañedimaci.

⁷ Ie jira Jesús dane llofujete:

—Llaigafu ie nase isoidicue.

⁸ Damierie firirainina bitimaci. Ie jira llaudaiai naimaci uaina cacaiñedimaci. —Iese Jesús llofujete; ia naimiena inotinona ñaite. Naimiena abi caitadinona ñaite. Naimie inotino naimiena abi caitadino llogacinomo cacarefiñena ñaite.

⁹ Nia llofujete:

—Llaigafo isoidicue. Bu cue nasedo fo bia, jilloite. Llaudaiai isoi fo biite. Jino jaité. Mare guille baite isoite. —Iese llofujete; ia naimiena inotino marena illana ñaite. Naimiemona naimaci jitailla rafuena uana ñaite.

¹⁰ Nia llofujete:

—Llaudaiaina fillena, meinellena, faifillena, firiraima bite; iadedi cominina jaca raise itatallena, biticue.

¹¹ Llaudaiai marena sedaraimadicue. Mare sedaraimadi ie toinaia facaina riiduanona ie abina faifite.

¹² Janallari bia, llaudaiai naimie ieñena jira, jamai maijidimiedi, llaudaiaina faionocaillano, ecimona aiside. Llaudaiaina janallari gaitaacanamona, llaudaiai tuudimaci.

¹³ Jamai ucube oiacanano, isiruiñenano, jamai maijidimie aiside.

¹⁴ Iese iñedicue. Mare sedaraimadicue. Cue llaudaiaina uiñoticue.

¹⁵ Cue Moo diga conimana coco uiñua isoi, naimaci cuena jiai uiñotimaci. Cue llaudaiai facaina fioidaiticue. —Iese Jesús llofujete; ia naimiena inotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiai fioidaiacade.

¹⁶ Nia llofujete:

—Jiaie llaigafomo jiaie llaudaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue llaudaiai iitimaci. Naimacina dama sedaiticue. —Iese Jesús llofujete; ia jiaie nairaiaimo naimiena inoitinona ñaite. Dajena naimacina sedajana ñaite.

Jesús fioidaille rafue

¹⁷ Jesús nia llofujete:

—Cue jai fioidaiacanamon, cue Moo cuena isiruite. Fioidaillamon, dane jilloiticue.

¹⁸ Cue jitañenia, jaca buna cuena meineñeite. Cue jitailla jira, fioidaiticue. Siño uai cuemo illa jira, cue jitailliruimo fioidaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofuia jira, judíuai illaicomini daje isoi comeciaina facañedimaci.

²⁰ Jiaínodi:

—Naimiemo Janaba illamie —raitimaci—. Uairico. Naimiena cacareiacaiñedicaí —raitimaci.

²¹ Jiaíno raitimaci:

—Bie isoidicinona Janaba illamie llofueñede. Janaba illamie uisnidimiena jillotanide.

Jesús ie Moo diga daje isoi comeci lloilla rafue

²² Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite.

²³ Salomón micori finotaga jofo abi ibirimo Jesús macarite.

²⁴ Naie facaise judíuai illaicomini naimie dine bitimaci. Jicanotimaci:

—¿Niruido caimo ona lloitio? Odi caí Jilloitaraímania, caimo marefodo llono.

²⁵ Jesús uai ote:

—Omoímo jai lloticue; iadedi inoñedomoi. Cue Moo mamecido cue finoca rafuemon, cuena uiñotomoi.

²⁶ Cue toica llaudaiaimo omoi jainaiañena jira, cuena inoñedomoi.

²⁷ Cue toica llaudaiai cue uaina cacadimaci. Naimacina uiñoticue. Cuena racadimaci.

²⁸ Naimaci jaca itataticue. Jaca abina faifiñeitimaci. Cue anamon, jaca budí naimacina bairoñeite.

29 Cue Moo naimacina cuemo fecade. Naimacidi jiaino baifemo faitimaci. Naimiemona jaca budi naimacina baironide.

30 Cue Moo diga daje isoi comecina lloidicoco. —Iese llote; ia naimiena inotinona ñaite. Naie illaicomini naimiemo jainaiañena jira, naimiena inoñedimaci. Iena Jesús ñaite.

31 Jesús llofuiana cacajano, naie illaicomini noficina llinotimaci, naimiena meinellena.

32 Iena cianona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomo?

33 Uai otimaci:

—Mare rafuena o finua muidona, ona meineñeticai. Jamai imadio. “Jusiñamuidicue” o railla jira, ona meineiticaí. Jusiñamui Joreñaon jiaí jeare ñaitio.

34-36 Jesús dinena uai ote:

—Jaie ciegafuaina jamainidicaí. Nainomo Jusiñamuidi naimie uaina cacadinomo jaie llote: “Omoídi jusiñamuillaídomoí”. Jusiñamui ie uaina cacadinomo jaie iese lloiade, ¿niese cuena jeare ñaitomoí? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñaon jeare ñaitio” raitomoí.

37 Cue Moo isoi cue finoñenia, cuena inoñeno;

38 iadedi cuena omoí inoiacaiñenia, cue Moo isoi cue finoia, naie rafuena ino. Iemei cue Moomo cue jainaiaillana uiñoitomoí. Cuemo cue Moo jainaiaillana jiaí uiñoitomoí.

39 Iena cacajano, naimiena dane gaitaacadimaci; iadedi naimacimona jillode.

40 Ie mei Jesús Jordán railla ille ruica dibeimo jaide. Nainomo Juan micori cominina nano bautizade. Nainomo rillanona, nainomo Jesús fiebide.

41 Ailluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúsna llucacinoí uanaicino.

42 Nainomo ailluena cominidi Jesús naimaci Jilloitaraimana inotimaci.

11

Betaniamo Jesús abido jailla rafue

1 Naie facaise Betaniamo Lázaro raillamiedi duide. Naimie miriñodi Marta, María iaíñuai.

2 Naie Mariadi jiaíruido Jesús eillimo caimare soride rana totade. Ie mei naiñaiño ie ifotie diga naimie eillina safenaillena dote.

3 Naie iaíñuai Jesús dine uaina orediaíñuai, naimie billena. Naimie jibuisaíbillena llotatataíñuai:

—Nama, o isiruigamie duide —llotatataíñuai.

4 Jesús naie rafuena fidiano, llote:

—Jamai fiodaillena naimie duiñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

5 Jesúsdi Lázaron isiruite. Ie miriño iaíñuaina jiaí isiruite;

6 iadedi Lázaro duillana Jesús fidiano, naimie dine jaiñede. Naimie illanomo menarui nia fiebide.

7 Ie mei ie llofueoicaiganodicaímo llote:

—Judeamo abido dane mai caí jailli.

8 Uai oticaí:

—Llofueraíma, judíuai illaicomini birui noficina ona fairinoiacadimaci. ¿Niese naimaci dine dane jaitio?

9 Uai ote:

—Nagarui userede. Userenia bu macaria, raise ciua jira, eicaítaiñede;

10 iadedi bu naíona macaria, raise cioñena jira, eicaítaide. —Iese llofujete; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai inide; iadedi naimiena casitallena, jaiticue.

¹² Uai oticai:

—Nama, naimie jamai inia, nia dama casite.

¹³ Naimie jafaici uanona iniamo comeciaina facadica; iadedi Jesús naiena lloñede. Lázaro fiodaillana ñaite.

¹⁴ Ie jira Jesús caimo marefodo llote:

—Naimie jai fodaite.

¹⁵ Nainomo cue iñena jira, cue siño uai omoi ñnollena, omoi facaina iobidicue. Naimie dine mai cai jailli.

¹⁶ Caïmona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídimio. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai nagaamagarui illana fididicai.

¹⁸ Jerusalémona Betaniamo tres kilómetros dinori illa jira,

¹⁹ diga judíuai illaicomini eedollena, Marta iañuui María dine bitimaci.

²⁰ Jesús billana Marta fidiano, cai dine naisomo bite; iadedi jofomo María fiebide.

²¹ Jesús Marta llote:

—Nama, o bene itiona, cue iio fiodaiñede;

²² iadedi Jusiñamui buena o jicaia, naimie iena finoite. Iena uiñoticue.

²³ Jesús dinena uai ote:

—O iio abido jilloite.

²⁴ Naiñaiño uai ote:

—Nana comini jilloilliruimo naimie jai jilloite. Iena uiñoticue.

²⁵ Jesús uai ote:

—Fiodaillamona comini abiaina Jilloitaraimadicue. Jusiñamui diga jaca illena, cominina itataraimadicue. Bu cuena ñnuanona, fiodaiadedi, iemona ico jilloite.

²⁶ Cuen a ñnotimiena Jusiñamui illanomo jaca illena itataiticue. ¿Iena ñnotio?

²⁷ Naiñaiño uai ote:

—Ji, Nama; odi cai Jilloitaraimadio. Odi Jusiñamui Jitodio. Jusiñamui dinena o billamo jaie ocuridicai.

²⁸ Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

²⁹ Iena cacajano, raire cai dine María bite.

³⁰ Marta diga ie ñaianomo Betania ecimo Jesús nia ite.

³¹ Jesús dine María nia jaiñenia, judíuai illaicomini María nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci.

³² María Jesús dine rillano, naimiena duenaillano, caiñici ifodo rainadacaida, llote:

—Nama, bene itiona, niadedi cue iodi fiodaiñede.

Jesús Lázarona jillotaja rafue

³³ María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite.

³⁴ Jicanote:

—¿Ñinomo Lázarona raitomoi?

Uai otimaci:

—Nama, mai jibuisaibi.

³⁵ Lázarona duenaillanona, Jesús eede.

³⁶ Iena ciuanona, judíuai illaicomini dinena llotimaci:

—Ero. Naimiena eo isiruite.

³⁷ Jiaíno raitimaci:

—Navui uisimidimiena jillotate. ¿Bue ñellena bimiena jilloitañede, naimie nia fiodañenia?

³⁸ Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica.

³⁹ Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰ Jesús uai ote:

—Cuenta o inoia, Jusiñamui uai siñonana uiñoitio.

⁴¹ Iemona cominidi noficina oni ñuitadimaci. Jesús monamo eruailano, llote:

—Moo, cue uaina o cacaja jira, iobidicue.

⁴² Jaca cuenta cacadio. Iena uiñoticue; iadedi cue diga bene itino illa muidona, iese ado lloticue. Cuenta o oretajana naimaci inollena, o diga ado ñaiticue.

⁴³ Ie mei eo ado llote:

—Lázaro, jino bi.

⁴⁴ Nai fiodaitimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

⁴⁵ Ie muidona María diga bitinomona ailluena comini Jesúsna inotimaci. Naimie finoca rafuena ciuanona, inotimaci.

Jesúna meinellena, illaicomini comeciaina facaja rafue

(Mt 26.1-5; Mr 14.1-2; Lc 22.1-2)

⁴⁶ Jesúsna inoñedinomona damierie Jesús finoca rafuena fariseuai dine lluidimaci.

⁴⁷ Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Ñiese naimiena nibaiticai? Diga siño rafuena ua finocabide.

⁴⁸ Naimiena ñiese cai nibañenia, nana comini naimiena inoitimaci. Nana comini naimie dibeimo jiaia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiaí fuidoitimaci. Iena jitaiñedicai.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi.

⁵⁰ Iese cai nairaimo suiñellena, damie cai nairai facaina fiodaitena, mare. Iena nibai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

⁵² Cai comini facaina dama fiodañede; iadedi nana Jusiñamuina inoitinona facaina fiodaite. Diga nairaiaimo itimaci; iadedi naimiemo dajena nana naimaci duillena, naimie fiodaite.

⁵³ Caifás llua naimaci cacajamona, judíuai illaicomini comeciaina nia facadimaci, naimiena meinellena.

⁵⁴ Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai.

⁵⁵ Pascua railla rafue iaie iacana jira, ailluena comini Jerusalémo naimaci nairaiaimona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci.

⁵⁶⁻⁵⁷ Jusiñamui diga nanoca ñairainidi fariseuai diga navui ñaitimaci:

—Bu Jesúsna cioia, naimiena cai gaitallena, caimo llono.

Rafuemo bitino illamona, Jesúsna jenodimaci. Jusiñamui jofomo naimaci ia, coninimo jicanododimaci:

—¿Ñiese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini lluana fidiano, naimie biñeite.

12

Betaniamo Lázarofomo Jesús guilla rafue (Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázarofomo illano. Jesús Lázarofomo fiodaillamona navui jillotata.

² Jesúsna iobillano, Lázarofomo ie guille rafuena finode. Marta guille bai jonega. Jesús diga guitino motomo Lázarofomo ite. Jesús llofueoicaiganodicaidi jiai motomo guiticaí.

³ Iemei Maríadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride.

⁴ Caímona Judas Iscariote micorina mameciredimie ite. Jesúsna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare — llote.

⁶ Dueredinona naimie duenaiñede; iadedi naimie cai ucubena sedade. Naimiedi firiraíma. Naie ucubemona fiuilla jira, iese naimie llote.

⁷ Jesús uai ote:

—Dama ite. Bie soride ra naiñaiño jai eenoga cue fiodaillirui iena.

⁸ Dueredino omoi diga jaca iitimaci; iadedi omoi diga jaca iñeiticue.

Ailluena comini Lázarofomo cúa rafue

⁹ Lázarofomo Jesúsna illana ailluena cai illaicomini fidiano, bitimaci. Navui fiodaillamona Lázarofomo Jesúsna jillotaja jira, Jesúsna dama cioiacaiñedimaci; iadedi Lázarofomo jiai cioiacadimaci.

¹⁰ Ie jira Jusiñamui diga nanoca ñairainidi Lázarofomo jiai meinellemo comeciaina facadimaci.

¹¹ Lázarofomo muidona ailluena judíuai illaicomini naimaci illa díbei faínonocaida, Jesúsna inotimaci.

Jerusalémo illaíma isoi, Jesúsna marena jailla rafue (Mt 21.1-11; Mr 11.1-11; Lc 19.28-40)

¹² Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázarofomo diga guillarui ie areruido Jesús Jerusalémo billana naie comini fididimaci. Fiodaillamona Lázarofomo Jesúsna navui jilloitajana diga comini cioidimaci. Iena llocana uitimaci. Ie jira ailluena comini Jesúsna dine jaidimaci.

¹³ Raforona uanona, naimiena feñollena, naimie uicomo jaidimaci. Ado cuiriisite:

—¡Cai Jilloitaraíma billa! ¡Jusiñamui mamecido bitimie eo mare! ¡Cai Illaíma eo mare! —cuiiriisite.

¹⁴ Jesúsna ailli baiga burrito emododo jaide. Jusiñamui facaina lloráíma micorí jaie llua isoi jaide. Jaie llote:

¹⁵ “Jerusalén imaci, jacinaíño. O Illaíma burrito emododo biite”.

¹⁶ Naie facaise bie rafuemo comeciaina facañedicaí; iadedi Jesúsna jillua mei, bie rafuena comeciticaí.

¹⁷⁻¹⁸ Lázarofomo Jesúsna jillotaja jira, ailluena comini Jesúsna dine jaidimaci.

¹⁹ Iena cíuano, fariseuai coniniri ñaitimaci:

—Jaca buena birui finoñedicaí. Ailluena comini Jesúsna díbeimo jai jaidimaci.

Judíuainedino Jesúsna cioiacana rafue

²⁰ Judíuainedino Jusiñamuina sedallena, pascua railla rafuemo jiai bitimaci.

²¹ Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicaí.

²² Felipe iena Andrémo llote. Ie mei Jesúsno lluidiaimaiaí.

²³ Jesús uai ote:

—Monamona biticue; ia jai cue fiodaille facaise ride. Comini cue uaidi siñonana uíñua facaise jai ride.

²⁴ Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci.

²⁵ Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite.

²⁶ Cuena bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite.

²⁷ Cue comeci jai rucaicuerite; iadedi, ¿niese raiticue? Raiñeiticue: “Moo, cue fiodaillemona cuena jillote”. Fiodaillena biticue. Ie jira raiticue:

²⁸ “Moo, cominina o uai siñonana uíñota”.

Ieconí monamona Jusiñamui llote:

—Jai iena finodicue. Dane iena finoiticue.

²⁹ Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaenici llote.

³⁰ Jesús uai ote:

—Cue facaina naie lluaana cacaiñedomoi; iadedi omoi facaina iena cacadomoi.

³¹ Cuena uíñoñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite.

³² Cruzmo cue fiodaia, naimacina jilloitallena, ailluena cominina cue dibeimo itataiticue.

³³ —Naimie fiodaillana naimaci uíñollena, iese llote.

³⁴ Naie comini uai otimaci:

—Jusiñamui facaina lloraini micoriai jaie cueba: “Cai Jilloitaraíma jaca fiodaiñeite”. ¿Niese raitio: “Jusiñamuimona biticue; ia fiodaiticue”?

³⁵ Jesús dane uai ote:

—Cue llofuia dinori omoi comeciaina nia lligaiñoticue. Cue lluomo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uíñoñede. Ie isoide. Jecino anamo itinodi jitiredinomo itimaci isoidimaci. Uanaicinona uíñoñedimaci.

³⁶ Jecino anamona omoi jilloillena, cue llofuia uaido omoi comeciaina birui lligaiñoticue. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús diga siño rafuena finode; iadedi ailluena comini: “Naimiedi cai Jilloitaraíma” raillana nia ñnosíñede.

³⁸ Iemona Isaías micori jaie cueba: “Naimie jaie cueba: Jusiñamui, cai lluacinona cacadimaci.

O siño uaido o finoca rafuena jiai ciodimaci; iadedi ñnoñedimaci.

³⁹⁻⁴⁰ Isaías micori dane cueba:

Naimaci cïoi raillano, Jusiñamui naimacina uisïnidinïo isoi itatate.

Naimaci comeciainïona abïna uïñoi raillano, naimaci comeciaina feitate.

Naimïena ïnoi raillano, iese naimacina jai itatate.

Ie jira jai ïnonidïmaci.

⁴¹ Jusiñamui ie ebirede rafuena naimïe ciuamona, Isaías micori iena llote. Isaías micori Jesúna llote.

⁴² Isaías micori iese llote; iadedi ailluena judíuai illaicomïni Jesús uaina ïnotïmaci. Fariseuaina jaciruillanona, iena janotïmaci. Naimaci ofiracomona naimacina jino dotajana jaciruitïmaci.

⁴³ Comïni naimacina iobitajana naimaci eo jitailla jira, dotajana jitaïñedïmaci. Jusiñamuimo ite iobillacinona raise oiacaïñedïmaci.

Jesús ie Moona ñaia rafue

⁴⁴ Naie facaise Jesús eo ado llote:

—Cuenta ïnotïmie cuenta oretatïmïena jiai jai ïnote.

⁴⁵ Cuenta cioidïmie cuenta oretatïmïena jiai ciode isoide.

⁴⁶ Comïni comeciaina lligaiñollena bitïcue. Ie muidona naga cuenta ïnotïmie jïtïredïnomo jai ïñede. Jeacino anamo jai ïñede.

⁴⁷ Cue uaina cacajano ïnoñedïmïemo juez isoi birui lloñedïcue. Comïnina duere finollena, biñedïcue; iadedi naimaci jeacïnomo naimacina jilloitallena bitïcue;

⁴⁸ ia cuenta bu ïnoñenia, cue uaina naimïe ïnoñenia, ja muidona faïfite. Cue uaina naimïe ïnoñellemona, nana naimïena ïnoñedïno janafefillïruimo Jusiñamui naimïena ïco duere finoite. Cuenta jitaïñedïmie, cue uaina jitaïñedïmie comïni janafefillïruimo janafefite.

⁴⁹ Dama cue comeci facaja uaido lloñedïcue. Cue Moo cuenta oretaja muidona, cue Moo cuemo lloga uaido llotïcue.

⁵⁰ Cue Moo lloga uaidi naimïe dïbeimo comïnina jaca itatate. Iena uïñotïcue. Ie jira cue Moo cuemo lloga uaina jaca llotïcue.

13

Jesúdi ie llofueoicaigano eïllïaina jocua rafue

¹ Pascua railla rafue riacana areruido ia, Jesús ie Moo ðine abïdo jaiacanana uïñote. Naimaci ðiga naimïe ñia ia, ie comïnina jaca eo isiruite.

² Jesúna gaitatallena, naie facaise Taïfedi Judas Iscariote micori comecina feidote. Judas micori Simón jito.

³ Jesúdi ie uai ie Moomona feïñuana uïñote. Ie Moo ðinena billana uïñote. Ie Moo ðine abïdo jaillena jiai uïñote.

⁴ Nairuido Jesús cai ðiga guite. Guilla meinoconi, Jesús a naidacaida ie abïmo ite ïniroina ðuiñode. Abi dora ðiga ie moïllina ferïnote.

⁵ Janorede nogomo jïnuina totaja mei, cai eïllïaina jocode. Safenaïllena, ie dora ðiga ðote.

⁶ Simón Pedro ðine naimïe ria, Pedro jïcanote:

—Nama, ¿cuenta eïllina jiai jocoitïo?

⁷ Jesús uai ote:

—Cuenta finoca rafuena birui uïñoñedïo; iadedi jiaïruido uïñoitïo.

⁸ Pedro uai ote:

—Cuenta eïllina jaca jocoñeitïo.

Jesús uai ote:

—O eïllina cuenta jocoñenia, cuenta facaina ïñeitïo.

⁹ Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

¹⁰ Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

¹¹ Naimiena gaitataiacadimiena naimie uiñua jira, iese llote.

¹² Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi.

¹³ Cuen a “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue.

¹⁴ Omoi Namadicue. Omoi llofueraimadicue; iadedi omoi mullaima isoi iticuedena, omoi eilliaina jai jocodicue. Omoi jamai bue isoidinomona, omoi eilliaina danirie jocua.

¹⁵ Cuemona fueo. Abi iedoñeno cue isoi omoi jai. Cue afemo iñedomoi.

¹⁶ Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaina jocodicue. “Jiaimie afemo iticai” raillanomo comecina omoi facañeno.

¹⁷ Bicino omoi uiñuamona, iese omoi finoia, caimare iitomoi.

¹⁸ Nana omoina iese ñaiñedicue. Nana cue fetocanona uiñoticue. David micori jaie llote: “Cue diga guitinomona damie cuena enoidimie ite”.

¹⁹ Bie nia suiñenia, iena jai lloticue. Iena cuemo suilla mei, David micori llogacino raise inoitomoi.

²⁰ Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesúdi ie gaitataitimi ena llua rafue

(Mt 26.20-25; Mr 14.17-21; Lc 22.21-23)

²¹ Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

²² Caimona ¿nimie naimiena gaitataite? raillanona, comecina facajano, coninimo eroridicai.

²³ Cuen Jesús eo gaia jira, Jesús abimo iticue.

²⁴ Cuen uaiduanona, Pedro cuemo llote:

—“¿Bu ona gaitataite?” Jesúmo jicano.

²⁵ Ie jira Jesúmo jicanoticue:

—Nama, ¿bu ona gaitataite?

²⁶ Jesús uai ote:

—Bie llomeniconna mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.

²⁷ Llomeniconna guilla meinoconi, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

²⁸ Jesús Judas micorimo llua raise uiñoñedicai.

²⁹ Judas micori ucubena sedaja jira, jiaino comecina facade: “ ‘Cai jitaille guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”.

³⁰ Guilla mei, Judas micori jino jaide. Naie facaise jai jitireficaide.

Jesús ie fiodaillena ñaia rafue

³¹ Judas micori jailla mei, Jesús llote:

—Jusiñamuimona billanona, imana jaidicue; ia cue fiodable facaise jai ride. Cue fiodablemona cominidi Jusiñamui uai siñonana uiñoitimaci.

³² Iemona Jusiñamui uai siñonana comini uiñoia, Jusiñamuidi cominina cue siño Jitona jiai uiñotaite. Iese ja finoite.

³³ Cue comini, dallu omoi diga bene iticue. Jaiticue. Cue diga iacanitomo. Judíuai illaicominimo navui cue llua isoi, omoimo ja lloiticue. Cue jaillinomo nia jaiñeitomo.

³⁴ Ie jira jiaie rafuena omoimo ja lloiticue. Omoina cue isiruilla isoi, coninina omoi isirui.

³⁵ Coninina omoi isiruillamona, jiaie cominidi cue cominidomoina uiñoitimaci.

Pedro Jesús diga ñaia rafue

(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio. Jiairuido jaitio.

³⁷ Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiticue.

³⁸ Jesús dinena uai ote:

—Cue facaina fiodaiacadio. Uanai omo lloticue. Nia monaiñenia, itava nia ñaiñenia, dacaiño amani cuena janoitiosa.

14

Jesús ie Moo dinomo rille rafue

¹ Jesús ie llofueoicaiganodicaina nia llofue:

—Rucaicueriñeno uri i. Jusiñamuina inocana jai. Cuena jiai inocana jai.

² Cue Moo illanomo diga comini illanuai ite. Iese inedena, omoimo jai lloticue. Omoi illinuaina raise finollena, nainomo jaiticue.

³ Fuiduanona, dane abido biiticue. Omoina cue dine uillena, cue dine omoi illena, biiticue.

⁴ Cue jaillinona birui uiñotomo. Nainomo omoi rillena jiai uiñotomo.

⁵ Tomás uai ote:

—Nama, o jaillinona uiñoñedica. ¿Ñiese nainomo riitica?

⁶ Jesús uai ote:

—Omoi naiso isoidicue. Uanaicinona lloticue. Cue Moo dibeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena ino.

⁷ Cuena uiñotomoina, cue Moona jiai uiñotomo. Biruidemona naimiena uiñoitomo. Naimiena jai ciodomoi.

⁸ Felipe uai ote:

—Nama, o Moona caimo acata. Iemo jai macaibaite.

⁹ Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciolimie cue Moona jiai jai ciode isoide. ¿Ñiese llotio: “O Moona caimo acata”? Cue Moona jai ciodio isoidio.

¹⁰ Cue Moo diga daajedicoco. Iena nia inoñedio. Cue lluadi cue Moo uai. Cue lluadi cue comeci iuañede. Cue metodo naimie maijide.

¹¹ Cue Moo diga daajedicocona ino. Cue uaina omoi inoñenia, siño rafuena cue finua jira, cuena ino.

Jesús ie Moo Joreña llua rafue

¹² Jesús nia llofue:

—Uanai lloticue. Cuena omoi ñnoia, cue finoca rafuena jiaí finoitomoí. Cue Moo ñine cue jailla jira, cue Moo Joreña omoi ñine cue oretaja mei, cue finua baifemo finoitomoí.

¹³ Cue Moo uai siñonana omoi uiñollena, buena cue ñibeido cue Moomo omoi jicaia, nana iena finoiticue.

¹⁴ Cue ñibeido omoi jicaia, iena finoiticue.

¹⁵ Cuena omoi isirua, cue llogacinaua ñnoitomoí.

¹⁶ Ie Joreño omoimo fecallena cue Moomo jaiticue. Naie Joreñodi omoína canoite. Omoi ñiga jaca iite.

¹⁷ Uanaicnona llocabite. Naimiena naimaci uiñoña jira, cuena ñnoñedno naimiena feñonidimaci; iadedi naimie omoi ñiga illa jira, naimiena uiñotomoí. Omoi ñiga jaca iite.

¹⁸ Omoína fañonocaiñeiticue; ia ñane biiticue.

¹⁹ Nano ñigarui illanona, cuena ñnoñedno cuena ñia caitimaci. Ie mei cuena caitiñeiticue; iadedi fiodaillamona cue jillua mei, cuena ñia caitomoí. Cue jaca illa jira, jiaí jaca iitomoí.

²⁰ Fiodaillamona cue jillua mei, cue Moomo cue duillana raise uiñoitomoí. Cuemo omoi duillana jiaí raise uiñoitomoí. Omoimo cue duillana jiaí raise uiñoitomoí.

²¹ Cue llogacinaua omoi isirua, cuena isiruitomoí. Ie jira cue Moodi omoína jiaí isiruite. Omoína jiaí isiruiticue. Omoína cuena uiñotaiticue.

²² Iscariotena mamecineñede Judas naimiemo jicanote:

—Nama, ¿bue ñellena ñani cana ona uiñotaitio; iadedi jiaie comina ona uiñotañeiticue?

²³ Jesús uai ote:

—Cuena isiruitnona cue rafuena uiñotadicue. Bu cuena isirua, cue llogacinaua ñnoite. Cue Moo naimiena isiruite. Iemona naimiena nabaiticoco.

²⁴ Bu cuena isiruiñena, cue llogacinaua ñnoñede. Cue llogacnodi cuejeñede. Cue Moo ie. Naimie cuena oretate.

²⁵ Omoi ñiga ñia cue illamona, bie llogacinaua omoimo jai lloticue.

²⁶ Cue Moodi omoína canollena, naga rafuena omoína llofuellena, cue facaina ie Joreña omoimo oretate. Omoína nana omoimo llogacinaua comecitaite.

²⁷ Cue Moo ñine jaiticue; iadedi omoi comeciaina uri itatiticue. Cuena ñnoñedno omoi comeciaina iese itatanidimaci. Jarire iñeno. Jaciruiñeno.

²⁸ Ailli cue llua cacadomoí: “Cue Moo ñine jaiticue; iadedi ñane biiticue”. Cue Moo ñine cue jailla jira, cuena omoi isirua, cueri iobitomoí. Cue Moo cue afemo ite.

²⁹ Bie rafue cuemo ñia suiñena, uicodo omoimo iena jai lloticue. Naie sua, cuena fañonocaiñeno omoi jaillena jitaidicue.

³⁰ Omoi ñiga are ñia ñaiñeiticue. Cuena ñnoñedno anamo itimie cuena jai ñuere finoacade. Taifena ñaiticue. Naimie anamo iñedicue;

³¹ iadedi cue Moona cue isiruillana cuena ñnoñedno uiñollena, cue Moo cuemo llua isoi, finoiticue. Mai caí jailli.

15

Uvas railla riarra ie rafue

¹ Jesús ñia llofueite:

—Cue ñibeimo marena omoi illena omoi raise uiñollena, jiaie rafuedo iena llofueiticue. Uvas railla ua riaradicue. Cue Moodi uvas railla riarra sedaraima.

² Cue amena igailaidomoí. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide.

³ Cue llogacinauido jaillamona, jai jaigaica isoidomoí. Iemona omoi comeciái jai jeanide.

⁴ Cuena nabai. Ona jiaí nabaiticue. Naie amenamo jai ñuñena jira, ñaje ñibegaise jaitaca igaidi jai llisiñede. Ie isoide. Cuena omoi nabaicabiñena, llisiñede igai isoidomoí. Ie jira cuena nabai.

⁵ Uvas raiilla riaradícue. Cue amena igaiillaídomoi. Cuemo omoi duiadedí, omoímo cue duiadedí, eo lliside isoidomoi; iadedí cuemo omoi duiñenia, jaca llisiñede isoidomoi. Cuemo omoi duiñenia, cue jitailla isoi mare rafuena jaca finoñeitomoi.

⁶ Jai duide igaiillaí safenailla mei, maraiñena jira, jobaillena, danomo ofitaticai. Cuemo duiñedímie jai duide igai isoide. Jusiñamuimona duere sefuite.

⁷ Cuena omoi nabaia, cue uaina omoi feitañenia, omoi jitailla rana jica. Ie mei feiñoitomoi.

⁸ Eo lliside omoi isoia, cue Moo iobide. Iese omoi ia, ua cue cominídomoi. —Iese Jesús llofuate; ia naimie díbeimo naimaci raise illena ñaite. Mare rafuena naimaci finocana jaillena ñaite.

⁹ Nia llofuate:

—Cuena cue Moo isiruilla isoi, omoína isiruitícue. Cuena nabaicabi.

¹⁰ Cue Moo llogacínuaína cue ñnuamona, naimie isiruillacino anamo itícue. Cue Moo llogacínuaína omoi ñnuamona, cue isiruillacino anamo itomoi.

¹¹ Cue isoi omoi comeciaí eo caimarellena, bicínuaí omoímo llotícue.

¹² Dane bie rafuena llotícue. Omoína cue isiruilla isoi, coninína omoi isirui.

¹³ Naimaci o isiruillamona, o nabaiñaí facaina o fiodaía, naimacína eo ua isiruitio.

¹⁴ Cue llogacínuaína omoi ñnoia, cuena nabaidomoi.

¹⁵ Omoína “Cue mullaíaidomoi” jaca raiñedícue; iadedí omoína “Cue nabaiñaíaidomoi” birui raitícue. Mullaíai imaci patrón finoca rafuena uiñoñedímaci. Ie jira nana cue Moomona cue cacaja rafuena omoímo jai llotícue. Ie jira nana cue rafuena jai uiñotomoi.

¹⁶ Cuena fetodídomoi; iadedí omoína fetodícue. Omoi lliside isoicabillana omoímo jai llotícue. Ie mei buena cue mamecido cue Moomo omoi jicaía, omoímo fecaite.

¹⁷ Coninína omoi isiruillena jai llotícue.

Comini Jesúsna enoilla rafue

¹⁸ Jesús nia llofuate:

—Cuena ñnoñedíno omoína enoia, nano cuena jai enoidímaci. Iena uiñotomoi. Omoína nia enoiñenia, cuena jai enoidímaci.

¹⁹ Naimacimo jainaíaidomoina, omoína isiruitímaci; iadedí naimacimo omoi jainaíaiñena jira, omoína cue fetua jira, omoína enoidímaci.

²⁰ Omoímo jai llotícue. Illaíma duere sefuia, naimie anamo itino jiaí duere sefuidímaci. Ie isoide. Cuena comini duere finua isoi, omoína jiaí duere finoitímaci. Cue llofuiacínona naimaci ñnua isoi, omoi llofuiacino jiaí ñnoitímaci.

²¹ Cuena oretatímiena naimaci uiñoñena jira, cue muidona iese finoitímaci.

²² Naimacimo ite jeacínona naimacimo lloñedícuenta, naimacimo ite jeacínona uiñoñedímaci. Cue rafuena naimaci cacajamona, naimacimo ite jeacínona jai uiñotímaci. Naimacimo jeacino nia ia, naimaci muidona.

²³ Cuena enoidímiedi cue Moona jiaí enoide.

²⁴ Eo siño rafuena naimaci motomo finodícue. Buna cue isoi jaca finoñede. Iena finoñedícuenta, naimacimo ite jeacínona uiñoñedímaci. Cue siño finoca rafuena jai cioidímaci. Ie jira cuena enoidímaci. Cue Moona jiaí enoidímaci.

²⁵ Naimacína David micorí jaie llote: “Naimacimo buena finoñedícue; ia cuena enoidímaci”. Naie cufaguaí jai suide.

²⁶ Cue Moo ie Joreño omoímo oretaite. Ie Joreño omoína canoite. Omoína uanaicínona uiñotaite.

²⁷ Cue nano lluaruimona cue díga omoi illa jira, cue facaisena jiaí raise lloitomoi.

16

Judíuaí illaícomini Jesús llofueoicaiganona duere finua rafue

¹ Jesús nia llofuate:

—Danomo abido omoi jaiñellena, cue uaina omoi fainonocaiñellena, bicinuai omoimo ja lloticue.

² Omoi ofracomona illaicomini omoina dotaitimaci. Jiairuido omoina meiniamona: “Jai Jusiñamuina marena sedadicaí”, comeciaina facaitimaci.

³ Cuen a naimaci ñnoñena jira, cue Moona jiai naimaci ñnoñena jira, iena finoitimaci.

⁴ Bie rafue omoimo suia, naie facaise cue llua omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

Jesús Jusiñamui Joreña llua rafue

⁵ Jesús nia llofueite:

—Cuen a oretatimie dine ja jaiticue; iadedi omoimona buna: “¿Ñine jaitio?” cuemo jaca nia jicanoñede.

⁶ Omoimo bie rafue cue llua jira, omoi comeciai eo sure ite. Ie jira cue jaillinona jicanoñedomoi.

⁷ Uanai lloticue. Cue jaiia, mare. Cue jaiñenia, omoina canoraíma omoi dine biñeite. Cue jaiia, omoi dine naimiena oretaiticue. Jusiñamui Joreñodi omoi canoraíma.

⁸ Naimie bia, cuena ñnoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiai uiñotaite.

⁹ Cuen a naimaci ñnoñenia, naimacina naimacimo jeacino nia illana uiñotaite.

¹⁰ Cue Moo dine abido cue jaillinona, cuena cioñeitimaci; ia iemona Jusiñamui Joreño cue uaina siñonana uiñotaite.

¹¹ Fiodaillamona jilloiticue. Iemona cuena ñnoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite.

¹² Diga rafue omoimo nia lloiacadicue; iadedi jai rairafaidomoi.

¹³ Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacino llofueite. Jiairuido suille rafuena llofueite.

¹⁴ Omoina cue rafuena uiñotaite. Ie jira cuena iobitaite. Nana cue Moomo ite uaidi cueje.

¹⁵ Ie jira bie rafuena lloticue. Jusiñamui Joreño omoina cue rafuena raise uiñotaite.

Sunailamona caimare illa rafue

¹⁶ Jesús nia llofueite:

—Dallu illanona cuena cioñeitomoi. Ie mei dallu illanona, cuena dane cioitomoi.

¹⁷ Ie llofueoicaiganodicaímona damierie daní coninimo jicanodosite:

—¿Ñiese caimo llote: “Dallu illanona, cuena cioñeitomoi. Ie mei dallu illanona, cuena dane cioitomoi. Cue Moo dine jaiticue”?

¹⁸ ¿Buena caimo llote? Raise cacaiñedicaí.

¹⁹ Cai jicanuana Jesús uiñuanona, naimie jicanote:

—¿Cue llua raise uiñoiacadomoi?

²⁰ Cuemo suille rafue suia, eo eitomoi; iadedi cuena ñnoñedino eo iobitimaci. Sunaitomoi; iadedi jiairuido caimare iitomoi.

²¹ Jiaie uaido iena lloticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide.

²² Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite.

²³ Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite.

²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús marefodo llua rafue

²⁵ Jesús nia llofue:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moona marefodo lloticue.

²⁶ Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi.

²⁷ Omoina naimie isiruillamona, omoimo fecajite. Cuen a omoi isiruilla jira, cue Moomona cue billana omoi inua jira, cue Moo omoina isiruite.

²⁸ Cue Moomona eniruemo biticue. Naimie dine abido jaiticue.

²⁹ Lloticai:

—Jai marefodo caimo llotio. O uaina meidocana jai uñedio.

³⁰ Nana rafuena o uñuana uñotica. Cai comeciaino iticinona o uñuamona, caina raise uñotio. Iemona Jusiñamuimona o billana jai inotica.

³¹ Jesús uai ote:

—Cuen a jai inotomoi.

³² Jiairuido, ua birui, oni tuuitomoi. Nagamiai jofomo omoi jailla mei, dama ifoconi fiebiticue; iadedi dama ineiticue. Cue Moo cue diga iite.

³³ Cuen a omoi inuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

17*Jesús ie Moo diga ñaia rafue*

¹ Jesús bicinona llua mei, monamo eruailano, jide:

—Moo, cue fiadaicanarui jai ride. Cue uai siñonana uñota. Iemei o uai siñonana jiai uñotaiticue.

² Nana comini afemo cuena jai itatatio. Imana cue jaillamona, nana comini afemo cuena jai itatatio. Comini comeciainuaina o meidotajamona, cue fiadaillamona, ailluena comini o diga jaca iitimaci.

³ Ona nanoca Jusiñamuina uñoitimaci. Jai cuena o oretajana jiai uñoitimaci.

⁴ Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue.

⁵ Ore Moo, enirue nia inena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa.

⁶ Comini comeciainuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena inocana jaidimaci.

⁷ Nana cuemo ite rafue omona feiñotiticue. Iena jai uñoitimaci.

⁸ Nana cuemo o llogacinuaina naimacimo jai lloticue. Jai inotimaci. Omona cue billana jiai jai inotimaci. Cuen a oretajana jiai inotimaci.

⁹ Naimaci facaina birui jidicue. Naimacina cuena inotadio. Ie jira omo jai duidimaci. Ona inoñedino facaina birui jinedicue.

¹⁰ Nana o dibeimo itinodi cueje. Nana cue dibeimo itinodi oie. Nana naimaciri iobidicue.

¹¹ Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci finoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita.

¹² Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusiñamui loraime micori cugafuiai suillena, naimie ua faifite.

13 O dine ja jaiticue. Cue isoi naimaci comeciai eo caimare illena, naimacimo ailluena rafuena jai lloticue.

14 O llogacinuaina jai lloticue. Ona inoñedinomo naimaci jainaiñena jira, ona inoñedino naimacina enoidimaci. Ona inoñedinomo jiai jainaiñedicue.

15 Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue.

16 Ona inoñedinomo jainaiñedimaci. Ona inoñedinomo jiai jainaiñedicue.

17 O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata.

18 Bene cuena o oretaja isoi, ona inoñedino dine naimacina oretaticue.

19 Uanaicinona naimaci uiñuamona, naimaci comeciai marebicaillena, cuena inotino facaina fiodiacadicue.

20 Bimacina birui dane jñedicue; iadedi bimaci cue rafuena ico lloia, jiaie comini cuena inoitimaci. Cuena ico inoitino facaina birui jiai jñedicue.

21 Daajedicoco. Coco illa isoi, naimaci comeciaina daje isoi lloillena, nana naimaci facaina jñedicue. Daje isoi comeciai lloillamona, cuena nia inoñedinodi inoitimaci. Iemona cuena o oretajana inoitimaci.

22 Cuemo o iga uaidi ebirede. Naimaci comeciai lloillena, naimacimo o uai jai cue iga.

23 Naimaciri dajedicaí. O diga daajedicoco. Naimaci comeciai daje isoi lloillana jitaídícúe. Iemona cuena inoñedino bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci.

24 Ore Moo, naimaci cue dine illena jitaídícúe. Enirue nia iñenia, illaima isoi o ecimo ebire jaie iticue. Dane ie isoi ebire birui cue ia, naimaci cuena cuana jitaídícúe.

25 Ore Moo, mareuidimiedio. Jiaie comini ona uiñoñedimaci; iadedi ona uiñoticue. Cue llofueoicaiganodi o cuena oretajana jai uiñoticue.

26 Naimacimo ona jai lloticue. O cuena isiruilla isoi coninina naimaci isiruillena, naimacimo nia lloticue —jñide.

18

Jusúna gaitalle rafue

(Mt 26.47-58; Mr 14.43-54; Lc 22.47-54)

1 Jñia mei, Jesús ie llofueoicaiganodicai diga, Cedrón railla iconi enefebeimo ruica aceituna railla riaraiñi illanomo naiona jaide.

2 Jesús cai diga nainomo jaisoilla jira, Judas micori naie illanona jiai uiñote. Jesúsna gaitatallena nainomo Judas jaide.

3 Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduai di lamparínaiiri bitimaci. Reinaiiri jiai bitimaci. Sidaniari jiai bitimaci. Judas naimacina ifode.

4 Jesúsdi nana naimiemo suille rafue uiñuanona, naimaci dine billano, jicanote:

—¿Buna jenodomoí?

5-6 Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaillamona, abido ñañjillamona, eniruemo uaidimaci. Jesúsna gaitatallena, Judas micori naimaci diga ite.

7 Jesús dane jicanote:

—¿Buna jenodomoí?

Uai otimaci:

—Nazaret ie Jesús.

8 Jesús uai ote:

—Omoimo jai lloticue: “Imiedicue”. Cuen a omoi jenoia, cue diga itino oni jaillena rairuiño.

⁹ Naimie ie Moomo como lloga uai suillena, iese llote. Iese ie Moomo como llote: “Cuen a o inotaganomona jaca buna faifñedicue”.

¹⁰ Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaïma jefona jaïbonote. Naie mullaïma mamecidi Malco.

¹¹ Iena ciuanona, Jesús Pedromo llote:

—O lloebina eeno. Cue Moo jitailla isoi, fioidaiticue.

¹² Ie mei soldaduai, imaci capitán diga, judíuai imaci policías diga, Jesúsna gaitajano, naimiena maïtimaci.

¹³ Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima.

¹⁴ Navui Caifás judíuai illaicomínimo llote: “Damie nana cai comini facaina fioidaitena, mare”.

Pedro Jesúsna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiai racadicue. Cuen a Jusiñamui diga nanoca ñairaima uiñua jira, ie nairaibirimo Jesús diga jaidicue;

¹⁶ iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño jicanoticue.

¹⁷ Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofo mullaïai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

Jesús Anás dine illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúsno ie llofueoicaiganodicaina jicanote. Ie llofuiacinuaina jiai jicanote.

²⁰ Jesús dinena uai ote:

—Nana comínimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue.

²¹ ¿Bue ñellena birui cuemo jicanotio? Cuen a cacadinomo iena jicano. Cue llofuiana uiñotimaci.

²² Iese Jesús llua jira, daje policia naimie uiecona butade. Jesúsno jicanote:

—¿Bue ñellena iese uai otio?

²³ Jesús dinena naie uai ote:

—Naimie uai jeare oticuen a, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maïanona orede.

Pedro Jesúsna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje mullaïma Pedromo llote:

—Aceitunas railla riaraiïa illanomo ona cioticue —llote. Jesúsna soldaduai gaitaja facaiseconi Pedro naie mullaïma ie come jefona ailli jaïbonote, soldaduai Jesúsna gaitaja ie daacaiño.

²⁷ Pedro dane janote. Ieconi itava ñaite.

Jesús Pilato dine illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caifás jofomona gobernador jofomo Jesúna jítiramo uitimaci. Naie fa-
caise gobernadori Pilato. Naimiedi judíuaiñedimie. Naimaci einamaci rairuilla jira,
judíuaiñedimie jofomo naie facaise fo jaiñedimaci. Fo jaiadedi, pascua railla rafue
guilledi guiñega.

²⁹ Ie jira Pilato jino bite. Naimacimo jicanote:

—¿Ñie isoide rafue muidona llogidotomoi?

³⁰ Uai otimaci:

—Bimie marañede rafue finoñedena, o dine naimiena atiñedicaí.

³¹ Pilato llote:

—Naimiena uiño. Omoi einamaci llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —llotimaci.

³² Navui Jesúdi: “Cuenta cruzmo coraitimaci” llote. Naie llucino jai suisaide.

³³ Pilato fo abido jaillano, Jesúna uaiduano, naimiemo llote:

—Judíuai illaíma raillamiedio.

³⁴ Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

³⁵ Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci.
Jusiñamui diga nanoca ñairaini cuemo jiai fecadimaci. ¿Ñie isoide marañede rafuena
finodio?

³⁶ Jesús uai ote:

—Eniruemo cominina sedañedicue. Judíuai illaicomini cuenta gaitañellena, eniruemo
cominina sedadicuedena, cue comini cue facaina fuiridimaci.

³⁷ Pilato uai ote:

—Ie jira odi illaimadio.

Jesús uai ote:

—Jaca railla. Uanaicino lollena, jeicigacue. Nana uanaicinona jitaídino cue llua
cacadimaci.

³⁸ Pilatodi Jesús uaina uaitajamona, raite:

—¿Ñie uai naidi uaina?

Ie mei dane jino billano, cominimo llote:

—Jaca nicino naimiemo iñede.

Jesúna coraiacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo
jicanuaibisoidomoi. Bie año omoi jitaia, omoi illaíma raillamiena marena oretaiticue.

⁴⁰ Comini dinena cuiriidimaci:

—Dama ite. Bimiena jitaíñedicaí. Barrabásna cárcelmona marena jino oreta. —Iese
cურიidimaci. Barrabásdi firiraíma.

19

¹ Ie mei Pilato Jesúna oni uillanona, naimiena sechedotade.

² Jifanodosillena, soldaduai eecuaímona finoca nuiciraina naimie ifogimo jítadimaci.
Jiduirede iniroina jítatajano raitimaci:

³ —Judíuai illaimadio. —Iemei ie uiecona bucoídimaci.

⁴ Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

⁵ Ie facaise Jesús jino bite. Eecuaimona finoca nuiciraina jitaca. Jiduirede iniroina jitaca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaicomini diga, naimiena ciuano, cuiiriidimaci:

—Naimiena corai.

Pilato llote:

—Naimiemo nicinodi iñede; ia oni uillanona, naimiena omoi corai.

⁷ Uai otimaci:

—Moisés micori jaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caimona naimiedi marañede rafue jai finode.

⁸ “Naimiedi Jusiñamui Jito” comini raillana Pilato cacajano, eo jacinaite.

⁹ Jesúsna dane fo uite. Jesúsdi Jusiñamui Jitona naimie raise uiñollena, Jesúsno jicanote:

—¿Ninena bitio?

Jesús uai oñede.

¹⁰ Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baifemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiiriisite:

—Bimie o jino marena oretaia, cai nanoca illaima ie nabaiñedio. “Illaamadique” Jesús lluamona, cai nanoca illaima dibeimo naimiedi iñede. Cai nanoca illaimadi César.

¹³ Comini lluaana cacajano, Pilato Jesúsna jino atide. Ie cominimo lloranomo raide. Naie illano nofinina mameciredede. Judíuai uaido Gabatana mameciredede.

¹⁴ Pascua rafue guilla finoraruijoma naidai illanona, Pilato dinena llote:

—Jadi, omoi illaima.

¹⁵ Iemona cominidi cuiiriisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaimana coraiticue?

Jusiñamui diga nanoca ñairaini uai otimaci:

—Cai illaimadi César. Jiaie illaimadi caimo iñede. Jaca dallaimade cai illaimadi.

¹⁶ Ie mei Pilato naimacimo naimiena fecade, coraillena.

Jesúna coraiacana rafue

(Mt 27.32-56; Mr 15.21-41; Lc 23.26-49)

Pilato llua jira, Jesúsna uitimaci coraillena.

¹⁷ Jesúsdi ie cruzna rocaicaida sonode. Ifocoraina eruaila mameciredede illanomo jaidimaci. Judíuai uaido naie illano Gólgotana mameciredede.

¹⁸ Nainomo naimiena coraidimaci. Naimie abimo menamie coraica. Damie Jesús nabeimo. Jiaimie jarifebeimo.

¹⁹ Cruzmo jonellena, Pilato rabricimo cuetatate: “Nazaret ie Jesús. Judíuai Illaima”.

²⁰ Judíuai uaido cuega. Romanos comini uaido jiai cuega. Griego uaido jiai cuega. Jesús coraiano Jerusalén ianori illa jira, ailluena comini iena cioidimaci.

²¹ Iena ciuamona, naie rabricina meidollena, Jusiñamui diga nanoca ñairaini Pilatomo llotimaci:

—“Judíuai Illaima” raillano jai cuetatatio. Iena meiduana jitaidicai. Bimie dinena raisoide: “Judíuai Illaamadique” raillanona, o cuetatajana jitaidicai

²² Pilato uai ote:

—Jai cuetataticue. Jiaie rabricimo dane cuetatañeiticue.

²³ Jesúna coraia mei, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi.

²⁴ Ie jira dani coniniri ñaitimaci:

—Bie camisa cuaranoñeiticai, dani cai fecallena. Mai. Conima jabomaiticai, iena ollena. —Iese finuano Jusiñamuina lloaíma micori ciegafuiai suide. Jaiie cueba: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite.

²⁶ Jesús ie eina ciode. Cuenaiñaiño ecimo jiai ciode. Cuenaiñaiño gaide. Ie jira ie eimo llote:

—Jai, o jito isoi itimie anamo iitio.

²⁷ Cuemo llote:

—Jai, o ei isoidiñaiño anamo iitio.

Naie dacaiño naiñaiño cue jofomo uillanona, naiñaiño sedadice.

²⁸ Ie mei Jesús nana rafue jai fuillana uinuano, llote:

—Jiroacadicue. —Iese lluanona, Jusiñamuina lloaíma micori jaiie ciegafuiai jai suide.

²⁹ Nainomo llerojimo vino ite. Radosimo fibecode rana joniano, vinomo faite. Iemei Jesúmo fecade jaronollena.

³⁰ Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitadacaida, fiodaite.

Jesús sida diga ducia rafue

³¹ Pascua railla rafue guille finuarui illa jira, judíuai illaicomini Pilato dine jaidimaci. Raie fiodaillena, coraicano idaiaina uellullena naimiemo jicanuaidimaci. Sábado rafue ie nairui nia illanona, sábadorui jai raie taíneacana jira, coraicano cruzmo sábadoruimo illana jitaiñedimaci.

³² Soldaduai jaillano, Jesús ecimo coraica iaímaiaí idaiaina uellude.

³³ Jesús dine billano, naimie jai fiodaillana cioidimaci. Ie jira naimie idaiaina uelluñedimaci;

³⁴ iadedi daje soldado Jesús ciraigiconi sida diga ducide. Naifo diaide. Naifomona jinui jiai bite.

³⁵ Nana iena cioidice. Uanai llotice. Omoi inollena, iena llotice.

³⁶ Soldaduai iese finuamona, jaiie ciegafuiai jai suide. Jaiie Jesúna cueba: “Naimie illaicina tainoñeiticaci”.

³⁷ Jiai jaiie cueba: “Judíuai dinena naimaci ducitagamiemo ico eruaitimaci”.

Noñici ifomo Jesús raia rafue

(Mt 27.57-61; Mr 15.42-47; Lc 23.50-56)

³⁸ Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicomina naimie jaciruillanona, Jesúna bainino inote.

³⁹ Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite.

⁴⁰ José, Nicodemo diga, Jesús abina useroina ferinotiaímaiaí. Naimaci comini finouilla isoi, naie siorede radi iniroimo jonega.

⁴¹ Amenaiaí iaie illanomo Jesúsdi coraica. Nainomo noñici ie raiafodi ite. Nia buna naifomo raíñenafo.

⁴² Naifo iaire illa jira, sábadorui jai riacana jira, jiaie raiafo jenollena abi juanina jira, nainomo naimiena jonetiaimaia. Nofici diga raiafo raise ibaila mei, jofomo jaidiaimaia.

20

Fiodaillamona, Jesús jillua rafue
(Mt 28.1-10; Mr 16.1-8; Lc 24.1-12)

¹ Domingo jitiramo nia monañenia, raiafomo María Magdalena jaide. Raiafo ibaila nofici oni joillana cide. Jesús abina cioñede.

² Ie jira aisicana Pedrona jenuaide. Cuenajia jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiñoñedicue.

³ Ie mei raiafomo jaidicoco.

⁴ Aisicana jaidicoco; iadedi riire cue aisicana jailla jira, nano ridicue.

⁵ Ana bitadacaida, fo erodaticuemo, useroi joillana ciodicue; iadedi fo jaiñedicue.

⁶ Ie mei Simón Pedro rillano, fo jaide. Useroi joillana jia cide.

⁷ Ie ifogimo ferinoga iniroi eneno illana cide. Raise nacuana cide.

⁸ Iemei jia fo jaidicue. Iniroina ciuamona, Jesús jai jilluana inoticue.

⁹ Jaiie ciegafuia llote: “Fiodaillamona jilloite”. Naie ciegafuiaina como raise inoticoco.

¹⁰ Ie mei jofomo jaidicoco.

María Magdalenamo Jesús bairia rafue
(Mr 16.9-11)

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo,

¹² Jusiñamuimona mena jaienici jai billana cide. Userede iniroi jitadiaimaia. Jesúna navui jonianomo ana raidiaimaia. Damie ifogi dibeimo raide. Jiamie eilli dibeimo raide.

¹³ Naiñaiño jicanotiaimaia:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine erocaillanona, Jesúna cide; iadedi naimiena uiñoñede.

¹⁵ Naiñaiño comecina facade; “Naimiedi bie illano sedaraima”. Jesús naiñaiño jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboni! —Naie uai oni dobaiñuamona: “Llofueraima”.

¹⁷ Jesús uai ote:

—Cuenalinoñoeno cuena faicai. Cue Moo dine nia a jaiñedicue. Cue amatia dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jia omoi Moo. Jia omoi Jusiñamui.

¹⁸ Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiño lluaana llote.

Jesús ie llofueoicaiganomo bairia rafue
(Mt 28.16-20; Mr 16.14-18; Lc 24.36-49)

19 Domingo naio Jesús llofueoicaiganodicaí jofomo ofidicaí. Judíuaí illaicominina caí jaciruillamona, nasiaí nana caí ibaica. Nase econoñeno ieconi Jesús caí motomo billanona, caína uaiduano, llote:

—Uri omoi i.

20 Ie onollina acatate. Ie ciraigina jiaí acatate. Cai Namana jai caí ciuari eo iobidicaí.

21 Jesús dane llote:

—Uri omoi i. Cue Moo cuena oretaja isoi cue rafuena llollena, omoína oretaiticue.

22 Ie facaise caína firaiñuanona, raite:

—Jusiñamui Joreñona omoi feiñuana jitaídicaí.

23 “O jeacina jai dotade” bumo omoi lloia, Jusiñamui jai dotaca. “O jeacina nia dotañede” bumo omoi lloia, Jusiñamui nia dotañega.

24 Naie naio Tomásna mameciredede llofueoicaigamie caí diga iñede. Dídimona jiaí mameciredede. Naimiedi gorasa.

25 Naimiemo lloticaí:

—Cai Namana ailli ciodicaí.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ñnoñeiticue.

Jesús ie llofueoicaiganomo dane bairia rafue

26 Ocho digarui illanona, Jesús llofueoicaiganodicaí dane ofillano, Tomás caí diga ite. Nana nasiaí ibaica; iadedi nase econoñeno ieconi Jesús caí motomo dane fo billano, uaiduano, llote:

—Uri omoi i.

27 Iemei Tomásno llote:

—Eroda cue onollimo. Naifo jeta. Ciraigi ifona jiaí jeta. ñnoñeno jaiñeno. Mai ñno.

28 Tomás uai ote:

—Cue Namadio. Cue Jusiñamuidio.

29 Jesús dane uai ote:

—Cuena o cúa jira, cuena ñnotio; iadedi cuena cioñedino cuena ñnoia, jiaí caimare iitimaci.

30 Jesús diga siño rafuena finode. Iena ciodicaí. Nana naie rafuena bie rabenicomo cueñedicue;

31 iadedi dajerie cueticue. Jesús caí Jilloitaraímana omoi ñnollena, iena cueticue. Naimiedi Jusiñamui Jitona omoi ñnollena, iena jiaí cueticue. Naimiena omoi ñnuano, naimie diga jaca iitomoí.

21

Jesús ie llofueoicaiganomo ane bairia rafue

1 Diga irui illanona, Tiberiana mameciredede jorai fuemo Jesús ie llofueoicaiganodicaímo dane bairede.

2 Nainomo diese iticaí: Simón Pedro, Tomás, Natanael, cue ama Jacobo, cue, jiaíe iaímaiaí. Tomás mameci jiaícidí Dídimó. Natanael Galilea ie Caná nairaí imie.

3 Simón Pedro caímo llote:

—Lloji faiaíticue.

Naimie uai oticaí:

—O diga jaiticaí. —Iese raillano, botemo jaidicaí. Namona naio llojina faíticaí; ia jaca buena oñedicaí.

4 Monaiacademo, Jesús jorai fuemo bite; iadedi naimiena uiñoñedicaí.

5 Jesús caímo jicanote:

—Caimaci, ¿nie diese lliciaína jai otomoí?

Uai oticaí:

—Jaca oñedicaí.

⁶ Naimie dane uai ote:

—Omoi bote nabei dine omoi lloijina faino.

Ie jira faiticai. Ailluena lliciai naiemo jilla jira, a aiñonidicai.

⁷ Iena ciuamona, Pedromo lloticue:

—Cai motomo cai Namadi ite.

Pedro iena cacajano, naimie taimiena jira, ie iniroi jitade. Jesús dine naimie raire rillena, joraimo daiade;

⁸ iadedi botedo biticai. Enirue iaire illa jira, na lliciaimo sonocana, lloijina atidicai. Nibai cien metros oni ite.

⁹ Jorai fuemo cai ria, coocimona bonoca iraina ciodicai. Lliciai iraimo ruica jai ite. Llomenico jiai ite.

¹⁰ Jesús caimo llote:

—Omoi oga lliciaimona janore ati.

¹¹ Ie jira Simón Pedro botemo jaillano, lloijina llinuanona, eniruemo ari sonode. Ciento cincuenta y tres jemierie jitaticai. Ailluena ite; iadedi lloiji cuarariñede.

¹² Jesús llote:

—Mai guisaibi. —Jesúna cai uiñua jira: “¿Budío?” jaca buna raiñena.

¹³ Jesúsdi llomenico diga lliciaina caina ecade.

¹⁴ Fiodaillamona jillua facaisemona dacaiño amani caimo Jesús jai abina bairetate.

Jesús Pedro diga ñaia rafue

¹⁵ Guilla mei, Jesús Simón Pedromo llote:

—Simón, odi Juan jitodio. —Jiai jicante— ¿Nana o nabaiñiai baifemo cuena isiruitio?

Simón uai ote:

—Jii, Nama, ona cue isiruillana uiñotio.

Jesús uai ote:

—Toica llaudaiai uruiaina omoi raise sedaja isoi, cuena inotinona raise seda. Naimacina cue rafuena raise llofue.

¹⁶ Dane llote:

—Simón, odi Juan jitodio. —Dane jicante— ¿Cuenta isiruitio?

Simón uai ote:

—Jii, Nama, ona cue isiruillana uiñotio.

Jesús dinena uai ote:

—Toica llaudaiai uruiaina omoi raise sedaja isoi, cuena inotinona seda.

¹⁷ Dane jicante:

—Simón, ¿cuenta isiruitio? —Jesús naimiemo dane jicanua jira, “Jesús cue uaina inoñede” raillanona, Pedro comeci sunaite.

Uai ote:

—Nama, naga rafuena uiñotio. Ona cue isiruillana uiñotio.

Jesús uai ote:

—Toica llaudaiai uruiaina omoi raise sedaja isoi, cuena inotinona seda.

¹⁸ Daje rafue omo nia lloticue. O nia conirue facai o iniroi dama jitadio. Ie mei o jitaillanomo jaidio. O uaciroma facaiseconi o onolli oni ñuitaitio. Ie mei jiamie o iniroi ona jitajano, o jitañenanomo ona uite. Cue llwana inocana o jai.

¹⁹ Fiodaillena Pedro uiñollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicaigaimemo llua rafue

²⁰ Pedro diga Jesús nia ñaia facaise, Pedro dobaicaillanona, cuena ciode. Iaimaiai jinafona racadicue. Jesús gaiaimedicue. Navui cai guia, Jesús nia fiodañenia, Jesús abimo cue ia, Jesúsdi jicantocue: “¿Bu gaitatallio?”

²¹ “Cuenta ñnotinona seda” Pedromo Jesús llua mei, Pedro dobaicaillanona, cuenta ciuano, Jesús mo jicane:

—Nama, ¿ñiese naimie fodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue llua ñnocana o jai.

²³ Ie jira creyentia ñaie llua fidiano cuenta raitimaci:

—Naimie fodañeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena ciuano lloticue. Iena cueticue. Uanaicinuana cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, ñaie libros eenollena. Mai. Juandicue.

JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o dine, ¿nigacino? ¿Nie isoidio? Omo jiaie rabe birui dane oretaiacadicue. Lucadicue. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue.

² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci.

³ Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui díbeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi.

⁵ Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreñona feiñoitomoí —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micori cai usumatiai micoriai jaie sedaja isoi?

⁷ Naimie uai ote:

—Naie rafue suille facaiseconi jaca uiñoñeitomoí. Naimie siñona illamona, dama cue Moo naie rafue suilliruina uiñote;

⁸ Iadedi cue Moo ie Joreñona omoi feiñua mei, siño uai omoimo iite. Ie jira Jerusalémo cuena lloitomoí. Judeamo, Samariamo, ua nana eniruemo ite nairaimo lloitomoí —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede.

¹⁰ Monamo nia eruidemo, ieconi naimaci dine Jusiñamui jaienici, mena ima bairia isoi, bairidiaimaiai. Naie iaimaiai iniroi userede.

¹¹ Raitiaimaiai:

—Galileo imaci, ¿bue ñellena monamo eruidomoí? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaiai.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci.

¹³ Rillano imaci cuartomo jaidimaci. A díbebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Dese nainomo itimaci.

¹⁴ Naimaci jitaillamona, Jusiñamuimo jillena, nagarui danomo ofidimaci. Jillena, jiaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

¹⁵ Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

¹⁶ —Amatai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cuega. Iena uiñoticaí. Judas micorina uiñoticaí. Naimie Jesúsna gaitadinona ifode.

¹⁷ Naimiedi da cai llofueoicaigano imie. Cai diga maijuide.

¹⁸ Ie maraiñoeno finoca rafuemonu ucubena feiñua mei, ie comeci iuaina meiduanona, naie ucubena oni judaide. Judíuai illacomini naie ucube diga eniruena ibadimaci. Nainomo Judas micori ie cimaio cuinajanona, ie abina dama meinete. Rifaillamona, ana uaillamona, ie jebegi boficaillamona, nana ie jebegi jino uaide.

¹⁹ Nana Jerusalémo itino iena fididimaci. Ie jira cai uaido naie enirue mameciredo Acéldama. Oni dobaiñuamona dirue toillanie.

²⁰ Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jiaimie mo iite.

Iese cuega.

²¹⁻²² Ie jira cai diga itinomona damiena fetoticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisezona, Jesús monamo caimona jaillarui facaiseconi, naimaci cai diga jiai itimaci. Naimacimona damiena fetoticaí, Jesús jilluana cai diga lollena. —Iese Pedro raite.

²³ Ie mei mena iimana fetodimaci. Damiedi José Barsabas. Jiaici mameci Justo. Jiaimiedi Matías.

²⁴ Ie mei Jusiñamuimo jidimaci:

—Nama, nana comini imaci comeciaina uiñotio. ¿Nie iimana jitaideo? Caina uiñota.

²⁵ Naimiedi Judas ifo meidoite. Jesús ie oretagamiena naimie jaillamona, cai diga maijjite. Ie fiodaillamona Judas micori ie maijiana jai faionocaide —jidimaci.

²⁶ Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreño feiñua rafue

¹ Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite.

² Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiai cacadimaci.

³ Iena naimacimo bairedo. Iena cioidimaci. Irai boua isoi eruaide. Nana naimacimo baite.

⁴ Iese Jusiñamui Joreño feiñotimaci. Nana naimaci comeciaina namatade. Iemei diga nairai uaillaido ñaitimaci, Jusiñamui Joreño naimacina ñaitatajamona. Naimaci ñaia uaillaina uiñoñedimaci.

⁵ Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamona bitimaci.

⁶ Creyentiaí ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci.

⁷ Eo rajicaidimaci. Coninimo jicanotimaci:

—¿Buta ñaite? Nana Galileos imaci.

⁸ ¿Niese naimacina cacadicaí? Cai uaido dajerie ñaiana cacadicaí —raitimaci.

⁹ Diga comini imiaia itimaci: Partos, Medos, Elamitas, Mesapotamia imaci, Judea imaci, Capadocia imaci, Ponto imaci, Asia imaci,

¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jia itimaci.

¹¹ Judíuai itimaci. Judíuaiñedino jia itimaci. Judíuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

¹² Nana eo raijicaidimaci. Danirie jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñiaia naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue llamo cacarei. Naie rafuena lloiticue.

¹⁵ Omoi comeciaina omoi facaja isoi, jifaiñedicaí. Jitoma nia furi daidemo, bu jaca jifairainina.

¹⁶ Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caimo jai suide.

¹⁷ Llote:

Jusiñamui caimo llote: “Jiairuido bie rafue suite.

Cue Joreña diga cominimo fecajiticue.

Iedo omoi uruiaie cue llana lloiticue.

Iemona omoi coniruiaina nicairitaiticue.

Iemona omoi einamacina jia nicairitaiticue.

¹⁸ Ua nana cuena sedadinomo cue Joreña fecajiticue.

Naimaci cue llana lloiticue.

¹⁹ Monamo eo jacirede rafuena ico suiñotaiticue.

Eniruemo eo jacirede rafuena ico jia suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaiticue” Jusiñamui llote.

Ie Joreño caimo birui illamona, Joel micori llogacino jai suide.

²² Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uñotomoi.

²³ Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomoi. Jusiñamuina ñoñedina naimiena meinetadomoi;

²⁴ iadedi fodaillamona naimiena Jusiñamui jillotajano, legi ie cacajamona naimie jillobide. Naimie fodaite; iadedi fodaillamona nainomo iñoñede.

²⁵ David micori naimiena jaie llote:

Jusiñamui cue diga jaca illana uñoticue.

Cue ecimo naimie ite, cue comecina ocuiñotallena.

²⁶ Ie jira cue comeci caimare ite. Eo iobidicue.

Cue marena illemo jai jia ocuiridicue,

²⁷ raiafomo cue joreña naimie fañonocaiñena jira,

ie mare Jito abi rifaillana naimie jitañena jira.

²⁸ Naimie cuena jilloitallena uñoticue.

Cue diga naimie illa jira, cue comeci caimare iite.

²⁹ Caimaci, cai usuma David micorina marefodo ñaiticue. David micori ñaia, dama naimie facaina ñañede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticaí.

³⁰ Ie ia David micori Jusiñamui rafuena llote. Naimie micoridi Jusiñamui naimiemo uanaicinona lluaña uiñote. Jaie Jusiñamui naimiemo llote: “O uruiaimona damie illaimana illanona, ie cominina sedajite” llote.

³¹ Cristona ñaite. David micori nia suiñede rafuena llote. Naimie micori Cristo jilloillena llote: “Raiafo Jusiñamui fiodaillanomo Cristo Joreño fañonocaiñeite. Cristo abi rifaiñeite” llote.

³² Jesúna ñaite. Jusiñamui Jesúna jai jillotate. Nana cai iena ciodicai. Ie jira iena lloticaí.

³³ Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi.

³⁴ Naimie abi monamo jaiñena jira, David micori dama naimie facaina ñañede; ia Cristona ñaite. Ero, jaie David micori raite: Jusiñamui Cristomo llote: “Cue ecimo ana raí.

³⁵ Ona ñnoñedinona o anamo itataiticue” raite. David micori llua isoi, birui jai suide.

³⁶ Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai jilloitaraimana jai itatate. Nana judíuai comini naiena uiñuana jitaídicue.

³⁷ Pedro lluaña cacajano, naimaci comeciáimo riire baite. Pedromo iena jicanotimaci. Ie nabaiñaiáimo jiai jicanotimaci:

—Caimaci, o lluaña jai cacadicaí. ¿Bue finoiticaí?

³⁸ Pedro uai ote:

—Omoi comeciáí iuaina meido. Iemei Jusiñamui omoi ite jeacinuaina dotajite. Jesucristo facaina omoi bautizallomoi. Jusiñamui Joreñoña jiai feiñoitomoi.

³⁹ Omoi ite Joreño fecallena navui llote. Omoi uruiaimo jiai fecaite. Jiaie nairaiái itinomo jiai fecaite. Ua nana Jusiñamui fetocanomo jiai fecaite.

⁴⁰ Diga uai naimacimo Pedro llote. Raite:

—Ailluena comini marañede rafuena birui finocana jaidimaci. Faifitimaci. Naimaci isoi jaiñeno; iadedi cue lluaña omoi cacajamona, iena ñno.

⁴¹ Diga comini ie lloga uaina feiñuano, bautizadimaci. Nairuido nibai tres mil comini creyentiaina jaidimaci.

⁴² Cristo oretagano llofuiana fueuidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

Cristona ñnotino illa rafue

⁴³ Cristo oretaganodi diga siño rafuena finuamona, nana comini jacinaitimaci.

⁴⁴ Nana creyentiái damacina itimaci. Naimaci raruiái coninimo fecauuidimaci.

⁴⁵ Dueredino ia, naimacina canollena, raruiáiredino naimaci raruiaina vendedimaci. Iemei naie ucube dueredinomo fecadimaci.

⁴⁶ Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauuidimaci. Nainomo danomo guillanona, Jesús fiodaillana comeciuidimaci. Caimare imaci comeciái illamona, caidiñeno guisoidimaci.

⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

3

Jusiñamui jofomo Pedro lluaçino

¹ Jusiñamui jofomo jiaa facaise Pedro iaiaiaia Juan diga jaide. Jitoma ana ia, comini jiiuidimaci.

² Iaímaiaí jaillanomo jiaíe comíni tísitaitimíena atiana ciódiaímaiaí. Tísitaitimíena naimíe jaca jeicíga. Naimíena nagarui atiano, Jusiñamui jofo ie ebiredena raila nase fuemo rainaudimaci. Nainomo naimíena rainaudimaci, fo jaidinomona ucube jicallena.

³ Iaímaiaí fo jaiacania, ucube jicallena, ie onolli ñuitade.

⁴ Iaímaiaí naimíemo eruaillano, Pedro raite:

—Cocomo eruai.

⁵ Ie jira iaímaiaímo eruaíde. Ra feiñoitena, ocianona sedade.

⁶ Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

⁷ Pedro naimíe onollido llinuano, a naidanete. Ieconí naimíe eillidi jillode. Ie taisicoñuai jiaí jillode.

⁸ Daiacaillanona naidacaide. Macarillanona, iaímaiaí díga fo jaide. Jusiñamuimo iobillacínona fecajano, daiacaillanona macarite.

⁹ Nana comíni naimíe macarillana ciódimaci. Naimíe iobillacínona fecajana jiaí cacadimaci.

¹⁰ Naimíe nase fuemo ana raisoilla jira, naimíena uiñotimaci. Naimíemo jai suide rafuena eo rajicaidimaci.

¹¹ Naimíedi Pedro iaímaiaí Juan díga nia llinuano, naimaci díne Salomón micorí finotaga jofo abi ibirímo comíni aisídímaci. Rajicaidimaci.

¹² Iena ciuano, Pedro naimacína raite:

—Caimaci, ¿bue ñellena biemo rajicaidomoi? ¿Bue ñellena caímo iese eruaídomoi? “Daiamaiaí iaímaiaí uaido naimíena jilloitate” raillanona cocomo eruaídomoi.

¹³ Iena finoñedicoco; iadedi Jusiñamui iena finuano, ie Jito Jesúna iobitade. Cai usumatiaí micoriaí, Abraham, Isaac, Jacob, ua nana cai usumatiaí micoriaí bie Jusiñamuina sedadimaci; iadedi Jesúna birui fecadomoi, coraillena. Pilato naimíena jino marena oretaiacana jira, Pilato ecimo naimíena llogídotomoi.

¹⁴ Mareuidimíena jitaiñedomoi; iadedi come fatimíena cárcelmona jino billana jitaídomoi. Barrabás raillamíena jitaídomoi.

¹⁵ Jusiñamui díbeimo caína itatatimíena meinetomoi. Naimíe fiodaite; ia Jusiñamui naimíena jillotate. Iena ciódicoco. Ie jira iena lloticoco.

¹⁶ Tísitaitimíe jilluana jai ciódomoi. Naimíena uiñotomoi. Jesúna naimíe ñnua jira, Jesús naimíena maíritate. Naimíena raise jillotate. Iena jai ciódomoi.

¹⁷ Caimaci, ero, omoi finoca rafuena abina uiñoñoeno finodomoi. Omoi illaicomíni jiaí daje isoi finodimaci.

¹⁸ Jaie Jusiñamuidi ie facaina llorainina jiaíruido suille rafuena llotatate. Naimacína Cristo legi cacajana llotatate. Birui naie llogacino suide.

¹⁹ Omoi comeciaí iuaillaí meido. Jusiñamui díbeimo omoi comeciaína meido. Iemei Jusiñamui omoi jeacínona dotaite. Iena jaca feitaite.

²⁰ Omoi uri illa facaise illena, Jusiñamui omoi díga illena, iena fino. Jusiñamui Jesucristona omoi díne dane oretallena, iena fino. Naimíedi omoi jilloitaraima.

²¹ Jusiñamui facaina lloraini micoriaí jaie lloga rafue suille dínorí monamo naimíe fiebiite. Jaie Jusiñamuidi ie mare lloraini micoriaí uaido buena llote.

²² Moisés micorí raite: “Omoi comínimona naimíe rafue lloraimana jaillena, cai Nama Jusiñamui cue isoi damíena fetoite. Nana naimíe omoímo llwana cacarei.

²³ Bie lloraimana bu cacarefiñenia, Jusiñamui naimíena duere finoite. Iemona faífite”.

²⁴ Nana Jusiñamui ie lloraini micoriaídi birui suille rafuena llotimaci. Samuel micorí illa facaisemona naimaci buena llotimaci.

²⁵ Jusiñamuidi cai usumatiai micoriaimo rafuena llote; ia bie rafue birui omoimo jiai duide. Jusiñamui Abraham micorimo jaie llote: “Nana cominidi o uruiai muidona caimare iitimaci”.

²⁶ Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona fañonocaitallena, omoi dine naimiena nano jai oretate.

4

Cristo oretagamaiai llaicomini motomo illa rafue

¹ Comini diga Pedro iamaiai Juan diga ñaia facaise, Jusiñamui diga ñairainidi naie iamaiai dine bitimaci. Jusiñamui jofona sedaraini illaia diga, saduceuai railla comini diga jiai bitimaci.

² Fiodaillamona Jesús jai jilluana llofuetiaiaiai. Cominina iamaiai llofuia jira, naie iamaiai diga iciritimaci.

³ Iamaiaina gaitajanona, jai navuilla jira, cárcelmo jonetimaci, ie jitiramo naie rafuena siadollena.

⁴ Iese suide; ia Pedro llogacinona cacadinomona ailluena comini naiena inotimaci. Cinco mil digamie creyentiaina jai itimaci.

⁵ Icoiti Jerusalémo nana judíuai illaicomini siadollena ofidimaci.

⁶ Anás jiai bite. Naimiedi Jusiñamui diga nanoca ñairaia. Caifás bite. Juan bite. Alejandro jiai bite. Nana Jusiñamui diga nanoca ñairaia cominidi ofidimaci.

⁷ Naimaci motomo Pedro iamaiai Juan diga atianona, iamaiaimo jicanotimaci:

—¿Bu uai diga buena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue.

⁹ Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi.

¹⁰ Jesucristo uai diga jillode. Omoi buena uiñuana, ua nana judíuai comini buena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tisitaitimie jai benoconi naidaillana ciodomoi.

¹¹ Omoi jofo finoraini isoidomoi. Omoi jitaiñede noficidi jiaie nofici baifemo jai jaide. Jesúsdi naie nofici isoide. Naimie rafuena omoi jitaiñena jira, naimiena meinetomoi.

¹² Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

¹³ Jaciruiñeno marefodo llofuetiaiaiai. Nainomo itino iena cacajano, comecina facadimaci: “Abina uiñoñediaiaiai. Jamai bue isoidiaiaiai”. Ie jira rajicaidimaci; iadedi Jesús llofueoicaigaiaiaiaina illana uiñotimaci.

¹⁴ Jilloitagamie iamaiai diga naidaillana ciodimaci. Ie jira naimaci uai iñede.

¹⁵ Naie rafuena siadollena, naie illaicomini iamaiaina bai oredimaci.

¹⁶ Coninimo jicanotimaci:

—¿Niese naie iamaiaina nibaiticai? Nana Jerusalémo itino iamaiai siño rafuena finuana jai fididimaci. Iena janonidicai.

¹⁷ Jiaie comini iena fidi raillano, Jesús rafuena iamaiai llofuiana rairuiticai.

¹⁸ Ie mei iamaiaina naimaci dine dane uaidotimaci. Iamaiaimo Jesús rafuena llofueñellena riire llotimaci.

¹⁹ Pedro iamaiai Juan diga naimaci uai ote:

—Ie rafuena coco lollena Jusiñamui jitaide. Omoi uaina coco inoia, Jusiñamui jitailla rafuena finoñeticoco. Cocomo llono. ¿Bu uaina inoiticoco? ¿Jusiñamui? ¿Omoi? Cocomo iese llono.

²⁰ Daiaiaiai coco ciua rafuena lloticoco. Daiaiaiai coco cacaja rafuena lloticoco —raite.

²¹ Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira.

²² Jai jillodimiemo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiacino

²³ Iaimaii jino jailla mei, iaimaii nabaiñiai dine jaidiaimaiai. Illaicomini iaimaiaimo lluaana llotiaimaiai.

²⁴ Naimaci iena cacajano, Jusiñamuimo damie llua isoi jidimaci:

—Ore Moo, mona finodio. Eniruena finodio. Monailaina finodio. Nana naiemo ite rana jiai finodio.

²⁵ Cai usuma David micorina raise uiñotica. Naimiedi ona sedadimie. Naimiena bie rafuena o Joreño jaie llotatajamona, naimie llote:

¿Bue ñellena Jusiñamui diga judíuaiñedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Illaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jiai iñedimaci

llote.

²⁷ Naie rafue birui bene suide. Bie nairaimo Herodedi, Poncio Pilato diga, judíuaiñedino diga, judíuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci.

²⁸ Naimaci ofillamona, nana o jitaille rafuedi, o jaie lloga rafue diga, jai suide.

²⁹ Nama naimaci jaciruitajacinona jai uiñotio. Cai comeciaina ocuiñota, o rafuena jacitaiñeno cai lollesa.

³⁰ Duidinona jilloita. O mare Jito Jesús uaido caina siño rafuena finota —jidimaci.

³¹ Jusiñamuimo jiacino fuilla meinoconi, naimaci ofiracodi jaidisite. Jusiñamui Joreño nagamiai comecimo namatade. Iemona Jusiñamui uai jacitaiñeno llocana jaidimaci.

Creyentiai damacina illa rafue

³² Nana creyentiai damacina itimaci. Naimacimo rarui ia, dajena naimacimo duide.

³³ Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

³⁴ Naimaci dine buna buena jaca jitañedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona,

³⁵ Cristo oretaganomo fecadimaci. Ie mei dueredinomo imaci jitailla isoi fecauidimaci.

³⁶ Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie.

³⁷ Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaimaii eniruena jiai fecade. Ie ai mamecidi Safira.

² Naie iba naimiemo dabei fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona.

³ Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niесе Таife o comecimo namatade? Jusiñamui Joreñomo taino llotio, dabei ucube omo fiebilla jira.

⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina marañeno facadio? Cominimo taino llotio. Jusiñamuimo tainona jiai llotio.

⁵ Ananías bie uaina cacajano ieconi fiodaillamona oni caide. Nana iena ciolino eo jacinaitimaci.

⁶ Iemei nainomo ite conirueniai naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uiñoño bite.

⁸ Pedro naiñaiño mo jicanote:

—¿Ñie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreñoña jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

¹⁰ Naimie ecimo ieconi naiñaiño fiodaillamona, oni caide. Conirueniai fo billano, naiñaiño fiodaillana ciolidimaci. Jino uillano, ie ini abimo dafomo jonetimaci.

¹¹ Iena fidiamona, nana creyetiai eo jacinaitimaci. Nana bie rafuena fididinodi jiai eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finoidimaci. Naie facaise nana naimacidi Jusiñamui jofomo Salomón micori finotaga jofa abi ibirimo ofisoidimaci.

¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyentiaina ailluena comini jaidimaci. Ailluena iñiai, ailluena riñoniai, diese creyentiaina jaidimaci.

¹⁵ Imaci biramo duidinona jonecaida, naisomo atidimaci. Pedro nainomo macarillano, o llotia naimie joreño naimacimo ibaillamona, “Jillobiticai” raillano, atidimaci.

¹⁶ Jerusalémo ie fuemo ite nairaiaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoidimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci.

¹⁸ Eo uradoillamona, Cristo oretaganona gaitajano, cárcelmo jonetimaci.

¹⁹ Naiona Jusiñamui jaienicidi cárcel nasena econote. Cristo oretagano jino atiano, naimacina raite:

²⁰ —Jusiñamui jofomo mai abido jai. Cominimo Jusiñamui dine naimaci ille rafuena llono.

²¹ Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiaina oretate, Cristo oretaganona atillena.

²² Cárcelmo jaidemo, naimacina cioiñedimaci. Abido billanona, llotimaci:

²³ —Cárcel ie nase jaca ibaicana ciodicai. Raise llaveca. Nase fuemo jaca soldaduai itimaci; iadedi econoticaimo, jaca buna cioiñedicai.

²⁴ Jusiñamui jofa nanoca sedaraima, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Ñie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofa nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiaina nofiaido fairinoi raillano.

²⁷ Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

²⁸ —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabilia, “Cai illaicomini Jesúna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina ñnoiacadicai.

³⁰ Cai usumatiai micoriai Jusiñamuina sedauidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei,

³¹ Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judúuai comini comeciai iuai meidollena, naimaci jeacnuai dotallena, iese naimiena itatate.

³² Bie rafuena llofuecabiticai. Jusiñamui Joreño uaido iena jiai llofueticai. Jusiñamuina ñnotinomo Jusiñamuidi ie Joreño jai fecade —raite.

³³ Iena cacajano, illaicomini eo iciritimaci. Cristo oretaganona meineiacadimaci;

³⁴ ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina ñnotimaci. Cristo oretaganona dallu bai oni oretajanona, naimie llote:

³⁵ —Caimaci, omoi bie cominimo omoi finolle rafuemo comeciaina raise faca.

³⁶ Jai Teudas micori illaimana jaiacade. “Jai uaina baitimiedicue” raillano, naimie dibeimo cuatrocientos ññiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide.

³⁷ Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite.

³⁸ Ie jira ja omoimo lloiticue: Bie cominina fañonocai. Jamai cominimona naimaci llogacino iade, jamai cominimona naimaci finuacino iade, ieconi duite.

³⁹ Jusiñamuimona bie rafue ia, jaca ñiese ñibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie llua feñuano,

⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci;

⁴¹ iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci.

⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai jilloitaraima” llofueuidimaci.

6

Creyentiaina canollena, siete digamie diáconuaina illena, fetua rafue

¹ Naie facaise ailluena comini creyentiaina jaidimaci. Uradoillamona griego uaido ñaite comini dinena, judúuai uaido ñaite cominina jeare ñaitimaci. Grieguai feciñuui judúuai feciñuui isoi nagarui rana feñoñena jira, jeare ñaitimaci.

² Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:

—Jusiñamui uaina lollena, ra fecalle diga, abi juanide. Jusiñamui uaina llofuiana cai fañonocaiadedi, marañede. Ra jamai cai fecaiadedi, jiai marañede.

³ Ie jira, amatiai, omoimona siete digamiena fetu. ñnogonona fetu. Jusiñamui Joreño nana comecimo namatadinona fetu. Eo abi uifnotinona fetu. Ie isoide ññiaina fetu. Bie ra fecarainina maijitimaci.

⁴ Ie mei cai abi juarenite, Jusiñamuimo cai jillena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo ñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina ñnote.

⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide.

⁹ Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiáide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci;

¹⁰ Iadedi naimaci uaitalle uaidi ñede. Naimacimo Esteban uai isoidiuidi ñede. Jusiñamuimona ie uaina ua jira, Esteban abina uiñuano ñaite.

¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese llumona, comini comeciaina feidocana jaidimaci. Ilaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci.

¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite.

¹⁴ Naimiedi Jesús bie jofona judaillena llote. Moisés micori caimo llogafuiaí fainonocaillena jiai llote. Iena cacadicaí.

¹⁵ Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

7

Esteban micori abi rídua rafue

¹ Jusiñamui diga nanoca ñairaima Esteban micorimo jicanote:

—¿Ua ie isoi naimaci llucacino ite?

² Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiammo naimie micori nia ia, Harámo naimie micori nia jaiñenia, Jusiñamuidi naimie micorimo bairiano

³ Llote: “O eniruemona mai jai. O cominimona mai jai. Omo cue acatalle eniruemo jaitio”.

⁴ Ie jira Caldea raila eniruemona naimie micori jaide. Harámo rillanona, diga iruillaí nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate.

⁵ Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote; iadedi naie facaise Abraham micori uruenide.

6 Jusiñamui jiaí llote: “O uruiaí jiaíe comini eniruemo jaianiitimaci. Egiptomo jaianiitimaci. Naimacina duere finoitimaci. Cuatrocientos años legi cacajitimaci.

7 Naimacina maijitaite nairaina duere finoiticue. Ie mei o uruiaí naie eniruemona biitimaci. Bie illanomo cuemo iobillacinona fecajitimaci” llote.

8 Ie cominina naimaci jaillena, Jusiñamui Abraham micorimo isaiaí diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaína comuitate. Naimaci micoriaimona cai doce diga nairai comuidimaci.

9 'Caimaci, José micorina Jacob micori uruiaí micoriaí uradoillamona, Egipto cominimo naimiena fecadimaci;

10 iadedi Jusiñamui naimiena eo sedade. Ie legi ie cacajamona naimiena jillotate. Naimiemo uiñoracinona fecade. Ie jira Faraón micori naimiena jiaí gaide. Faraón micoridi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiaí sedatate.

11 Naie facaiseconi nana Egipto comini aime guitimaci. Canaámo Jacob micori illanona, nana nainomo itino diga aime jiaí guite. Eo duere sefuidimaci. Cai usumatiaí micoriaí naimaci illanomo guillena baiñedimaci.

12 Egiptomo guille illana Jacob micori fidiano, guille ollena, nano facaise ie uruiaí micorina nainomo oretate.

13 Ie mei José ie amatiaina naimiena uiñotade. Faraóndi José comini illana fidide.

14 Ie jira Josédi ie moona uaidote. Nana ie cominina uaidote. Setenta y cinco digamie ite.

15 Ie jira Egiptomo Jacob micori jaide. Nainomo fiodaite. Ie uruiaí micoriaí nainomo jiaí fiodaitimaci.

16 Siquem railla nairai illanomo naimaci comini naimaci micoriaína uillano, nofici ie raiafomo jonetimaci. Siquemmo Abraham micori naifona Emmor uruiaí micoriaimona jaie ibade.

17 'Caimaci, Jusiñamui Abraham micorimo lloga rafue suille iaírei illa facaiseconi, Egiptomo cai cominidi eo jebuidimaci. Abraham micorimo: “Egiptomona o uruiaí biitimaci” Jusiñamui jaie llote.

18 Naie facaise jiaíe illaíma Egiptona sedade. José micorina uiñoñede.

19 Ie jira cai cominina jifuiano maijitaude. Uruiaí fiodaillena, naimacina imaci uruiaína faínonocaitate.

20 Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite.

21 Ie mei naimiedi faínonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide.

22 Naimie micori nana Egipto comini uiñuacinona fueote. Illaíma uai isoi naimie uaidi ite. Eo abina uiñotimie.

23 'Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judíuai comini.

24 Egipto imiemona damie legi cacajana ciuano, naimiena riidote. Riiduanona, Moisés micoridi Egipto imiena meinete.

25 Moisés micori comecina facade: “Cue muidona Egiptomona Jusiñamuidi cue cominina oretate”. “Cue comini biena uiñotimaci” raillanona comecina facade; ie iadedi iena uiñoñedimaci.

26 Ie arediruido Moisés micoridi mena come iaímaiaí fuirillana ciode. Iaímaiaína marena itataiacade. Raite: “¿Bue ñellena conimana duere finoacadomico? ¿Bue ñellena o come diga fuiridomico?”

²⁷ Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caimo ona llotatate juez isoi?”

²⁸ ¿Na are Egipto imie o meinia isoi cuena jiai meineiacadío?”

²⁹ Iena cacajano, come fajana naimie llinua jira, jacinaillanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

³⁰ ‘Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede.

³¹ Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote:

³² “O usumatiai imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillamona Moisés micori abi docaide. Jaciruillanona, erodañede.

³³ Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidailanodi eo mareno.

³⁴ Egiptomo cue comini legi cacajana raise cidicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote;

³⁵ iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jil-loitaraimana jiai itatate.

³⁶ Egiptomona Moisés naimacina atide. Egiptomo nia ia, diga siño rafuena finode. Jiairede monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

³⁷ ‘Caimaci, Moisés micoridi cai judíuai cominimo llote: “Omoimona Jusiñamuidi damiena ie rafue lloraimana ico oretaita, naimie cuena oretaja isoi”.

³⁸ Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote;

³⁹ iadedi cai usumatiai micoriai naimiena ñinoiacaiñedimaci. Naimiena jitaiñedimaci. Egiptomo abido jaillemono naimaci comeciiai facadimaci.

⁴⁰ Ie jira comini dinena Aarón micorimo llotimaci: “Egipto eniruemonona Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruaide jiraraina fino, Egiptomo abido caina ifollena”.

⁴¹ Iemo jurareta urue joreñaona finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci.

⁴² Ie jira Jusiñamui naimacimona oni jaillanona, naimacina fañonocaide. Iemona jitomana sedavidimaci. Fivuina jiai sedavidimaci. Ucuaina jiai sedavidimaci. Jusiñamui rafue lloraíma ie rabenicomo biena jaie iese ciega:

Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiiai fecañedomoi;

⁴³ iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoína oretaiticue”

ciega. Naie facaise cai usumatiai micoriai Jusiñamuina jitaiñedimaci.

⁴⁴ ‘Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofo aillocona nitimaci.

Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga.

⁴⁵ Josué diga bie eniruemo naimaci billa facaise, cai usumatiai micoriai naiconatidimaci. Bie enirue jiaie nairaiaimo jainaiaide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi.

⁴⁶ Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote:

⁴⁷ ia Salomón micoridi jofona Jusiñamui iena finode;

⁴⁸ iadedi Jusiñamuidi ima finoca jofomo i-iñede. Jusiñamui facaina lloraima micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci. Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitañedicue” raite.

⁵¹ ‘Ero, omoi comeciai jaiarede. Omoi comeci iñoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiai micoriai isoi itomoi.

⁵² Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue.

⁵³ Jusiñamui jaieniciaimona Moisés micori llogacinona feiñotomoi; iadedi iena iñoñedomoi.

Judíuai Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite.

⁵⁵ Jusiñamui Joreño nana Esteban micori comecimo namatajamona, monamo eruaillano, naimiedi Jusiñamui ebirenana cide. Naimiedi Jusiñamui nabeimo Jesús naidaillana cide.

⁵⁶ Raite:

—Mona ecuaillana cidicue. Jusiñamui Jito Jusiñamui nabeimo naidaillana cidicue.

⁵⁷ Esteban lluaana cacajano, jefo oroisite. Eo cuiriillano, naimie dine aisicaidimaci.

⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside.

⁵⁹ Estebana nofici diga fairinuano, Estebadi Jusiñamuimo ado jide:

—Cue Nama Jesús, cue joreño feiño.

⁶⁰ Ieconí cañici ifodo rainadacaida ado jide:

—Naimaci bie jeacino finua muidona, ibana oñeno.

Iese naimie jia mei, fiodaite.

8

Saulo creyentiaina duere finua rafue

¹⁻² Saulo dinena Esteban meiniana jiai jitaide. Cristo rafuena eo inotinomona damerie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiai duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiaiodi Samaria railla eniruemo jaidimaci; iadedi Cristo oretagano nine jaiñedimaci.

³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

Felipe Samariamo illa rafue

⁴ Tuficaida jaidino naga illanomo Jesús rafuena llocana uitimaci.

⁵ Samariamo Felipedi daje nairaimo jaide. Nainomo Cristo rafuena llofueuide.

⁶ Ailluena cominidi Felipe llofuiana eo raise feiñotimaci, naimie siño rafuena finua jira.

⁷ Felipedi diga jananiai anamo ite cominimona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñuja-ñujacaidinona jiai jillotate.

⁸ Ie jira naie nairaimo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

¹⁰ Nana comini naimiena inotimaci. Abina uiñoñedino inotimaci. Abina uiñotino jiai inotimaci. Raitimaci:

—Naimie uaidi Jusiñamui ie. Naimiedi siño jito —raitimaci.

¹¹ Iese naimacina are jifue. Naimaci rajicailla jira, naimaci naimiena cacadimaci.

¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llote. Naimaci Felipe llofuiana inotimaci. Inuamona, Felipe naimacina bautizade. Fiñiaina bautizade. Riñoniaina jiai bautizade.

¹³ —Jiai inoticue —Simón di raite. Naimie bautizaja mei, Felipe diga jaoicaide. Felipedi diga siño rafuena finua jira, Simón naiena ciuano, rajicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana caca-jano, Pedro, iaimaiai Juan diga, batine oredimaci.

¹⁵ Iaimaiai rillano, naimaci Jusiñamui Joreña feiñollena Jusiñamuimo jidiamaiiai,

¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreña nia feiñoñedimaci.

¹⁷ Iecon iaimaiai onolli naimacimo joniano, Jusiñamui Joreña feiñotimaci.

¹⁸ Naimaci Jusiñamui Joreño feiñuana Simón di ciuano, ucubena iaimaiaimo fecaacade.

¹⁹ Raite:

—Cuemo omico uaina ine, bumo cue onollina cue joniamona, naimie Jusiñamui Joreña feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade.

²¹ Bie rafuedi omo duiñede. Jusiñamuimona o comeci nia maraiñede.

²² O comeci iuai meido. Naimie o comecimo ite maraiñede facajacinuaina oni dotallena, cai Namamo jica.

²³ Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredio.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaimaiai llua mei, Jerusalémo abido bitiaimaiai. Abido billano, Samariamo diga comini illanuaimo Jesús ie mare rafuena llocana bitiaimaiai.

Etiopía imie creyentena jailla rafue

²⁶ Naie facaise Jusiñamui jaienisaimona damie Felipemo llote:

—Beicido joide naido mai jai. Jerusalémona Gazamo joide naisona jai —llote. Naie naiso jofue iñenanodo joide.

²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuide. Naiñaiño mamecidi Candace. Naimiedi nana naiñaiño gobierno ucubena sedade.

²⁸ Naimie jai abido jaillano, ie carretamo raíta, Isaías micori cuega rabenicono ado facade.

²⁹ Jusiñamui Joreño Felipemo llote:

—Naimie dine iairei jai. Carreta dine jai.

³⁰ Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uiñotio?

³¹ Naimie uai ote:

—¿Niese uiñoiticue, bu cuena canoñenia?

Felipemo jicanote, naimie diga a jaillano danomo raillena.

³² Naimie facaca ciegafue iese raite:

Toica llauda fallena uilla isoi, naimiena uitimaci.

Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

³³ Maraiñede rafuena naimie finoñede; ia naimiena duere finodimaci.

Naimie uruia iñededí, ¿bu naimie rafuena lloite?

Meinia meinoconi, naimie jai iñede.

³⁴ Etiopía imie Felipemo jicanote:

—¿Bie lloraima bu iena llote? ¿Dama naimie iena llote? ¿Jiaimiena iena llote? Cuemo llono.

³⁵ Iemei Felipedi bie ciegafuimona naimiemo Jesús ie mare rafuena llote.

³⁶ Naisona jaidiaimaiaimo, jinui illanomo ridiaimaia. Etiopía imie dinena raite:

—Ero, bie jinui itemo, ¿bue ñe cuedí bautizañellie?

³⁷ Felipe uai ote:

—O começimona o ñnoia, cuemona mare.

Naimie uai ote:

—Jesucristodí Jusiñamui Jitonana ñnoticue.

³⁸ Naimie ie carreta jorodate. Iemei jinui dine jaidiaimaia. Felipedi naimiena bautizade.

³⁹ Jinuimona iaimaia bia, Jusiñamui Joreño Felipeña oni uite. Etiopía imie Felipeña dane cioñede; iadedí Etiopía imie iobicana jaide.

⁴⁰ Jusiñamui Joreño Azotomo Felipeña uite. Cesarea dine naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

9

Saulo creyentena jaiila rafue

(Hch 22.6-16; 26.12-18)

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiade. Ie jira Jusiñamui diga nanoca ñairaia dine jaide.

² Judíuai comini naie ñairaia anamo illamona, creyentiaina duere finollena, Saulo cartana naimiemo jicajaide. Damascomo ite judíuai ofracuaimo dajerie cartana uia-cade. Naie ofracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. fiñiai baia, riñoniai baia, naimacina Jerusalémo atiacade.

³ Cartana ua mei, naimie jaillano, Damascomo iaie ia, ieconi monamona damie naimie abina quetiñote.

⁴ Eniruemo naimie ana uaillano, monamona damie naimiemo lluna cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, ricaiillamona raise maiga jurareta suiñoacana isoi. Ie isoidio. Ricaiillamona, cuena duere finoacadio.

⁶ Naidacai. Damascomo mai jai. Nainomo o finolle rafue omo lloiticue.

7 Saulo diga jaidinodi ñaiñeno naidaidimaci. Naie uaina cacadimaci; iadedi buna cioiñedimaci.

8 Ieconí Saulo naidacaide. Ie uisi ecoricaillamona, erodatemo, jai buena cioiñede. Ie onollina llinocaida, naimiena Damascómo uitimaci.

9 Darui amani cioiñede. Jusiñamuimo comecina facajamona, guiñede. Jiai jiroñede.

10 Damascómo Ananiana mameciredimie ite. Naimiedi creyente. Iniñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

11 Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicómo Tarso ie Saulona jicano. Naimie cuemo jai jüide.

12 Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

13 Ananías uai ote:

—Nama, diga cominimona naimiena fididicai. Jerusalémo naimiedi maraiñede rafuena ona inotinomo finode.

14 Jusiñamui diga nanoca ñairaima uai naimiemo ite, nana bene ite creyentiana gaitallena.

15 Cai Nama naimiemo llote:

—Mai. Naimie jai cue fetoca, judíuaiñedinomo cue rafuena lllollena, illaicominimo cuena lllollena, judíuai cominimo cue rafuena jiai lllollena.

16 Cuená naimie jai inua muidona, naimie nie isoi legi cacajite. Naimiemo iena lloiticue.

17 Ie jira Ananías naie jofomo jaide. Ie onolli Saulómo joniano, raite:

—Saulo, jai cue amana jai itio. Naisómo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

18 Ieconí Saulo uisimona lliciai ico isoide ra uaide. Dane ciuana, naidaide. Ie mei jai bautizaga.

19 Ie mei jai guite. Dane maide. Diga irui Damascómo ite creyentiai diga naimie ite.

Damascómo Saulo illa rafue

20 Judíuai ofiracómo naimie jaillanona, Jesús ie rafuena llofuede. “Jesúdi Jusiñamui Jito” raillanona llofuede.

21 Nana naimiena cacadinodi rajicaide. Raitimaci:

—Bimie Jerusalémo Jesúsna inotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús dibeimo jai ite.

22 Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofuiá jira, judíuai dinena iena uaitanidimaci.

23 Digarui illa mei, judíuai comeciaina facadimaci, naimiena meinellena.

24 Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano,

25 naiona creyentiai naimiena oni uitimaci. Naimie jillobillena, llaigafó jinofebeimo cirigaimo rainajanona, naimiena ana ñuitadimaci.

Jerusalémo Saulo illa rafue

26 Jerusalémo naimie jaide. Naimie ria, creyentiana nabaiacade; ia naimiena jaciruitimaci. Creyentena naimie jaillana inoñedimaci.

27 Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulómo lluaña jiai llote. Damascómo naimie ia, Jesúsna jacitaiñeno llofuiana jiai llote.

²⁸ Ie jira Saulona nabaidimaci. Jerusalémo jaisoillanona, cai Nama ie rafuena jaitaiñeno lloouide.

²⁹ Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci.

³⁰ Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiai uri itimaci. Cai Namana inocana jaidimaci. Cai Namana jaciruoicaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaina jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiai dine ride.

³³ Nainomo damie biramo biidena cide. Naimiedi Eneas. Ocho años tisaillamona bide.

³⁴ Naimiena ciuano, Pedro naimiemo llote:

—Eneas, Jesucristo ona jai jillotade. Mai naidacai. O bira feri. —Iecon naimiedi naidadate.

³⁵ Nana Lidamo ite comini, nana Sarónmo ite comini diga, naimiena jilluana ciuanona, creyentiaina jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobañuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide.

³⁷ Naie facaise naiñaiño duicotaide. Ie mei fiodaite. Naimaci einamací finua isoi, ie nabaiñiai naiñaiño abina jocodimaci. Iemei aneba ie quartomo naiñaiñoña jonetimaci.

³⁸ Lidamona Jope iaire ite. Pedro Lidamo creyentiai illana fidiano, menamie naimie dine oredimaci. Iaimaiaina llotatimaci:

—Buena sedaño cai dine raire bi.

³⁹ Ie jira Pedro naidacaida, naie iaimaiai diga jaide. Naimie ria, aneba ie quartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci.

⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raite, Jusiñamuimo jide. Abido dobaicaida, naiñaiño erodate. Raite:

—Tabita, mai rainaicaí.

Iecon naiñaiño uisi oni erodate. Pedrona ciuano, a rainadate.

⁴¹ Naiñaiño onolli llinuanona, a naidanete. Ie mei Pedrodi feciñuaina, jiaie creyentiai diga, uaidote, naiñaiño jai cajenana naimaci cioillena.

⁴² Nana Jopemo ite comini naie rafuena fididimaci. Ie jira ailluena comini cai Namana inotimaci.

⁴³ Jopemo Pedro diga irui Simón jofomo ite. Simóndi ocaina igoina cuidoraíma.

10

Cornelio comeci iuai meidua rafue

¹ Cornelio raillamiedi Cesareamo ite. Naimiedi capitán. Italamona bite soldaduai naimie anamo itimaci.

² Naimiedi Jusiñamui llogacinodo jaide. Nana ie comini diga Jusiñamuina inote. Judíuai cominimo ailluena rana jamai fecauide. Jusiñamuimo jiuide.

³ Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana cide. Jaienicidi uaidote:

—Cornelio.

⁴ Naimiena Cornelio jaciruoicaida eruaide. Jicanote:

—Nama, ¿buena jitaídió?

Naimie uai ote:

—Jusiñamui o jiaicinuaina jai cacade. Jusiñamuidi duerede cominina o canuana jiai feitañede.

⁵ Mai, Jopemo damierie o mullaiaimona oreta, Simón raillamiena atillena. Naimie jiaie mamecidi Pedro.

⁶ Naimiedi igoi cuidoraïma jofomo ite. Naie cuidoraïma mamecidi Simón. Monailai fuemo naimie jofo ite.

⁷ Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaïmona damie jiai uaidote. Naie soldadodi Jusiñamuina jiai ñnote.

⁸ Nana naimiemo Jusiñamui jaienici lluaana naimacimo llua mei, Jopemo oretate.

⁹ Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jïllena.

¹⁰ Naimie aimetaite. Guiacade. Guillena comini finodemo, naimiemo ñicairilla isoi ite.

¹¹ Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite.

¹² Naiemo jiaïforie eruaide ocainaiaï ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite.

¹³ Naimiedi monamona damie lluaana cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵ Monamona damie lluaana dane cacade:

—Jusiñamui jai fimaidoñede. Ie jira iese lloño.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Ñiese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride.

¹⁸ Simón Pedrona naie jofomo illana jicanotimaci.

¹⁹ Pedro ie ñicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode.

²⁰ Naidacaida, ana jai. Naimaci diga buena sedaño mai jai. O dine naimacina oredicue.

²¹ Pedrodì comini dine ana jaide. Raite:

—Omoi jenocamiedicue. ¿Bue ñiaïbitomoi billa?

²² Uai otimaci:

—Cornelio raillamie anamo iticaï. Corneliomo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina ñnotimie. Nana judíuai comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiaï naimie diga jiai jaidimaci.

²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiaï jiai jai uaidote.

²⁵ Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena.

²⁶ Pedrodì naimiena a naidanete. Raite:

—Mai a naidada. Cue jiai jamai ñimadicue.

²⁷ Naimie diga ñaïano fo jaidiaïmaiaï. Ailluena comini ofillana ciode.

²⁸ Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jiai rairuide. Ie areruido Jusiñamui ñicairilla isoidifuenta cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoïna cue jearuillana jai jitañede.

²⁹ Ie jira buena sedañoeno biticue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconí Jusiñamui jaienicí cuemo bairede. Naimie iniroi quenirede.

³¹ Cuena raite: “Jusiñamui o jiana cacade. Naimiedi duerede cominina o canuana feitañede.

³² Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igoí cuidoraíma. Ie jofo monaillai fuemo ite”.

³³ Iemona ona uaidotícue. O comeci marena jira, bene bitío. Jai nana bene itícaí. Jusiñamui caí díga jiaí ite. Caí Nama nana omo lluaana cacareillena, bene itícaí.

Corneliomo Pedro llua rafue

³⁴ Pedro uai ote:

—Jusiñamui nana comini naimie inuana jitaillana jai uifnotícue.

³⁵ Naga nairaimona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide.

³⁶ Caí judíuai cominimo Jesucristo llua mona, Jusiñamui díbeimo caí illena jai uifnotícaí. Iemona Jusiñamui díga caí uri illana jai jiaí uifnotícaí. Jesúdi nana caí Nama. Bie rafuena navui janore fididomoi.

³⁷ Nana Judeamo bie rafue llocana jai jaide. Juan micorí bautizajana llua mei, Galileamo Jesús naimie llofuiana tainede.

³⁸ Jusiñamuidi ie Joreñoa Jesúmo fecade. Jesúdi Nazaret imie. Naimiemo ie uaina jiaí fecade. Ie jira Jesús mare rafuena finocana uite. Jusiñamui naimie díga illa jira, díga Taife anamo itinona jillotate.

³⁹ Judíuai eniruemo nana naimie siño finoca rafuena ciodícaí. Iena birui llocabitícaí. Cruzmo jonianona, caí illaicomini naimiena meinetimaci;

⁴⁰ Iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiaí ciodícaí.

⁴¹ Nana comini naimiena cioifnedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie díga guitícaí. Naimie díga jamai jirodícaí. Naimiena caí raise uifua jira, Jusiñamui caina fetode, naie rafuena llollena.

⁴² Cominimo bie rafuena lluaana caimo llote. Jusiñamui Jesúna jai fetode, naimiena inoñedinona duere finollena. Nia fiodaifnedinona duere finoite. Jai fiodaitinona jiaí duere finoite. Ie jira Jesús rafuena llocana jaidícaí.

⁴³ Jesús muidona naga naimiena inotimie ie maraifnedicinodi Jusiñamui dotalle. Iena nana Jusiñamui facaina lloraíni micoraí jaie llotimaci.

Judíuaifnedino Jusiñamui Joreñoa feifua rafue

⁴⁴ Pedro biena nia llofueia, Jusiñamui Joreño nana bie rafuena cacadinomo bite.

⁴⁵ Iena ciuanona, Pedro díga bite creyentiaí raijicaídímaci. Naimacídí judíuai comini. Judíuaifñede cominimo Jusiñamui ie Joreño jai fecaja jira, raijicaídímaci.

⁴⁶ Jusiñamui Joreño naimacimo illamona, judíuaifnedinodi jiaie nairaí uaillaído ñaitímaci. Naie ñaia uaillaína uifnoñedimaci. Jusiñamuimo iobillacinona jai fecadímaci. Pedro díga bitino iena cacajano, raijicaídímaci. Iemei Pedro raite:

⁴⁷ —Caí feifua isoi, Jusiñamui Joreñoa jiaí feifnotomoi. Omoi bautizallena jaca budi rairuifñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci díga fiebillana naimaci jitailla jira, díga irui nainomo fiebide.

11

Jerusalémo Pedrodi naimiemo jai suide rafuena llote

1 Judeamo ite Cristo oretagano, jiaie creyentiai diga, judúuaiñede comini Jusiñamui uaina feiñuana fididimaci.

2 Pedro Jerusalémo abido ria, judúuai comini naimiena icidimaci.

3 Jicanotimaci:

—¿Bue ñellena judúuaiñedino jofomo jaidio? ¿Bue ñellena naimaci diga guitio?

4 Pedro uai uanona, naimacimo naie rafuena nagacinuaina llote:

5 —Jopemo navui cue ia, Jusiñamuimo cue jiaia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride.

6 Nainomo eruaidicue, diga rana ciodicue: ocainaiaina, eniruemo jorocana jaidinona, nuicinaiaina. Iena ciodicue.

7 Monamona damie cuemo llwana cacadicue. Raite: “Pedro, naidacaillanona, fajanona, rino”.

8 Naie uai oticue: “Nama, dama ite. Moisés micori fimaidoga rille rana jaca riñedicue”.

9 Monamona dane cuemo llote: “Jusiñamui iena jai fimaidoñede. Ie jira iese lloño”.

10 Dacaiño amani iese suide. Ie mei monamo nana abido dane jaide.

11 Ieconi daje amani iima cai illa jofomo ridimaci. Cesaremona cue dine damie naimacina orede.

12 Jusiñamui Joreño di naimaci diga buena sedaño cuo cue jaillena cuemo llote. Cue diga seis creyentiai jiai jaidimaci. Cuena uaidotimie jofomo jaidicai.

13 Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienici naimiemo llote: “Jopemo cominina oreta, Simón Pedrona atillena.

14 O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote.

15 Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite.

16 Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreño birui feiñoitomo”.

17 Cai Nama Jesucristona cai inuamona, Jusiñamuidi ie Joreño caimo navui fecade. Naimacimo daje isoi birui fecademo, ¿niese Jusiñamui dibeimo iñeiticue?

18 Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judúuaiñede comini comeciai uai meiduana jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

19 Esteban micorina duere finua facaise, creyentiai tuficaida jaidimaci. Feniciamo damerie jaidimaci. Chipremo damerie jiai jaidimaci. Antioquíamo damerie jiai jaidimaci. Dani judúuai cominimo naimaci rafuena llotimaci;

20 iadedi tuficainomona jaino Chipremona billanona, Cirenemona billanona, Antioquíamo rillano, judúuaiñedinomo cai Nama Jesús rafuena llotimaci.

21 Cristo uai naimacimo illamona, ailluena comini inotimaci. Cai Nama dibeimo jaidimaci.

22 Jerusalémo ite creyentiai iena fidiano, Antioquíamo Bernabéna oretatimaci.

23 Naimie ria, naimaci marena illamona, naimiedi Jusiñamui naimacina dueruillana uñote. Ie jira iobide. Imaci comeciai ocuiñocana inocana jaillana naimacimo llote.

24 Naimiedi maremie Jusiñamui Joreño nana naimie comecimo namatadimie. Jusiñamuina eo inotimie. Naie facaise ailluena comini creyentiaina jaidimaci.

25 Ie mei Tarsomo Bernabé Saulona jenuaide. Naimiena baillanona, Antioquíamo naimiena uite.

²⁶ Daje año creyentiaí diga nabairillanona, naimacina llofuetiaímaiaí. Antioquíamo creyentiaídi cristianona nano mamecíredimaci.

²⁷ Iemei Jerusalémona Antioquíamo damierie Jusiñamui rafuena lloraini bitimaci.

²⁸ Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide.

²⁹ Ie jira Antioquíamo ite creyentiaídi, Judeamo ite creyentiaímo, ucubena oretaiacadimaci.

³⁰ Nagamíiaí imacimo illa dierise ucubena oredimaci. Creyentiaína llofueraímo Bernabé diga, iaímaiaí Saulo diga, naie ucubena oredimaci.

12

Herodes Agripadi creyentiaína duere finua rafue

¹ Naie facaise Herodes railla illaimadi creyentiaímona damieriena gaitatate, naimacina duere finollena.

² Lloebi diga Jacobo cimáona jaitatate. Jacobodi Juan ama.

³ Ieri judíuai illaicomini iobidimaci. Iena uiñuamona, Herodes Pedrona jiaí gaitatate.

⁴ Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaína orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade.

⁵ Ie jira Pedro cárcelmo fiebide; iadedi creyentiaí naimie facaina eo jidimaci.

⁶ Herodes naimiena meineiacanarui naio Pedro soldaduai motomo inide. Mena lloeo diga maíga. Soldaduai cárcel nasena jiaí sedadimaci.

⁷ Ieconi cai Nama ie jaienici di cárcelmo bairede. Cárcelmo lligaiñote. Naimiena casitallena, jaienici Pedro ciraigina jetade. Raite:

—Raire naidacai.

Ie mei naimie onollimo ite lloeodi oni uaide.

⁸ Jaienici naimiena raite:

—O iniroina jita. O zapatona jiaí jita— Iena jitaja mei, naie jaienici dane raite—. O iniroi o abimo ferino. Cue diga mai bi.

⁹ Naie jaienici jinafona Pedro jino jaide. Pedrodi naie jaienici naimiemo finoca rafuena uiñoñede.

—Nícairilla isoi comecina facadícue —raite.

¹⁰ Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaímaiaí. Daje calle jaillanona, jaienici naimiena fainonocaide.

¹¹ Iemona Pedro naimiemo suide rafuena jai uiñoacaide. Raite:

—Cue Nama ie jaienicina uanai oretate. Herodemona cuena jillobitade. Judíuai illaicomini cue meinellena cue sedajamona cuena jillobitade.

¹² Iena jai naimie uiñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci.

¹³ Rillanona calle fuemo ite nasena tute. Daje mullaíño bite. Naiñaiño mamecidi Rode.

¹⁴ Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote.

¹⁵ Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuaibitimaci. Econuamona naimiena naimaci cuamona, rajicaidimaci.

¹⁷ Fo jaillano, Pedro ie onolli jaidide, naimaci llucaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jianomo jaide.

¹⁸ Monaidemo, Pedro nainomo iñena jira, soldaduai rajicaillanona, siadotimaci.

¹⁹ Herodes iena fidiano, naimiena jenotate. Naimiena baiñena, soldaduaimo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micori fiodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote.

²¹ Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemona raite, rafuena are llote.

²² Iena cacajano, comini ado cuiriidimaci:

—Jamai imadi ñaiñena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aia naimiena aite. Iemona naimiedi fodaite.

²⁴ Naie facaiseconi Jusiñamui uai llocana jaide. Ailluena comini iena inotimaci.

²⁵ Iaimaiai uiga ucube illanona, Bernabé, Saulo diga, Jerusalémona Antioquíamo abido bitiaimaiai. Juan Marcos jiai atidiaimaiai.

13

Bernabéna, iaimaiai Saulo diga, fetua rafue

¹ Antioquíamo creyentiai motomo Jusiñamui facaina lloraini itimaci. Llofueraini jiai itimaci: Bernabé, Simón. Simón di jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite.

² Naimaci Jusiñamuina sedajamona, guiñenaruillai ia, Jusiñamui Joreño naimacimo llote: —Bernabé iaimaiai Saulo diga feto, cuejena. Cue rafuena iaimaiai lollena, iaimaiaina jai fetodicue.

³ Jusiñamuimo naimaci jia mei, Jusiñamui iaimaiaina fetuana naimaci uiñuamona, naimaci onolli iaimaiaimo jonia mei, iaimaiaina naimacimona oni oretatimaci.

Pablo, iaimaiai Bernabé diga, Chipremo illa rafue

⁴ Iaimaiaina Jusiñamui Joreño oretaja jira, Seleuciamo jaidiaimaiai. Nainomona botedo Chipremo jaidiaimaiai. Chipredi uiasi.

⁵ Chipremo ria, Salaminamo judiaiai ofracuaimo Jusiñamui uaina llofuetiaimaiai. Juan Marcos iaimaiai diga jiai jaide.

⁶ Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloraima.

⁷ Gobernador diga maijuide. Gobernador di Sergio Paulo. Gobernador di abina uiñotimie. Jusiñamui uaina cacaacana jira, naimie Bernabé iaimaiai Saulo diga uaidote.

⁸ Barjesús ie jiaie mamecidi Elimas. Naie iaimaiai llofuiana uaitate. Gobernador inuana jitañede.

⁹ Saulodi jiaie mameci Pablo. Pablo dinena naimiena eo eruailano, Jusiñamui Joreño nana Pablo comecimo namatajama,

¹⁰ naimiemo llote:

—¡Eo jifueraimadio! ¡Eo marañedio! ¡Taife dibeimo itio! Nana mare rafue dibeimo iñedio. Cai Nama ie mare uanaicinona dobairaidodio.

¹¹ Cai Nama ie uaido ona ja iracotaitaiticue. Nano nigarui useredinona cioiñeio.

Iecon naimie cioiñede. Cominina jenuaide, ie onollido llinocaida ie uillena.

¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaiete.

Jesús rafuena llocana jaidiaimaia

¹³ Pafomona botedo Pablo ie nabaiñia diga jaide. Perge railla nairaimo ride. Perge Panfilia railla eniruemo ite. Juan Marcos iaiaiaina faionocaida, Jerusalémo abido jaide.

¹⁴ Pergemona Antioquíamo jaidiaimaia. Pisidia railla eniruemo Antioquia ite. Sábadoruimo judíuai ofiracomo jaillano, ana raiaiaimaia.

¹⁵ Moisés micori ciegafuena facaja mei, Jusiñamui facaina lloraini micoriai ciegafuena facaja mei, judíuai ofiraco sedadino iaiaiaimo llotimaci:

—Caimaci, cominimo bue omico lloiacania, mai llono.

¹⁶ Pablo naidadajano, ie onollina jaidide, comini llicaillena. Raite:

—Jusiñamuina sedallena bene itomoi. Omoimona damierie judíuaidomoi. Jiaino judíuaiñedomoi; iadedi judíuai isoi Jusiñamuina sedadomoi. Cue llamo mai cacarei.

¹⁷ Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadica. Naimiedi cai jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide.

¹⁸ Jofue iñenanomo cuarenta años naimacina canode.

¹⁹ Canaán eniruemo siete nairaina cuenode. Cai jaiagaimo, naimaci uruia diga, naie eniruena fecade, naimaci iena.

²⁰ Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitañedimaci. Samuel micoridi Jusiñamui facaina lloraia.

²¹ Illaiana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatia micoriana sedade.

²² Naimie ifo meidollena, naimaci illaiana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitaile rafuena finoite”.

²³ Jusiñamui llua isoi, David micori uruiaimona Jesúsdi cai judíuai comini Jilloitaraimana jaide.

²⁴ Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona faionocaida, Jusiñamui dibeimo omoi comeciai iuailai meido. Iena omoi meidoia, comini iena uiñotallena, mai omoi bautizallomoi”.

²⁵ Juan micori ie llofua fuillamona, raite: “Omoi comeci facajamieñedicue. Cue ifomo jaimiena meidoite. Naimie isoiñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

²⁶ Caimaci, cai eirue jito Abraham micorimona comuidica. Jusiñamuina birui sedadica. Ie jira cai jeacinomona naimie jilloitale rafue caimo duide. Jesúna ñaiticue.

²⁷ Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai ciegafuina facadimaci; iadedi iena raise cacañedimaci. Jesúna naimaci meiniamona, Jusiñamui lloraini micoriai ciegafuina jai suitatimaci.

²⁸ Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena.

²⁹ Nana Jusiñamui facaina lloraini micoriai ciegafuina suilla mei, cruzmona naimie ana uano, nofici ie raiafomo naimiena jonetimaci;

³⁰ iadedi fiodaillamona Jusiñamui naimiena jillotate.

³¹ Galileamona Jerusalémo naimie diga jaidino naimiena diga icaiño ciotimaci. Iemei cominimo naimie rafuena jai llocabitimaci.

³² Jusiñamui cai jaiagaimo jaie lloga rafue jai suide. Iena omoimo ja lloiticoco.

³³ Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cueba: “Jusiñamui llote: ‘Cue jitodio. Birui ona Jilloitaraimana itataticue’”.

³⁴ Fiodaillamona Jusiñamui naimiena jai jillotate. Ie abi jaca rifañede. Iena Jusiñamui jiai raite: “Davidmo cue llogacinona omoi facaina jaca finojiticue”.

³⁵ David micori jiaie salmomo iena cuete: “O mareuidimie jaca rifaillana jitaiñedio” raite.

³⁶ Jusiñamui David micorina ñañede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide;

³⁷ iadedi Jusiñamui Jito abidi ie isoi rifañede.

³⁸ Caïmaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi marañedicinomona omoina jillotañede;

³⁹ iadedi Jesúna birui omoi ñnoia, omoi jeacino anamona jilloitomo.

⁴⁰ Abina omoi rairui, Jusiñamui facaina lloraini micoriai jaie ciegafuina omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri rajicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena ñnoñeitomoi.

Ie isoi omoimo suiñellena, Jesúna birui omoi mai ñno.

⁴² Ie mei Pablo llñcaide. Iaimaia jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane llollena.

⁴³ Comini jino jailla mei, ailluena comini Pablo, iaimaia Bernabé diga, ñaicana jaidimaci. Judúuai iese jaidimaci. Judúuaiñedino iese jiai jaidimaci. Naie judúuaiñedinodi judúuai isoi Jusiñamuina ñnotimaci. Pablo, iaimaia Bernabé diga, ñaicana jaillanona, naimacimo llotiaimaia:

—Jusiñamui omoina duenaillana omoi jai uñua jira, Jesús rafuena mai omoi ñno.

⁴⁴ Jiaie sábadoruimo ailluena comini ofidimaci, Jusiñamui uaina cacareillena.

⁴⁵ Ailluena cominina ciuano, judúuai comini dinena eo uradoidimaci. Pablo joreña ñaitimaci. Naimie llofuaciunaina uaitatimaci;

⁴⁶ iadedi Pablo, iaimaia Bernabé diga, jacitaiño llofuetiaimaia:

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judúuaiñedino dine jaiticoco.

⁴⁷ Iese Jusiñamui jaie llote:

Judúuaiñedinomo ona oretaiticue, naimacimo cue rafue llollena,

naga eniruemo ite cominimo jeacinomona jilluana llollena.

⁴⁸ Iena cacajano, judúuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci.

⁴⁹ Nana bie eniruemo cai Nama Jesús uaina llocana jaide;

⁵⁰ iadedi judíuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illacomini fuemo faicana uitimaci. Ie jira Pablo, iaimaiai Bernabé diga, duere finodimaci. Naimaci illanomona iaimaiaina jino dotadimaci;

⁵¹ iadedi jioracuai iaimaiai eillimona jaidinotiaimaiai, naimacimo ite jeacinuaina naimaci uinollena. Ie mei Iconio railla nairaimo jaidiaimaiai;

⁵² iadedi Antioquíamo ite creyentia eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaimaiai Bernabé diga, illa rafue

¹ Iconiomo judíuai ofiracomo, iaimaiai Antioquíamo jailla isoi, jaidiaimaiai, Cristo rafuena duere llotiaimaiai. Ie jira ailluena comini creyentiaina jaidimaci. Judíuai cominimona ailluena inotimaci. Judíuaiñede cominimona ailluena jiai inotimaci;

² iadedi inoñede judíuaidi judíuaiñedinona fuemo faitimaci. Naimacimo creyentiaina tainona llotimaci;

³ iadedi nainomo are fiebidiaimaiai. Cai Nama facaisena jacitaiñeno llotiaimaiai. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci;

⁴ iadedi nana comini naiena inoñedimaci. Comeciaina daje isoi lloisiñede. Damerie judíuai facaisena itimaci. Damerie naie iaimaiai facaisena itimaci.

⁵ Judíuaiñedinodi, judíuai diga, naimaci illacomini diga, naie iaimaiaina duere finoacadimaci. Noficina iaimaiaina fairigiacadimaci.

⁶ Iena fidiano, Licaoniamos ite nairaimo aisicano jaidiaimaiai. Listra railla nairaimo jaidiaimaiai. Derbe railla nairaimo jiai jaidiaimaiai. Naie nairai ecimo ite eniruemo jiai jaidiaimaiai.

⁷ Nainomo Jesús ie mare rafuena llofuetiaimaiai.

Listramo iaimaiaimo suilla rafue

⁸ Listramo damie tisitaite. Nanomona naimie iese jeicia jira, jaca macariñede.

⁹ Pablo llofuiana naimie raise cacajamona, “Jusiñamui cuena jillotarede” raillanona, tisitaitimie inote. Pablo dinena naimiemo eruailano, naimie inuana uinote.

¹⁰ Naimiemo ado llote:

—A naidada.

Iemei daiacaida naimie macarite.

¹¹ Ailluena comini Pablo finoca rafuena cioidimaci. Naimaci uaido ado cuiriidimaci:

—ñiaiai isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci.

¹² Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira.

¹³ Naie nairai nanoca nase ruica facai Júpiterna sedauilla jofu ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feaacadimaci.

¹⁴ Iaimaiai iena cuanona, “Comini marañede rafuena finoacade” raillano, iaimaiai iniroina cuaranotiaimaiai. Comini motomo aisicana jaidiaimaiai. Ado llotiaimaiai:

¹⁵ —Nabaiñiaiai, ¿bue ñellena cocomo iese finodomo? Jamai imadicoco. Omoi isoidicoco. Jusiñamuina omoi sedallena, jamai rana omoi sedañellena, mare rafuena omoi jai lloticoco. Cajede Jusiñamuina sedadicoco. Naimiedi mona finode. Eniruena finode. Monallaina jiai finode. Nana nainomo ite rana jiai finode.

16 Jaie Jusiñamuidi nana omoi judíuainēdino omoi jitailla rafuena finuana rairuiñede;

17 iadedi naimie finoca rafuemona naimiena uiñoredomoi. Omoi facaina mare rafue naimie finocabide. Noci deitate. Omoi riará scotote. Omoimo guille itatate. Iemona omoi comeciaina caimare itatate. Iemona Jusiñamuina uiñoredomoi.

18 Iese Pablo lloste; iadedi iaímaiaimo juraretaína fecajana jaca faínonocaiacaiñedimaci.

19 Nano nigarui illamona, Pisidiamo ite Antioquíamona judíuai comini bitimaci. Iconiomona jiai bitimaci. Judíuai dinena fuemo faíamona, naimaci díbeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiodaitimiena naimie erualla jira.

20 Naimiena iese faínonocalla mei, creyentiai naimie ecimo billamona, naimie a naidadate. Nai nairaimo abido jaide. Ie are Derbemo, Bernabé díga, jaide.

21 Naie nairaimo Jesús ie mare rafuena llotiaímaiaí. Díga comini creyentiaína jaidimaci. Ie mei Listramo abido jaidiaímaiaí. Iconiomo abido jiai jaidiaímaiaí. Pisidiamo ite Antioquíamo jiai abido jaidiaímaiaí.

22 Creyentiai comeciaina ocuiñotadiaímaiaí. Cristona nia ínuana llotiaímaiaí. Raitiaímaiaí:

—Jusiñamui díne cai nia riñenia, eo duere sefuiticai.

23 Naga creyentiai illanomo creyentiaína sedarainina fetodiaímaiaí. Guiñeno Jusiñamuimo jia mei, guiñena facaise mei, naimiena naimaci jai ínua jira, cai Nama illa anamo naimacina faínonocaidiaímaiaí.

Siriamó ite Antioquíamo abido jaidiaímaiaí

24 Pisidiamo jaillanona, Panfiliamo ridiaímaiaí.

25 Pergemo Cristo uaina llua mei, Ataliamo jaidiaímaiaí.

26 Nainomona botedo Siriamo ite Antioquíamo abido ridiaímaiaí. Nano naie iaímaiaí illanomo abido ridiaímaiaí. Nainomona iaímaiaí navui nia jaiñenia, creyentiai dinena Jusiñamui iaímaiaína duenaillana uiñuamona, iaímaiaína oredimaci. Jusiñamui rafuena iaímaiaí lollena, iaímaiaína oredimaci. Naie maijia fuilla jira, jai abido bitiaímaiaí.

27 Iaímaiaí rilla mei, creyentiaína ofitatiaímaiaí. Nana Jusiñamui iaímaiaímo finoca rafuena llotiaímaiaí.

—Jusiñamuidi judíuainēdino naimiena ínuana jai jitaide —llochiaímaiaí.

28 Dínomo creyentiai díga are itiaímaiaí.

15

Jerusalémo Moisés micorí llogacina siadua rafue

1 Antioquíamo Jerusalémona janore comini billano, creyentiaína iese llofuetimaci:

—Moisés micorí caímo llua isoi, omoi abina omoi detatañenia, jeacinomona jillo-biñeitomoi.

2 Ie jira creyentiai uri iñedimaci. Pablo, iaímaiaí Bernabé díga, Jerusalémona bitino llofuiana eo uaitatiaímaiaí. Ie muidona creyentiai dinena iaímaiaína, jiaie creyentiai díga, Jerusalémo jaillena fetodimaci. Cristo oretagano díga, Jerusalémo ite creyentiaína sedaraini díga, bie rafuena siadoiacasite.

3 Creyentiai naimacina oretaja mei, Fenicia railla enirue díbeido jaidimaci. Ie mei Samaria railla enirue díbeido jiai jaidimaci. Creyentiai illanuaímo llofuecana jaidimaci. Judíuainēdino creyentiaína jai jaillana naimacimo jiai llotimaci. Ie jira naie creyentiai caimare itimaci.

4 Jerusalémo ria, creyentiaídi naimacina feiñotimaci. Cristo oretagano itimaci. Creyentiaína sedaraini jiai itimaci. Naimacimo nana Jusiñamui iaímaiaímo finoca rafuena llotiaímaiaí. Cristo rafuena iaímaiaí llofuíamona, judíuainēdino Cristona ínuana llotiaímaiaí.

5 Iena cacajano, fariseuai díbeimo ite creyentiaímona jiaíno naidaita raitimaci:

—Moisés micori llogacinuaina #nuamona, judúuaiñede creyentiaí abina diana jitaídicaí.

⁶ Bie rafuena siadollena, Cristo oretaganodi, creyentiaí sedaraini diga, danomo ofidimaci.

⁷ Iena are siadua mei, Pedro naidacaillano, raite:

—Amatiaí, judúuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona #notimaci.

⁸ Nana comini comeciaina naimie uiñuamona, judúuaiñedino naimiena #nuana Jusiñamuidi uiñote. Cai mo fecaja isoi, ie Joreño naimacimo fecaja jira, Jusiñamuidi judúuaiñedinona jitaillana jai uiñoticaí.

⁹ Jusiñamuidi naimacina cai isoi jai feiñote. Naimiena naimaci #nua jira, naimie naimaci comeciimona jeacinona jai dotade.

¹⁰ ¿Bue ñellena Jusiñamuina #noiacaíñedomoi? Jusiñamui jitaillacino omoi finoacaíñena jira, naimie omoína duere finuana jitaídomoi. Cai jaiagai Moisés micori llogacinodo jaidimaci; iadedi iena raise #ñoñedimaci. Nana ie llogacinona jaca finonidimaci. Iedo jaie jiaí jaidicaí; iadedi iena jiaí finonidicaí. ¿Bue ñellena iedo birui cai jaillana jitaídomoi?

¹¹ Jesucristo caína duenaila jira, cai jeacinomona jilloiticaí. Judúuaiñedino cai isoi jilloitimaci.

¹² Iena cacajano, nana ofidino uai ll#caidimaci. Iemei Bernabé lluaana cacadimaci. Pablo lluaana jiaí cacadimaci.

—Jusiñamui judúuaiñedino motomo cocona siño rafuena finotate —lloitiaímaiaí.

¹³ Iaimaiaí ñaia mei, Jacobo raite:

¹⁴ —Amatiaí, cuemo cacarei. Judúuaiñedinomo Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode.

¹⁵ Jusiñamui facaina lloraini micoriaí iena jaie cuetimaci:

¹⁶⁻¹⁸ Jusiñamui jaie llote: “David micori illaima isoi illaimana illena, cue Jitona ico oretaiticue.

David jicori jito illaimana birui iñede; iadedi David micori ifomo illaimana cue Jito iite.

Iemona judúuaiñedino cuena #noitimaci.

Naimaci cue cominina jaillena jiaí jitaídicue.

Iena cue llua jira, iena finoiticue” llote.

¹⁹ Ie muidona cue comeci raite: Judúuaiñedinomona creyentiaína jaidinona duere finoñeiticaí.

²⁰ Naimacimo rabena oreta, dama buena llollena: “Jiraraimo fecaca llicisina riñeno. O aiñede riño diga iñeno. O iniñede ima diga iñeno. Llerinoga rana riñeno. Diruena jiaí riñeno”.

²¹ Jaiemona naga sábado naga judúuai ofiracomo judúuaidi Moisés micori cuezafuiaimona naie isoide lletarafuena cacadimaci. Ie jira naie isoide rafuedo nia jaiticaí: iadedi jiaie Moisés micori lletarafuedo jaiñeiticaí.

²² Ie mei Cristo oretaganodi, creyentiaína sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiaí comeciaina facajano: “Jee” raitimaci. Pablo, iaimaiaí Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiaí fetodimaci. Jiaie comini baifemo rafuena baitadiiaímaiaí.

²³ Rabena cuetimaci, iaimaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticaí. Jerusalémo iticaí. Cristo oretaganodicaí. Creyentiaína sedarainidicaí. Omoídi cai amatiaí. Omoimo jai cueticaí. Judúuaiñediomoi; iadedi cai amatiaídomoi.

²⁴ Cai motomona jiaie comini naimaci llofuiado omoína uri itatañenana fididicaí. Omoi jeacinomona omoi jilloillena, Moisés micori llogacinodo omoi jaillana jitaídicaí. Ie jirari omoi comeciá rucaicuerite. Naimacina oretañedicaí.

²⁵ Danomo cai ofilla mei, menamiēna fetodicaī, omoimo oretallena, Bernabé, iaīmaiaī Pablo diga. Bernabéna isiruiticaī. Pablona jiaī isiruiticaī.

²⁶ Iaīmaiaī cai Nama Jesucristo muidona navui niadedi fiodaitiaīmaiaī.

²⁷ Ie jira Judas, iaīmaiaī Silas diga, oretaiticaī. Omoimo bie rabe cuia isoi lloitiaīmaiaī.

²⁸ Jusiñamui Joreño caimo illamona, bie rafuena omoimo lloiticaī. Ailluena rafue omoī finuana lloñeiticaī. Dani bie rafuena finojitomoī.

²⁹ Jiraraimo fecaca rana riñeno. Diruena riñeno. Llerinoga rana riñeno. O añēde riño diga iñeno. O iniñede iima diga iñeno. Iese omoī iñenia, marena iitomoī. Macaibaite” cuetimaci.

³⁰ Ie mei Antioquíamo jaidimaci. Ailluena cominina ofitaja mei, naimacimo cartana fecadimaci.

³¹ Iena facajano, naie llucacnori iobidimaci.

³² Judas Jusiñamui facaina lloraima. Silas daje isoide. Diga rafuena creyentiaimo llofuetiaīmaiaī. Naimaci comeciaina jiaī ocuiñotadiaīmaiaī.

³³ Diga irui nainomo illa mei, iaīmaiaīna oretatinomo creyentiaī iaīmaiaīna marena abido oretatimaci.

³⁴ Nainomo Silas comecina facajano, fiebide. Ie jira Judas dama abido jaide.

³⁵ Antioquíamo Pablo, iaīmaiaī Bernabé diga, cai Nama Jesús rafuena llofuellena fiebidiaīmaiaī. Diga comini jiaī iese llofuetimaci.

Pablo jiaie eniruemo ite creyentiaī dīne dane jailla rafue

³⁶ Diga irui illa mei, Pablo Bernabémo llote: p –Naga navui coco llua nairaimo creyentiaī dīne abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

³⁷ Bernabédi, naie iaīmaiaī diga, Juan Marcos uiacade.

³⁸ Panfiliamo iaīmaiaīna navui Juan fañonocaide. Iaīmaiaī diga llofuellena jaiñena jira, Pablo naimiēna dane uiacañede.

³⁹ Riire ñaitiaīmaiaī. Comecina daje isoi lloñēdiaīmaiaī. Ie jira dajena jaiñēdiaīmaiaī. Bernabé Juan Marcona uillanona, Chipremo aillue botedo jaidiaīmaiaī.

⁴⁰ Ie mei Pablo Silana uite. “Jusiñamui omicono canoite” creyentiaī dīnena raillanona, iaīmaiaīna oredimaci.

⁴¹ Siria railla eniruemo Jesús rafuena llocana jaidiaīmaiaī. Cilicia railla eniruemo jiaī llocana jaidiaīmaiaī. Creyentiaī comeciaina ocuiñotacana jaidiaīmaiaī.

16

Timoteo iaīmaiaī diga jailla rafue

¹ Nano Derbemo Pablo, iaīmaiaī Silas diga, ridiaīmaiaī. Iemona Listramo ridiaīmaiaī. Nainomo Timoteo railla creyente ite. Naimie eidi judía iñaiño. Jiaī creyente. Ie moo micoridi griego imie.

² Listramo ite creyentiaī, Iconiomo ite creyentiaī diga, naimiēna: “Mare” raitimaci.

³ Pablodi Timoteona uiacade, naimie diga jaillena. Timoteo moo micoridi griego imiēna jira, naimie abina nia detañede; iadedi nainomo ite judíuai illa jira, Moisés micoridi llua isoi, Pablo Timoteo ie abina dete. Judíuñēdimie naimaci motomo ia, naimaci motomo inde.

⁴ Naga nairaimo naimaci jaillanona, Jerusalémo siadogacina creyentiaimo llote. Jerusalémo Cristo oretagano, creyentiaīna sedaraini diga, navui naicinona siadotimaci. Creyentiaī naie lluaña ñinollena, iena llocana jaidimaci.

⁵ Ie jira creyentiaī ñinocana jaidimaci. Nagarui ailluena comini creyentiaīna jaidimaci.

Pablo nicañilla ra isoidena ciua rafue

⁶ Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci.

⁷ Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide.

⁸ Ie jira Misiamona ecido jaillano, Troas railla nairaimo jaidimaci.

⁹ Nainomo naie naiona Pablo nicairilla ra isoidena cide. Daje Macedonia imiedi uicomo naidaita naimiemo jica-jicanode. Raite: “Macedoniamos ruica o bi. Caina canuaibi”.

¹⁰ Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uifnoticue, iena omo cuellena. Macedoniamos ruica dine cai jaille botena jenodica. Comecina facadica: “Jusiñamuidi caina uaidote, nainomo ie mare rafuena cai lollena”.

Filipomo illa rafue

¹¹ Ie jira Troamona Samotraciamos monaillaido atona ie mamedo jaidica. Ie icotidiruido Neápolis railla nairaimo ridica.

¹² Dinomona Filipomo duide naisodo jaidica. Macedoniamos ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo itica.

¹³ Sábadoruido naie nairaimona nasedo jino jaidica. Comecina facajamona: “Dinomos nibai comini oficabidimaci, Jusiñamuimo jillena”, ille fuemo jaidica. Nainomo dañaiñorie riñoniai billanona, dinomo ana raidica, naiñaiñuaimo Cristo rafuena lollena.

¹⁴ Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede inruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie llwana feiñotade. Naie facaise creyentena jaide.

¹⁵ Naiñaiño ie jofomo itino diga bautizaja mei, caimo llote:

—Cuedi cai Namana cue jai inuana omoi uifnuamona, cue jofomo mai bi, nainomo omoi fiebillesa. —Duere caina uai-uaidode.

¹⁶ Jusiñamuimo jiranomo jairuido jaidicaimo, daje jitañonomo dafaifidica. Naiñaiñodi jainomona ibacañaiño. Janaba anamo naiñaiño jai ite. Iemona naiñaiño jairuido suille rafuena llouide. Naie rafuena llwana ibatajano, naiñaiño namaiaidi ailluena ucubena feiñoudimaci.

¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jillwana omoimo llocabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñonomo ite Janabamos llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño llwamona ucubena jai oñenana naiñaiño namaiai jai uifnu jira, Pablo, iaimaiai Silas diga, gaitadimaci. Iaimaiaina plazamos illaicomini illanomo sonocana uitimaci.

²⁰ Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañediaimaiai. Iaimaiai judíuai comini.

²¹ Romanuai cominina cai illa jira, iaimaiai llogacinuaina cai inoia, iedo cai jaia, marañede.

²² Iena cacajano, nana comini naie iaimaiaina fanaisitimaci. Ilaicominidi naie iaimaiai iniroina cuaranuanona duiñode. Rasi diga, iaimaiaina diga icaiño fatatatimaci.

²³ Iaimaiaina eo faja mei, cárcelmo jonetimaci. Cárcelna sedaraimamos iaimaiaina raise sedallena llotimaci.

²⁴ Iese llua jira, iaimaiaina llaveracomos fo iaimaiaina uite. Donoramos iaimaiai eilliai ñuitajano, raise donode.

²⁵ Naiona daferui facai Pablo, iaimaiai Silas diga, Jusiñamuimo ifuerillacinona rorodiamai. Jai jidiamai. Jai llavecamos naiena cacadimaci.

²⁶ Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dacaiño nana llavecamos imaci donua radi oni ecoride.

²⁷ Cárcelna sedaraima casidemo, cárcel ie nasia ecocorinaillana cide. “Llavecano jai aisidimaci” raillamo naimie comecina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona comecina facade;

²⁸ Iadedi Pablodi eo raire cuirioide:

—¡O abina dama meineño! Bene nana iticaisa.

²⁹ Lamparina atillena cárcelna sedaraima jicajanona, jarire fo jaide, Pablo iaimaiai Silas dine. Jacinaillano, naimie abidi docaillamona, iaimaiai uicomo caiñici ifodo ana rainadate.

³⁰ Iaimaiaina jino ua mei, nai iaimaiaimo jicanote:

—¿Buena finojiticue, cue jeacinomona cue jilloillena?

³¹ Uai otiaimaiai:

—Coco Nama Jesúna ñino. Iese na o jofomo ite comini diga o jilloillesa.

³² Iemei naimiena Jesús ie rafuena llofuetiaimaiai, nana ie jofomo itino diga.

³³ Naie facaise iaimaiai bofellañona jocode. Iemei naimiedi, nana ie comini diga, bautizaga.

³⁴ Guillena, ie jofomo naie iaimaiaina uite. Jusiñamuina jai ñnua jira, na ie comini diga, naimie caimare ite.

³⁵ Ie oni monaidemo, illaicominidi dajerie policiana cárcelmo oretatimaci, nai iaimaiaina jino orellena.

³⁶ Cárcel sedarimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

³⁷ Iadedi policíamo Pablodi llote:

—Cocodi romanuai cominidicoco; iadedi cocomo ite rafuena raise uiñoño cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

³⁸ Ilaicominimo policías naiena lluaibitemo, illaicominidi naiena cacajanona, eo jacinaite, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci.

³⁹ Ie jira naie iaimaiai dine illaicominidi jaidimaci, iaimaiaina: “Dama dino iesede” raillena. Jino atia mei, nairaimona jino iaimaiai jaillena oredimaci.

⁴⁰ Cárcelmona jino billano, Lidia jofomo fo jaidiaimaiai. Creyentiaina cuano, naimaci comeciaina ocuiñotallena, naimacina dane llofuetiaimaiai. Ie mei oni jaidiaimaiai.

17

Pablo, iaimaiai Silas diga, Tesalónicamo illa rafue

¹ Anfípolis railla nairaimo macaritiaimaiai. Apolonia railla nairaimo macaritiaimaiai. Ie mei Tesalónica railla nairaimo ridiaimaiai. Dinomo judíuai ofiracodi ite.

² Pablo fibilla isoi, nainomo fo jaide. Daje amani sábadoruimo Jusiñamuina cuega-fuiaimona naimacina llofuate.

³ Iese naimacina llofuate:

—Cristo llegei cacaite. Fiodaillamona naimie jilloite. Naimiedi Jesús.

⁴ Naiena cacadinomona ailluena ñnotimaci. Pablo, Silas iaimaiai dibeimo jaidimaci. Jusiñamuina ñnote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jiai jaidimaci;

⁵ Iadedi judíuaidi uradoillano, jamai itinomona eo marañede ññaiaina uaiduanona, ailluena cominina ofitatimaci. Ie jira naie nairai uri ñnedimaci. Iaimaiaina comini uicomo uillena, Jasón jofomo binaisite.

⁶ Iaimaiaina baiñenano, Jesóna, jiaie creyentiai diga, illaicomini illanomo aiñoicaida uitimaci. Cuirisite:

—Naga nairaimo cominina uri itatañediaimaiai. Benomo jai bitiaimaiai. Jai benomo billanona, Jasón ie jofomo iaimaiaina feiñote.

⁷ Cai nanoca illaïma ie llogacinona jai ñinoñedimaci. Ie anamo jai iacaiñedimaci. Raitimaci: “Jiaie illaïma anamo iticai. Jesús raillamie anamo iticai”.

⁸ Judíuai iese llumona, cominidi uri iñedimaci. Illaicominidi jiaï uri iñedimaci.

⁹ “Naie iaïmaiaï dane biñeitiaïmaiaï” illaicominimo creyentiaï raillano, illaicominidi Jasón jiaie creyentiaï diga, jino oretatimaci.

Bereamo Pablo, iaïmaiaï Silas diga, illa rafue

¹⁰ Naie naio creyentiaïdi Pablona, iaïmaiaï Silas diga, Bereamo raire oretatimaci. Dinomo rillano, judíuai ofiracomo jaidiaïmaiaï.

¹¹ Nainomo ite judíuai eo mare. Tesalónicamo ite judíuai isoiñedimaci. Bereamo itinodi Cristo rafuena iocire feiñotimaci. Niedi uanaicinoni raillanona, nagarui Jusiñamuina ciegafuaïna facadimaci.

¹² Ie jira naimacimona ailluena ñnotimaci. Judíuaiñedinomona ailluena nanocañaiñuiai ñnotimaci. Ailluena iñiaï jiaï ñnotimaci;

¹³ Iadedi Bereamo Pablo Jusiñamui ie uaina jai llumona Tesalónicamo ite judíuai di fidiano, dinomo jaidimaci. Cominina fuemo faïllena, jaidimaci.

¹⁴ Naie facaise creyentiaïdi Pablona oni oretatimaci. Monailai fuemo duide naïsona oretatimaci. Silas, iaïmaiaï Timoteo diga, fiebidiaïmaiaï.

¹⁵ Pablo uigamacï naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaïmaiaï Timoteo diga, raire cue dine billesa” llono.

Atenamo Pablo illa rafue

¹⁶ Atenamo iaïmaiaï rillena Pablo sedademo, naie nairaimo ailluena jiraraïna ciode. Iena ciuanona, Pablo comecidi jeareficaide.

¹⁷ Naïena ciua mei, judíuai ofiracomo judíuai diga coniniri Jusiñamui rafuena siadote. Jusiñamuina jai ñnote judíuaiñedino diga coniniri iena jiaï siadote. Plazamo nagarui jamai itino diga coniniri iena jiaï siadote.

¹⁸ Jamai comecina facadinomona damierie naimie diga jiaï ñaitimaci. Epicúreo railla rafuedo jaisoidimaci. Estoico railla rafuedo jiaï jaisoidimaci. Damierie naimacimona raitimaci:

—¿Buena nai ñaïllareuidimie caïmo lloiacade?

Jiaïno raite:

—Jiaie nairai jusiñamuillaicaïmo lloiacade isoide.

Jesús fiodaïllamona jilluana Pablodi llouilla jira, iese raitimaci.

¹⁹ Ie jira naimïena naimaci siadouïllanomo uitimaci. Naie illano Areópagona mamecïrede. Jïcanotimaci:

—¿Ñie isoide o comocinuai? Caïmo llono, cai uiñollena.

²⁰ Eo feiredicinuaïna cacadicaï. ¿Buena nai llofuiacinodi llote? Iena uiñoïacadicaï.

²¹ Nana Atenamo ite comini, jiaie illanomona bitino diga, jamai ailli como imaci fidiï rafuena ñai-ñaidimaci. Jamai ailli fidiï rafuena caca-cacadimaci. Jiaie rafuena finoñedimaci.

²² Jïcanua mei, Areópago railla illanomo Pablo naidacaida llote:

—Atenas imaci, omoïmo rafuena lloiacadicue. Omoï jusiñamuillaïna eo sedacabidomoï.

²³ Cue macarillamona, omoï jusiñamuillaïna sedaja jiraraïna ciodicue. Daje jiraraï abïmo iese ciega: “Uiñoñega Jusiñamuina sedadicaï” ciega. Uiñoñeno naimïena sedadomoï. Ja omoïmo naimïena lloiticue.

²⁴ Jusiñamui binïena jaie finode. Ie emodoconi Jusiñamuidi nana binïemo itinona jiaï finode. Naimïedi mona ie Nama. Enirue ie Nama. Ie jira ñima finoca jofomo naimïe ñede.

²⁵ Naga jitaile rana naimiemo illa jira, naimiena canonidicai. Naimie nana cominina comuitate. Jiai nagarui jafaici cai uadi caimo iga. Uanai nana rana caimo iga.

²⁶ Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiai jonega.

²⁷ Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede.

²⁸ Naimie jaca illa jira, cai jiai iticai. Jiai cajedicai. Ie isoi omoi rafue lloraini jiai llotimaci: “Naimie ie uruidicai”.

²⁹ Naimie caina comuitaja jira, Jusiñamuidi jirarai isoiñedena uiñoticai. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. fima ie onolli diga finoca ra isoiñede.

³⁰ Cominidi abi uiñoño jeacino jaie finoidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciai iuai meidollena jitaide.

³¹ Naimaci comeciai iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúna naimie jai jilloitaja jira, iena uiñoticai.

³² Fiodaillamona Jesús jilluana cacajano, damierie jaisitimaci. Ieconi jiaínodi raite:
—Jiairuido o lluaana dane cacajiticaí.

³³ Iemei naimaci motomona Pablo jino jaide.

³⁴ Naie cominimona damierie naimie dibeimo jaidimaci. ñnotimaci. Naimacimona damie Areópagomo siaduidimie. Ie mamecidi Dionisio. Jiaiñaiño ñnote. Naiñaiño mamecidi Dámaris. Daje facaiseconi jiaie cominidi ñnotimaci.

18

Corintomo Pablo illa rafue

¹ Atenamona Corinto railla nairaímo Pablodi jaide.

² Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaiai. Romamona Claudio nana judíuai cominina jai oretate. Ie jirari bitiaimaiai. Roma ie nanoca illaimadi Claudio.

³ Pablo iaímaiai daje isoi maijia jira, Pablo iaímaiai jofomo fiebide. Iaímaiai conima diga maijide. Chivos itiraiai ie nilla iniroina tiforisoidimaci, naiemona jofona finollena.

⁴ Naga sábadoruimo judíuai ofiracomo llofujete, judíuaina ñnotallena, judíuaiñedinona iena jiai ñnotallena.

⁵ Macedoniamona Silas, iaímaiai Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai Jilloitaraíma” llouide;

⁶ ia naimie uaina ñnosñedimaci. Jiai naimie jinafomo jeare ñaitimaci. Naimaci comeciai jeare ciua jira, Pablo ie iniroina jaidinote, naimacina raillano:

—Daní omoi muidona Jusiñamui omoína duere finojite. Cue muidonañeite. Jai judíuaiñedino dine jaiticue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina ñnouidimie. Ie jofu judíuai ofiraco ecimo ite.

⁸ Crispodi, nana ie jofomo itino diga, cai Nama Cristona ñnote. Naimiedi judíuai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga.

⁹ Daje naíona Pablo nicaírilla isoidemona, Pablomo cai Nama Jesucristodi llote:

—Mai jaciruiño. Faicaiño cue rafuena llocana jai.

¹⁰ O diga iitícue. Budi ona maraiño finoñeite. Bie nairaimo ailluena cominidi cue dibeimo jaitimaci.

¹¹ Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹² Corinto railla nairaidi Acaya railla eniruemo jainaiide. Naie facaise Acaya ie gobernadori Galión. Naie facaiseconi damerie judíuai comini Pablona faiacadimaci. Galión dine naimiena uitimaci.

¹³ Raitimaci:

—Cai illaíma llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndi llote:

—Judíuai, cacarei. Naimie maraiñede rafuena finodena, naimie omoína jifuetena, omoi lluamo nia cacarefidicue;

¹⁵ iadedi jamai naimie uaillai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoiacaiñedicue.

¹⁶ Iemona naimiedi nainomona naimacina oni orede.

¹⁷ Ie mei Sostenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuenta Galión niese nibaiñede.

Antioquíamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaína facaduano, Priscila iaímaiai Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate.

¹⁹ Efesomo rillanona, iaímaiaína fainonocaide. Judíuai comini Jusiñamui rafuena siadollena, Pablodi judíuai ofiracomo fo jaide.

²⁰ Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeíticue—

²¹ Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riitícue. —Iemei Efesomona jaide.

²² Cesareamo sijiano, Jerusalémo macarite. Creyentiaí dine jaide. Ie mei Antioquíamo jiai macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiaí imaci comeciána ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote.

²⁵ Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede.

²⁶ Judíuai ofiracomo naimie llofuia, jaitaiño llofuate. Priscila, iaímaiai Aquila diga, naiena cacadiímaiai. Ie jira naimiena oni eneno uitiaímaiai. Ie uiñoñega rafuena eo raise naimiena llofuetiaímaiai.

²⁷ Acayamo Apolodi jaiacana jira, creyentiaídi naimie comecina ocuiñotajano, naimiena oresite. Acayamo ite creyentiaímo rabemo cuetimaci. Jusiñamui naimacina dueruilla jira, creyentiaína jai jaidimaci. Naimiena marena feiñollena iese cuetimaci. Nainomo naimie rillanona, creyentiaína eo canode.

²⁸ Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuegafuiaímona Jesúdi cai Jilloitaraímana llofuate.

19

Efesomo Pablo illa rafue

¹ Corintomo Apolo nia itemo, nairai ai onifedo joide naído jailla mei, Pablo Efesomo ride. Dinomo rillanona, creyentia ina baite.

² Naimacimo jıcanote:

—¿Cristona omoi inuaruimo Jusiñamui Joreñona feiñotomoi?

Uai otımacı:

—Jusiñamui Joreñona nia jaca cacaiñedicai.

³ Dane jıcanote:

—¿Nie isoi omoi bautizagaomoi?

Uai otımacı:

—Juan micori lloga rafue facaina bautizagacai.

⁴ Pablo uai ote:

—Mare. Juan llote: “Omoi comecıai iuaina meido. Iemei bautizallomoi”. Ie ifo meido itimiena comıni inollena llote. Jesúna inollena llote. Jesús rafuena omoi mo raise lloıtıcue.

⁵ Iena cacajano, cai Nama Jesús dıbeido bautizadımacı.

⁶ Naimacimo Pablo ie onollına joniamona, Jusiñamui Joreñona feiñotımacı. Ie mei naimacı uiñoñega nairai uaido ñaitımacı. Jusiñamui Joreño naimacimo llua rafuena jıai llotımacı.

⁷ Nıbai nana naimacıdı doce iıñıai.

⁸ Sábadoruimo judıuai ofiracomo fo jaillano, naimie anamo naimacı illana Jusiñamui jıtaiıa jira, Jusiñamui dıbeimo naimacı comecıai iuaina meıduana Pablodı jacıtaiñeno eo llouide. Nainomo daje amani fıvui fıebide.

⁹ Naimacımona jıainodı Pablo uaina uaitatımacı. Jıai inoiacaiñedicımacı. Naimacı inoñena ira, ofiracomo bitınomo: “Cristo rafuedı maraiñede” llouıdımacı. Ie jira Pablodı creyentıai dıga naimacımona eneno oni jaide. Tiranno ie lloracomo nagarui Pablodı llofueıde.

¹⁰ Mena fıemona ıese llofueıde. Ie jira dıga Asia raııa enıruemo ite comınidı cai Nama ie uaina cacadımacı. Judıuai cacadımacı. Judıuaiñedıno jıai cacadımacı.

¹¹ Jusiñamuidı Pablona sıño rafuena fınotate.

¹² Duidınomo comınidı naimie jetaca pañueluaina uitımacı. Duidınomo naimie jetaca inıroına jıai uitımacı. Naiena jetajamona, duıdnodı jıllodımacı. Janaba anamo itınodı jıai jıllodımacı.

¹³ Naie facaise jamai macarisoidıno ridımacı. Judıuai imacı. Naimacıdı icorırainı. Jesús mamecı llinuano, janani ai anamo itınomona jananiaina oni oretaiacadımacı. Jananiaimo raitımacı:

—Pablo llua isoi, Jesús muidona bimacımona oni jai.

¹⁴ Esceva ie siete jıtotıaidı ıese fınoacadımacı. Escevadı Jusiñamui dıga ñairııma.

¹⁵ Janabana oni oretaiacadımacımo, Janaba dınena uai ote:

—Jesúna uiñotıcue. Pablona jıai uiñotıcue; iadedı omoi na uiñoñedicue.

¹⁶ Ieconı Janaba anamo itımie naimacı emodomo daiacaide. Rııre nana naimacına emodofıcaide. Ie jira naie jofomona taimııaina jıno aısidımacı. Naimacıdı bofellaıai dıga jıno aısidımacı.

¹⁷ Nana Efesomo itıno iena fıdidımacı. Judıuai, judıuaiñedıno dıga, naıfuena fıdidımacı. Naıfuena fıdıanona, eo jacınaıtımacı. Iemona cai Nama Jesús mamecıdı are sorıde. Comıni dınena: “Jesús uai eo sıño” raitımacı.

¹⁸ Ie jira aılluena creyentıaidı bıllano, imacı navui maraiñede fıno ca rafuena Jusiñamuımo llotımacı. Icorııa rafuena fınoıdımacı. Iena marefodo llotımacı.

¹⁹ Aılluena icorııa rafııai illabıai atıanona, marefodo jobaidımacı. Nıga raıfı rabıai jobaııana facadımacı. Cıncuenta mıı ucube dıese facai rabıaina jobaidımacı.

²⁰ Cai Nama Jesús uaina eo llocana jaide. Cominidi naie uai siñonana uiñotimaci.

²¹ Naie rafue illa mei, Pablodi começina facajano raite: “Macedoniamos cue macarillamona, Acayamos cue jiai macarillamona, Jerusalémo riacadice”. Ie emodoconi naimiedi raite: “Nainomona Romamos jiai jaiacadice”.

²² Naimie nia Asiamos nano nigaruillanona, mena canoraimana Macedoniamos oretate. Timoteona, iaiaiaia Erasto diga, oretate.

Efesomos ite comini marañede rafue finoacadimaci

²³ Naie facaiseconi Pablo nia oni jaiñenia, Jesucristo rafue muidona Efesomos ite cominidi marañede rafuena comuitatimaci.

²⁴ Demetrio raillamie platamona diga rana finouide. Naimiedi Diana ie jofojoreñuaina finouide. Naimie anamos ailluena maijuidimaci. Dianadi naimaci jusiñamui.

²⁵ Naimie isoi maijuidinona Demetrio uaidote, nana naimaci danomos ofillena. Ie mei raite:

—Jai danomos ofidicai. Bie maijiamona cai ucubena uana raise uiñotomoi;

²⁶ iadedi Pablo raillamiedi diga cominina jai llofuate: “Comini finoca raniaidi jusiñamuillañede”. Naie llofuiamona ailluena comini naimie dibesimo jaidimaci. Dama Efesomos iese suiñede; iadedi ua nana Asiamos iese suide.

²⁷ Ie jira abina rairuiacadica, cai maijille faifi raillano, comini Diana jofona jiai sofei raillanona. Cominidi naiñaiñona ebiruillana feittaimaci. Naiñaiñori rajicaiñeitimaci. Dianadi eo ebirede jusiñamui. Nana Asiamos ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuiacadica.

²⁸ Iena cacajano, eo iciritimaci. Riire cuiriidimaci:

—¡Efeso ie Diana eo ebirede!

²⁹ Danirie siaduamona, nana comini eo failliñaidimaci. Iemos nana comini dajena naimaci ofiracomo fo raire jaisite. Gayona, iaiaiaia Aristarco diga, gaitajano uitimaci. Naie iaiaiaidi Pablo ie nabai iaiaiaia. Iaiaiaia comuillanodi Macedonia.

³⁰ Pablo ofiracomo jiai fo jaiacade; iadedi creyentiaidi naimie fo jaillana rairuidimaci.

³¹ Illaicominimona damerie nabaiñiaia naimiemo fo jaillana jiai rairuidimaci.

³² Fo itinomona damerie daje rafuena ebena cuiriidimaci. Jaiino jiaifuena ebena cuiriidimaci. Eo failliñaidimaci; ie iadedi bue ñellena naimaci ofillana raise uiñoñedimaci.

³³ Comini motomona judiaia dinena damie uicomo oredimaci. Ie mameçidi Alejandro. Cominina llucaitallena, ie onolli jaidianona, cominimo lloiacade;

³⁴ iadedi naimie judio imiena naimaci uiñuanona, nana daacaiño cuiriidimaci. Mena horas raifi cuiri-cuiriidimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina llucaitatate. Naimaci llucaila meinoconi, naimie llucanona cacadimaci. Raite:

—¡Cacarei! Cai nairaidi Dianana sedacabidica. Naiñaiño ebirediñaiño. Naiñaiñona eruaide jiraraidi monamona jaie uaide. Iena jiai sedacabidica. Nana bie eniruemo ite comini iena uiñotimaci. Bu naiena uiñoñedimiena jaca iñede.

³⁶ Bu cue lluana jaca uaitañeite. Ie jira omoi llucacai. Começiaia facañeno buena finoñeno.

³⁷ ¿Bue ñellena Gayo iaiaiaia Aristarco diga, benomos atidomoi? Iaiaiaiaidi cai jusiñamui joreñona ñañediiamaiaia. Naiñaiñona jeare finoñediiamaiaia.

³⁸ Demetrio, ie maijiraini diga, iaiaiaia llogidoraco, cominina llogidoraco ite. Diga jueces jiai ite. Coniniri nainomos iena siado;

³⁹ iadedi jiai nicino omoi mo ia, cai illaicomini ofia, biena siaduano, caimo lloitimaci.

⁴⁰ Birui bie rafue cai finua jira, illaicomini nibai caina duere finoitimaci. ¿Ñiese cai nibaille? Illaicomini caimo biena jicanoia, ¿ñiese raiticai?

⁴¹ Naie llua mei, ofidinona jino orede. Iemei jai jono tuudimaci.

20

Macedoniamo Pablo dane jailla rafue

¹ Efesomo ite rafue suilla mei, Pablodí creyentiaina uaidote. Naimaci começiaina ocuiñotafuena llote. Iemei naimacina naimie facaduano, Macedonia railla eniruemo jaide.

² Nainomo ite nairaiamo macarite. Começina ocuiñotallena, naimacina llofuecana jaide. Iese Macedoniamona Grecia railla eniruemo risaide.

³ Nainomo daje amani fivui illa mei, Siriamo botedo abido jaiacade; iadedi judúaidi naimiena meineiacanana Pablo fidiano, Macedoniamo abido macarite.

⁴ Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaiaiaia Segundo diga, jaide. Tesalónica nairai imie iaiaiaia. Gayo naimie diga jiai jaide. Gayodí Derbe nairai imie. Timoteo naimie diga jiai jaide. Tíquico, iaiaiaia Trófimo diga, jiai jaidiaiaiaia. Asia imie iaiaiaia.

⁵ Coco uicodo naimaci jaillano, Troamo cocona sedadimaci.

⁶ Llomenico guillaruillaia railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fodaillana começillena, danomo ofidicaimo, Pablodí caina llofue. Icoiti naimie jaiacana jira, Pablo are ñaite. Naiona jitoma daferui illa facai nia ñaite.

⁸ Cai ofillanomo ailluena lamparíniai ite.

⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fodaillana cioidimaci.

¹⁰ Ie jira Pablo ana jaide. Naimie emodomo jitadacaida, naimiena meniñote. Cominimo llote:

—Omoi rucaicueriñeno. Naimie cajede. Jafaicina nia faite.

¹¹ Abido a jaidimaci. Jesús fodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide.

¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³ Pablodí Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai.

¹⁴ Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai.

¹⁵ Nainomona dane monailaido cai jaillano, ie areruido Quío railla nairaimo ruicafelbellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai.

¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla eniruemo naimie are iacaiñena jira, Pablo começina facade: “Efeso ecido monailaido jaiticai”.

Efesomo ite creyentiai sedarainimo Pablo llua rafue

¹⁷ Creyentiaina sedarainina uaidollena, Miletomona Efesomo Pablo cartana orede.

¹⁸ Naimie dine naimaci rillanona, Pablo naimacimo llote:

—Asiamo nano cue rillarui mona, niесе omoi diga nagarui cue illana uiñotomoi.

¹⁹ Cai Nama diga abina iedoñoeno maijuidicue. Eecana sure maijidicue. Judíuai cuena duere uiñodosia jira, ie facaiseconi dueredicue.

²⁰ Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoina llofueuidicue. Omoi jofuemo omoina jiai llofueuidicue.

²¹ Judíuaina llofueticue. Judíuaiñedinona daje isoi llofueticue. Jusiñamui dibeimo omoi comeciai iuaina meiduana lloticue. Cai Nama Jesúna omoi inuana jiai lloticue.

²² Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue;

²³ iadedi Jusiñamui Joreño naga nairaímo cuemo llote: “Llaveracomo ona gaitajano ona jonesiite. Duere sefuitio”.

²⁴ Cue ille dinori are illemo comecina facañedicue. Dama cue ille dinori fuidoiacadicue. Cai Nama Jesúmona cue feiñoaga maijiana fuidoacadadicue. Mare rafuena omoimo lloiacadicue. Jusiñamui omoina duenaillana jiai lloticue.

²⁵ Jusiñamui anamo omoi illa rafuena omoimo jai lloticue. Jai dane cue uiecona cioñeitomoi. Iena uiñoticue.

²⁶⁻²⁷ Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue comeci mare. Jusiñamui uaido omoi jaiñenia, cue muidonañeite.

²⁸ Mai omoi abi rairui. Jusiñamui Joreñodi omoina creyentiaina sedatate. Naimacina raise seda. Jusiñamui dibeimo itinona llofue. Naimie Jito fiodailla muidona, naimacina ote, naimie iena.

²⁹ Naimacidi toica llaudaiai isoidimaci. Nia abina raise uiñoñedimaci. Cue jailla meinoconi, taino llorainidi, janallari isoi, omoimo biite. Naimaci nana omoi sedaca cominina ramo faite, danomo abido naimaci jaillena, jiconiai llaudaiai gaitaja isoi.

³⁰ Omoimona uanañedinona llorainidi iite. Creyentiaina ramo faitimaci, omoi llucacinona fainonocaillena, naimaci dibeimo illena.

³¹ Ie jira abina rairui. Bie rafuena feitañoeno. Daje amani fiemona nana omoina jai llofueticue. Naiona omoina llofueticue. Aremona omoina jiai llofueticue. Omoina cue duenaillamona, eianona omoina llofueticue.

³² Mai. Cai Nama illa anamo omoina fainonocaiticue. Naimie uaimona naimie omoina duenaillana jai uiñotomoi. Naie uaidi omoina jiai ocuiñotaite. Iemona Cristona inocana jaitomoi. Nana naimie fetocano diga naimie illanomo ico jaca iitomoi.

³³ Jiaíno ie ucubena jaca nicidoñedicue. Bu ie iniroillaina jaca jiai oiacañedicue.

³⁴ Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoidi uiñotomoi.

³⁵ Iese cue illamona omoina llofueticue. Iese maijiano duerede cominina canocana jaiacadicaí. Cai Nama Jesús ie llogacinona uiñoticaí. Naimie raite: “Raruiaina cai feiñoia, iobidicaí; iadedi cai eo iobiacania, jiaíno mo raruiaina fecadicaí”.

³⁶ Naie llua meino, naimaci diga caiñici ifodo rainadajano, Jusiñamuimo jiide.

³⁷ Nana naimacidi eo eedimaci. Pablona caimaduanona, naimiena llibanotimaci.

³⁸ “Cuena dana cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicaí. Cos railla nairaímo atona jaidicaí. Ie are Rodas railla uiasimo ridicaí. Iemei Pátara railla nairaímo ridicaí.

² Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí.

³ Chipre railla uiasina cai ciojia, cai nabei dibeimo ite. Iemei Siria railla eniruemo jaidicaí. Tiro railla nairaímo sijidicaí. Botedo uiga raruiaina nainomo joneacadimaci.

⁴ Tiromo ite creyentiaí caí baillanona, siete digarui naimaci diga iticaí. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate.

⁵ Digarui illa meinomo oni jaidicaí. Naie nairaimona nana naimaci caí diga jaidimaci. Riñoniaí, naimaci uruiaí diga, jaidimaci. Caiñici ifodo monailai fuemo ana rainadajano Jusiñamuimo jiidicaí.

⁶ Naimaci facadua meinoconi, botemo jaidicaí. Naimaci imaci jofuemo abido jaidimaci.

⁷ Tiromona Tolemaida railla nairaimo jaidicaí. Creyentiaína uaiduano, darui naimaci diga iticaí.

⁸ Ie are jaillano, Cesareamo caí ria, Felipe jofomo jaidicaí. Felipedi Jesucristo ie rafuena lloraima. Jerusalémo diáconuaina creyentiaí jaie fetua facaise, Felipena fetodimaci.

⁹ Naimie dinomo fiebidicaí. Naimiemo cuatro jisa ite. Naiñaiñuái nia iima abina uiñoñede. Jusiñamui naiñaiñuaimo llucacina llocabitimaci.

¹⁰ Digarui nainomo caí illamo Judeamona damie bite. Naimie mameci Agabo. Jusiñamui facaina lloraima.

¹¹ Caímo ria, naimiedi Pablo cinturóna aiñode. Naie diga ie eillina maite. Ie onollina jiaí maite raillano:

—Jusiñamui Joreño raite: “Jerusalémo judíuai illaicomini bie cinturón jainaide imana daje isoi maítimaci. Judíuaiñedinomo naimiena fecajitimaci” raite.

¹² Naiena caí cacajano, naie comini diga, Pablona caididicaí, naimie Jerusalémo jaiñellena.

¹³ Pablo uai ote:

—¿Bue ñellena eedomoi? ¿Bue ñellena cue comecina ocuiñoñañedomoi? Cue maiana jaca jitaidicue. Ua cue fiodaillana jaca jiaí jitaidicue. Cue Nama Jesús muidona cue fiodaiadedi, damamai fiodaiticue.

¹⁴ Caí lloga uai naimie iñoñena muidona, raiticaí:

—Caí Nama jitaille rafuena finuana jitaidicaí. —Iemei llucaidicaí.

¹⁵ Nano nigarui illanona, caí raruiaina finuano, Jerusalémo jaidicaí.

¹⁶ Cesareamo ite creyentiaimona jiaíno caí diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

¹⁷ Jerusalémo caí ria, creyentiaídi caina caimare uaidotimaci.

¹⁸ Ie are Pablo, caí diga, Jacobo dine jaide. Nana creyentiaína sedaraini nainomo jai ofidimaci.

¹⁹ Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedino creyentiaína jaidimaci —llote.

²⁰ Naie rafuena cacajano, Jusiñamuimo iobillacina fecadimaci. Iemei naimiemo llotimaci:

—Ama, ero, judíuaiimona ailluena comini jai creyentiaína jaidimaci; ia nana naimaci Moisés micori llogacino do eo jaidimaci.

²¹ O finoca rafuena jai fididimaci. Ona comini ñaiana jai fididicaí. Jiaie nairai motomo ite judíuaina Moisés micori llogacina fañonocaillana llofuetio. Naimaci uruiaí abina deñenana llofuetio. Moisés micori llogacinuaido jaiñellena llofuetio.

²² Ie jira ¿niese nibaiticaí? O rillana jai fididimaci.

²³ Ie jira omo caí lluaña fino. Caí ecimo cuatro iima jai ite. Nie isoide rafuena Jusiñamuimo jai llotimaci.

²⁴ Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaína naimaci facaina

iba. Naie rafue omoi fuiduanona, omoi ifogina rijiruda gareitomoí. Ie mei nana comini mare rafuena o finocana jaillana uiñoitimaci. Moisés micorí llogacinodo o nia jaillana uiñoitimaci. Iese omo lloiacadicaí.

²⁵ Judíuaiñedino Moisés micorí llogacinodo jaillena lloñeiticai. Naimacimona creyentiaína jaidinomo navui cueticai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede ima diga iñeno” cueticai.

²⁶ Pablo “Jee” raillanona, nai cuatro ima diga ie are Moisés micorí llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamiái rana fecajaruina jiaí lote. Siete digarui illanona, Moisés micorí llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillai fuiacanuillaímo Asiamona damierie judíuaidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona,

²⁸ cuiridimaci:

—Caímaci, caína cano. Bimie naga illanomo llofuiamona, cominina raise itatañede. Moisés micorí llogacinuaido jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciodimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana maraiñede.

³⁰ Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci.

³¹ Pablona meineiacania, soldaduai ie comandantedi nana comini ieillana fidide.

³² Ieconí naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana faínonocaidimaci.

³³ Comandante naimiemo iaíreicaia, Pablona gaitade. Naimiena mena lloeo diga maillena lote. Jicanote:

—¿Bu naimiedi? ¿Bue ñete?

³⁴ Nana íeídnodi jiaíforie llotimaci. Ie jira naie rafuena naimie jaca uiñoñede. Ie muidona cuatello naimiena uillena lote.

³⁵ Cuartel tidabacuimo naimaci ría, comini jarire jailla jira, soldaduai Pablona uitimaci.

³⁶ Ailluena comini racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartello jaiacania, Pablo comandantemo lote:

—O diga ñaiacadícue.

Raijicaillamona, naimie uai ote:

—Griego uaido ñaitio—

³⁸ Jiaí lote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedícue. Judío imiedícue. Ciliciamo ite Tarso railla nairaimona bitícue. Naie nairai mamecidi are soride. Cominimo cue lollena, omo jicanoiacadícue.

⁴⁰ —Jee —raite. Pablo tidabacui muidomo naidaide. Cominina llícaitallena, ie onollina jaidide. Comini llícailla mei, Pablo judíuai uaido naimacimo lote:

22

¹ —Caímaci, einamací, cue abi riiduacínomo mai omoi cacarei.

² Naimie judíuai uaido lluana naimaci cacajano, llicaidimaci. Ie jira Pablo llote:

³ —Judío imedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue.

⁴ Jesucristo inotinona jaie eo duere finodicue. Diga creyentiaina maianona, cárcelmo joneticue. Iñiaina duere finodicue. Riñoniaina jiai duere finodicue.

⁵ Jusiñamui diga nanoca ñairaima cuena uiñote. Nana omoi illaicomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidicue, nainomo ite creyentia maiano, Jerusalémo atianona, naimacina duere finollena.

*Pablodi Jesúna inuana llua rafue
(Hch 9.1-19; 26.12-18)*

⁶ Omoimo bie rafuena lloiticue. Jerusalémona jaidicue; iadedi Damascomo cue iaireicaia, jítoma naidai iacania, ieconi monamona damie cue abina eo quetiñote.

⁷ Eniruemo ana uaidicue. Monamona damie cuemo lluana cacadicue: “Saulo, Saulo, ¿bue ñellena cuena duere finodio?”

⁸ Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”.

⁹ Cue diga itinodi cue quetiñua rana cioidimaci; iadedi cue diga ñaitimiena cacaiñedimaci.

¹⁰ Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

¹¹ Cuena eo quetiñua jira, cioñedicue. Cue diga itino cue onollido llinocaida, Damascomo cuena uitimaci.

¹² Nainomo Ananías raillamiedi ite. Jusiñamuina eo inote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci.

¹³ Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena ciodicue.

¹⁴ Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareillena.

¹⁵ Nana cominimo naimiena lloitio. Nana o cúa rafuena lloitio. Nana o cacaja rafuena jiai lloitio.

¹⁶ Mai cue lluana ino. Naidadajanona, o jeacino oni dotallena, Jusiñamuimo jica. Ie mei bautiza” raite.

Judíuaiñedinomo Pablo jailla llua rafue

¹⁷ Ie mei Jerusalémo abido cue billa mei, Jusiñamui jofomo Jusiñamuimo cue jia, nicairiticue isoidicue.

¹⁸ Cai Namana ciodicue. Cuemo llote: “Jerusalémona raire mai jai. Cominidi o cuena lluana feiñoñeitimaci”.

¹⁹ Uai oticue: “Nama, naga judíuai ofiracomo ona inotinona fauidicue. Cárcelmo naimacina joneuidicue. Nama, Jerusalémo itino iena uiñotimaci.

²⁰ Esteban micori fiodailla facaiseconi nainomo iticue. Naimie o facaina lloraíma. Naimie fiodailla jira, iobidicue. Naimiena meinetino iniroina sedadicue”;

²¹ iadedi cue Nama cuemo llote: “Mai jai. Judíuaiñedinomo ona are oretaiacadicue”.

Comandante anamo Pablo illa rafue

²² Bie lloga dinori comini Pablo lluana cacadimaci. Iemei cuiiriidimaci:

—Bie isoide ima illana benomo jitaiñedicaí. ¡Naimiena meine!

²³ Cuirillamona naimaci iniroina jaidisite. Icirisiano eniruena jiai fadosite.

²⁴ Judíuai uaido cominimo Pablo llua jira, comandante iena cacaiñede; iadedi comini icirillana cüanona, naimie llote:

—Naimiena cuartelmo uiño. Naimiena fano. Naimiemo ite rafuena caimo naimie lollena, naimiena duere fino.

²⁵ Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiena fajana mare? Romano nairai imiedicue.

²⁶ Capitán iena cacajano, comandante dine jaide. Iena llote. Jicanote:

—¿Ñiese nibaiticai? Bimie romanuai nairai imie.

²⁷ Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

²⁸ Comandante dinena raite:

—Romanuai nairai imiena cue jaillena, eo ibadicue.

Pablo uai ote:

—Romanuai nairai imiena jeicigacue.

²⁹ Ieconí naimiena duere finoacadino naimiemoná raire oni jaidimaci. Pablo romanuai nairai imiena jira, naimiena jai ebena maia jira, comandante jiai jacinaite. Comecina nibai facade: “Iese naimiemo cue finua jira, ie ibana ollena, cue illaimamo cuena jiai llogidoite”.

Illaicomini motomo Pablo illa rafue

³⁰ Comandantedi judíuai Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judíuai illaicomini diga, ofillena llote. Pablona atiano, naimaci motomo uillanona, naimiena naidanete.

23

¹ Ie abina riidollena, Pablo naie judíuai illaicomini motomo ite. Naimacimo eruaillano, Pablo raite:

—Caímaci, cuemona nana cue illa dinori Jusiñamui jitailla rafuena finocabidicue. Naimiemoná cue comeci mare.

² Ananíadi Jusiñamui diga nanoca ñairaima. Pablo lluana naimie gaiñenamona, Pablo ecimo itinona Pablo fuena farotate.

³ Pablo dinena naimiemo llote:

—Jusiñamui o fuena faroite. Mareuidimiena abina caitadio. Moisés micori llogacinuai muidona benomo itio, cuemo lollena; iadedi cue finoca rafuena raise o uiñoñoeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iena jaie cuiana uiñoticue. “Illaicominina jeare ñaiñoeno” cuete. Caímaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

⁶ Cominimo Pablo eruaillamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caímaci, fariseo imiedicue. Fariseo imie jitodicue. Fiodaillamona ico jilluacínomo ocuiriticue. Ie jira bene cuena llogidoiacadomoi.

⁷ Naimie iena lloia, naimaci comeci daije isoi lloñedimaci.

⁸ Saduceuai cominidi fariseuai comini isoi ñnoñedimaci. “Fiodaillamona jilloñeiticai” saduceuai comini raillana ñnoside. “Jusiñamui jaienisaí ññede. Comini joreñuai ññede” raillana ñnoside; iadedi fariseuai comini dinena nana naie rafue illana ñnotimaci.

⁹ Ie jira eo failliñaidimaci. Fariseuai motomona jiaíno naidadajanona, llote:

—Bimiemo jeacino ññede. Jusiñamui jaienici naimiemo nibai jaie lluaamona, bie rafue naimiemo ite.

¹⁰ Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena llote.

¹¹ Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

Pablona meineiacana rafue

¹² Monaidemo, judíuaimona jiaíno comeciaina facadimaci: “Pablona nia cai meineñenia guiñeiticai. Jiroñeiticai”.

¹³ Cuarenta baífemo ite comini iese comeciaina facadimaci.

¹⁴ Naimaci judíuai illaicomini dine jaillano, raitimaci:

—Dani comeciaina facadicaí: Pablona nia cai meineñenia, jaca buena guiñeiticai.

¹⁵ Omoi dine Pablona atillena, naimiemo eo raise jicanua isoi, comandantemo jicano. Pablo iaírei bia, naimiena cai meinellena, ocuidoiticaí.

¹⁶ Pablo enaise naie rafuena fidiano, cuartelmo jaide, Pablomo llollena.

¹⁷ Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

¹⁸ Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹ Naimie onollina comandante llínocaida, bai ie atianona, naimiemo jicanote:

—¿Bue cuemo lloiacadio?

²⁰ Naimie uai ote:

—Íco are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci.

²¹ Naimaci jitailla isoi finoñeno. Cuarenta digamie baífemo naimiena reiduanu sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruena facaduanu raite:

—Jaca bumo cuemo o llua lloñeno.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaido, imaci raruaí finollena, Cesareamo navuida baífe imaci jaillena. Setenta caballuaido jaitino uaido. Doscientos ducirainina jiai uaido.

²⁴ Jiaíe caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote.

²⁵ Cartana jiai cuete. Iese cuete:

²⁶ “Félix, omo cueticue. Claudio Lisiásdicue. Cai mare gobernador dio. ¿Nigacino? Cue uai o dine oredicue.

²⁷ Damie o dine oredicue. Judíuai naimiena meineiacana jira, soldaduai diga naimiena gaitaticue. Naimiena gaitataja mei, naimiedi romanuai nairai imienana fididicue.

²⁸ Judíuai illaicomini dine naimiena uiticue, naimaci llogiduacinona raise cue uiñollena.

²⁹ Naimaci einamací llogacínuaí muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue.

³⁰ Jiaíno naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiai lloiticue. Naimaci naimiena omo lloitimaci” cuete.

³¹ Comandante llua isoi, soldaduai naiona Pablona Antípatrismo uitimaci.

³² Íco are eillido jaide soldaduai cuartelmo abido bitimaci; ia Pablo caballuaido jaidino diga oni jaide.

³³ Cesareamo railla nairaimo rillanona, gobernadormo cartana fecadimaci. Naimie dine Pablona jiai uitimaci.

³⁴ Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵ Gobernador dinena raite:

—O llogidotino bia, o rafuena cacajiticue.

Soldaduaïmo jiaï llote:

—Omoi anamo Herodes railla illaïma micori jofomo naimïena seda.

24

Félix dine Pablo riidua rafue

¹ Dabecuirorui illa mei, Ananías bite. Naimiedi Jusiñamui diga nanoca ñairaima. Jiaïe illaïcomini diga bite. Tértulo raillamïe jiaï bite. Naimiedi llogidoraïma. Gobernadormo Pablona llogiduaibitimaci.

² Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimïedio. O muidona eo uri iticai. Cai nairaina canollena, diga mare rafuena finodio.

³ Iobillamona, nana cai iena feiñoticaï.

⁴ Ona iciacaiñedicue; iadedi o fue maria jira, cue lluomo dallu cacarei.

⁵ Bimiedi eo cai abina aruire finode. Nana enïruemo ite judíuaina uri itatañede. Naimiedi Jesús raillamïe rafuedo jaidino illaïma.

⁶ Jusiñamui jofona jeare naimïe finoiacana jira, naimïena gaitadicaï. Moisés micori llogacinuaido naimïena duere finoacadicaï;

⁷ iadedi comandante Lisias ride. Caïmona naimïena riire bairode. Naimïena cai llogidollena, o dine cai billena caïmo llote.

⁸ Pablomo o jïcanoïacania, naimïemona bie rafuena uiñoitio. Nana naimïena cai llogiduacinona uiñoitio.

⁹ Judíuai illaïcomini, Tértulo llua isoi, dacinodo llotimaci.

¹⁰ Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue.

¹¹ Doce digarui illanona, Jerusalémo como birui ridicue. Iena uiñoiacadiosa jiaïe cominimo jïcano. Jusiñamuina sedallena, Jerusalémo iticue.

¹² Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiaï uaitañedicue. Naisomo uaina jiaï uaitañedicue. Cominina uri itatañenana lloñedicue.

¹³ Nie isoide rafuena cue finuana cioiñedimaci. Ie jira cuena raise llogidonidimaci;

¹⁴ iadedi jiaïe rafuena lloiticue. Cai usumatiaï Jusiñamuina sedadimaci. Naimïena jiaï sedadicue. Nana Moisés llogacinuaina ñnoticue. Nana Jusiñamuina lloraini micriaï cuegafuaina ñnoticue. Bimacimona jiaïe llogacinuaido jai jaidicue. Bimacimona uanañedicinodo jaidicue.

¹⁵ Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiaï jilloitimaci. Beno itino iena jiaï ñnotimaci.

¹⁶ Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena.

¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiaï sedajabidicue.

¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue.

¹⁹ Naie facaise Asiamona jiaïe judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena?

²⁰ Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci.

²¹ Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²² Félixdi Jesús dibeimo itino rafuena raise uñua jira, Pablo rafuena nairuido siadoia-cañede.

—Comandante Lisias bia, dane omoi rafuena siadoiticue —raite.

²³ Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairuiñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiaimaiai. Jesúsna ñnuana cacadiiaimaiai.

²⁵ Jeacino finoñellena, dama ie jitailla rafuena finoñellena, jiairuido Jusiñamui riicaillafue anamo iñellena cacadiiaimaiai. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

²⁶ Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena.

²⁷ Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fañonocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide.

² Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci.

³ Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci.

⁴ Festo uai ote:

—Pablo Cesareamo fiebiite. Raire nainomo abido jaiticue.

⁵ Omoi illaicomini mona damerie cue diga jaitimaci, nicino naimiemo ia, naimiena llogidollena.

⁶ Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote.

⁷ Pablo billa mei, Jerusalémona bite judíuai naimie ecimo ofidimaci. Diga fododiconona naimiena llogidotimaci; iadedi tainuaido llogidotimaci.

⁸ Pablo uai ote:

—Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹ Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

¹⁰ Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue llole. Judíuaimo jaca buena finoñedicue. Iena raise uñotio.

¹¹ Romanuai railla nairai illaicomini llogacinona cue ñnoñenia, damamei jearede rafuena cue finoa, cue fiodaillamo jaca ocuridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima dine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaimaiai. Agripadi naie enirue illaima.

¹⁴ Diga irui nainomo itiaimaia. Naimiemo Festodi Pablo ie rafuena llote:

—Félix Pablona cárcelmo bene fañonocacue.

¹⁵ Jerusalémo navui cue ia, Jusiñamui diga nanoca ñairaimadi, judíuai einamací diga, naimiema llogidote. Naimiema duere finollena cuemo jicanotimaci.

¹⁶ Naimaci uai oticue: “Cai Romanos cominidi llogidogamiema jamai tainomo duere finoñedica; iadedi llogidogamiedi ie llogidotino uai nano cacareitica. Ie mei ie abi riidollicinomo jiai cacareitica”.

¹⁷ Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue.

¹⁸ Naimiema llogidotinodi lloia, naimiema marañede finoca rafue cue facaja isoi, llogidoñedimaci.

¹⁹ Dani naimaci ñnuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite.

²⁰ Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”;

²¹ Iadedi Pablo nainomo jaiacañede. Cai nanoca illaima dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaima dine naimiema cue nia oretañenia.

²² Agripadi Festomo llote:

—Naimie ñaiana cacaacadicue.

Festo uai ote:

—Ico are naimie ñaiana cacareitio.

²³ Ie jira ie are Agripa, iaimaia Berenice diga, gobernador ofiracomo bitiaimaia. Finobillano ebire bitiaimaia. Soldaduai imaci illaicomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote.

²⁴ Festo llote:

—Agripa, nana beno itino, bimiema ciodomoi. Jerusalémo ailluena judíuai naimiema llogidotimaci. Bene cue dine jiai bitimaci. Naimie meiniana eo jitaidimaci;

²⁵ Iadedi naimiemo nicinodi iñenana jai uiñoticue. Naimiema meinellena cue llollena, nicinodi naimiemo iñede. Augusto dine naimie jaillena naimie jicanua jira, naimiema oretaiticue.

²⁶ Nicinodi nia iñede, cai illaimamo cue cuellena. Ie muidona omoi dine naimiema jai atidicue. Agripa, naimie ñaiamo raise cacarei. Naimiemo cai jicanua mei, nibai nicino naimiemo illana uiñoitica. Iemona Augustomo cueitica.

²⁷ Augusto dine llavecamié cue oretaia, naimiemo nicino iñenia, cuemona marañede.

26

Pablo ie abina dane riidua rafue

¹ Naie facaise Agripa Pablomo llote:

—Mai llono. O abi riiduacinona cacaacadicue.

Pablo: “J#” raillanona, ie onolli a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoiticue. Judíuai cominidi diga rafuena cuena llogidotimaci.

³ Nana cai judíuai rafuena raise uiñotio. Nana cai einamací rafuena jiai uiñotio. Cuemo raise cacarei.

⁴ Jerusalémo naimaci motomo cue illa jira, diga judíuai cue coniruenamona cuena uiñotimaci.

⁵ Cuena naimaci lloiacania, fariseo imiema cue illana are uiñotimaci. Jiaie comini baifemo fariseuaidi cai einamací llogacinuaina ñnotimaci.

⁶ Jusiñamuidi cai usumatiai micoriaimo fiodaillamona comini ico jilloillena jaie llote. Ie suillemo jai ocuridicue. Ie jira llogidoracomo birui jai iticue.

⁷ Nagarui Jusiñamuina naimaci eo sedajamona, cai doce nairaidi naie llogacino suillemo jiai nia ocuridimaci. Ore illaïma, bie ocurillacino muidona judíuai illaïcomini cuena llogidotimaci.

⁸ ¿Bue ñellena Jusiñamuidi comini fiodaillamona jillotajana ñinoiacaiñedomoi?

⁹ Jaie ie isoidicue. Nazaret ie Jesúna ñnotinona diga jearede rafuena jaie finoacadicue.

¹⁰ Jerusalémo iena finodicue. Cárcelmo ailluena Jesúna ñnotinona joneticue. Jusiñamui diga nanoca ñairaini uaido iena finodicue. Naimacina meinelle cai illaïcomini raia: “Jee” raisoidicue.

¹¹ Diga judíuai ofiracomo, diga icaiño, naimacina duere finodicue. Naimaci Jesúna jeare ñairana jitaïdicue. Naimaci diga cue eo icirilla jira, jiaie eniruemo ite nairaimo jiaï jaidicue, naimacina duere finollena.

*Pablodi Jesúna ñnuana llua rafue
(Hch 9.1-19; 22.6-16)*

¹² Te jira Damascomo jaidicue. Jusiñamui diga nanoca ñairaini uaido jaidicue.

¹³ Ore illaïma, jitoma naidai ia, monamona quetiñotena ciodicue. Naidi jitoma baifemo quetiñote. Cue abina quetiñote. Cue diga itino abina jiaï quetiñote.

¹⁴ Eniruemo cue ana uaia, damie lluaana cacadicue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, ricacillamona raise maiga jurareta suiñoacana isoi. Ie isodio. Ricacillamona, cuena duere finoacadio”.

¹⁵ Uai oticue: “¿Budiota?” Cai Nama cuemo llote: “Jesúdicue. Cuena duere finodio.

¹⁶ Mai a naidacai. Cue rafuena o llofuellena ona fetodicue. O birui cïua rafuena lloitio. Ona cue uifotalle rafuena jiaï lloitio.

¹⁷ Naimaci ona duere finoia, omoi cominimona ona jillotaiticue. Judíuaiñedinomona ona jiaï jillotaiticue; iadedi judíuaiñedino dine ona oretaiticue,

¹⁸ naimaci comeciai tainomo ñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitedinomo jai itimaci isoidimaci. Jusiñamuina uifnuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci ñnuamona, nana cuena ñnotinono diga cue illano ico jaca iitimaci”.

¹⁹ Ore Agripa, monamona cue cacaja rafuena ñnoticue. Jesúdi Jusiñamui Jitona ñnoticue.

²⁰ Damascomo itinomo iena nano lloticue. Ie mei Jerusalémo itinomo iena jiaï lloticue. Diga Judeamo itinomo iena jiaï lloticue. Judíuaiñedinomo iena jiaï lloticue. Lloticue: “Omoi comeciaino iticinona meido, Jusiñamui dibeimo omoi illena. Omoi comeciaino iticinona omoi meidua mei, mare rafuena finocana jai”.

²¹ Ie jira judíuai illaïcomini Jusiñamui jofomo cuena gaitadimaci. Cuena meineiacadimaci;

²² iadedi Jusiñamui cuena canode. Ie jira birui bene iticue. Illaïcominimo beno nia lloticue. Illaïcominiñedinomo jiaï nia lloticue. Dama Jusiñamui facaina lloraini micoriaï ico suille ciegafuena birui lloticue. Dama Moisés micori ico suite ciegafuena jiaï birui lloticue. Jiaie rafuena lloñedicue.

²³ Jaie cuetimaci: “Cristo legi cacajite. Fiodaillamona jilloite. Naimiedi nano dofoconi jilloitimie. Iemona cai judíuai comini jeacinomona jilloillena uifnoitimaci. Iemona judíuaiñedino jeacinomona jilloillena uifnoitimaci”. Ie jira bie rafuena llocana jaidicue.

Creyentena Agripa jaillena Pablo jitailla rafue

²⁴ Iese Pablodi abi riiduano, Festo riire llote:

—Pablo, odi uairico isodio, eo comecina o facaja jira.

²⁵ Pablo uai ote:

—Uairicoñedicue. Festo, odi cue illaimadio. Cue llucacnodi uanaicino. Ebena ñaiñaiacaiñedicue.

²⁶ Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede.

²⁷ Ore Agripa ¿Jusiñamui lloraini ciegafuiaina inotio? omo jicanoticue. Iena o inuana jai uiñoticue.

²⁸ Agripa dinena uai ote:

—Dallu o ñaiamona, cuena creyentena nibai itataiacadio.

²⁹ Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lleo diga maiana jitañedicue.

³⁰ Iemona Agripa naidacaide, Festo diga, Berenice diga. Nana raidino jiai naidacaidimaci.

³¹ Jino jaillano, Pablo joreñona siadotimaci:

—Bimie jaca buena finoñede, naimiena cai meiniana lollena. Buena finoñede, cárcelmo illena.

³² Agripa Festomo llote:

—Naimie cai nanoca illaima dine jaillana jicanoñedena, niadedi naimie jino marena oreca.

27

Romamo Pablo jailla rafue

¹ Italiamo Augusto dine Pablo oretajana Festo llua mei, Pablona jiaie llavecana diga capitámo fecade. Naie capitádi Julio. Augustona mameciredede batallómo jainaiaide.

² Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai.

³ Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote.

⁴ Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai.

⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia.

⁶ Naie bote Roma dine jaiñena jira, capitádi jiaie botena jenode. Capitádi Alejandro bote botena baite. Naie bote Italiamo jaiacade. Ie jira naie botemo cai jonecaida, caina uite.

⁷ Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai.

⁸ Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jaciredede. Ie jira botemo maijadinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticai. Botena jiai nibai faifiticai. Cai nibai jiai faifiticai —llote.

¹¹ Iese llote; iadedi naie bote piloto oni jaiacade. Naie bote nama jiai oni jaiacade. Capitán iaimaiai llua Pablo llua baifemo inote.

¹² Igobe maraiñena jira, rollime facaise illa jira, ailluena comini nainomona jaiacaidimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide.

13 Beici dinena aifidi bia, “cai jitailla aifidi bite” raillanona, suiñodicaí. Creta iairei monaillai fuemo jaidicaí.

14 Ie mei raire cai dine eo riire aifi bite. Naie aifi noci deisoilla dinena bite.

15 Botena oni uite. Botena atona eronenidicaí. Ie muidona jamai ebena jaidicaí. Aifidi caina iese uite.

16 Janorede uiasi fuemo aifi raise iñenanomo jaidicaí. Nai uiasi mameci Claudia. Faiñellena bote ie janorede nocae sefuire a aiñodicaí.

17 A aiñua mei, rao diga botena ruica maíticaí. Sirte railla conillie illanomo cai joodai raillano, velaiana duiñodicaí. Iemei aifi jamai uigacaí.

18 Ie areruido aifi riire illa jira, cargana oni dotadicaí.

19 Dane ie are bote ie raruiaí, cai onolli diga, oni dotadicaí.

20 Diga irui jitoma bainide. Diga irui ucuaí jiaí bainide. Aifi eo riire nia ite. Cai jillobiñellemo jai ocuiriñedicaí.

21 Diga irui cai guiñena mei, Pablo naimacimo llote:

—Nabaiñiaí, cue uaina navui ñnotiomoidena, niadedi bie isoi sefuiñedicaí. Cretamo cai fiebidicaina, bie isoi sefuiñedicaí.

22 Omoi comeciaina ocuiño. Bie botedi faifite; iadedi caimona jaca buna faifiñeite.

23 Jaive naiona Jusiñamui jaienicií cuemo bairedede. Jusiñamuimo jainaiadicue. Naimiena sedadicue.

24 Naie jaienicií cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenailla jira, nana o diga jaidino jilloitimaci”.

25 Ie jira omoi comeciaina ocuiño. Cuemo llua isoi, naimiedi bie rafuena suiteite. Jusiñamui iena finuana ñnoticue.

26 Nibaí uiasimo jutadaiticaí.

27 Catorce digarui naio illamona, Adria railla monaillaimo jamai cai jaia, naiona daferui facai marineruaidi: “Enirue iaire ite” raillanona comeciaina facadimaci.

28 Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede.

29 Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci.

30 Naie facaise marineruái botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

31 Iena ciuano, Pablo capitámo llote. Soldaduaímo jiaí llote:

—Botemo bimaci fiebiñeniadedi, jilloñeitomoi.

32 Ie jira soldaduaídi nocae maía raona jaitadimaci. Jai dinomo nocaena faínonocaidimaci.

33 Nia monaiñenia, Pablo nana caímo llote:

—Guiño. Catorce digarui illanona, jai guiñedomoi.

34 Ie jira guiño, omoi maírillesa. Ua faifiñeitomoi.

35 Iese naimie raillanona, Jusiñamuimo iobillacinona fecade, nana comini illa uicomo. Llomenicono tairuano, guite.

36 Nana naimaci comeciái ocuiñocaida, jiaí guitimaci.

37 Botemo doscientos setenta y seis diese iticaí.

38 Cai monillamona, fiebide trigona monaillaimo oni fadodicaí, bote meenaiñellena.

39 Ie oni monaidemo, erodatemo, naie eniruena uiñoñedicaí. Igobermo conillici illana ciódicaí. Nainomo jamai ebena sijiacadicaí.

40 Ie jira lloelluna nainomo oni faínonocaidicaí. Datarabe maiana suiñodicaí. Vela aifimo sebiñoticaí. Monaillai fuemo enirue dine jai jaidicaí.

41 Iemei jaiciridifomo ridicaí. Eniruemo jodate. Bote muido eniruemo jaiáire jodate. Eo baguamona jillaci taicosite.

42 Naimaci íamona jillobi raillano, soldaduaí llavecana meineiacadimaci.

⁴³ Pablona jillotaiacana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai.

⁴⁴ Jiaíno bote ie rabicido juicaida icana jai. Jiaíno bote ie raruiaido juicaida icana jai.
—Iese eniruemo nana marena ridicai.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñoticaí.

² Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci.

³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide.

⁴ Jaio naimie onollido lliillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede.

⁶ Comeciaína facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaína facajano raitimaci:

—Naimiedi ñibai Jusiñamui.

⁷ Naie illanomona uiasi illaima enirue iaie ite. Naimie mamecidi Publio. Caina marena feiñote. Darui amani ie jofomo caina marena itatate.

⁸ Publio moo duide bide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate.

⁹ Bie rafue suilla jira, naimie dine nana uiasimo ite duidino bi-bidimaci. Naimacina jillotate.

¹⁰ Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹ Daje amani fivui illa mei, Alejandríamona bite botedo jaidicai. Naie uiasimo nana rollime facaiseconi naie bote ite. Mena jusiñamui iaímaiaí joreño bote muidomo ite. Damie Cástorna mameciredede. Jiaímie Póluxna mameciredede.

¹² Naie botedo oni cai jaillanona, Siracusamo sijidicai. Darui amani nainomo iticai.

¹³ Nainomona jaillano Regiomo sijidicai. Darui illa mei, aifi beici dinena billa jira, ie areruido Puteolimo ridicai.

¹⁴ Sijia mei, nainomo creyentiaína baiticai. Naimaci diga siete digarui cai illana jitaídímaci. Ie mei Roma dine jaidicai.

¹⁵ Romamo nia cai riñenia, nainomo ite creyentiaí cai billana fididimaci. Cai dine bitimaci. Foro de Apio railla nairaimo damierie bitimaci. Jiaíno Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiaí ocuiñote. Cai diga Romamo jaidimaci.

¹⁶ Romamo cai ria, capitán llavecanona ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisii raillano, daje soldado nainomo naimiena sedade.

Romamo Pablo llofuia rafue

¹⁷ Darui amani illa mei, Pablo Romamo ite nanoca judúuaina uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacínuaína jaca iñoticue;

¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira;

¹⁹ iadedi judíuai: “Dama ite” railla jira, cai nanoca illaíma dine jaillena jicanoticue; iadedi cue nairai diga jaca iciriñedicue.

²⁰ Omoi diga ñaillena, omoína cioacadícue. Fiodaillamona ico comini jillollena cue llofuecabilla jira, bie lloeo diga maigacue.

²¹ Uai otimaci:

—Judeamona jiaíno ona cuega cartana jaca feiñoñedicai. Caímo o rafuena lollena, jaca buna biñede. Bene jaca bu ona jeare ñaiñede.

²² Ie jira omona naie rafuena cacaacadícai. Naga illanomo comini o llofuiana uaitajana uiñotícai. Creyentiaína jeare ñaitimaci. Iena fididícai. Ie jira caímo iena raise llono.

²³ Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofujete. Moisés micorí llogacínuaímona, Jusiñamui facaina lloraíni micoríaí cuegafuaímona, Jesúna llofujete.

²⁴ Jiaíno naimie llofuiana ñnotimaci. Jiaíno ñnoñedimaci.

²⁵ Nana naimaci comeciái na daje isoi lloiñedimaci. Iemona oni jaidimaci. Nia jaiñenia, naimacímimo Pablo llote:

—Jusiñamui Joreñodi Isaías micorína cai usumatiaímo raise llotatate. Omoi usumatiaí micoríaí illa isoi nia itomoi. Isaías micorídi omoína jai cuega rafue jai suide. Naimie micorí cuete:

²⁶ Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciái jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisínidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue díbeimo iacaiñedomoi, omoína cue jilloítai raillanona’ ”.

²⁸ Jusiñamui rafuena omoi ñnoñena muidona, judíuaiñedinodi Jusiñamui naimacína jilloítaiacanana jai fididimaci. Naimaci iena cacareítimaci.

²⁹ Iese naimie llua mei, judíuaiídi coniníri siadocana abído jaidimaci.

³⁰ Mena años Pablo ie jofomo ite. Ie illa dinori naie jofona íbauide. Nainomo nana naimie dine bite comínina feiñote.

³¹ Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofujete. Marefodo llofujete. Naimiedi cai Nama Jesucristo rafuena llofujete. Jaca budí naimie llofuiana rairuíñede. Teofilo, jaca dígacino omo jai llotícue. Mai. Lucadícue.

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

¹ Romamo ite creyentiaí, omoi dine cartana oredicue. Pablodícue. ¿Nigacino? Jesucristo díbeimo maijidícue. Jusiñamui fetocamiedicue. Ie mare rafuena cue lollena, cuena orede.

² Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiaí cueda. Iemona birui facacabidicai.

³ Bie rafuedi Jusiñamui Jitona llote. Naimie jaie ite usumadi cai illaíma David micori.

⁴ Naimie Jusiñamui Jitonana uiñoticaí. Jusiñamui Joreñodi siño rafuedo caina iena uiñotade. Jusiñamui Jito fiodaillamona, Jusiñamuidi ie Jitona jillotade. Jusiñamui Jitodi Jesucristo. Cai Nama.

⁵ Caina duenaillanona, caina oretate, naga nairaiaína naimiena hnotallena, naimiena naimaci iobitallena.

⁶ Naimacimona itomoi. Naimiemo omoi duillena, Jesucristo omoi na jai fetode.

⁷ Romamo ite creyentiaí, Jusiñamui isiruiganodomoí. Naimie isoi mareuidinona omoi illena, fetocanodomoí. Cai Moo Jusiñamui, cai Nama Jesucristo diga, omoi na duenaite. Iena uiñocana mai omoi jai. Iaimaiaí omoi na uri jai itatatiiaímaiaí. Iena omoi uiñocana mai omoi jai.

Roma dine Pablo jaiacade

⁸ Diga comini, diga illanuaímo, Jesucristona omoi hnuana jai fididimaci. Ie jira nano dofoconi omoi facaina Jesucristomo iobillacinona fecaacadicue, Jusiñamuimo iena naimie fecallena.

⁹ Jusiñamuimo cue jiaí, omoi ri jidícue. Jusiñamui iena uiñote. Naimie Jito rafuena cue lluanona, cue comecimona naimiena sedadicue.

¹⁰ Jusiñamuimo cue jiaí, naimiemo jicadicue, cuena canollena. Naimie jitaia, omoi dine ja muidomo cue riitícue. Iena jicadicue.

¹¹ Omoi na eo cioacadicue. Jusiñamui Joreño uai cuemo illamona, omoi comeciaina ocuiñotaiacadicue.

¹² Jesucristona omoi hnuamona, naimiena cue hnuamona, coninina cai comeciaina ocuiñotaiticai.

¹³ Cue amatiaí, diga icaiño omoi dine jaiacadicue. Iena omoi uiñuana jitaídicue. Jaiacadicue; iadedi nia jainidícue. Cuemona Jesucristo rafuena cacajamona, dajerie jiaie nairaiaí jai hnotimaci. Omoi dine Jesucristo rafuena lluaiacadicue, iena omoi mona dajerie hnollena.

¹⁴ Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñañedínomo iena jiaí lloiacadicue. Abina uiñotínomo iena lloiacadicue. Abina uiñoñedínomo iena jiaí lloiacadicue.

¹⁵ Ie jira omoi mo Jesucristo rafuena eo lloiacadicue.

Jesucristo rafue siño

¹⁶ Jesucristo rafueri iobidícue. Naie rafuedi siño. Jusiñamuidi naga iena hnotinona naimaci jeacinomona jillotade. Judíuaidino nano iena cacadimaci. Ie mei judíuañedíno iena jai cacadimaci.

¹⁷ Naie rafuemona Jusiñamui caina feiñuana uiñoticaí. Jusiñamui caina marebicaita-jana uiñoticaí. Naimiena cai hnuamona iena uiñoticaí. Jusiñamui facaina lloraima micori jaie cueda: “Jusiñamuina hnuamona marebicaidimiedi Jusiñamui díbeimo ico jaca iite” cueda.

Comini jeacinona finoiadedi, dani naimaci muidona

¹⁸ Nana Jusiñamuina jitañedinodi naimie duere finollifue anamo jai itimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci.

¹⁹ Jusiñamui naimacina naimiena uiñotaja muidona, imaci comeciainona Jusiñamui illana uiñotimaci.

²⁰ Enirue finua facaisemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicaí” rainidimaci.

²¹ Jusiñamui uiñotimaci; iadedi naimie uaina ñnoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificaiñedimaci.

²² “Abina uiñoticaí” raitimaci; iadedi abina uiñoñedimaci. Jamaí ebe isoidimaci.

²³ Jusiñamui jaca ite. Naimie uai siño. Naimiena sedaacaiñedimaci; iadedi jiaie rana sedaacadimaci. Fiodairuide iimana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedavidimaci.

²⁴ Ie jira Jusiñamui naimacina fainonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci.

²⁵ Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

²⁶ Iese naimaci illa jira, naimaci jitailla meirede rafuena finollena, Jusiñamui naimacina fainonocaide. Coniñona aifuedotimaci.

²⁷ Naimaci jitailla jira, conimana aifuedotimaci. Naimaci maraiñede finoca rafuemona duere sefuillemona ibana feiñoitimaci.

²⁸ Jusiñamuina naimaci uiñoiacaiñena jira, maraiñede rafuemo naimaci comeciái fallena, Jusiñamui naimacina fainonocaide. Naimaci finorainiga rafuina finocana jaidimaci.

²⁹ Naga isoide maraiñedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci.

³⁰ Jiaie comini joreña ñaoidimaci. Jusiñamuina jaca gaiñedimaci. Cominina jeare ñaoidimaci. Abina iedoudimaci. Abina biruidimaci. Diga jearede rafuemo comeciaina facauidimaci. Naimaci moo uaina ñnorainidimaci. Naimaci ei uaina ñnorainidimaci.

³¹ Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiaí dueruirainidimaci. Iese jaisoidimaci. Iese nia jaicabidimaci.

³² Jusiñamuidi jiaie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui llwana uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macaí mare iese imaci finua” raitimaci.

2

Jusiñamuidi maraiñede rafuena finodinona duere finoite

¹ Ero, omoi judíuaimona damie comecina nibaí facade: “Bie isoide maraiñede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide maraiñede rafuena naimie finua jira, Jusiñamui naimiena jiaí duere finoite.

² Jusiñamuidi uanaicinona uñuamona, marañede rafuena finodimiena duere finoite. Iena uñoticaí.

³ “Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiaí duere finoite.

⁴ Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie díbeimo o illana naimie jitaide. Naiena jamañeno.

⁵ O comeci jaiarena jira, o comeci Jusiñamui díbeimo meidoiacañedio. Ie jira ico eo duere sefuitio. Ie riicaillifuemona Jusiñamuidi nana naimiena ñnoñedinona duere finoite. Iena Jusiñamui finoia, Jusiñamuimona mare.

⁶ Nagamiiaí imaci finua ille dinori Jusiñamui naimacina duere finoite.

⁷ “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite.

⁸ Marañede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona ñnoñeditimaci.

⁹ Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinono cominina jiaí duere finoite;

¹⁰ iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiaí finoite,

¹¹ naga nairaina daje isoi naimie finua jira.

¹² Judíuaiñedinodi Moisés micori llogacino anamo iñeditimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci ñnoñena jira, jiaí jaca daje isoi duere sefuitimaci.

¹³ Moisés micori llogacinona cacajamona, Jusiñamuimona jaca buna marebicañede; iadedi iena ñnuamona marebicaide.

¹⁴ Judíuaiñedinodi Moisés micori llogacino anamo iñeditimaci; iadedi naimaci comeciaí facajamona, marecinona finuana uñotimaci. Marecinodo jaillana jiaí uñotimaci.

¹⁵ Moisés micori llogacino anamo naimaci illa isoi, naimaci comeciaimona marecinona naimaci finoiadedi, iena uñotimaci. Ie jira marañedicinona naimaci finoiadedi, iena jiaí uñotimaci.

¹⁶ Biena llofuecabiticue. Ico Jusiñamui llua jira, Jesucristodi cominimo imaci comeciaimo iticinona juez isoi lloite. Marañedicinona finouidinomo duere finollicinona lloite. Marecinona finouidinomo duere finollicinona lloñeite.

Moisés micori llogacinodo judíuai comini raise jaiñeditimaci

¹⁷ Abina iedumona, omoimona damierie raitomoi: “Judíuai imacidicaí. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi.

¹⁸ Naimie jitailla rafuena uñotomoi. Moisés micori llogacinona omoi uñuamona, marecinona finuana uñotomoi.

¹⁹ Jusiñamuina uñnoñedinona llofueiacadomoi. Naimiena naimaci uñnoñena jira, jitiñedinomo itimaci isoidimaci. Uanaicinona naimacimo omoi llumona, naimaci comeciaina lligaiñoiacadomoi. Naimacina uanaicinona uñnotaiacadomoi.

²⁰ Jusiñamuina raise uñnoñedinona llofueiacadomoi. Naimacina abina uñnotaiacadomoi. Naimie rafuena nia raise uñnoñedinona llofueiacadomoi. Moisés micori llogacinomo nana uñuacino illa jira, naiemo uanaicino illa jira, iese iacadomoi.

²¹ Jiaie cominina llofueiacadomoi; iadedi ¿ñiese omoi comeciaimo fueoiacañedomoi? “Rana fiñeno” llotomoi; iadedi fiñdomoi.

²² Omoi añede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiñdomoi.

23 Moisés micorí llogacínori abina íedotomoi; iadedi iena omoi ñinoñena jira, Jusiñamuina jeare finodomoí.

24 Iena Isaías micorí jaie cuete: “Omoi muidona judíuainñedinodí Jusiñamuina jeare ñaitimaci” cuete.

25 Jusiñamui díbeimo jai omoi illana jiaie comíní uíñollena, omoi abina detatatomoi. Moisés micorí llogacínona omoi ñinoiadedi, omoi abina detatajadi mare; iadedi naicínona omoi ñinoñenia, abina detatañedíno isoi jai itomoi. Jusiñamui díbeimo íñedomoi.

26 Moisés micorí llogacínona judíuainñedíno ñinoiadedi, naimaci abina detatañenia, Jusiñamuimona naimie díbeimo ite judíuai isoidimaci; iadedi abina detatañedimaci.

27 Moisés micorí llogacínuaína uíñotomoi. Omoi abiaína detatatomoi; iadedi Moisés micorí llogacínona judíuainñedinodí ñinua jira, Moisés micorí llogacínuai omoi ñinoñena jira, Jusiñamuimona omoi baífemo uaidimaci.

28 Omoi jeiciamona Jusiñamui ua comíníñedomoi. Omoi abiaína detatajamona, Jusiñamui ua comíníñedomoi;

29 iadedi omoi comeciái marena illamona, Jusiñamui ua comínídomoi. Abi detataja jira, Jusiñamui comíníñedomoi; iadedi omoi comeciái marena illa jira, Jusiñamui comínídomoi. Raise naimièna ñinotínodí comínímona iobillacínona feíñuana jitaíñedimaci; iadedi Jusiñamuimona iobillacínona jitaídímaci.

3

1 Bie cartana omoi feíñuanona, iena facallemona, damierie comecina facaite: “Judíuaidicái; ia naiemona, ¿ñiese jiaie comíní baífemo faiticái? Cai abiaína detataticái; ia naiemona jaca buena oñedícaí”.

2 Ie jira omoímo lloiacadícue: “Judíuaina cai illana eo mare”. Jusiñamuidí daní caímo ie rafuena llote. Jiaie comínímo lloñede.

3 Cai comínímona dajerie Jusiñamui rafuena ñinoñedimaci; iadedi Jusiñamuidí ie lloga rafuena jaca finode.

4 Comíní tainona llotimaci; iadedi Jusiñamuidí uanaicínona jaca llote. David micorí iena jaie llote:

O lloga uaimona uanaicínona o llouillana uíñotícaí.

O finoca rafuena jiaie comíní uaitaia, o dínená jaca anafenodio.

Iena uíñotícaí.

5 Dane damierie comecina facaite: “Jusiñamuidí mareuidímie. Cai baífemo uaide. Cai marañedícínona cai finuamona caína Jusiñamui jitaia, jiaie comíní Jusiñamui jaca mareuillana uíñoítímaci. Cai illa muidona Jusiñamuina íese uíñotímaci. Ie muidona naimíedí cai jeacino facaina caína duere finoñena, jiaie comínína naimièna cai uíñotaja jira”. Omoímona íese dajerie comeciáína facadímaci;

6 iadedi íese íñede. Cai jeacino facaina caína duere finoñeniadedí, Jusiñamuidí jiaie comínína jiaí duere finonite.

7 Taino cue lloia, iena naimie oni dotaia, naimíedí mare rafuena finuana comíní uíñotímaci. Ie mei naimiemo iobillacínona fecadímaci. Ie muidona Jusiñamui cue jeacino facaina cuena duere finoñena.

8 Omoímona dajerie cuena ñaitímaci: “Bimie raite: ‘Jusiñamui marecínona finuana raise cai uíñollena, marañedícínona finocana cai jailla’ ”. Íese cue lloñena jira, Jusiñamui naimacína duere finoia, cuemona mare.

Jeacínona nana cai finodícaí

9 Judíuaidicái; iadedi jeacínona nana comíní finua jira, jiaie nairái baífemo faiñedícaí. Judíuaidícaí; iadedi jeacínona finodícaí. Judíuainñedinodí jeacínona jiaí finodímaci.

10 Jusiñamui facaina llorainí micoríái iena jaie cuete: Marebicadíno jaca íñede. Nana comíní marañedímaci.

11 Jaca buna Jusiñamuina raise uiñoñedimaci. Naimiena raise uiñoiacaiñedimaci.

12 Mare rafuedo nana jaiñedimaci. Maraiñedicinona finooidimaci.

Jaca buna marecinona finoñedimaci.

13 Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

14 Naimaci fuiái eo borede.

15 Icirillamona jiaie cominina raire meinetimaci.

16 Nine naimaci jaia, diga maraiñede rafuena comuitatimaci.

17 Uri illana uiñoñedimaci.

18 Jusiñamuina jaciruiñedimaci

jaie iese cuete.

19 Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci riidolle uai iñede. Nana comini Jusiñamui duere finollicino anamo itimaci. Iena uiñoticaí.

20 Moisés micori lloga uaina ñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

Jesucristona cai ñnuamona jillobidicaí

21 Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedicaí; iadedi Moisés micori iena jaie llote. Jusiñamui facaina lloraini micoriai iena jiai llotimaci.

22 Jesucristona cai ñnuamona, Jusiñamuidi caina marebicaitate. Nana Jesucristona ñnotinona marebicaitate. Nie isoide cominina cai ia, caina marebicaitallena, caina daje isoi feiñoite.

23 Nana caidi jeacinona finodicaí. Jusiñamui caina jitailla isoi, marena iñedicaí.

24 Caina naimie duenaillamona, naimie jitailla jira, Cristo Jesúsna cai ñnuamona, caina marebicaitate.

25 Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiiena uiñoticaí.

26 Naimiena iese oretajamona, Jesúsna ñnotimiiena Jusiñamuidi marebicaitaja jira, Jusiñamuina mareuidimiiena uiñoticaí.

27 Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai ñnuamona, jillobidicaí. Ie jira cai finoca rafueri abina iedoñedicaí.

28 Moisés micori lloga uaina cai ñnuamona, marebicaiñedicaí; iadedi Jesucristona cai ñnuamona marebicaidicaí.

29 Jusiñamuidi dani judíuai imaci Mooñede; iadedi naimiedi nana comini imaci Moo.

30 Cai Moodi jaca damiena jira, naimiena naimaci ñnua jira, judíuaina marebicaitate. Naimiena naimaci ñnua jira, judíuaiñedinona jiai marebicaitate.

31 Cai ñnuamona cai marebicaila jira, Jusiñamui facaina lloraini micoriai jaie lloga uaina caitañedicaí; iadedi iena ua ñnocana jaidicaí.

4

Abraham micorimona fueoticaí

1 Abraham micori rafuena ja ñaiacadícue. Naimie marebicaillafuena omoimo lloiacadícue.

2 Ie finoca rafuemona naimie micori marebicaidena, naimie micori abina iedote; iadedi ie finoca rafuemona naimie micori marebicaiñede. Ie jira Jusiñamuimona naimie micori abina iedoiacaiñede.

³ Iena Moisés micorí jaie cuega: “Jusiñamuina Abraham micorí ñnua jira, Jusiñamuidi naimie micorína jeacinona jaca finoñedimiena isoitate. Naimie micorína marebicaitate” cuega.

⁴ Maijillena buna damie ocuiadedi, ibajana jamai fecañeite; iadedi maijia facaina fecaite.

⁵ Ero, ie maijiamona jaca bu jeacinona jaca finoñedimiena isoiaicaiñede. Jusiñamuina naimaci ñnua jira, Jusiñamuidi marañedinona marebicaitate.

⁶ Bie rafuena David micorí jiai jaie cuega:

Ie maijiamona bu marebicaiñena jira, Jusiñamui marebicaitagamiedi iocire iite.

⁷ Naimaci marañedicinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

⁸ Naie jeacinomo Jusiñamuidi comecina dane facañeite.

Naimiedi jai feitaite.

Ie jira iocire iitimaci.

⁹ Dani abina detatitino iocire illena lloñede; ia abina detatañedinomo iena jiai llote. Jusiñamuina Abraham micorí ñnua jira, Jusiñamui naimiena marebicaitate.

¹⁰ Naimie micorí abina nia detatañenia, naimie micorí marebicaide.

¹¹ Naimie micorí marebicailla mei, Jusiñamui ñnena Abraham micorímo abi detatajana llote. Abraham micorí ie abina detatajamona, Jusiñamuina naimie micorí ñnuana uñnoticaí. Ie abina detatajamona, judío imiena jai jaide; iadedi Jusiñamuina ñnuamona, naimie micorí marebicaide. Ie jira Abraham micorídi nana Jusiñamuina ñnotino moo. Nana comini abiaina detatañedimaci; iadedi naimaci ñnua jira, Jusiñamui naimacina marebicaitate.

¹² Cai comini abiaina detatitimaci; iadedi cai moo Abraham micorí isoi naimaci ñnua jira, Abraham micorí isoi marebicaidimaci. Ie jira Abraham micorí nana naimaci moo.

Abraham micorí ñnuamona, Jusiñamui lloga uaidi suide

¹³ Abraham micorímo Jusiñamuidi: “Nana enirue omo iiticue” llote. “O uruiaimo iena jiai iiticue” llote. Moisés micorí llogacinona Abraham micorí ñnua jira, iese Jusiñamui lloñede; iadedi Jusiñamui lloga uaina Abraham micorí ñnua jira, iese Jusiñamui llote. Abraham micorí ñnua jira, Jusiñamuidi naimiena marebicaitate.

¹⁴ Moisés micorí lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiena ñnotinomo: “Nana eniruena omoimo iiticue” llote.

¹⁵ Moisés micorí lloga uaina naimaci raise ñnoñenia, Moisés micorí lloga uaido jaidino Jusiñamui ricailifue anamo itimaci; iadedi Moisés micorí lloga uai iñedena, Jusiñamuimona buna duere sefuiñeite.

¹⁶ “Eniruena omoimo iiticue” naimiena ñnotinomo Jusiñamuidi llote. Duenaillamona llote. Nana Abraham uruiaí micoriaimo iena llote. Dani Moisés micorí lloga uaido jaidinomo lloñede; iadedi Abraham isoi ñnotinomo jiai llote. Abraham micorí isoi cai jailla jira, naimiedi cai moo.

¹⁷ Jusiñamui iena jaie llote: “Ona diga nairai imaci moona jai itataiticue” llote. Jusiñamui fiodaitinona jilloitarede. Nia iñede rana ie uaido jiai comuitate. Ie jira Jusiñamui Abraham micorímo llua isoi, suide. Jai fiodaitino illa isoi Abraham micorí abi illa jira, Jusiñamui naimie abina mairitate. Ie ai oñiñomo urue comuillena llote.

¹⁸ Jusiñamui Abraham micorímo jiai llote: “Ailluena uruiaí omo iite. Diga nairai omona jebuite” llote. Abraham micorídi naie ñnorainiga rafuena ñnote.

¹⁹ Jaca ñnote; iadedi cien años naimie micorímo illamona, naimie jai eeiroma. Naimie micorí aidi, Sara micorídi, oñiñona jira, nairaiño uruedi comuiñede.

²⁰ Abraham micorídi Jusiñamui llua ñnote. ñnocana jaillano, iobillacinona Jusiñamuimo fecade.

²¹ Abraham micoridi Jusiñamui lloga uaina finuana eo ñnote.

²² Ie jira Jusiñamui naimiena marebicaitate.

²³ Naie rafue jaie cuega; iadedi dama Abraham micorimo duiñede;

²⁴⁻²⁵ iadedi caimo jiai duide. Jusiñamuina ñnotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitallena, naimiena jai jillotate.

5

Jai cai marebicaidicai

¹ Jusiñamuina cai ñnuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai.

² Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicai;

³ iadedi duere cai sefuiaidedi, jiai iobidicai. Duere sefuillamona, cai comeciai ocuiñocana cai jaillana uiñoticaí.

⁴ Cai comeciai ocuiñuamona facacifidicai. Facacifillamona, Jusiñamuimo ocuridicai.

⁵ Jusiñamui caina isiruilla jira, tainomo ocuriñeiticai. Ie Joreño caimo fecade. Ie Joreño cai comeciaino illa jira, ie Joreñodo Jusiñamuidi caina naimie caina isiruillana uiñotade.

⁶ Cai jeacinomona dani jillonidicaino, Cristo cairi fiodaite. Maraiñedicai; iadedi naie façaiseconi cairi fiodaite.

⁷ Maraiñedimie facaina caimona jaca buna fiodaicaiñede. Caimona nibai damie maremie facaina fiodaite; iadedi nana comini iese fiodaicaiñedimaci. Maraiñedimie facaina jaca buna fiodaicaiñede;

⁸ iadedi nia maraiñedicaino, Jusiñamui caina isiruillamona, Cristo cairi fiodaite.

⁹ Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite.

¹⁰ Cai dinena Jusiñamuina cai enoilla façaiseconi naimie Jito cairi fiodailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñoticaí.

¹¹ Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

Adán micori finoca rafue

¹² Bie rafue jai suide. Adán micori jeacinona finuamona, nana caimo jeacinodi jai comuide. Jeacino caimo illa muidona, cai jeacino ite diga nana fiodaicana jaidicai.

¹³ Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede.

¹⁴ Moisés micori llogacino nia iñenia, Adán micori façaisemona Moisés micori façaisemo naimaci jeacino ite diga nana comini fiodaicana jaidimaci. Adán micori isoi jeacinona finoñedimaci; iadedi fiodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

¹⁵ Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena.

¹⁶ Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicai; iadedi marebicaidicai.

¹⁷ Dama Adán micorí jeacinona finuamona, cai jeacino ite diga nana cai fiodaicana jaidicai. Jusiñamui caina eo duenaillamona, Jusiñamui caina marebicailamona, dama Jesucristo muidona, Jusiñamui diga jaca iticai.

¹⁸ Dama Adán micorí muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci.

¹⁹ Adán micorí Jusiñamuina inoñenamona, nana comini jeacinona finodimaci. Jesucristo Jusiñamuina inuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini inoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite.

²¹ Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicailamona, cai Nama Jesucristo muidona, Jusiñamui diga jaca iticai.

6

Jesucristomo cai duillamona, jeacino anamo jai iñedicai

¹ Jeacino anamo jai iñedicai; iadedi omoimona damerie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uiñoiticai”.

² Iese comecina facaño. Jeacino anamo jai cai iñena jira, jeacinona finocana cai jaiñena.

³ Biena uiñotomoi. Cristo Jesús dibeimo cai illamona, nana caidi bautizagacai. Cristo fiodailla jira, cai comeciaino ite jearedicino anamo jai iñedicai.

⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie dibeimo cai illamona, cai jeacino anamona jillodicai. Cai comeciaino jiaie rafue birui illa jira, jiaie rafuedo jai jaidicai.

⁵ Cristo fiodaite; iadedi naiemona jillode. Naimie dibeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai.

⁶ Cristo fiodailla jira, cai comeciaino ite jearedicino anamo jai iñedicai. Caimo jai jainaiañena jira, jeacino finocana cai jaiñena.

⁷ Jeacino anamo jai cai iñena jira, jeacinona finocana cai jaiñena.

⁸ Cristo fiodaite; iadedi jillode. Naimie fiodailla jira, cai jearedicino anamo jai iñedicai. Naimie jillua jira, jiaie rafuedo birui jaidicai.

⁹ Fiodaillamona Cristo jillua jira, naimiedi dane fiodaite. Naimie fiodaitemo, cai jeacino facaina naimiedi jai fiodaite. Jai dane fiodaite.

¹⁰ Jeacino facaina jeacinona oni dotallena, naimie dacaiño fiodaite; iadedi ie Moona jaca iobitajanona, naimie ie Moo dibeimo jaca iite.

¹¹ Ie jira jeacino anamo iñenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

¹² Jeacinona finocana jaiñeno. Omoi comeciaino jeacinona finoacania, iena inoñeno.

¹³ Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina ino. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaicino isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi.

¹⁴ Moisés llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micorí llogacinodo jaiñedomoi; iadedi jeacino omoi finoñellena, omoina Jusiñamui duenaillamona, naimie omoina birui canocabide.

Patrón anamo itinomona cai fueolle

¹⁵ Moisés micorí llogacino anamo jai iñedicaí; iadedi omoimona damierie comecina facade: “Moisés micorí llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena.

¹⁶ Biena uiñoticaí. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoí ia, jeacinona finocana jaidomoí. Jeacino omoí finuamona omoí jeacino ite diga fiodaicana jaidomoí. Ie jira Jusiñamui illanomo ico iñeitomoí. Jusiñamui anamo omoí ia, Jusiñamui jitailla rafuena finocana jaidomoí. Naimie illanomo ico iitomoí.

¹⁷ Jeacino anamo jaie itomoí. Iemei omoimo jiaie comini Jesucristo rafuena jai llotimaci. Iena cacajanona, iena raise ñnotomoí. Ie jira Jusiñamuimo iobillacinona fecadicue.

¹⁸ Jeacino anamona jai jillobillamona, marecinona finocana jai jaidomoí.

¹⁹ Cue llwana omoí raise cacaillena, bie isoide rafuena lloticue. Omoí comeciaí railla jira, jeacinona navui finodomoí. Maraiñedicinona finocana navui jaidomoí. Cristo díbeimo omoí jai illa muidona, marecinona omoí finocana birui mai omoí jai. Iese omoí jaillamona, omoí comeciaí Jusiñamui jitailla isoi marena iitomoí.

²⁰ Jeacino anamo navui omoí ia, Jusiñamui jitailla isoi, marecinona finoñedomoí.

²¹ Jeacinona navui omoí finuamona mare rafuena oñedomoí. Ie jira iena birui meiruitomoí. Jeacinona finocabidino fiodaillamona, Jusiñamui illanomo ico iñeitimaci.

²² Jeacino anamona jai jillobidomoí. Jusiñamui anamo omoí jai illa jira, naimie ocuica rafuena finodomoí. Iena omoí finuamona, Jusiñamui jitailla isoi, marecinona finocana jaitomoí. Ja muidomo naimie diga iitomoí.

²³ Jeacinona finocana omoí jaia, omoí jeacino ite diga fiodaitomoí. Jusiñamui illanomo ico iñeitomoí; iadedi cai Nama Jesucristona omoí ñnuamona, Jusiñamuidi omoína jaca itataite. Naimie illanomo ico iitomoí.

7

Inirede riñomona cai fueolle

¹ Cue amatiaí, Moisés micorí llogacinuaina uiñotomoí; iadedi iena nia raise ca-caiñedomoí. Ie fiodailla mei, jaca buna Moisés micorí llogacinuai anamo iñede. Ie fiodailla mei, jai iñena jira, nainomo duiñede.

² Ie isoide. Nana naimie ille dinori, inirede riño ie inimo duide. Iese Moisés micorí jaie llote. Ie ini fiodailla mei, ie inimo jai duiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuimona mare.

³ Ie ini nia fiodaiñenia, jiaimie diga naiñaiño ia, ie ini abimo jeacinona jai finode, Moisés micorí lloga uai naiñaiño ñnoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micorí llogacinuai anamo jai iñedicaí. Iemo jai duiñedicaí. Ie jira Cristomo jai duidicaí. Jusiñamui jitailla rafuena finocana cai jaillena, fiodaillamona Cristo jai jillode.

⁵ Jusiñamuina nia cai ñnoñenia, cai jitailla rafuena finocana jaidicaí. Moisés micorí llogacinona uiñoticaí; ia cai maraiñede jitailla rafuena finocana jaidicaí. Cai jeacino ite diga fiodaicana jaidicaí;

⁶ ia Moisés micorí llogacino jai saide. Caímo jai duiñede. Navui ie anamo iticaí; iadedi birui ie anamo jai iñedicaí. Jusiñamuina cai sedajamona, Jusiñamui Joreño rafuedo jai jaidicaí. Moisés micorí cuezafuiaido jai jaiñedicaí.

Cue comecimo ite maraiñedicino

⁷ “Moisés micorí llogacino maraiñede” lloñeiticaí; iadedi naie llogacino iñedena, jeacinona uiñoñedicue. Jiaimieimo ite rana cue niciduana maraiñenana jaie uiñoñedicue.

Moisés micori jaie llote: “Jiaimie mo ite rana nicidoñeno” llote. Ie jira naiemona niciduanana maraiñenana uiñoticue.

⁸ Naie llogacino muidona cue comeci jeacinona finoacade. Ie muidona rana nicidotie. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai.

⁹ Moisés micori llogacinona nia cue uiñoñenia, caimare uri itie. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue.

¹⁰ Nano cue comecina facadicue: “Naiedo cue jaillamona, Jusiñamui diga ico jaca iitie”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede.

¹¹ Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona otie. Naimie dibeimo Moisés micori llogacino cuena itatañede; ia naimie dibeimona cuena itatate.

¹² Iese ite; iadedi Moisés micori llogacinodi mare. Jusiñamuimona ite.

¹³ Naie llogacino mare. Naie rafue muidona fioidañeitie; ia jeacino muidona fioidatie. Jeacinona cue finua jira, Jusiñamui illanomo ico jaca iñeitie. Naie mare llogacinomona jeacino cue finuana eo maraiñenana uiñoticue.

¹⁴ Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana itie.

¹⁵ Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidie.

¹⁶ Cue maraiñede finoacaiñega rafuena cue finojade, Moisés micori llogacino mare-nana uiñoticue.

¹⁷ Cue comeci iena dama finoñede; iadedi cue comecimo ite jeacino cuena finotate.

¹⁸ Cue comecimo marecino iñede. Mare rafuena finoacadie; iadedi iena finonidie.

¹⁹ Cue mare finoacaga rafuena finoñedicue; iadedi cue maraiñede finoacaiñega rafuena finodie.

²⁰ Cue finoacaiñega rafue cue finojade, cue comeci iena dama finoñede; iadedi cue comecimo ite jeacino cuena iena finotate.

²¹ Biese cuemo suicabide. Mare rafuena cue finoacaniadedi, jeacinona finocabidie.

²² Cue comeci Jusiñamui lloga uaina gaide;

²³ iadedi cue comecimo maraiñede rafuena illana uiñoticue. Cue comecina namataacade. Cuena jeacinona finotaiacade.

²⁴⁻²⁵ Eo dueredie. Jusiñamui lloga uaina cue comecimona finoacadie; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuitie. Jusiñamui illanomo ico jaca iñeitie. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

8

Jusiñamui Joreño cai comeciaina namatacana cai jailla

¹ Cristo Jesúmo duidinodicai. Ie jira Jusiñamuidi caina duere finoñeite.

² Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi naiemona Jusiñamui Joreño caina jai jillotate. Jesucirstomo cai duillanona, caina jaca itataite.

³ Moisés micori llogacinona cai raise iñoñena jira, jeacinomona dani jillonidicai. Ie jira Jusiñamuidi ie Jitona orede, imana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fioidaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate.

⁴ Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedica; iadedi Jusiñamui Joreño jitailla rafuedo jai jaidica.

⁵ Cai comecimo ite maraiñede jitaillacinodo cai jaiadedi, naiemo cai comeciaina facadica. Iena finodica; iadedi Jusiñamui Joreño jitailla rafuedo cai jaiadedi, iemo cai comeciaina facadica. Naimie jitailla rafuena finodica.

⁶ Maraiñede jitaillacinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jia jaca uri iitimaci.

⁷ Jiaino Jusiñamuina enoidimaci. Jusiñamui lloga uaina jitañedimaci. Iena ñnonidimaci.

⁸ Iese itino Jusiñamuina iobitanidimaci.

⁹ Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede.

¹⁰ Jeacinona omoi finua jira, fiодaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaिता jira.

¹¹ Cristo Jesús fiодaimona, Jusiñamuidi naimiena jillotate. Omoimo ie Joreño illa jira, omoi fiодaiade, Jusiñamuidi ie Joreño uaido omoi abiaina jia jillotaite.

¹² Cue amatia, iese caimo suite. Ie jira cai comeciaino ite maraiñedacinodo cai jaiñelli.

¹³ Naicinodo cai jaia, Jusiñamui illanomo ico jaca iñeitica; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iitica.

¹⁴ Nana Jusiñamui Joreño namatadinodi Jusiñamui uruia.

¹⁵ Jusiñamui Joreño feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruiñedomoi.

¹⁶ Cai comeciaina Jusiñamui Joreño uiñotajamona, cai comeciainona Jusiñamui uruiaidicaina jai uiñotica.

¹⁷ Naimie uruiaidicaina jira, ie uruiaimo fecaacalle ra caimo jai duide, Cristomo jai duilla isoi. Naimie ñbeimo cai illanona, Cristo isoi cai duere sefuilla jira, naimie isoi ie Moo illanomo ico iitica.

¹⁸ Biena uiñoticue. Bene birui duere sefuidica; iadedi iemo cai comeciaina cai facañena, monamo ico eo marena jaca cai illena jira.

¹⁹ Iese cai illemo nana Jusiñamui finoca radi iocire birui ocuridimaci.

²⁰ Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci,

²¹ naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fiодaiñeitimaci.

²² Biena uiñotica. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci.

²³ Dani naimaci duere sefuicana jaidimaci; iadedi jia duere sefuidica. Jusiñamuidi ie Joreño caimo fecaja jira, ico cai marena illena uiñotica. Monamo Jusiñamui uruiaina ico cai illemo ocuridica. Cai fiодaia, fiодaimona cai abiaina jillotaite. Jiaifo eruaite cai abiaimo meidollemo ocuridica. Ie mei cai abia dane fiодaiñeitimaci.

²⁴ Naiemo cai ocurillamona, cai jeacinomona navui jillobidica. Bumo ie jitailla ra ia, iemo naimie ocuriñede. Ie feiñoñega ramo ocuride. Ie isoidemo ocuridica.

²⁵ Caimo suiñede rafuemo cai ocurilla jira, iemo fecuise ocuridica.

²⁶ Birui duere cai sefuia, ico marena cai illemo ocuridica. Jusiñamui Joreño caina jia canode. Jusiñamuimo cai jia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote.

²⁷ Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñotical.

²⁹ Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena.

³⁰ Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iitical.

³¹ Iese caina itataja jira, Jusiñamuidi cai facaina illa jira, bu cai facaina iñellena, damamai iesedical.

³² Jusiñamuidi ie Jitona duere sefuillamona jillotañede; iadedi naimie jitailla jira, cai facaina ie Jitona orede, cairi fiodaillena. Ie muidona naimie dibeimo marena cai ille rafuena caimo jiai iite.

³³ Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite.

³⁴ Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite.

³⁵ Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meineia, Cristo caina nia isiruite.

³⁶ Iena Jusiñamui facaina lloraima micori jaie cueda: Jusiñamui muidona caina jaca meinetimaci, mercadomo toica llaudaiai fallena illa isoi cueda.

³⁷ Cristo caina isiruilla jira, caina naimie canuamona, naga bie isoide rafue caimo sua, cai comeci ai ocuiñocana cai jailla.

³⁸ Jusiñamui caina isiruite. Naimiemona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomona caina baironide.

³⁹ Monamo ite radi Jusiñamui isiruillacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai Nama Cristo Jesúmo cai duilla jira, Jusiñamui caina isiruillana uiñotical.

9

Jusiñamuidi judíuai railla cominina fetode

¹⁻² Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñotical. Cue cominiri sunaiticue.

³ Cue comini Cristo rafuena inoiacaiñedimaci. Ie muidona Jusiñamui ricailifue anamo birui itimaci. Naiemona naimaci jilloillena, naimaci duere sefuillacino ifomo cue iticuedena, cuemona mare. Naimacidi cue amatiai.

⁴ Israel railla cominidimaci. Jiaicidi judíuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena cioidimaci. Iena naimaci inollena,

Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote.

⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidecua.

⁶ Cai cominimo Jusiñamuidi ie uaina llote; iadedi nana cai comini iena inoñena jira: “Jusiñamui ie lloga uaina finoñede” raiñeiticai. Jusiñamuina naimaci raise inoñena muidona, nana Israel micorimona comuide cominidi Jusiñamuimo duiñedimaci.

⁷ Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruia”.

⁸ Naie llua mona nana Abraham micorimona comuidinona ie uruiañenana uiñotica. Jusiñamui lloga uaina inotinodi naimie ua uruia.

⁹ Jusiñamuidi Abraham micorimo jaie llote: “Jiaie año bie facaiseconi o dine abido biitica. Naie facaiseconi o ai Saradi jitona jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaimai micorina jocode. Nano doforamiedi Esaú micori. Jiaimiedi Jacob micori.

¹¹⁻¹³ Naiñaiño micori nia jocoñena, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraíma micori Jusiñamui llua nia jiai cuete: “Jusiñamui llote: ‘Jacobna eo isiruitica; iadedi Esaúna janore isiruitica’ llote”. Naie iaimai micori nia jeicñena, iaimai micori marecinona nia finoñena, iaimai micori marañedicinona nia finoñena, Jusiñamuidi iaimai micorina iese llote. Ie finoca rafuemona Jacob micorina fetone; iadedi Jusiñamui jitailla jira, Jacob micorina fetode.

¹⁴ “Jusiñamuidi dama Jacob micorina fetuana marañede” raiñeiticai. Jusiñamuidi marañedicinona jaca finoñede.

¹⁵ Jusiñamui bie isoide rafuena Moisés micorimo llote: “Cue dinena cue jitaillanona duenaitica; ia cue dinena cue jitañenanona duenaiñeiticua” llote.

¹⁶ Comini naimiena jitaillanona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaiñe.

¹⁷ Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticua. O uicomo siño rafuena finodicua, cue uai siñonana jiaie comini uiñollena, nana cominido cue mameci sorillena”.

¹⁸ Jusiñamui iese ite. Naimie dinena ie jitaillanona duenaiñe. Naimie jitailla jira, jiaie cominina naimiena inotañede.

¹⁹ Nibai comeciaina facadomoi: “Cominina iese Jusiñamui itataia, ¿bue ñellena naimacina duere finoacade?”

²⁰⁻²¹ Iese comeciaina facañeno. ¿Niese nainona naimiemo ducaitomoi? Ero, jñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode.

²² Ie isoide. Nana comini dajena eruaiñedica. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiai uiñotaacade; iadedi naimacina nia duere finoñede.

²³ Cominina Jusiñamuidi jiai duenaiñe jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate.

²⁴ Jusiñamui caina iese itatate. Da judúuaina iese itatañede; ie iadedi judúuaiñedinona jiai iese itatate.

²⁵ Jusiñamui iena jaie llua nia Oseas micori jaie cuete:

Cue cominiñedinodi cue cominina jaitimaci. Isiruiñeganona isiruitica.

²⁶ Dane jiaí cuete:

Navui cue cominiñedomoi; iadedi jiaie comini omoína ico lloitimaci: “Naimacidi jaca cajede cai Jusiñamui ie uruiaidimaci” lloitimaci cuete.

²⁷ Isaías micori railla lloraima jaie cuete: “Monaillai fuemo conillie eo ite. Ie isoi Israel micori uruiaí eo jebuitimaci; iadedi Jusiñamuidi nana naimacina jillobitañeite. Dajeriena jillotajanona,

²⁸ jiaínomo ie lloga uaina raire finoite. Naimacina duere finoite” cuete.

²⁹ Isaías micori jiaí cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiaí jaie cuenode.

Naimaci micoriaí isoi iñedicaí, nana cai cominina naimiedi duere finoñena jira.

Judíuai di Cristo rafuena jitañedimaci

³⁰ Biemo comeciaina faca. Judíuaiñedinodi Jusiñamui jitailla isoi, marena illana navui uiñoiacaiñedimaci; iadedi iena jai uiñotimaci. Jesucristona naimaci ñnuamona, marena illana jai uiñotimaci.

³¹ Jusiñamui jitailla isoi marena naimaci illena, judíuai di Moisés micori llogacinodo jaidimaci; iadedi Moisés micori llogacinona naimaci raise ñnoñena jira, marena illana jaca uiñoñedimaci.

³² Naimaci finoca rafuemona marena iacadimaci. Marena naimaci illena, Jesucristona ñnoiacañedimaci. Naimie muidona marena iñeitimaci.

³³ Isaías micori iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiena naimaci ñnoñenia, faifitimaci;

iadedi naimiena ñnotinodi tainona ñnoñeitimaci.

Suubicañeitimaci” llote.

10

¹ Cue amatiaí, judíuai comini jilluana eo jitaídicue. Jusiñamui diga cue ñaia, iena jicadícue.

² Jusiñamui jitaillacinona eo finoacadimaci. Iena uiñotícue. Iena finoacadimaci; iadedi iena finuana raise uiñoñedimaci.

³ Jusiñamui naimacina marena itatallena uiñoñedimaci. Naimaci finoca rafuemona marena iacadimaci. Jusiñamui llua isoi jaiacañedimaci.

⁴ Nana Cristona ñnotimiedi Moisés micori llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

⁵ Moisés micori jaie cuete: “Naimie marena illena, cue lludo jaidimiedi jaca iite, cue llua naimie raise ñnoia” cuete.

⁶ Iese jaie cuete; iadedi jaca buna iese ñnoñede. Cristona ñnuamona, marena Jusiñamui jitailla isoi, birui iticaí. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticaí.

⁷ Fiodaitino dine jaiticaí, Cristona cai jillotallena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode.

⁸ Jusiñamui uai llote: “Naie rafue cai dine jai ite. Iena jai uiñoticaí”. Cai jilloillena Cristona cai ñnuana birui lloticaí.

⁹ Jiaie cominimo: “Cristodi cai Nama” omoi lloia, Cristo fiodaillamona Jusiñamui naimie jillotajana omoi ñnoia, jilloitomoí.

¹⁰ Cai comecimona cai ñnua jira, Jusiñamui caína marena illana itataite. “Cristodi cai Nama” cai lloia, Jusiñamui caína jillotaite.

¹¹ Isaías micorí iena jaie cuete: “Cristona ñnotinodí tainona ñnoñeitimaci. Suubi-caiñeitimaci” cuela.

¹² Naie rafuedí nana cominina ñaite. Judíuaina ñaite. Judíuaiñedinona jiaí ñaite. Jusiñamui anamo nana cominídi itimaci. Nana naimiemo jicanotinona jaca duenaite.

¹³ Cristodí naga naimiemo jicanotimiena jillotaite;

¹⁴ iadedí Cristona naimaci nia ñnoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimiena ñnonidimaci. Naimacimo naie rafuena jiaie cominí lloñenia, iena cacaiñeitimaci.

¹⁵ Jusiñamui ie rafue llorainina jai orede. Isaías micorí iena jaie cuete: “Mare rafuena llotino cai ñine billano, eo iobidícaí” cuete.

¹⁶ Iese cuete; iadedí ailluena cominí naie rafuena nia jitañedimaci. Isaías micorí iena jiaí jaie cuete: “Jusiñamui, ailluena cominí cai llwana ñnoiacañedimaci” cuete.

¹⁷ Cai llumona Cristo rafuena cacadimaci. Cristo rafuena cacajamona, damierie naimiena ñnotimaci.

¹⁸ Judíuai cominí naie rafuena jai cacadimaci. Jusiñamui facaina lloraima micorí iena jaie cuete:

Naga eniruemo ite cominimo Jusiñamui llorainí micoriaídi naie rafuena jai llotimaci cuete.

¹⁹ Judíuai cominí naie rafuena cacadimaci; iadedí iena ñnoñedimaci. Moisés micorí iena jaie cuete:

Jusiñamuidí llote: “Cue rafuena naimaci feiñua jira, judíuaiñedino ñiga uradoitomoí. ‘Naimaci abina uiñoñedimaci’ raitomoí;

iadedí cue rafuena naimaci feiñua jira, naimaci ñiga iciritomoí” llote.

²⁰ Isaías micorí marefodo jiaí cuete:

Jusiñamui llote: “Cuena jenoñedino cuena jai baitimaci.

Naimacina cue jilloitallena cuena jicanoñedinomo jai bairedícue” llote.

²¹ Jusiñamui judíuai cominina jiaí llote: “Naimacina cue ñine jaca uaidotícue; iadedí ñnoiacañedimaci. Cuena jitañedimaci” llote.

11

Judíuai cominimona dajerie ñnoítimaci

¹ Jusiñamuidí judíuaina fainonocailamo omoí comeciaina facañeno. Judío imiedícue. Abraham uruíaí micoriaímona comuidícue. Benjamín railla nairaí imiedícue.

² Naimacina jaie naimie fetua jira, Jusiñamui judíuaina fainonocaiñede. Elíamo jaie ite rafuena uiñotomoí. Jusiñamuimo naimiedi judíuaina llote:

³ “Cue Nama, o facaina llorainí micoriaína meinetimaci. Ona cai sedajanona judaidimaci. Dama cue fiebidícue. Cuena jiaí meineiacadimaci”.

⁴ Jusiñamui ñnena uai ote: “Dama iñedio. Siete mil iñiaí cue ñibeimo nia eenotícue. Baal railla jiraraina jaca sedañedimaci. Cuena nia sedadimaci” llote.

⁵ Birui ie isoide. Naimacina duenailamona, naimacina Jusiñamui fetua jira, dajerie Jusiñamui ñibeimo itimaci.

⁶ Naimacina duenailamona, naimacina fetode. Naimaci finoca rafue muidona naimacina fetofede. Naimaci finoca rafue muidona naimacina fetodena, naimacina duenailamona naimacina fetofede.

⁷ Ie jira iena iese lloítícue. Ailluena judíuidí marena Jusiñamui jitailla isoi illana oñedimaci; iadedí Jusiñamui fetocano iena otimaci. Ailluena cominí iena ñnoiacañedimaci.

⁸ Jusiñamui facaina llorainí micoriaí iena jaie cuela: “Jusiñamuidí naimacina abina uiñotañede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacaiñedimaci. Birui iese nia itimaci” cuela.

⁹ David micorí iena jiaí llote:

Naimacimo aillue ra illamona, Jusiñamui naimacina duere finoite.

¹⁰ Naimaci comeciai Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

Judúuaiñedinomona dajerie #noitimaci

¹¹ Naimie rafuena judúuai comini jitaiñena jira, Jusiñamui naimacina duere finode; iadedi naimacina sofeñede. Jusiñamuina judúuai #noñena jira, Jusiñamuidi judúuaiñedinona jai jillotate. Naimacina jai jillotate, judúuai dinena judúuaiñedinona uradoillena. Uradoillamona Jusiñamuidi naimaci naimiena #nollena jitaide.

¹² Cristona judúuai jitaiñena jira, Jusiñamuimona judúuaiñedinodi diga marecinona birui feiñotimaci. Cristo dibeimo ico judúuai ia, Jusiñamuimona judúuaiñedino ailluena feiñoitimaci.

¹³ Judúuaiñedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue,

¹⁴ cue comini cuena uradoillena, Cristona dajerie #notallena.

¹⁵ Cristona naimaci nia #noñena jira, judúuaiñedino jai #notimaci. Cristona ico judúuai #noia, Jusiñamui diga jaca iitimaci.

¹⁶ Janore jisa juilliruñu marenia, nana juilliruaidi mare. Riara ie jainauai marenia, nana ie igaillai mare. Judúuaidi ie isoidimaci. Naimaci jaiagai micoriai jainauai isoidimaci. Naimaci jaiagai marenia, naimacidi jiai mare. Birui ite judúuaidi igaillai isoidimaci.

¹⁷ Taide igaillaiidi ie amenamo jai duiñede. Ie isoidimaci. Naimacimona Cristona jiaino #noñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feiñocabitomoi.

¹⁸ Naimaci ifomo omoi illa jira, abina uradoiñeno. Igaillaimona jinao cajellena, ie ijina oñede; iadedi iemo duilla jira, jinaomona igaillai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feiñocabitomoi.

¹⁹ Comeciaina facadomoi: “Taide igaillai ifomo iticai isoidicai. Jusiñamui judúuaina oni dotade, caina fetollena”.

²⁰ Uanaicinona comeciaina facadomoi. Naimaci #noñena jira, Jusiñamuidi naimacina oni dotade. Omoi #nua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui.

²¹ Naimiena naimaci #noñena jira, judúuaina duere finode. Naimiena omoi #noñenia, daje isoi omoina duere finoite.

²² Biemo comeciaina faca. Naimiena #noñedinona jai duere finode; iadedi omoina duenaite. Naimiena #nocana omoi jaia, naimie omoina nia duenaite. Iese omoi jaiñenia, naimie omoina dotaite.

²³ Judúuai Cristona #noñeno navui jaidimaci: iadedi Cristona naimaci birui #noia, naimie dibeimo Jusiñamui naimacina itatarede, igai riaramo sotaja isoi.

²⁴ Ailli riarana cueticue. Naie amenamo nano duiñedomoi. Judúuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judúuaina abido oite.

Eo ailluena judúuai jilloitimaci

²⁵ Bie rafuena omoi uiñuana jitaidicue. Iena navui uiñoñedicaí. “Judúuai baifemo faiticaí” omoi raiñellena, biena omoimo lloticue. Diga judúuai Cristona birui #noiacaíñedimaci. Jusiñamui jitailla diese judúuaiñedino jillua facaisena, iese iitimaci.

²⁶ Ie mei eo ailluena judúuai jilloitimaci. Jusiñamui facaina lloraini micoriai iena cuetimaci:

Jerusalémona cai Jilloitaraíma biite.

Jacob micori uruaímona jeacinona dotaite.

²⁷ Naimaci jeacinona oni dotajanona, Jusiñamui jaie lloga uai suite.

²⁸ Cristona birui ñnoiacaiñedimaci. Jusiñamuina enoidimaci. Jusiñamuina naimaci jitañena jira, naimie omoina fetode. Ie jira jillodomo; iadedi Jusiñamuidi judíuaina nano jaie fetode. Naimaci jaiagai micoriaimo ie lloga uaina jira, naimacina nia isiruite.

²⁹ Jusiñamui ie lloga uaina saiñede. Naimacina fetua jira, naimacina fainonocaiñeite.

³⁰ Jusiñamuina navui ñnoñedomo; iadedi Jusiñamuina naimaci ñnoñena jira, Jusiñamui omoina jai duenaite.

³¹ Jusiñamuina jai ñnoñedimaci; iadedi omoina naimie duenaila isoi, Jusiñamuidi naimacina ico jiai duenaite.

³² Jusiñamui nana cominina naimiena ñnoñenana uiñotade, naimacina naimie duenailena.

³³ Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicaí. Naimie finoca rafuena raise jiai uiñoñedicaí.

³⁴ Jusiñamui facaina lloraima micori iena jaie cuete: “Jaca buna cai Nama Jusiñamui comeci facajacinona uiñoñede. Jaca buna naimiemo ie finoca rafuena lloñede.

³⁵ Jiairuido ibana feiñollena, jaca buna naimiemo rana fecañede” cuete.

³⁶ Naga ra naimiemo illa jira, naga ra naimiemon bite. Naga rana finode. Naimiemo iobillacinona cai fecacabillasa. Iena jitaídícue.

12

Jusiñamui anamo raise omoi i

¹ Cue amatiai, omoimo bie rafuena lloítícue. Jusiñamui caina duenaila jira, omoi jeanide comeciáimona, naimie jitaílle rafuena omoi finuamona naimie anamo raise omoi i. Naimie jitaílla isoi omoi i. Naimiedi omoi iese illana gaíde. Omoi comeciáimona naimiena raise omoi seda.

² Cristona uiñoñedino isoi omoi iñeno; iadedi omoi comeciái iuaina meiduanona, jiaie rafuedo mai omoi jai. Ie mei Jusiñamui jitaílla rafuena finuana uiñoítomoi. Mare rafuena finuana uiñoítomoi. Naimiena iobitajacinona jiai uiñoítomoi. Eo mare rafuedo jaíllana uiñoítomoi.

³ Jusiñamui cuena duenailamona, bie rafuena omoimo cue llollena, naimie uai cuemo ite. “Jiaie comini baífemo faitícue” raíllamo o comecina facañeno; iadedi: “Ñie isoidimédícue” o raíllamo o comecina raise faca. Jusiñamuimona o feiñoga diese ñnuacinomo o comecina faca.

⁴ Nagamie ie abímo díga ra ite. Ie onolli ite. Ie uisi ite. Ie jebe ite. Díga jiaie ra ite. Rana cai finollena, naga ra cai abímo ite. Cai abímo jainaiáide.

⁵ Ie isoide. Cristona jai ñnoticaí. Aillosiedicaí; iadedi daajena naimiemo jainaiáídicaí. Dani caímo jiai jainaiáídicaí.

⁶ Jusiñamuidi daje isoide uaina naimie díbeimo cai maíjillena, caímo fecañede. Ie jitaílla diese caímo fecade. Ie jira omoi feiñoga uaido naimie facaina maíji. Rafuena omoimo Jusiñamui lloia, iena raise llono. Roracomo omoi maíjillena Jusiñamui lloia, nainomo raise maíji. Omoi llofuellena Jusiñamui lloia, naimie rafuena raise llofue.

⁷ Roracomo maíjiacinona uiñotímiedi nainomo raise maíjia. Llofuiacinona uiñotímiedi raise llofua.

⁸ Comeci ocuiñotajacinona uiñotímiedi comini comeciáina ocuiñotacana jaílla. Rana fecajacinona uiñotímiedi rana caidíñeno fecaja. Cominina sedajacinona uiñotímiedi cominina raise sedaja. Dueredínona canodímiedi dueredínona iocire canua. Cristomo daajena cai jainaiáíllamona, iese coninina canocana jaiticaí.

Cristo rafuedo cai jaílla

⁹ Omoi comeciáimona nana cominina isirui. Maraiñedicinona gaiñeno; iadedi mare rafuedo omoi jai.

¹⁰ Coninina isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

¹¹ Cristo rafuena sefuiruiñoeno finocana omoi jai. Cai Namana iocire seda.

¹² Naimie dine omoi illemo iocire omoi ocuri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

¹³ Jiaie creyentiai rania, naimacina cano. Omoi jofuemo creyentiai ria, naimacina nafue.

¹⁴ Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoñoeno.

¹⁵ Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

¹⁶ Daje isoi omoi comeciiai lloillamona uri omoi i. Abina birioicaiñoeno. Jamai bue isoidino diga nabairi. “Jiaie comini baifemo uiñoticaí” raiñoeno.

¹⁷ Jiaie comini omoina jeare finoia, naimacina daje isoi jeare finoñoeno. Ibana oñoeno. Omoi marena illana jiaie comini uiñollena, marena omoi i.

¹⁸ Omoimona rafuena suiñoñoeno. Nana comini diga uri omoi i.

¹⁹ Cue isiruigano, bu omoina jeare finoia, ibana oñoeno. Jusiñamui naimacina duere finoite. Moisés micori iena jaiete: “Cai Nama llote: ‘Cominina duere finodicue. Ibana oiticue’” cuete.

²⁰ Ibana oñoeno. Jusiñamui facaina lloraíma iena jaiete jiai cueba: “Omoi enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaite.

²¹ Jiaie comini omoina jeare finoia, iciriñoeno; iadedi naimacimo mare rafuena fino. Iese omoi finoia, naimacina omoi dibeimo itataitomoí.

13

¹ Nana illaicominina naimaci ifomo Jusiñamuidi itataja jira, illaicomini lloga uaina nana cai inua.

² Illaicomini uaina bu inoñenia, Jusiñamuina jiai inoñede. Ie mei Jusiñamui naimiena duere finoite.

³ Mare rafuena finodinodi illaicominina jaciruiñedimaci; iadedi maraiñede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jai, omoina marena ñaitimaci.

⁴ Jusiñamui facaina omoina canodimaci. Maraiñede rafuena omoi finoia, naimacina jacirui. Omoina duere finollena, naimacimo uai ite. Maraiñede rafuena finodimiena Jusiñamui facaina duere finoitimaci.

⁵ Ie jira naimaci uaina ino, Jusiñamuimona omoi duere sefuiñellena. Omoina: “Mare” jiai raitimaci.

⁶ Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoina ibataia, iena iba. Illaicominimo iobillacinona fecu.

⁸ Ra omoi oia, ibañoeno jaiñoeno; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode.

⁹ Moisés micori diga lletarafuena jaiete cuete: “O aiñede riño diga iñoeno. O iniñede ima diga iñoeno. Jiaimiena meineñoeno. Rana fiñoeno. Jiaimieimo ite rana nicidoñoeno” cuete. Jiai lletarafue ite: “Dani omoi abiaína omoi isiruilla isoi, jiaie cominina omoi isiruilla”. Bie lletarafuena omoi inoia, nana lletarafuena jai inotomoí.

¹⁰ Jiaie cominina omoi isirua, naimacina jeare jai finoñedomoi. Jiaie cominina omoi isirua, nana Jusiñamui lloga uaina jai inotomoí.

¹¹ Iena birui cai finua. Jesucristo billiruidi iaiei jai ite. Naimiena cai nano inua facaiseconi, naimie billiruimo cai comeciaina facadicaí; iadedi nagaruí naimie billirui iaiei iñoicaide.

¹² Jesucristo nia dane biñena jira, eniruemo cai illa jira, jitiredinomo iticai isoidicai. Naimie bia, naimie diga cai illemona, useredinomo raire ja iticai isoiticai. Ie jira jeacinona finocana cai jaillana mai cai fainonocaili. Jesucristo rafue anamo raise cai illesa.

¹³ Cai marena illana nana comini uinollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena.

¹⁴ Iese cai iñena; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comecina facañena.

14

Jiaie creyentena jeare ñaiñeno

¹ Cristona inotimiena omoi dine biade, naimiena raise feiño. Naimie Cristona nia raise inoñena, naimiena nafue; iadedi omoi isoi naimie inoñena, conima uina caitañeno.

² Dajerie naga rana gutimaci; iadedi jiaimie difai guiga rana guite. Naimie riñede. Ie comecina facade: “Cue riia, jeacinona jai finoiticue”.

³ Naga rana guiñedimiena miñeno. Naga rana gutimiena miñeno. Jusiñamuidi naimacina jai feiñote. Ie jira miñeno.

⁴ Omoi facaina maijinedimaci. Jusiñamui facaina maijidimaci. Jeacinona naimaci finoa, Jusiñamui naimacina duere finoite. Jeacinona finoi raillanona, Jusiñamuidi naimacina canoite.

⁵ Dajerie creyentia comecina facadimaci: “Judíuai rafue finuaruilla Jesuñamuina sedajitica, nairuilla jiaruilla baifemo uilla jira”. Jiaino raitimaci: “Nagarui daje isoide” raitimaci. Nagamie ie comecina raise facajamona,

⁶ cai Namana iobitallena, nagamie ie jitaillaruimo cai Namana sedaite. Naga rana gutimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

⁷ Cristomo cai duilla jira, dani cai jitailla rafuena finonidicai. Cai fiodailliruina jiai llonidicai.

⁸ Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticai.

⁹ Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiai iitica.

¹⁰ Naimie baifemo omoi iñena jira, jiaie creyentena miñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iitica. Jusiñamuidi marañedinona duere finoite. Maredinona duere finoite.

¹¹ Isaías micori jiaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

¹² Nainomo Jusiñamuimo nana cai finouiga rafuena lloiticai. Ie jira jiaie creyentia diga marena omoi i.

Jiaie creyentena jeacino finoi raillano, mare rafuedo cai jailla

¹³ Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla.

¹⁴ Cai Nama Jesúmo cue duilla jira, naga riga radi cuemona mare. Iena raise uinoticue. Iena cue riia, jeacinona finoñedicue. Iena uinoticue; iadedi jiaimie comecina facade: “Biena cue riia, jeacinona jai finodicue”. Naimie comecina iese facajamona, iena naimie riia, naimiemonna jeacinona jai finode.

15 O ríga ra muidona jiaie creyente comeci maraiñeno jaia, naimiena jai isiruiñedio. Cristo naimieri fodaite. Ie jira naie isoide rana riñeno, naimiena Jusiñamuina fañonocaitañellena.

16 Ie jira o jitailla rana finoñeno. Jiaie comini ona miñellena, naie rana riñeno.

17 Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite.

18 Iese cai jaia, Cristona raise sedadica. Jusiñamuina iobitadica. Jiaie comini caina marena jiai ñaitimaci.

19 Ie jira uri icana cai jailla. Dani cai comeciaina ocuiñocana cai jailla.

20 Omoi riacaga ra muidona, jiaie cominina Jusiñamuina fañonocaitañeno. Naga radi mare, rillena; iadedi bue isoide omoi ria muidona, jiaimie Jusiñamuina fañonocai, jeacinona jai finodomo.

21 Bue isoide omoi ria muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide.

22 Mare ra omoi finoa, omoi comeciaimona iena uiñotomo. Jusiñamuidi omoi comeciaina uiñua jira, iena marefodo lloñeno. Omoi comeciaimona jeacinona omoi finoñenana uiñotomo. Ie jira iocire itomo.

23 “Nie isoide ra cue ría, jeacinona finodicue” raillanomo bu iese comecina facaia, iena naimie riñena. Iena naimie ría, Cristona naimie raise ñnoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

15

Jiaie creyentena cai canua

1 Cristo rafuedo raise jaidica; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitailla rafuena finoñeiticai;

2 iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena.

3 Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete.

4 Naiemona cai fueollena, naiemona cai comeci ai ocuiñotallena, Jusiñamuina jai euegafuiaidi caimo ite. Naiemona Jusiñamui illanomo cai illemo ocuiridica.

5 Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús llua isoi, omoi uri illana jitaidicue,

6 daje isoi omoi comeci ai lloillamona, Jusiñamuina omoi iobitallena. Cai Nama Jesu-cristo Moona Jusiñamui illamona, Jusiñamuina omoi iobitajana jitaidicue.

Judúaiñedinodi Cristo rafuena jiai cacadimaci

7 Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño.

8 Iena nia lloiticue. Judúaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jai e llote. Eniruemo billanona, Cristo iena fuiduaibite.

9 Judúaiñedino Jusiñamuina iobitallena, Jusiñamui naimacina duenaila jira, Cristodi bite. David micori Cristo llua jai e cuete:

Judúaiñedino motomo cue illamona ona iobitaitimaci.

Ruamona cue muidona ona jiai iobitaitimaci.

¹⁰ Moisés micorí jiaí cuete:

Judíuainfedino, Jusiñamuimo duide comini diga iobi.

¹¹ David micorí jiaí cuete:

Nana judíuainfedino, Jusiñamuimo iobillacinona feca.

Nana comini naimiemo iobillacinona fecacabillasa.

¹² Isaías micorí cuete:

Isaí micorí uruiaimona damie comuitajamona, naimiedi judíuainfedinona sedaite.

Naimie naimacina jillobitallena, naimiemo ocuiritimaci.

¹³ Jusiñamui iemo omoína ocuiritate. Naimiena omoi inuanona, naimie omoína caimare itatajana jitaidicue. Uri itatajana jiaí jitaidicue. Iemei Jusiñamui Joreño naimie siño uai diga omoi jilluamo omoína ocuiritaite.

¹⁴ Cue amatiai, omoína uiñoticue. Eo maredomoi. Cue lloga rafuena eo uiñotomoi. Coninina llofueredomoi.

¹⁵ Iena omoi comecillena, dafuerie rafuena omoimo marefodo cueticue. Jusiñamui cuena fetuanona, ie rafuena cue llollena, cuena orede.

¹⁶ Judíuainfedinomo Jusiñamui ie mare rafuena cue llollena, Cristo Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jiaí maretaite.

¹⁷ Jusiñamui dibeimo cue maijia jira, Cristo Jesús muidona cue maijari iobidicue.

¹⁸ Cue maijiana marefodo lloticue. Judíuainfedinona Jusiñamuina inotallena, Cristodi cuena canode. Cue llwana cacadimaci. Cue illana ciodimaci.

¹⁹ Cristodi cuena siño rafuena finotate. Jusiñamui Joreño uaido cuena finotate. Iemei Cristona jai inotimaci. Jerusalémona Ilírico railla enirue dinomo Cristo ie mare rafuena ailluena cominimo raise jai lloticue.

²⁰ Nainomo Cristona nia uiñoñedino dine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue.

²¹ Isaías micorí biena jaie cuete:

Cristo rafuena nia cacaiñedinodi iena cacaitimaci.

Naimiena uiñoitimaci

cuete.

Romamo Pablo jaiacade

²² Nainomo cue maijiacana jira, Romamo omoi dine nia jaiñedicue.

²³ Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira.

²⁴ España mo cue jaia, omoi dine jaiticue. Omoi diga nano nigarui caimare ñaiticue. Ie mei España mo cue jaillena, cuena canoitomoi.

²⁵ Omoi dine jaiticue; iadedi Jerusalémo ite creyentiaína cue canollena, nainomo nano jaiticue.

²⁶ Macedoniamoi ite creyentiaidi ucubena ofitatimaci. Acayamo ite creyentiaidi ucubena jiaí ofitatimaci. Jerusalémo ite duerede creyentiaína canoacadimaci. Jerusalémo ite creyentiaína canollena, iena birui uiticue.

²⁷ Iena feaacadimaci. Judíuainfedimaci; iadedi judíuaina canoacadimaci, naimacimo Cristo rafuena navui judíuai llua jira. Ie jira naimacina birui canodimaci.

²⁸ Naimacimo bie ucubena raise cue fecaja mei, España mo cue jaillemona, omoi dine nano jaiticue.

²⁹ Omoi dine cue ria, naimie rafuena cue llollena, Cristo cuena raise canoite.

³⁰ Cue amatiai, cai Nama Jesucristomo omoi duilla muidona, Jusiñamui Joreño coniniña omoína isiruitaja muidona, Jusiñamuimo omoi jiaia, cue facaina jiaí omoi jii.

³¹ Judeamo ite creyenteñedinomona cue jillobillena, Jerusalémo ite creyentiamoi cue feaacalle ucubena naimaci raise feiñollena, cue facaina omoi jii.

³² Jusiñamui jitailla isoi omoi ðine iocire cue rillena, iese omoi jii. Iemei omoi ðiga cue illemona, jafaicina oiticue.

³³ Jusiñamui omoina uri itatajana jitaicue.

16

Romamo itinomo Pablodi ie uaina orede

¹ Febe raillañaiño omoi ðine jaite. Naiñaiñoona omoi uiñuana jitaicue. Naiñaiñodi creyente. Cenrea railla nairai iñaiño. Cristo ðibeimo maijiano, nainomo ite creyentiaina canocabide.

² Cristomo omoi ðuilla muidona, jiaie creyentiaina cai feñoiacacabilla isoi, naiñaiñoona raise feño. ðiga cominina naiñaiño canua jira, naiñaiño jitailla ðiese cano. Curna jiaí canode.

³ Priscila ðine cue uaina oreicue. Naiñaiño ini Aquila ðine cue uaina jiaí oreicue. Cristo Jesús facaina cue ðiga maijiaiaimaiaí.

⁴ Cue facaina niadedi fiodaitiaimaiaí. Ie jira iaímaiairi iobidicue. ðiga nairaimo judíuaíñede creyentiaí itimaci. Cuemona Cristo rafuena cacadimaci. Cue facaina iaímaiaí niadedi fiodailla jira, iaímaiairi jiaí iobidimaci.

⁵ Iaímaiaí jofomo rollena bitino ðine cue uaina oreicue. Epeneto ðine cue uaina jiaí oreicue. Cue isiruigamie. Asia railla eniruemo itinomona naimiedi Cristona nano ñnotimie.

⁶ María ðine cue uaina oreicue. Omoína canollena, omoi motomo maijide.

⁷ Andrónico ðine cue uaina oreicue. Junias ðine cue uaina oreicue. Naie iaímaiaí ðine cue comini. Cárcelmo danomo navui iticai. Jesucristo oretaganodi iaímaiaina marena ñaitimaci. Naimiena nia cue ñnoñena facaise Cristona ñnotiaimaiaí.

⁸ Amplias ðine cue uaina oreicue. Cristomo naimie ðuilla jira, naimiedi cue isiruigamie.

⁹ Urbano ðine cue uaina oreicue. Cristo facaina cai ðiga maijicabide. Estaquis ðine cue uaina oreicue. Cue isiruigamie.

¹⁰ Apeles ðine cue uaina oreicue. Cristomona naimiedi mare rafuedo jaicabide. Aristóbulo jofomo itino ðine cue uaina oreicue.

¹¹ Herodión ðine cue uaina oreicue. Naimiedi cue comini. Narciso cominimona dajerie ñnotimaci. Naimaci ðine cue uaina oreicue.

¹² Trifena ðine cue uaina oreicue. Trifosa ðine cue uaina oreicue. Cai Nama facaina maijiaiaíñuai. Pérsida ðine cue uaina oreicue. Cue isiruigañaiño. Cai Nama facaina eo maijide.

¹³ Rufo ðine cue uaina oreicue. Cai Namana eo raise ñnote. Naimie ei ðine cue uaina jiaí oreicue. Naiñaiñodi cue ei isoide.

¹⁴ Asíncrito ðine cue uaina oreicue. Flegonte ðine cue uaina oreicue. Hermas ðine cue uaina oreicue. Patrobas ðine cue uaina oreicue. Hermes ðine cue uaina oreicue. Naimaci illanomo ite creyentiaí ðine cue uaina oreicue.

¹⁵ Filólogo ðine cue uaina oreicue. Julia ðine cue uaina oreicue. Nereo ðine cue uaina oreicue. Naimie miriño ðine cue uaina oreicue. Olimpás ðine cue uaina oreicue. Nana naimaci illanomo ite creyentiaí ðine cue uaina oreicue.

¹⁶ Conini caimare omoi uaido. ðiga nairaimo creyentiaí itimaci. Nana naimacidi omoi ðine naimaci uaina oreidimaci.

¹⁷ Cue amatiaí, daje rafuena nia lloiticue. Omoi comeciaí daje isoi lloitañedino ðiga nabairiño. Uai uaitacabidino ðiga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci ðiga nabairiño.

¹⁸ Cai Nama Jesucristo facaina maijiaíñedimaci; iadedi ðani naimaci jitailla rana maijicabidimaci. Mare isoide llamona abina raise uiñoñedimona jifuetimaci.

¹⁹ Ailluena cominidi Cristona omoi ñnuana uiñotimaci. Ieri iobidicue. Marecinona finuana raise omoi uiñuana jitaicue. Marañedimona omoi finuana jitaíñedimaci.

²⁰ Jusiñamuidi omoïna uri itatate. Naimie omoïna canoite, Taifena anafefitallena. Cai Nama Jesucristo omoïna duenaillesa.

²¹ Omoï dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

²² Terciodicue. Pablo facaina bie cartana omoïmo cueticue. Cai Namamo cue duilla jira, omoïmo cue uaina oredicue.

²³ Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

²⁴ Erasto ie uaina orede. Naimiedi bie nairai ie ucube eenoraïma. Cuarto ie uaina orede. Naimiedi jiai creyente.

Jusiñamuimo iobillacinona jaca cai fecajasa

²⁵ Cue mare rafue llua isoi, Jusiñamui omoï comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede;

²⁶ iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini ñinollena, nana cominido bie rafuena llocana birui jaide. Jusiñamuidi jaca ite.

²⁷ Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.

CORINTOMO ITE CRISTONA #NOT#NOMO PABLO NANO ORETAGA RABE

Corintomo ite creyentiaimo Pablo cartana orede

¹⁻² Corinto railla nairaimo ite creyentia, ¿nie isoidomoi? Pablodícue. Carta omoimo oredícue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredícuco. Jesucristo díbeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoína jai marebicaitate. Jusiñamui omoína fetode, naimie iena. Ua nana cai Nama Jesucristona sedadinodicaidi Jusiñamui iena.

³ Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoi jai. Iaimaia omoína uri jai itatatiamaia. Iena omoi uiñocana mai omoi jai.

Cristo muidona Jusiñamuimona ailluena feiñoticaí

⁴ Jusiñamui diga cue ñaia, omoi facaina iobillacinona jaca fecadícue. Jesucristomo omoi duillamona, Jusiñamui omoína jai duenaite. Ie jira naimiemo omoi facaina iobillacinona jaca fecadícue.

⁵ Jusiñamui omoína duenailamona, ie rafuena omoi lollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoína eo canode. Omoína naimiemo ite rafuena raise uiñotade.

⁶ Ie muidona Cristo rafuena raise #notomoi. Cristo rafuena cai jino llamona, naimiemo raise #nofidomoi.

⁷ Ie muidona Jusiñamuimona omoimo jaca buena fiebiñede, naimie díbeimo omoi raise maijillena. Naimie díbeimo omoi raise maijamona, naimie díbeimo jiaie creyentiaína raise itatacana jaidomoi. Cai Nama Jesucristo abido billemo iocire omoi ocurillanona, Jusiñamuimona ailluena rafuena feiñotomoi.

⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoína duere finoñeite. Naimie bia, naimacimo jeacino nia illa jira, naimiena #noñedinona duere finoite.

⁹ Jusiñamui ie lloga uaina jaca finoite. Naimie #nogamie. Naimie Jitona omoi nabaillena omoína fetode. Naimie Jitodi cai Nama Jesucristo.

Naimaci comeciaí daje isoi lloñedimaci

¹⁰ Cue amatiaí, omoimo rafuena llotícue. Cai Nama Jesucristomo omoi duilla jira, iena llotícue. Omoi comeciaí daje isoi lloillana jitaídícue. Daje isoi omoi comeciaí facajana jitaídícue.

¹¹ Cloé raillamie cominimona bie rafuena cue fidia jira, iese omoimo llotícue. “Omoi comeciaí daje isoi iñedomoi” naimie llote.

¹² Omoimona damierie raitomoi: “Dani Pablo llofuia díbecinodo jai jaidícaí”. Damierie raitomoi: “Dani Apolos raillamie llofuia díbecinodo jai jaidícaí”. Damierie raitomoi: “Dani Pedro llofuia díbecinodo jai jaidícaí”. Damierie raitomoi: “Dani Cristo llofuia díbecinodo jai jaidícaí” raitomoi. Nana iese itomoi. Iemona omoi comeciaí daje isoi iñedomoi. Cloé cominimona iese fididícue.

¹³ Ero, diga omoi Jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fioidañedícue. Cue díbeimo omoi illena cue bautizañegaomoi.

¹⁴ Omoína cue bautizañena jira, omoimo ite rafue cuemona comuiñena jira, iobidícue. Dama Crispona bautizadícue. Gayona jiaí bautizadícue.

15-16 Estéfanos jofomo ite cominina bautizadícue. Jiaie cominina cue bautizajana comeciñedícue. Ie muidona: “Pablo facaina bautizadícái” llonidomoi. Daje isoi omoi comeciñe lloñenia, cue muidonañede.

17 Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraíma isoi omoímo cue llofueticuedena, cue lloga rafuemo omoi comeciñe facañedomoi. Ie jira eo abina uiñoraíma isoi omoímo llofueñedícue. Cristo fiodaillamona, omoi jeacinomona naimie omoína jillotate. Iena omoi feitañenana jitaídícue.

Cristo finoca rafuemona Jusiñamui uai siñonana uiñotícái

18 Cristona ñnoñedinomona cruzmo Cristo fiodailla rafuedi jamaífue. Naimacidi faíficana jai jaidímaci. Jusiñamuimona naie rafue illa jira, caímona naie rafuedi siño. Naie uaidi diga comini comeciñe meidorede. Caídi naie rafuena ñnotinodícái.

19 Ero, Jusiñamui facaina lloráíma micori Cristona ñnoñedinona jiaie cuete: Jusiñamui llote: “Abina uiñoraíni imaci uiñuacinona saitaitícue.

Abina baitadino imaci baitajacinona saitaitícue” llote. Ie muidona naie isoide comini jilloñenana jai uiñotícái.

20 Naie isoide comini uiñuacinomona jaca jillonidícái. Abi uiñoraíma uiñuacinodi Cristo fiodailla rafue baífemo faíñede. Moisés micori ciegafuena uiñoraíma uiñuacinodi Cristo fiodailla rafue baífemo faíñede. Uaina uaitatímie birui ite uiñuacinodi Cristo fiodailla rafue baífemo faíñede. Jusiñamuidi naimiena uiñoñedinomona imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñotícái.

21 Ie jitaillacino diese Jusiñamui finua jira, naimaci abi uiñuacinomona naimiena ñnoñedinomona. Ie jira naimie mare jitaillacinomona, naimiena ñnotinomona jai jillotate. Naimaci jeacinomona naimacina jai jillotate. Cristo rafuena caí lluamona ñnotinomona. Jusiñamuina ñnoñedinodi naie rafuena: “Jamaífue” raitímaci.

22 Siño rafuena naimaci cioacana jira, judíuai railla cominidi iese raitímaci: “Siño rafuena Jusiñamui finoa, omoi lloga rafuena ñnoitícái” raitímaci. Grieguai railla comini dinena raitímaci: “Omoi lloga rafuena caí abina uiñuacino ie isoi itena, iena ñnoitícái” raitímaci;

23 iadedi Cristo rafuena llocana jaidícái. Cruzmo naimie jai fiodaillana llotícái. Ie jira judíuidi caí lloga rafue muidona iciritímaci. Naiena oiacañenano iciritímaci. Damie naimaci illaímana jaillemo ocuiridímaci. Naimaci ocuirillamie fiodaillamo naimaci comeciñe facañedinomona. Cristo fiodailla jira, raitímaci: “Naimiedi caí ocuirinamie” raitímaci. Judíuaiñedinomona dinena raitímaci: “Omoi lloga rafuedi jamaífue” raitímaci. Ailluena comini caí lloga rafuena jitaíñedinomona;

24 iadedi Jusiñamui damierie judíuaina jai fetode. Dajerie judíuaiñedinomona jiaí jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotímaci. Cristo finoca rafuedo naimaci jilluamona, Jusiñamui abina uiñuana jiaí uiñotímaci.

25 Jusiñamui Cristona orede, caí jeacino facaina naimie fiodaillena. Jusiñamuina ñnoñedinomona Cristo finoca rafuedi jamaífue. Ebinidífue. Caímona Cristo finoca rafuedi Jusiñamui ñnoñedinomona uiñuacino baífemo faíte.

26 Cue amatíai, Jusiñamui omoína navui fetode; iadedi ¿nie isoidomoi? Jamai bue isoidomoi. Omoi comeciñe iemo faca. Jusiñamuina ñnoñedinomona abina uiñoñedomoi. Omoi creyentíai díbeimo eo abi uiñotino raise íñedinomona. Omoi creyentíai díbeimo illaícomini raise íñedinomona. Omoi creyentíai díbeimo ucuberedino raise íñedinomona. Jusiñamui ie isoidinona eo fetoñede;

27 iadedi abina uiñoñedinomona raillanodomoina fetode, eo abina uiñotino dinena meidaillena. Illaícominiñedinomona jiaí fetode, illaícomini dinena meidaillena.

²⁸ Jamai bue isoidinona fetode, jamai bue isoiñedino baifemo faillena. Jusiñamuimona jamai bue isoiñednodi jamai comini.

²⁹ Ie muidona jaca buna Jusiñamui uicomo abina iedoñena.

³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñoticai. Cristo fiodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate.

³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

2

Pablodi cruzmo Cristo fiodailla rafuena llocabite

¹ Cue amatiai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue.

² Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue.

³ Omoi motomo navui cue ia, meiruiocaillamona jacinoidicue. Jusiñamui facaina cue raise jino lloñeni raillano jaciruioidicue.

⁴ Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoina cue lloga rafue siñonana uiñotade.

⁵ Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoina jillotaja jira, jai ñnotomoi.

Jusiñamui Joreñodo bie rafuena uiñoticai

⁶ Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue isoi jiai llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiai uainicaitimaci. Ie jira naimiaci uiñogacinodo llofueñedicai;

⁷ Iadedi Jusiñamuimona abi uiñuacinona cai feiñuamona, iedo llofueticai. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede.

⁸ Birui ite illaicominidi Jusiñamuimo ite rafuena nia uiñoñedimaci. Iena uiñotimaciden, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade.

⁹ Jusiñamui facaina lloraima micori iena jaie cueda:

Jaca buna naimiena ñnotino facaina Jusiñamui finoca rafuena cioñede.

Jaca buna iena cacaiñede.

Jaca buna iemo comecina facañede

cueda. Jusiñamui rafuena uiñoñedino naie rafuena jaca uiñoñeitimaci; iadedi naimiena isiruitino naie rafuena uiñotimaci.

¹⁰ Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

¹¹ Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote.

¹² Jusiñamuimona ie Joreñona jai feiñoticai. Jiaie cominimona naie Joreñona feiñoñedicai. Jusiñamui Joreñodi caina Jusiñamui caimo caidiño fecaca rafuena uiñotade.

¹³ Omoimo naie rafuena llofuecabiticai. Cominimona fueoga uaido llofueñedicai; iadedi Jusiñamui Joreño caimo llofuaia uaido llofueticai. Ie jira Jusiñamui Joreño ite cominimo naie rafuena llofuecabiticai.

¹⁴ Jusiñamuina ñnoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci.

¹⁵ Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci.

¹⁶ Jusiñamui facaina lloraima micori iena jaie cuega: “Jaca buna Jusiñamui comecimo iticinona uiñoñede. Budi naimiena jiai llofuenide” cuega. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

3

Danomo Jusiñamui dibeimo maijidimaci

¹ Cue amatiai, Jusiñamui Joreño anamo itinona omoi raise itomoidena, omoina llofueñedicue. Omoi jitaillacinodo nia omoi jailla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaina omoi jailla mei, Cristo rafuedo eo jaiñedomoi.

² Feinide rafuena navui llofueticue. Eo feirede rafuena omoimo llofueñedicue. Omoina iena nia llofueñedicue. Omoi uruiai janore moonaila mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiñena jira, Jusiñamuimona nia moonaiñedino isoidomoi.

³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloiñedomoi. Jusiñamuina ñnoñedino isoi nia itomoi. Jamai ebe isoi nia itomoi.

⁴ Omoimona damerie: “Pablo llofuaia dibecinodo jaidicai” raitomoi. Jiaino: “Apolos raillamie llofuaia dibecinodo jaidicai” raitomoi. Iese omoi raia, Jusiñamuina ñnoñedino isoi itomoi. Ie jira iese raiñeno.

⁵ Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena lloticoco.

⁶ Naie rafuena cue llofuiamona nano ñnotomoi. Ie mei Apolos iena dane llofujete. Iese llofueuidicoco; iadedi dama Jusiñamui omoina naie rafuena ñnotacana jaide.

⁷ Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina ñnocana jaitate.

⁸ Daje uaina Apolos diga maijidicue. Coco maijia diese Jusiñamuimona coco ibana feiñoticoco.

⁹ Jusiñamui facaina maijidicoco; iadedi naimiedi omoina ñnocana jaitate. Naimiedi omoi comeciaina marena itatacana jaitate.

¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue lluaamona Cristona ñnotomoi. Birui jiaimie omoina naie rafuena jai llofujete. Omoi comeciaino naie rafue raise itabillena, omoina llofujete. Bu omoina llofueia, omoi comeci marena illacinomo naimie comecina facajanona, omoina naimie llofuecabilla.

¹¹ Omoi jeacinomona omoi jilloillena, jaca daje rafue ite. Jiaie rafuedi iñede. Iena omoimo jai llofueticue. Naie rafuedi Jesucristona ñaite.

¹² Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimiaci comeciaino raise itabide. Iena raise atona bu

llofueñenia, uanaicinona jaca llofueñenia, cominina Cristona inocana jaitañede. Naie rafuedi naimaci comecimo raise itabiñede.

¹³ Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidino llwana lloite. Naimaci llogacinona eo facaciite.

¹⁴ Ie mei Cristo rafuena raise atona llotinodi Jusiñamuimona ibana feiñoitimaci.

¹⁵ Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifiñeitimaci. Jusiñamui diga jaca iitimaci; iadedi tainomo maijidimaci.

¹⁶ Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentiai.

¹⁷ Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatimiena duere finoite.

¹⁸ Bie rafuedo omoi raise jaillena, dani omoi abiaina jifueñeno. Creyenteñedino uiñuacinodo jaiñeno. Omoimona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedino uiñuacinodo omoi jaiñeno.

¹⁹ Jusiñamuimona naimiena inoñedino uiñuacinodi jamaifue. Jusiñamui facaina lloraima micori jaie cueda: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”.

²⁰ Jiai cueda: “Jusiñamuidi abi uiñotino railla comini imaci comeciai facajacino jamafuena uiñote”.

²¹ Ie jira omoi llofuerañiri abi iedoñeno. Jusiñamuimona nana rafue omoimo jai illa jira, naimaci abi uiñuacinodo abina iedoñeno.

²² Marena omoi comeciai illacino jitai raillano, Cristo omoi dine caina oretate. Cuena oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jairuido nana omoimo ite rafuedi suite. Nia omoi fioidañenia, Cristo omoina canoite. Omoi fioidaia, naimie dine jaitomoi. Naiemona marena omoi comeciai illacino jitai raillano, ua nana rafue omoimo jai ite.

²³ Cristomo omoi jainaiaila jira, naimie anamo itomoi. Jusiñamuimo Cristo jainaiaila jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

4

Cristo fetocano naimie dibeimo maijide

¹ Caimo omoi comeciaina faca. Cristo dibeimo maijidicai. Jusiñamui rafuena llocana jaidicai. Iena jaie uiñoñedicai; iadedi naimie caina uiñotaga rafuena birui llofueticai.

² Ero, naga patródi naimie dibeimo maijidino naimie lloga uaina inuana jitaide. Ie isoide. Jusiñamuidi ie facaina lloraini naimiena naimaci inuamona naimie rafuena raise llwana jitaide.

³ Cue uaina omoi uaitañenia, iena omoi uaitaia, jaino iena uaitaia, iemo comecina facañedicue.

⁴ Cuemo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite.

⁵ Ie jira: “O llucino mare” cuemo lloñeno. “O llucino marañede” cuemo jiai lloñeno. Cai Nama nia abido biñenia, iena cuemo omoi lloñeno. Naimie bia, nana comini comeciaino ite rafuena uiñotaite. Naimaci comeciaino ite jitaillacinona uiñotaite.

Iemona naimaci maijia dinori Jusiñamuimona iobillacinona feiñoitimaci. Naie facaise cuemo ite rafuena lloite. Ie jira nia cuemo lloñeno.

⁶ Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cuegafue llua isoi, omoi illana jitaicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno.

⁷ Nana omoi llofuerañidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciaimona iena naimaci oñena jira, ie diga abina iedoñeno.

⁸ “Nana Jusiñamuimona iticinona jai feiñoticaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticaí” omoi comeciaina facadomoi; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue.

⁹ Jusiñamuidi nana omoína cue baifemo faitatate raillanomo cue comecina facadicue. Cristo rafuena llorainidicaí; iadedi cue baifemo omoi faiamo cue comecina facadicue. Omoimona jamai bue isoidicaí. Nana comini duere cai illamo raise eruaidimaci. Jusiñamui jaienisaídi duere cai illamo jiai eruaidimaci.

¹⁰ Cristo rafuena cai llua muidona, omoimona ebe isoidicaí. “Cristo rafuena raise ñnuanona, iedo raise jaidicaí” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi.

¹¹ Cai guille buedi jaca iñede. Iniroinidicaí. Jiaie comini caina duere finodimaci. Jofonidicaí.

¹² Cai ra ollena, cai onolli diga duere maijidicaí. Comini caina jeare ñaitimaci; iadedi ñbana oñedicaí. Naimaci diga marena ñaiticaí. Caina duere finodimaci; iadedi uai oñeno ñbana oñedicaí.

¹³ Cai joreñona jeare ñaitimaci; iadedi cai dinena naimaci diga marena ñaiticaí. Naimacimona jamai bue isoidicaí. Iese caimo naimaci comeciái nia facadimaci; ia Cristo ñibeimo ie rafuena nia llocana jiacadicaí.

¹⁴ Bie carta cue cuiamona, omoína meiruitaiaicaiñedicue; ia omoína nia llofueiacadicue. Isiruiga uruiaidomoi isoidomoi. Ie jira bie rafuena omoi raise uiñuana jitaicue.

¹⁵ Omoína Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruiaina jai jaidomoi isoidomoi.

¹⁶ Ie jira omoimo cue llogacínodo mai omoi jai.

¹⁷ Iedo omoi jaillena, omoína canollena, omoi ñine Timoteona jai oredicue. Naimiēna isiruiticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoide. Creyentiaí illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoína llofue.

¹⁸ “Pablo caina jaciruilla jira, naimie cai ñine biñeite” raillanomo omoi comeciaina facajamona, omoimona damierie jai abina biridomoi.

¹⁹ Iese comeciaina facadomoi; iadedi Jusiñamui jitaia, omoi ñine raire jaiticue. Ie mei ñie isoide uai naie abina biridinomo illana uiñoiticue. Naimaci ñaiacínodo iena uiñoñeiticue; iadedi naimaci finoca rafuemona iena uiñoiticue.

²⁰ Ero, jamai ñaiamona, Jusiñamui anamo naimie jitailla isoi iñedicaí; iadedi naimie finoca rafuedo cai jaillamona, naimie jitailla isoi iticaí.

²¹ Omoi dine ico cue ria, ¿niese omoi diga ñaiticue? Cuemo llono. Cue llwana omoi ñinoñena, omoimo riire lloiticue. Cue llwana omoi ñinoia, omoina cue isiruillamona, omoimo fecuise lloiticue. Ie jira cuemo llono.

5

Pablo eo jearede rafuena finodimiena riire llote

¹ Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina ñinoñedino naie isoide rafuena finoñedimaci; iadedi omoimona damie ie eicañona ote, ie aina.

² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacomo naimie bia, naimie fo billana rairui.

³ Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uiñoticue.

⁴ Cai Nama Jesús facaina cue ñaiaimona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite.

⁵ Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaiamo faiamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa.

⁷ Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judíuai cominidi toica llaudaia fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno.

⁸ Cai facaina Cristo fiodailla jira, cai jeacinona fainonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicínodo mai cai jailli.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaia diga itañaiñuai diga nabairiñellena lloticue.

¹⁰ Nibai iena raise cacaiñedomoi. Ie jira iena dane lloiticue. Cristona ñinoñedinona ñaiñedicue. Naimaci aiñede riñoniai diga ia, naiñaiñuai iniñede iñiaia diga ia, naimaci rana nicidoia, rana naimaci fñia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusiñamuina uiñoñedino illa jira, ¿ninomo niadedi iticai?

¹¹ “Cristona ñnoticai” raitinona ñaiticue. Naimaci aiñede riñoniai diga naimaci ia, naiñaiñuai iniñede iñiaia diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci fñcabia, naimaci diga nabairiñeno. Naie isoidino omoi jofuemo feiñoñeno.

¹²⁻¹³ Cristona ñinoñedinona ñaiñedicue. Naimaci rafue cuemo duiñede; iadedi marañedicinona naimaci finoia, Jusiñamui naimacina duere finoite; iadedi Cristona ñnotino marañedicinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona ñnoñede juezmo jiaie creyentena llogidoñoeno

¹ Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaie dine jaiñedomoi, naicinona siadollena? ¿Bue ñellena Cristona ñnoñede juez dine naimiena meiruiñoeno llogidotomoi?

²⁻³ Jesucristo abido bille mei, Cristona ñnotinodicaidei Cristona ñnoñedinona duere sefuillena lloiticai. Taife comini duere sefuillicinona ico jiai lloiticai. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi?

⁴ Nicino omoimo ia, ¿bue ñellena Cristona ñnoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci.

⁵ Omoi meidaillena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena.

⁶ Iese finocabiñedomoi; iadedi nicino omoi creyentiaimo ia, Cristona ñnoñedimie mo jiaie creyentena llogidocabitomoi.

⁷ Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñoeno anamo ee. Naimiemona omoi duere sefuia, dama ite.

⁸ Iese iñedomoi; iadedi dani conini jiaie creyentiaina duere finocabidomoi. Naimaci rana fiidomoi. Omoi amana duere finodomoi.

⁹ Jusiñamui sedajanomo naimiena ñnoñedino duiñoetimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñoetimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conioño aifiedotino,

¹⁰ rana bainino fiicabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñoetimaci.

¹¹ Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemonabina rairui

¹² Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaie iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi.

¹³ Raitomoi: “Nie isoide guille cai guiacania, nie isoide rafue cai finoacania, camona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite.

¹⁴ Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiaie diga caina ico jillotaite. Cai abi jaca illa jira, jearede rafuena birui cai finoñena.

¹⁵ Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñoeno.

¹⁶ Ie añede riño diga bu ia, ie ai illa isoi, jai dajena jaidiaimaia. Ie jira Jusiñamui jaie llote: “Riño diga ima illa jira, jai dajena jaidiaimaia” llote.

¹⁷ Cai Nama Cristomo bu duia, dajena jai jaidiaimaia. Jusiñamui Joreño iaiaimaiaimo illa jira, iaiaimaia comeci daje isoi jai lloide.

¹⁸ Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caïmanide rafue ie abi diga finode. Jiaie marañede rafue bu finoia, naimie abimo jearede rafue finoñede.

¹⁹ Naimiemo omoi duillanona, Jusiñamui Joreño omoiimo illana uiñotomoi. Ie illanodi omoi creyentia. Jusiñamuimo jai jainaiaidomoi. Ie muidona omoi jitaillacinodo jaiñeno.

²⁰ Omoi jeacino facaina Cristo fodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

7

Pablodi ima ie aina ua rafuena ñaite

¹ Dajerie rafue cuemo jicanollena, carta cuemo navui oredomoi. Iena ja ñaiticue. Ima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare;

² Iadedi jeacino omoi finoi raillano, nagamie ie aina otena, jiai mare. Nagañaiño ie inina otena, jiai mare.

³ Naga ini ie ai diga iniacania, naimiemonai naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena.

⁴ Naiñaiño abi dañeñede; iadedi daño ie ini abimo jiai duide. Naimie abi damañede; iadedi dama ie ai abimo jiai duide.

⁵ Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacañenia, jiai mare. Naie facaise fuilla meinomo riño diga o iacanamona, dane danomo ini, Taife omicomomo ramo fai raillano.

⁶ Dane lloiticue. Jeacina omoi finoi raillano, nagamie ie aina otena, mare. Nagañaiño ie inina otena, jiai mare. Iese omoiimo lloticue; iadedi iese ocuiñedicue.

⁷ Ainidicue. Cue illa isoi omoi illana jitaidicue; iadedi daje isoiñedica. Jusiñamui caina itataja diese iese itica. Dajerie ainidimaci. Dajerie airedimaci. Dajerie inidimaci. Dajerie iniredimaci.

⁸ Nia ainidinomo lloiticue. Nia inidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare;

⁹ Iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie imamo o comecina facañellena, daje imana ono, o inina.

¹⁰ Creyentiaimo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie llote: “Riño ie inina sofeño.

¹¹ Ima ie aina sofeño” llote. Iese llote; iadedi nie riño ie inina sofeia, jiaie imana naiñaiño oñena. Imana naiñaiño oiacania, ie ini diga dane abido illasa.

¹² Nia lloiticue. Cai Nama biena jaie lloñede; iadedi iena birui cue lloiticue. Omoi nairaïmona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono.

¹³ Omoi nairaïmona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiño llono.

¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacina finoñede. Ie ai nia creyentena jaiñenia, ie ini creyentena illamona,

naiñaiño diga naimie nia iacania, jeacinona finoñede. Naie creyente muidona, naie iaímaiaí uruiaína, jaíe creyente iaímaiaí uruiaí isoi, omoi roracomo feiño.

¹⁵ Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aína creyenteñede ini sofeiacania: “Naimiena dotaño” naiñaiñoño llono. “Naimie jaillena rairuiño” naiñaiñoño llono. Sofeia mei, jai dajemo duiñediiaímaiaí. Jusiñamui naga creyente uri illana jitaide;

¹⁶ iadedi ie ini diga ie ai fiebia, ie ini creyentenamona, naiñaiño níbaí creyentena jaite. Ie ai diga ie ini fiebia, ie ai creyentenamona, naimie níbaí creyentena jaite.

¹⁷ Iena llotícue; iadedi Jusiñamui mona ie feiñooga uaido nagamie jailla. Creyentiaína omoi jailla facaiseconi, omoi maijjuilla ramo nia raise omoi maiji. Naga creyentiaí illanomo buena llofuecabitícue.

¹⁸ Nia creyentiaína omoi jaíñenia, judíuai isoi omoi mona dajerie omoi abiaína detatato moi. Naie detatafuemo omoi comeciána birui facaño. Omoi mona dajerie omoi abiaína nia detatañedomoi. Iemo omoi comeciána birui facaño;

¹⁹ iadedi Jusiñamui uaina omoi inuamo omoi comeciána birui faca. Jaíe rafue baífemo faite.

²⁰ Creyentiaína omoi jailla facaiseconi, omoi maijjuilla ramo nia raise omoi maiji.

²¹ Creyentiaína omoi jailla facaise omoi mona dajerie patrón anamo itinodomoí. Nia patrón anamo itino isoi omoi jai. Iemo omoi comeciána jarire facaño. Jaíruido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai.

²² Cristona omoi inua facaise, patrón anamo omoi mona damierie navui itomoí; iadedi Jusiñamui omoi na fetode. Naimiena omoi inuamona, omoi jeacino anamo jai iñedomoi. Patrón anamo omoi mona damierie navui iñedomoi; iadedi Jusiñamui omoi na fetode. Ie jira naimie anamo jai itomoí.

²³ Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie comina jai jaidomoí. Ie jira comini jitaillacino anamo iño; iadedi Jusiñamui jitaillacino anamo i.

²⁴ Cue amatiaí, creyentiaína omoi jailla facaiseconi omoi maijjuilla ramo nia raise omoi maiji. Jusiñamui omoi na canuanona, jearede rana omoi maijiñenia, nie isoide rana omoi maijja, Jusiñamui mona mare.

²⁵ Navui cuemo cartana oredomoí. Faidaiñuai illa rafuena uiñoiacadomoí. Cai Nama naie rafuena jaie lloñena jira, iena birui llotícue. Naimie cuena duenaila jira, naimie uaina inotícue. Ie muidona comini inogamiedicue.

²⁶ Birui duere omoi sefuilla facaise illa jira, omoi illa isoi omoi i.

²⁷ Omoi mona bu airenía, naiñaiñoña dotañena. Bu aína, dama ainide. Riñoña oñena;

²⁸ iadedi o aína illena ininide riñoña o otiodena, jeacinona finoñedio. Omoi mona o inina illena ainide imana o otiodena, jeacinona finoñedio; iadedi aína bu ua mei, inina bu ua mei, eo duere maijite. Iese omoi duere sefuiñellena, omoi mo iena llotícue.

²⁹ Cue amatiaí, biemo omoi comeciána faca. Jesucristo abido dane billirui iaírei ite. Naimie jitailla rafuena omoi raise finollena, omoi ainiaimo ite rafuemo omoi comeciána facaja; iadedi Cristo rafuemo omoi comeciána eo facaja.

³⁰ Omoi mona damierie sunaia, damierie caimare ia, iemo omoi comeciána eo facaño. Damierie raruiána ibaia, naieri eo iobiño.

³¹ Omoi mona damierie bene ite rana ebiruitimaci; iadedi iemo omoi comeciána eo facaño. Iemo omoi comeciána eo facaia, abi juanide, Cristo rafuena omoi finollena. Cristo rafue nano finuamo omoi comeciána eo faca.

³² Omoi comeciána jarire iñenana jitaídícue. Nia ainidimie abi juarede, dama Cristo rafuena maijillena. Naimiena iobitaíacade;

³³ Iadedi airedimie bene ite rafuemo ie começina facade. Ie aina iobitaiacade. Naiñaiño mo ite rafuemo naimie começina facade. Cristo rafuemo ie começina jiaí facade;

³⁴ Iadedi mena rafuemo ie começina eo facallemo abi juarede. Ininidiñaiño abi juarede, dañó Cristo rafuena maijillena. Nana naiñaiño começimona naimiena iobitaiacade; iadedi inirediñaiño bene ite rafuemo começina facade. Ie inina iobitaiacade. Naimiemo ite rafuemo naiñaiño começina facade.

³⁵ Aina uana rairuiñedicue. Inina uana jiaí rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaídicue. Dani Cristo rafuemo omoi começina facajana jitaídicue.

³⁶ Ero, omoi mona naiñaiño oiacaga imamo ie moo, ie jisa caidiñeno fecaca. Naiñaiño jai moonaila jira, naiñaiño jitailla jira, naiñaiño feca. Fecaia, ie moo jeacinona finoñede;

³⁷ Iadedi inina naiñaiño oiacañenia, naimie começi llumona, ie começina eo facajamona, ie jisa feacaaiñenia, jiaí mare.

³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiaí mare.

³⁹ Jiaie rafuena lloticue. Riño ie ini nia fioidañenia, naiñaiño naimiemo jaca duide. Ie ini fioidaille mei, jiaie imana ie ini ifomo naiñaiño oiacania, mare; iadedi creyentedimiena naiñaiño ua.

⁴⁰ Naie feciñodi imana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoi mona damerie naie isoide llicisi riana: “Maraiñede” raitimaci. Creyentiamona Jusiñamuina eruaide jirarai jamai rana illa jira, damerie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie começina raise facañede. Iena naimie riia, jiaie creyentiamo começina facañede. Jiaie creyentiaina bu isirua, naimacimo ie começina facade. Cristo rafuedo jiaie creyentiaí raise jaillana jitaide.

² “Eo abina uiñoticue” ie começina bu facaia, nia eo raise abina uiñoñede;

³ Iadedi Jusiñamuina ua cai isiruillamona, jiaie creyentiaina cai isirua, jai abina uiñoticaí. Jusiñamui dinena caina jiaí uiñoñede.

⁴ ¿Niese Jusiñamuina eruaide jiraraimo fecaca llicisina ñaiticaí? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca dajede. Iena uiñoticaí” raitomoi;

⁵ Iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci.

⁶ Iena sedacabidimaci; iadedi cai dani Jusiñamuina sedacabidicaí. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentiaí uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: “Naie jirarai sedadicaí” naimaci começina facadimaci. Naie rafue naimaci raise uiñoñena jira: “Jeacinona finodicaí” raitimaci.

⁸ Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai ñnuamona caina feiñote. Buena cai riñenia, buena cai ríia, jeacinona finoñedicai. Naiemona marecinona jiai finoñedicai.

⁹ Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi ríia, naimiemona jeacinona jai finodomo. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite.

¹⁰ Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”.

¹¹ Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite.

¹² Iese omoi finoia, omoi amana jeacinona finotatomo. Naimie comecina ocuiñotañedomoi. Ie muidona Cristomo jeacinona jiai finodomo.

¹³ Cristomo jeacino cue finoí raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feiñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuenajae fetua facaise cai Nama Jesúna ciodicue. Creyentiaina omoi jailla jira, cai Nama facaina cue maijiana uiñotomoi.

² Jiaie comini Jesucristo oretagamiedicuena nibai uiñoñedimaci; iadedi omoi iena uiñotomoi. Cristona omoi inua jira, Jesucristo cuena oretajana uiñotomoi.

³ Cue llofuiacinona bu uaitaia, iese cue llofuiacinona riidoticue.

⁴ Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa.

⁵ Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiai macaria, omoi dine Pedro macaria, naimaci jitailla rana naimacimo jamai fecaidomoi. Ie jira, ¿niese cue jitailla rana cuemo jamai fecañeitomoi?

⁶ Jiaie llorainimo naimaci jitailla rana jamai fecacabidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi.

⁷ Ero, soldadodi ie guille ibañede. Iena jamai feiñote. Naga illimo maijuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue.

⁸ Jamai comini uaido naiena llofueñedicue; iadedi Moisés micori cufuafuiaimona iena fueotice.

⁹ Naimie micori jaie cuela: “Jusiñamui llote: ‘Jurareta trigo oni juillena saisiia, iemona ie guillesa, ie fuena maiñeno. Maiñenia, ie maijia fuemona guite’ llote”. Ie isoide. Omoi motomo cue maijia fuemona cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade.

¹⁰ Cristo rafuena cue llofuecabilla jira, cue llua fuemona cue jitailla rana jamai cue feiñua. Iemo ocuiridicue. Ie isoide. Ie illimo bu maijia, naiemona riera ollena, nainomo maijide. Iemo ocuiride.

¹¹ Omoi motomo Cristo rafuedo omoi raise jaillena, navui llofuetice. Ie jira cue jitailla raruaia omoimona jamai cue ua.

12 Omoimona raruiaina jiaie lloraini feiñocabilla jira, cuemona Cristo rafuena nano omoi cacaja jira, cue jamai jiaie feiñua; iadedi omoimona raruiaina jicañedicue.

Cue jitailla raruiái cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: “Raruiái oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoimona raruiaina jicañedicue.

13 Ero, Jerusalémo judíuai comini Jusiñamuina sedauilla jofo ite. Nainomo naie comini toiniaina atiuidimaci, Jusiñamuimo fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijiuidino comini atica toiniaimona naimaci rillena, ibajanona ocabitimaci. Iena uiñotomoi.

14 Ie isoide. Cristo rafuena llorainidi naimaci rafuena ñnotinomona naimaci jitailla rana imaci ua. Cristo iena jai llote.

15 Omoimona raruiaina jaca jicañedicue. Raruiái birui cue ollena, bie cartana jiaie cueñedicue. Dama cuemo ite ra diga iiticue. Omoimona iena feiñoticuedena, meiruiocaida feiñoticue. Omoimona cue feiñoñena jira, omoi facaina Cristo rafue cue llumona, abina iedoticue. Raruiái cuemo jamai omoi fecaia, ¿ñiese abina iedoiticue?

16 Jiaie lloraini rana feiñua isoi cue feiñoia, Cristo rafuena cue llumona abina iedoñeiticue. Jusiñamui cuena oretaja jira, naie rafuena lloticue. Iena cue lloñenia, Jusiñamui cuena duere finoite.

17 Dama cue comeci jitaillamona Cristo rafuena cue lloiacania, Jusiñamuimona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue.

18 Ie jira, ¿ñiese ibana feiñoiticue? Ibana nibai feiñoiticue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

19 Omoimona raruiaina cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina Cristo ñibeimo cue itatallena. Iese jaiñedicuedena, eo janore comini Cristo ñibeimo nibai jai itataticue.

20 Judíuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo ñibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue.

21 Judíuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiaie jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiaie jaidicue. Cristo lloga uaido jiaie jaidicue. Naimacina Cristo ñibeimo itataiacadicue.

22 Naimaci diga cue nabairillena, Cristo rafuena nia raise ñnoñedino diga cue ia: “Omoi baifemo Cristo rafuena uiñoticue” raiñedicue. Naimacina iciacaiñedicue, naimacimo jeacina cue fino raillano. Naimacina cue isiruillamona, naimacina canoacaducue. Naimacina Cristo rafuena raise ñnuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damerie Cristona nibai ñnoitimaci”.

23 Cristo rafuena ailluena comini ñnollena, iese jaidicue. Iena llocana jaidicue. Naimaci ñnua jira, iobidicue.

24 Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, riire uicodo ridimie rana ote. Ailluena comini aisdimacimona, damie naie rana ote. Ie isoide. Cristo rafuena ñnocana mai cai jailli, ico Jusiñamui illanomo monamo ibana nana cai feiñollena.

²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiaina cai eenua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobiticaí.

²⁶ Riire aisiacadimie ebena aisíñede. Onolli diga mena iaímaiaí jamai jifanoia, jafaicina jamai ducoíñediaímaiaí; iadedi conimana ducoídiaímaiaí. Ie isoide. Cristo rafuedo raise cue jaiacania, jamai ebena jaiñedicue; iadedi nana cue comecimona iedo jaidicue.

²⁷ Cue comecina raise sedadicue. Dama Cristo rafue anamo iacadicue. Dama iena inoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

10

Jiraraína sedañena rafue

¹ Cue amatiái, bie rafuena feitaño. Cai jaiagai micoriaí finoca rafuemonona fueoiticaí. Egipto railla enruemonona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiaírede railla monailai ruica naimaci jaiacania, Jusiñamuidi naie monailai oni ñaijitate, safefodo nana naimaci ruica jaillena.

² Naie isoide rafue nana naimacimo suillanona, Moisés micori díbeimo raise duidimaci. Naimie anamo itabidimaci.

³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci.

⁴ Nainomo jinui jiai iñena jira, Jusiñamui llua jira, Moisés micori noficina butajamona, toide jinuina nana jirodimaci. Naimaci nine macaria, Cristona cioíñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide;

⁵ Iadedi Jusiñamuina naimaci inoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaína fiodaitade.

⁶ Cai jaiagai finoca rafuemonona cai fueua. Maraiñede jearede rafuena naimaci finua isoi ebiruiño. Abimo omoi oño.

⁷ Jusiñamuiñedimiena sedaño. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñedimiena omoi sedaño.

⁸ Naimaci jearede rafuena finodimaci. Naimacimona damierie naimaci aiñede riñoniaí diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oño.

⁹ Cai jaiagaimona damierie Jusiñamui Joreñoña ñaitimaci. Naimaci guisoiga radi Jusiñamuimona bite. Naiena ñiamona, Egiptomona ite guillemo comeciaina facadimaci. Ie muidona naimiena ricaitadimaci. Ie jira Jusiñamuidi jaioniaína naimacina ainitate. Iemona ailluena fiodaitimaci. Naimaci finoca rafue isoi abimo cai oño. Jusiñamuina ricaitaño. Cristona cai nia inoñena facai finoca rafuemo cai comeciaina facaño.

¹⁰ Cai jaiagaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oño. Jusiñamui facaina lloraini joreñuaina cai ñaiño.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona.

¹² Naie isoide rafue omoimo suiñellena, omoi abiaina rairui. Omoi comeciaina nibai facadomoi: “Cristona cai eo raise ñnua jira, iena finoñeiticaí” comeciaina facadomoi; iadedi omoi abiaina omoi rairuiñenia, jeacinona finoitomoi.

¹³ Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi ñnogamie. Ie muidona omoi comeciái ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi ñnoñellena, Jusiñamuidi omoína canoite.

¹⁴ Cue amatiaí, Jusiñamui omoína canuamona, Jusiñamuiñedimie facaina finoca rafue-mona oni i.

¹⁵ Abina uiñotomoi. Ie jira omoimo cue llucacina omoi cacaja mei, iemo omoi comeciaina omoi faca.

¹⁶ Ero, Cristona cai sedallena, roracomo danomo oficabidicaí. Naimie fiodailla rafuena cai comecillena, janore vino jiruana, janore llomenicono guiticaí. Jusiñamuimo iobillacina nano fecadicaí. Ie mei janore vino jirodicaí. Iena cai jiruamona, Cristona cai nabaillana uiñoticaí. Cruzmo Cristo fiodailla jira, naimiena nabaidicaí. Naie facaise llomenicono cai tairuñuamona, naimiena cai nabaillana uiñoticaí. Cristo fiodailla jira, iese iticaí.

¹⁷ Diga creyentiaídicaí; iadedi daje llomenicomona jaca guiticaí. Daje llomenicomona cai guilla jira, dajena Cristomo cai duillana uiñoticaí.

¹⁸ Ero, judíuai railla cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci.

¹⁹ Omoi illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentiaídicaímona naie guilledi jamai guille. Naie jiraraidi jamai ra. Cajene;de;

²⁰ iadedi Jusiñamuina ñnoñedinomona jamai rañede. Naimacimona nanoca ra. “Iemo rille cai fecajia, cai moonu sedadicaí” raitimaci; iadedi naie ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoi. Taife diga omoi nabairillana jitañedicue. Taifemo omoi duillana jitañedicue.

²¹ Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, marañede.

²² Iese omoi finoia, Jusiñamuina jai iciritaitomoi. Naimiena omoi icia, ¿ñiese naimie riicaillafuemono jilloitomoi? Jaca jilloñeitomoi.

Jiaie creyentiaína canocana cai jailla

²³ Ero, Jusiñamui díbeimo omoi illa jira, ¿ñiese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaí iena finorede; iadedi dajerie Jusiñamui rairuiñega rafuena cai finoñelli, naiemona bué cai oñena jira. Iena cai finoia, cai amana Cristo díbeimo itatañedicaí. Iena cai finoia, cai amana Cristo rafuena ñnotacana jaiñeiticaí. Naimiena ramo faicana uitataticaí.

²⁴ Omoimona nagamie dama naimie mo ite rafuemo comecina facañena; iadedi naga jiaie creyentemo ite rafuemo ie comecina jiai facaja.

²⁵ Ero, ninena o llicisina omoi ibaia, Jusiñamuiñedimie mo naie llicisina fecajana jicanoño; iadedi jicanoño iena jaricitaiño rino.

²⁶ Iena David micori jiaie cuega: “Jusiñamui bie enruena finode. Nana rana finode. Cai guillena, cai guille rana nana comuitaga” cuega. Ie jira ¿ñiese fimaiticaí? Naimie mare finoca rana cai ría, jeacinona finoñedicaí.

²⁷ Ero, naimie diga o guillena Cristona ñnoñedimiedi ona uaidoia, naimie dine o jaiacania, naimie dine guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno;

²⁸ iadedi Cristona raise ñnoñedimie nainomo jiai guitemo, omo lloia: “Bie llicisidi Jusiñamuiñedimie jai fecaca llicisi”, iena o riñeno. Iena o rña, Cristona raise ñnoñedimie comecina facaite: “Jecinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno.

²⁹ Naimie comecina facajacinodo cai jaiñenamona, nana Jusiñamui comuitaga guillena guiredicai; iadedi Cristona nia raise ñnoñedimiemona nana guinidicai; iadedi naimie comecina facajacinodo jaiñedicai.

³⁰ Cai guia, Jusiñamuimona naie guille comuitaja jira, Jusiñamuimo iobillacinona fecadicai; iadedi cai guillamona damierie cai joreñona ñaiamona, iena guiñeiticai.

³¹ Omoimo iena nia lloiticue. Nie isoide rana omoi guia, nie isoide rana omoi rña, nie isoide rana omoi jiroia, nie isoide rafuena omoi finoia, naieri Jusiñamuina iobita.

³² Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotinona jiai canocabi, naimaci abido danomo uaiñellena.

³³ Buena cue finoia, nana cominimo cue comecina facadicue. Ie jira nagarui cue jitail-lacinodo jaiñedicue; iadedi Cristo rafuena naimaci ñnollena, nana cominina canocana jaidicue.

11

¹ Cristo lloga rafuedo jai jaidicue. Cue isoi omoi jai.

Roracomo riñoniai illa rafue

² Cuenia feitañedomoi. Cristo oretagano jaie llogacinona omoiina llofueticue. Cue llofueuillacinodo nia jaidomoi. Ie jira omoi iobidicue;

³ iadedi jiaie rafuena nia lloiacadicue. Cristo ie Moo anamo ite. Naga ñima Cristo anamo jiai ite. Nagamie ai ie ñini anamo ite. Omoi afemo itino uaina omoi ñnoñenia, marañede.

⁴ Roracomo omoi comini oficabia, ie ñini anamo ie ai illa jira, omoi comini finocabilla isoi, naga riño ie ifogimo ñiroina bicuano jailla. Iese naiñaiño bicoñenia, ie ñini anamo naiñaiño ñede isoi eruaide. Jusiñamui diga nie ñima ñaia, Jusiñamui uaina nie ñima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitañia, Cristo afemo itena eruaide.

⁵ Nie riño Jusiñamui diga ñaia, Jusiñamui uaina nie riño jino lloia, ie ifogimo ñiroina bicoñeno jaia, ñima isoi naiñaiño iacana jira, ie ñini afemo illana eruaide. Ie ñini anamo iacaiñena jira, ie ñino meidaitade.

⁶ Nie riño ie ifogimo ñiroi bicoñeno jaiacania, ñima isoi eruaillena, ie ifogidi rijiruda gareca. Iemona naiñaiño meidaillamona, ie ñini anamo illamona, ie ifogimo ñiroina bicuano naiñaiño jaite.

⁷ Jusiñamui diga naimie ñaia, Jusiñamui anamo naimie illa jira, ñima ie ifogi icona jitañena. Jusiñamui naga ñimana comuitate. ñimana naimie finuamona, naimiena cai iobitajamona, Jusiñamui cai afemo illana uñoticai. Ie ñina iobitajamona, naiñaiño afemo ie ñini illa jira, riño ie ifogimo ñiroina bicuana jailla.

⁸ Ero, Eva micorimona Adán micori comuiñede; iadedi ie ñini micorimona ie ciraiofemona naiñaiño micori comuide.

⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai ñnollena, naimiena canollena, naiñaiño comuide.

¹⁰ Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiño na naimaci ciuanona, Jusiñamui jaienisaïmona jiai mare.

¹¹ Naga riño ie ini anamo ite; iadedi Cristona cai inua jira, riño baifemo imadi faiñede. Ima baifemo riño jiai faiñede; iadedi daiñaiñaiñ conimana iañaiñaiñ canua. Cristo naga imana, naga riñoña daje isoi feiñote.

¹² Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga ima riñoña comuide.

¹³ Biemo omoi comeciaina omoi faca: Omoi roracomo Jusiñamui diga nie riño ñaia, omoi einamac finocabilla isoi, ie ifogina bicoñeno jaia, ¿niese omoi comeciadi raite? Cue comeci: “Maraiñede” raite. Ie ini anamo naiñaiño iñedena eruaide.

¹⁴ Nana omoi biesedena raicabitomoi: “Nie ima ie ifotirai eo areniadedi, cai cominimona maraiñeno ciode;

¹⁵ iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena scotajamona, naiñaiño ifotie ie ifogina raise ibaide.

¹⁶ Iena jaca llofuecabitucue. Jiaie creyentiaï illanomo cue isoi comeciaina lloidimaci. Omoi mona bu cue llogacinona uaitaiacania, damamei ite.

Cristo fodailla rafuena raise comeciñedimaci

¹⁷ Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena inocana jaiñedomoi; iadedi naiemona maraiñede rafue comuide.

¹⁸ Rollena omoi oficabia, omoi comeciaina daje isoi lloiñenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiai guillena aticabidomoi. Mare; iadedi danomo guiñedomoi. Omoi mona damerie ucuberena jira, dueredino diga guiacaiñedomoi. Omoi guille caididomoi.

¹⁹ Omoi iese illana jitaiñedicue; iadedi daje isoi omoi comeciaina lloiñenamona, Jusiñamui dibeimo raise itinodi uñoga. Omoi mona damerie danomo omoi guillamona, Jusiñamuina omoi isiruillana uñoticaï.

²⁰ Cristona sedallena omoi oficabia, guitomoi; iadedi vino jiruanona, llomeniconona guillanona, cai Nama fodailla rafuena raise comeciñedomoi. Maraiñede rafuena omoi finua jira, iena nia lloiticue.

²¹ Nagamiai guillena aticabidomoi. Dani coniniri raise guiñedomoi. Danirie omoi atica guillena guitomoi. Jiaïnona guillena iñedomoi. Damerie omoi mo ailluena guille ite. Damerie omoi mo guille raise iñede. Jiaïnona guillena omoi iñena jira, damerie jaca aimetaïtimaci; iadedi jiaïno monidimaci. Damerie guilla motomo jiai jifaidimaci. Conini nabaiñedomoi. Ie jirari Cristo fodailla rafuena raise comecinidomoi.

²² Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiaïnomo guille feacaïñedomoi? Jiaie creyentiaïna omoi isiruiñenamona, Jusiñamuina jiai isiruiñedomoi. Janore guille itinona duere finodomoi, naimacina omoi eacaïñena jira. Iese omoi illa jira, omoi iobiñedicue.

Cristo fodailla rafuena llofuicacino

²³ Navui omoi na biena llofueciticue; iadedi omoi raise inoñena jira, iena dane llofueciticue. Cai Nama iena cuemo jaie llote. Cai Nama Jesús ie gaitatajarui facaiseconi, ie llofueoicaigano diga ia, naimaci guia, llomeniconona llinote.

²⁴ Iena llinuanona, Jusiñamuimo iobillacinona fecade. Ie mei iena taiñuanona raite: “Mai, biena guiño. Bie llomenicodi omoi guillamona, cue fodaillana omoi comeci. Cue fodaillamona omoi jeacinomona jilloitomoi. Biena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci.

²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toiniaina atiuidimaci, naimiemo fecallena”. Iemo ie comecina facajano, raite: “Cue fiodaillemona, dama cue diaillemona, Jusiñamuidi omoimo jiaie rafuena birui llote. Omoi jeacinona oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci.

²⁶ Naga icaiño Cristo facaina llomeniconona omoi guia, Cristo facaina vinona omoi jiroia, omoi jeacino facaina cai Nama fiodaillana uiñotomoi. Naimie nia abido dane bille dinori naiena comeci.

Cristo fiodailla rafuena raise comeciadicai

²⁷ Cristo fiodailla rafuena raise comeci. Naie llomeniconona Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie ñnoñena jira, Cristomo jeacinona finode.

²⁸ Jeacino omoi comeciaino illamo omoi comeciaina faca. Jeacino omoi comeciaino ia, iena guiño. Iena jiroño. Jeacino omoi comeciaino iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro.

²⁹ Jeacino naimie comecimo nia illamona, iena guia, iena jiroia, marañede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite.

³⁰ Ie muidona omoimona ailluena irareside. Ie jira omoimona damierie fiodaite.

³¹ Cai comeciaina raise cai facajamona, jeacinona cai fainonocaia, Jusiñamui caina duere finoñeite.

³² Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena ñnoñedinona duere finoite. Naimaci diga cai duere sefuiñellena, birui caina duere finode.

³³ Cue amatiai, Cristo fiodailla rafuena omoi comecillena omoi ofia, daacaiño omoi guillesa, jiaino riñedinona seda.

³⁴ Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoina duere fino raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

12

Cristo facaina raise maijillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoi. Iena ja ñaiticue. Jusiñamuimona diga uaina feiñoticaí. Naimiemona naimie facaina maijia uaina feiñoticaí. Naimie facaina cai maijillena, jiaie creyentaina cai canollena, naimiemona cai oga uaina ñaiticue. Iena omoi raise uiñuana jitaidicue.

² Ero, Cristona nia omoi ñnoñenia, Jusiñamuiñedimiede jiraraina sedavidomoi. Iedo jaiie tainodo jai-jaisoidomoi. Taife iedo omoina jifuate.

³ Ie jira biena omoi raise uiñuana jitaidicue. Jusiñamui Joreño uaido nie creyente ñaia, Jesús Joreñoa jeare ñañeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiñeno.

⁴ Jusiñamui Joreño caimo jai illa jira, Jusiñamui Joreñomona cai maijia uaina oticaí. Naga creyente daje isoi oñedicaí.

⁵ Naga creyente Cristo facaina daje isoide uai diga maijñedicaí; iadedi Cristo facaina nana maijidicaí.

⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena.

⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticaí.

⁸ Damierie creyentemo Cristo rafue jino lolle uaina itatate. Damierie creyentemo Cristo rafue llofuelle uaina itatate.

⁹ Damierie creyentemo Jusiñamui siño rafue finuana ñnotaja uaina itatate. Damierie creyentemo duidinona jillotaja uaina itatate.

¹⁰ Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jiaínomo jino lollena. Dajerie creyentemo uaina itatate, nie isoide uaido Cristo rafuena railla lloraima llua uiñollena. Jusiñamui Joreño uaido nie lloraima lloia, iena uiñote. Taife uaido nie lloraima lloia, iena jiaí uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobaiñolle uaina itatate, comini iena raise uiñollena. Iena naimaci nia dobaiñoñenia, iena jiaí raise uiñoñedimaci.

¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicaí

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicaí; iadedi dajena Cristomo duidicaí.

¹³ Dama Jusiñamui Joreñodi dajena Cristomo nana creyentiaidicaí; duidicaí. Dajerie judíuaidicaí; dajerie judíuaiñedicaí; dajerie patrón anamo iticaí; dajerie patrón anamo iñedicaí. Diga nairaiaidicaí; iadedi dajena Jusiñamui Joreñona nana feiñoticaí.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicaí; iadedi Cristo facaina dajena maijidicaí.

¹⁵ Ero, cai abimona cai eilli nibai facaite: “Onolli isoíñedícue. Onolli cue baífemo faíte. Bie abimo duiñedícue” facaite. Iese facaía, jaca iese iñede. Cai abimo jaca duide. Onolli eilli baífemo faiñede. Dafaconi ite.

¹⁶ Ero, cai jefo nibai facaite: “Uisi isoíñedícue. Uisi cue baífemo faíte. Bie abimo duiñedícue” facaite. Iese facaía, jaca iese iñede. Cai abimo jaca duide. Uisi jefo baífemo faiñede. Ie isoide. Dajena Cristomo omoi duilla jira: “Jiaímie baífemo itícue” raiñeno. Jiaie creyentena abina uradoiñeno.

¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticaí? ¿Niese niadedi ra sorillana cacadicaí? Ie isoide. Dajena Cristomo omoi duilla jira, naga creyentena jitaídomoi, Cristomo dajena ñnocana omoi jaillena. Jiaie creyentena uaitañeno.

¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate.

¹⁹ Cai abimo diga ra iñedena, ¿buedo cajeniticaí?

²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai cúa rana llinonidicaí. Ra feitañellena, cai comeci ite; iadedi cai eilli iñedena, macarinidicaí. Ie isoide. Cristomo dajemo cai duilla jira, naga creyentena dajena ñnocana jaillana jitaídicaí. Jiaie creyentemona abina iedoñeno.

²² Naga cai abimo ite rana jitaídicaí, raise cai illena. Naga cai abimo ite ra jiaie ra baífemo iñede. Nana daje isoi itena, mare;

²³ iadedi dajerie ra ebire eruaillena, cai abi jifollena, ñniroina jitaídicaí. Meiruiñellena, cai abi bainillena, ñniroina jiaí jitaídicaí.

²⁴ Cai uiecomo meiredino iñena jira, iena jifoñedicaí. Ero, Jusiñamui cai abina finode. Dajerie ra jiaie ra baifemo iñede.

²⁵ Jusiñamuidi naga cai abimo ite ra dajena maijiana itatate. Dajena maijicana jaide.

²⁶ Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicaí. Ie isoide. Cristomo dajena duidicaí. Jiaie creyente duere sefua, naimiena cai canoia, Cristo dibeimo caimare marena iticaí. Naimiena cai canoñenia, caimare marena iñedicaí.

²⁷ Ero, caidi naimie cominina jira, Cristomo dajena nagasaiaí duidicaí.

²⁸ Ie jira Jusiñamuidi naimiena inotonomona damieriena nano fetuanona, Cristo naimacina oretate, ie rafuena lollena. Ie mei jiaínona fetode, naimacimo ie rafuena llua mei, jiaínomo ie rafuena jino lollena. Jiaínona fetode, ie rafuena llofuellena, cominina ie rafuena raise uiñotallena. Jiaíno ie uaina itatate, naimie facaina naimaci maijillena, jiaie creyentiaína naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoína fetode, naimie facaina dajena nana omoi maijillena.

²⁹ Ero, Jusiñamui nana omoína fetoñede, ie rafuena jino lollena. Damieriena fetode. Nana omoína fetoñede, ie rafuena llofuellena. Damieriena fetode. Nana omoína fetoñede, siño rafuena finollena. Damieriena fetode.

³⁰ Nana omoína fetoñede, duidinona jilloitallena. Damieriena fetode. Nana omoína fetoñede, omoi uiñoñega uaido ñaíllena. Damieriena fetode. Nana omoína fetoñede, naie uiñoñega uai jino dobaiñollena. Damieriena fetode.

³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoímo illena, Jusiñamuimo jica; iadedi jiaie rafuena omoi ollena, omoímo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuena ñaiticaí.

² Jusiñamui rafue jino lolle uaina caímo ia, nana Jusiñamui caína uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo inoia, cominina cai isiruiñenia, Jusiñamuimona jamai bue isoidicaí.

³ Jiaie cominina cai canollena nana caímo ite rana cai fecaia, Cristo rafuena cai lollena cai niadi fioldaiacania, cominina cai isiruiñenia, jaca buena oñedicaí. Jusiñamuina jaca iobitañedicaí.

⁴ Cominina cai isirua, naimaci diga raire iciriñedicaí. Naimacina canocabidicaí. Naimaciri abina uradoiñedicaí. Abina birioicaiñedicaí.

⁵ Cominina cai isirua, abina iedoñedicaí. Naimacimo cai comeciaina facacabidicaí. Cai rana caidicabiñedicaí. Naimaci diga iciricabiñedicaí. Naimaci caína jeare finoia, ibana ocabiñedicaí.

⁶ Cominina cai isirua, naimaci jeare finoca rari iobicabiñedicaí. Naimaci uanai mare finoca rari iobicabidicaí.

⁷ Cominina cai isirua, naimaci caína duere finoia, ibana ocabiñedicaí. Cai joreña bu ñaia, caína taino lloia, iena inocabiñedicaí. Cai marena illamo ocuridicaí. Cai comeciaina ocuiñocana jaidicaí.

⁸ Jusiñamuidi cominina jaca cai isiruillana jitaide; iadedi caímo ie rafuena jino lolle uaina jaca itatañeite. Naie uaidi ico saite. Caímo cai uiñoñega uaido ñaia uaina jaca itatañeite; iadedi naie uai ico saite. Caímo ie llofuelle uaina jaca itatañeite; iadedi nai uai ico saite.

⁹ Nana Jusiñamui caina uiñotagacinona nia raise cacaiñedicaí. Nana Jusiñamui rafuena nia raise jino lloñedicaí;

¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticaí. Naimiemo ite rafuena jiai raise uiñoiticaí.

¹¹ Jiaie rafuedo iena llofueticue. Jaie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fainonocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoticaí; iadedi monamo cai ia, eimie isoi iena raise uiñoiticaí.

¹² Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiai raise uiñoiticaí.

¹³ Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina ñnoticaí. Naimie llogacino suillemo jai ocuridicaí. Jusiñamuina cai isiruillamona, jiaie cominina jiai isiruiticaí. Naie isiruillacino jiaicino baifemo faite. Ie jira coninina isiruicana omoi jai.

14

Omoi uiñoñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido.

² Ero, omoi uiñoñega uaido ñaia uaina omoi ñaicabia, jaca buna omoina cacaiñena jira, cominina canollena ñañedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciainona ñaitomoi.

³ Jusiñamui rafuena jino omoi lloia, cominina canodomoi. Naimacina Jusiñamuina ñnotadomoi. Naimie ñibeimo raise itatatomoi. Naimaci comeciaina ocuiñotadomoi.

⁴ Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

⁵ Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiaí iena raise cacareillena, iena omoi oni dobaiñoia, cuemona jiai mare. Ie mei naie ñaiamona, Jusiñamui rafuena naimaci cacajamona, creyentiaina canodomoi.

⁶ Cue amatiaí omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoina canoñedicue; iadedi Jusiñamui cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uiñua jira, omoina cue llofueticuedena, omoina jiai canodicue.

⁷ Ero, quena jamai tainuaido bu fia, ie figana uiñoñedicaí. Guitarra bu jamai tainuaido taia, ie taillana uiñoñedicaí.

⁸ Ejércitomo trompetana jamai tainuaido fia, soldadauí maijillena raise uiñoñedimaci.

⁹ Ie isoide. Cai cacaiñena uaido omoi ñaia, omoi ñaiana uiñoñedicaí. Iese omoi ñaia, jamai tainona ñaite isoi cacadicaí.

¹⁰ Eo ailluena nairaiá ite. Naga nairai ie uai ite dani naimaci ñaillena;

¹¹ iadedi ñie nairai ie uaina cue uiñoñenia, naimacimona jiaie nairai imiena eruaidicue. Cuemona naimaci jiaie nairaina eruaidimaci. Conini diga ñaiana cacaiñedicaí.

¹² Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena ñnocana omoi jaillena. Jusiñamui Joreñomona dani daje uaina nicidoño; iadedi nana nicido.

¹³ Ie jira ie uiñoñega uaido bu ñaia, ie oni dobaiñua uaina naimiemo illena, jiaie creyentiaí iena cacaillena, Jusiñamuimo jicaja.

¹⁴ Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue.

¹⁵ Ie jira, ¿ñiese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue.

¹⁶ Iobillacinona Jusiñamuimo omoi fecajano, omoi uiñoñega uaido omoi ñaianona, ¿ñiese omoina cacaiñedinno: “Jee” raitimaci?

¹⁷ Iobillacinona Jusiñamuimo raise fecadomoi; iadedi omoina cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno.

¹⁸ Cue uiñoñega uaido cue ñaicabilla jira, Jusiñamuimo iobillacinona fecadicue. Omoi bai femo naie uaido cue ñaiana uiñoticue;

¹⁹ iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona marañede.

²⁰ Cue amatiai, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca.

²¹ Jusiñamui facaina lloraima micori jaiie cuega: “Jusiñamui llote: ‘Cue comini dine jiaie nairaina cue oretajamona, cue cominina cuena ñnotallena, naie jiaie nairai uaido cue cominimo lloiticue; iadedi iena jitaiñeitimaci. Cuena jaca uiñoñeitimaci’ llote”.

²² Ie isoide. Uiñoñega uaido omoi ñaiamona, Cristona ñnoñedinno iena raise cacaiñedimaci; iadedi Cristona ñnotino iena cacadimaci. Iemona fueotimaci. Jusiñamui rafuena omoi llofuamona, Cristona ñnoñedinno iena cacajamona, Cristona ñnoñedimaci; iadedi Cristona ñnotinona canodomoi.

²³ Danomo nana omoi ofia, omoi uiñoñega uaido nana omoi ñaia, Cristona ñnoñedinno iena cacajanona, omoina; “Uairico” raitimaci;

²⁴ iadedi omoi ofia, Jusiñamui rafuena omoi jino lloia, iena Cristona ñnoñedimie cacajamona, naimiedi jeacino naimie comecimo illana uiñoite. Naie rafue naimiemo riire baite.

²⁵ Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina ñnoite. Ie muidona raite: “Uanai, Jusiñamui omoi motomo ite”.

Roracomo omoi ia, raise marena omoi i

²⁶ Cue amatiai, rollena omoi oficabia, ¿ñiese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo dibeimo creyentiaina raise itatallena, nana omoi finua rafuena raise fino.

²⁷ Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite.

²⁸ Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia.

²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua.

³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llicaiilla. Iemei jiaimie lloite.

³¹ Iese damierie nana lloitomoi, naie lluaamona Jusiñamui rafuena raise omoi uiñollena, omoi comeciai jiai ocuiñollena.

³² Naga llotimiedi ie uiñua diese lluaana uiñoite. Ie jira jiaimie nia lloia, iena cacarei. Iemei jiaimie llua.

³³ Iese iñenia, daacaiño omoï lloia, buna Jusiñamui rafuena raise cacaiñeite. Omoï raise illena Jusiñamui jitailla jira, omoï uri illena Jusiñamui jitailla jira, cue llucacino omoï jai.

³⁴⁻³⁵ Jiaie creyentiaï illanuaïmo isoi omoï roracomo riñoniaïdi uaina uaitañena. Nainomo lloga rafuena nainomo naiñaiñuaï siadoñena; iadedi naiñaiñuaï jofomo rillanona, naiena ie inimo jicanoitimaci. Roracomo naiñaiñuaï ia, Moisés micori jaie llua isoi, naiñaiñuaï iní anamo naiñaiñuaï illa jira, nainomo ite lloraïma uaina naiñaiñuaï uaitañena. Roracomo naiñaiñuaï uaina uaitaïa, maraiñede, nainomo ite jino lloraïma uaina naiñaiñuaï raise cacaiñena jira.

³⁶ ¿Ñiese cue llucacino jaiacaiñedomoï? Jusiñamui rafue omoïmona comuiñede. Dani omoïmo naie rafue duiñede; iadedi nana creyentiaïmo duide. Dani omoïmo Jusiñamui ie rafuena lloñede. Nana creyentiaïmo iena lloite.

³⁷ “Rafuena Jusiñamui cuemo lloite” omoïmona ie comecina bu facaia, “Jusiñamui Joreño ie ñaïa uaina cuemo itatate” ie comecina bu facaia, “Cai Namamona ite uaina omoïmo cueticue” naimiedi uiñote;

³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaï.

³⁹ Cue amataï, Jusiñamui omoïmo ie rafuena llua uaina naimiemo jica; iadedi naimaci uiñoñega uaido jiaie creyentiaï ñaïa, iena rairuiñeno.

⁴⁰ Omoï ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amataï, iena omoï feitañellena, bie rafuena dane lloiticue. Cristo ie mare rafuena omoïna navui llofueticue. Fiodaillamona Cristo jilluana llofueticue. Cue llofuicacina feiñotomoï. Iena inocana jaidomoï.

² Naiena omoï inuamona, Jusiñamui omoï jeacino mona omoïna jillotate. Naiedo nia omoï jaia, iena raise omoï inoia, jai jillobidomoï.

³ Nanoca rafuena omoïna llofueticue. Jiaie creyentiaïmona buena jai cacadicue. Jusiñamui facaina lloraïni micoriaï jaie ciegafuiaï isoi cai jeacino facaina Cristodi fiodaite.

⁴ Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraïni micoriaï jaie llua isoi.

⁵ Ie mei Pedro naimiena ciode. Ie mei ie once llofueoicaigano naimiena ciodimaci.

⁶ Ie mei quinientos naimiena inotino naimiena daruido ciodimaci. Naimacimona damerie jai fiodaitimaci; iadedi ailluena nia fiodaiñedimaci. Cristo jilluana uiñotimaci.

⁷ Ie mei Jacobo naimiena ciode. Ie mei nana ie oretagano naimiena ciodimaci.

⁸ Ie mei naimiena jiaï ciodicue. Ie jira fiodaillamona naimie jilluana uiñoticaï. Ie doce llofueoicaigano fetua mei, diga años illanona, naimiena nia cue uiñoñena facaise cuena fetode. Ie mei ie rafuena cue lollena, cuena oretate.

⁹ Ailluena creyentiaïna jaie cue duere finua jira, nana jiaie Cristo oretagano cue baifemo faitimaci. Jamai bue isodicue; iadedi Cristo cuena fetode.

¹⁰ Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue.

¹¹ Jiaie oretagano Cristo rafuena llofueia, iena cue llofueia, daje isoide rafuena llocana jaidicaï. Naie rafuena omoï cacajamona, iena inotomoï.

Fiodaillamona nana creyentiaï ico jilloitimaci

¹² Fiodaillamona Jusiñamui Cristona jillotajana llofuecabiticaï; iadedi omoïmona dajerie raitomoï: “Fiodaillamona, nana comini imaci abiaï diga ico jilloñeitimaci”.

¹³ Ero, omoï llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede.

¹⁴ Cristo jilloñenia, Cristo rafuena jai tainona lloticaï. Naie rafuena jiai tainona ñnotomoi.

¹⁵ Cristo fiodaillamona Jusiñamuidi naimiena jillotajana llofuecabiticaï. Fiodaillamona creyentiaïna ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticaï.

¹⁶ Fiodaillamona nana creyentiaï ico jilloñenia, Cristo jiai jaie jilloñede.

¹⁷ Cristo nia jilloñenia, naimiena tainona ñnotomoi. Jusiñamui omoï jeacinona niadedi oni dotañede.

¹⁸ Cristona ñnuanona jai fiodaitinodi jiai jai faïfidimaci. Jusiñamui illanomo jaca ññeitimaci; iadedi iraimo jaca iitimaci.

¹⁹ Nana cai ille ñnori ñani Cristo caina jilloitallemo cai ocuria; iadedi naimie jilloñenia, jai duere iticaï. Jai tainomo ocuridicaï.

²⁰ Ero, tainomo ocuriñedicaï; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentiaï jiai jilloitimaci.

²¹ Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicaï; iadedi fiodaillamona Cristo jai jillua jira, fiodaillamona ico jiai jilloiticaï.

²² Adán micorimona cai comuilla jira, nana fiodaicana jaidicaï; iadedi Cristomo cai duilla jira, jilloiticaï, naimie diga jaca cai illena.

²³ Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticaï.

²⁴⁻²⁵ Ie mei naimie ñnena nana naimie ñibeimo ññedina anafefitaite. Nana naimie ñibeimo ññede joreñuaina jiai anafefitaite. Illaïmana Cristo illamona, nana naimie ñibeimo ññedina anafefitaite. “O uai cuemo o illamona, nana o jitailla rafuena jai fuidodicue” ie Moomo lloite.

²⁶ Nana naimie ñibeimo ññedino naimie anamo jai illa mei, Cristo muidona naimie comini jai jilluamona dane fiodaïññeitimaci.

²⁷ Jusiñamuidi nana comina Cristo anamo itataite. Ie muidona creyentiaïdicaï dane fiodaïññeiticaï; iadedi Cristo anamo Jusiñamui ññeite. Cristona oretaja jira, Cristo anamo Jusiñamui ññede.

²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocaimena jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fiodaillamona jilloñeitomoidena, ¿ñiese bautizagaomoi? Fiodaillamona omoï jilloñenia, ¿bue ññellena bautizagaomoi? Tainomo jai bautizagaomoi; iadedi ñese ññoñedomoi. Dajerie creyentiaï marena illamona, omoïmona dajerie creyentiaïna jaidomoi. Naimaci jai fiodaitimaci; iadedi fiodaillamona ico jilluana ñnotimaci. Iena omoï ñnuanona, bautizagaomoi.

³⁰ Cristo jilloñenia, cue jilloñedicedena, ¿bue ññellena nagarui Cristo rafuena cue llofuiamona, eo jacirede ramona niadedi fiodaicabiticue?

³¹ Cue amatiaï, cai Nama Jesucristomo omoï duilla jira, omoïri iobidicue; iadedi nagarui niadedi fiodaicabiticue. Cristo rafuena omoïmo cue llocabilla jira, jiaie comini iciritimaci. Icirillamona, cuena meineiacadimaci.

³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llamona jaca buena oññeiticue. Ie muidona fiodaillamona cai jaca jilloññeiticaïdena, Cristo rafuena faïnonocaida, ico raïre jamai cai fiodailla jira, jamai ua jai jaicaïllafuena cai jaiacaiticaï. Ie ia ñese ññede. Cristo jai jillode.

³³ Ie jira omoi abiaina jifueño. “Jilloñeiticai” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiño.

³⁴ Ie jira raise abina uiñuanona, mai jai. Jeacinona finocana jaiño. Omoimona dajerie Jusiñamuina raise uiñoña jira: “Jusiñamuidi cominina jillotañeite” raitimaci. Omoi meidallena, omoimo iese lloticue. Jusiñamui rafuedo raise mai omoi jai.

¿Niese creyentiai jilloitimaci?

³⁵ Omoimona damie nibai jicanoite: “¿Niese fiodaillamona creyentiaidicai jilloitica? Naimaci abiai nibai jai rifaidimaci. ¿Nie isoide abiai diga dane iitica?”

³⁶ Iese bu jicanoia, raise comequina facañede. O illimo buena o ria, janore sicua meinocni, o riga radi jai abidi rifaide.

³⁷ Nie isoide icoña o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruañede.

³⁸ Naga riarra daje isoi eruañede. Jusiñamui jitailla isoi, jiaiforie eruaide. Ie isoide. Naga fiodaitemie jillua mei, Jusiñamui jitailla isoi, ie abina jiaiforie itataite.

³⁹ Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede.

⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebirenitica. Bene cai ia, jiai ebire itica; iadedi daje isoi ebire iñedicai.

⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucua isoi lligaiñoñede. Naga ucua daje isoi lligaiñoñede. Monamo cai ico illena, naimie jitailla diese cai abiai caimo iite.

⁴² Ie isoide. Fiodaillamona cai jillua mei, cai abiai jiaifo eruaite. Cai fiodaillamona cai abiai rifaide; iadedi cai jilluamona, cai abiai dane jai rifañeite.

⁴³ Cai fiodaillamona cai abiai jai ebinide; iadedi cai jilluamona, cai abiai ebirenite. Fiodaicana cai jailla jira, cai abiai birui raise mairiñede; iadedi ico cai jilluamona, cai abiai mairite. Nana Jusiñamui jitailla rafuena finorenitica.

⁴⁴ Cai fiodaia, come abiai isoi caimo birui ite; iadedi cai jilluamona monamo ico caimo cai abiai jiai iite. Enirue iena cai abiai birui caimo ite. Ie jira monamo cai jiaifo eruaite abiai caimo iite.

⁴⁵ Adán micori comuilla rafuena Moisés micori jaie cuega: “Jusiñamuidi nano comuidimie dofomo jafaicina firaiñuamona, naimie micori comena jaide” cuega. Naimiemona cai comuilla jira, fiodaitica. Fiodaillamona Cristo jillua jira, ico cai jiai jilloille jira, caina jiaifo eruaite abiaina ico itataite.

⁴⁶ Eniruemo birui cai illa jira, caimo birui ite abiai diga itica. Fiodaillamona ico cai jillua mei, monamo cai ia, jiaifo eruaite abiai diga iitica.

⁴⁷ Adán micoridi enirue ie. Imuicimona Jusiñamuidi naimiena finode. Cristodi eniruemo billanona, iimana jaide; iadedi Jusiñamui dinena monamona naimie bite.

⁴⁸ Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiai imuicina jaitica; iadedi Cristomo jiai duidica. Cai jillua mei, naimie isoi ico iitica.

⁴⁹ Adán micorimona cai comuilla jira, naimiena eruaidica. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaifo eruaite abi naimiemo ite. Cai jillua mei, Cristona eruaitica.

⁵⁰ Cue amatiai, buena lloticue. Caimo jai ite abiai diga monamo Jusiñamui ie cominina sedajanomo iñeiticai. Cai abiai rifailla jira, cai fiodailla facaise naie isoide abiai diga nainomo jaca iñeiticai.

⁵¹ Ero, Jusiñamui cuena uiñotaga rafuena omoimo ja lloiticue. Iena navui jaca uiñoñedicai. Nana creyentiaidicai fiodaiñeiticai; iadedi Jusiñamui cai abiaina jiaifo meidotaite.

⁵² Omoi uisi jarire cuirorilla isoi, iena ua raire meidotaite. Ie trompeta fillanona, jai fodaite creyentiaina Jusiñamuidi jillotajanona, naimaci abiaina meidotaite. Nia fiodaiñedinodicai cai abiaina jiai meidotaite. Dane fiodaiñeiticai.

⁵³ Cai abiai birui rifaiacade. Ie jira birui fiodaicana jaidicai. Jusiñamuidi cai abiaina ico meidoite. Ico monamo jiaifo abiai caimo ia, cai abiai rifaiñeite. Fiodaiñeiticai.

⁵⁴ Iese caimo sua, Jusiñamui facaina lloraima micori jaie cuega uai jiai suite. Cuega: "Nairuimona creyentia jaca fiodaiñeitimaci".

⁵⁵ Cai jaca illa jira, fiodaicana jaiñeiticai. Fodaillana jaciruiñeiticai, dane cai fiodaiñeiticaina jira.

⁵⁶ Jeacino illa jira, birui fiodaicana jaidicai. Moisés micori jaie llogacino illa jira, iena cai raise finonina jira, jeacino caimo illana uiñotica;

⁵⁷ iadedi cai jeacino facaina cai Nama Jesucristo fiodailla jira, jeacino anamo jai iñedicai. Cai fiodailla mei, dane fiodaiñeiticai. Jusiñamui caina iemona jai jillotate. Ie muidona naimieri cai iobillasa.

⁵⁸ Cue amatiai, fodaillamona nana creyentia ico jillua jira, Cristo rafuena inocana jai. Naganomo iñeno; iadedi Cristo rafuena llocana omoi jai. Naimie jitailla rafuena finocana omoi jai. Naimie facaina omoi maijia, tainona maijiñedomoi. Naiemona diga mare rafue comuite. Iena jai uiñotomoi.

16

Jerusalémo itinomo ucubena oredimaci

¹ Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoimo lloiticue.

² Naga domingo omoi ucubemona daje diese eneno oni eeno. Omoi maijia bailla diese ucubemona cue bille dinori iena eeno. Iese naga domingo omoi eenoñenia, ico cue bia, ¿niese dacaiño ofrendamo ailluena ucubena joneitomoi?

³ Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiai oretaiticue, omoi fetocano mareuidinona Jerusalémo itino uiñollena.

⁴ Jerusalémo cue comeci jiai jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue.

⁶ Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue. Omoi dinomona cue jaia, cue jaillinona nia uiñoñedicue.

⁷ Omoi dine birui nia jaiñeiticue. Omoi dine birui cue jaia, dallu omoi diga iiticue; iadedi jiaruido omoi dine cue jaia, cai Nama jitaia, omoi diga are iiticue.

⁸ Beno Efesomo nia iiticue.

⁹ Beno diga comini Cristo rafuena cacaacadimaci. Naimacimo iena llofueiacadicue. Diga comini cue llua uaitatimaci. Cue llua jitañedimaci Ie jira bene nia lloiacadicue. Pentecostés railla rafue fülle mei, jaiticue.

¹⁰ Omoi dine Timoteo ria, naimiena raise marena nafue. Cue isoi cai Nama facaina naimie maijicabide.

¹¹ Ie muidona naimie llucanona jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduanu oreta. Jiaie creyentia diga naimie billemo ocuridicue.

¹² Apolona jicanotomoi. Jiaie creyentiaí diga omoi dine naimie jaillana naimiemo llotícue; iadedí naimie comeci nia jaiacaiñede. Jiairuido abi juarenia, omoi dine jaite.

Fuiduacino

¹³ Jeacinomona abina rairui. Cristo rafuena ñnocana omoi jai. Eimie isoi omoi comeciaina ocuiño.

¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amataí, Acaya railla eniruemo Estéfanadi, ie comini diga, nano creyentiaídímaci. Iena uñotomoi. Naimaci jitailla jira, jiaie creyentiaína canocabidímaci.

¹⁶ Naie isoidino lloga uaina cacarei. Naga Cristo díbeimo maijidino uaina cacarei. Iedo omoi jai.

¹⁷ Omoimona cue dine Estéfanas bite. Fortunato diga, Acaico diga naimie billa jira, iobidícue. Cue dine iñedomoi; iadedí naimaci billa jira, omoi isoi cuena canodímaci.

¹⁸ Naimaci billamona cue comeci caimataide. Omoi comeciái jiaí caimataide. Naie isoidinomo: “Marena maijidomoi” omoi railla.

¹⁹ Diga creyentiaí Asia railla eniruemo itímaci. Imaci uaina oredímaci. Aquila, ie ai Priscila diga, ie uaina jiaí orediaímaiaí. Iaimaiaí jofomo dajerie creyentiaí rocabítímaci. Cristomo naimaci duilla jira, omoína isiruillanona, nana naie creyentiaí imaci uaina jiaí oredímaci.

²⁰ Nana bene ite creyentiaí imaci uaina oredímaci. Nana creyentiaína eo caimare uaido.

²¹ Omoimo cue uaina jiaí oredícue. Cuena canollena, naimiemo cue llua isoi, jiaimie bie carta cuega; iadedí cue mamecí bene dama cuetícue. Nana iena ñno. Pablodícue.

²² Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoína duenaillasa.

²⁴ Jesucristomo cai duilla jira, omoína cue isiruillana omoi uñuana jitaídícue. Mai. Macaibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo Pablo cartana orede

¹ ¿Nigacino? ¿Nie isoidomo? Pablodícue. Corintomo ite creyentiaí, omoí díne bie carta oredícue. Nana Acaya railla eniruemo ite creyentiaimo bie carta jiaí oredícue. Jusiñamui jitailla jira, ie rafuena cue jino lollena, Jesucristo oretagamiedícue. Cue diga Timoteo illa jira, naimie ie uaina omoí díne jiaí orede.

² Cai Moo Jusiñamui, cai Nama Jesucristo diga, omoína duenaite. Iena uiñocana mai omoí jai. Iaímaiaí omoína uri jai itatate. Iena omoí uiñocana mai omoí jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade.

⁴ Nie isoide rafuemona cue duere sefuia, nie isoide ramo cue jiria, naimie cue comeciaina jaca ocuiñotade. Ie jira jiaínona canoredícue. Nie isoide rafuemona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredícue.

⁵ Cristomo jai cue duilla jira, naimie isoi cue duere sefuia, naimie cue comeciaina ocuiñotade. Iemona jiaíno comeciaina ocuiñotajana raise uiñoticue.

⁶ Duere cue sefuillamona, omoína canoredícue. Jusiñamui jitaillacino omoí finocana jaillana jitaídícue. Cuená naimie ocuiñotajamona, Cristona omoí faínonocaiñellena, cue isoi omoí duere sefuia, omoína ocuiñotaredícue.

⁷ Cue isoi omoí duere sefuia, cue isoi Cristo omoí comeciaina ocuiñotaite. Iena raise uiñoticue.

⁸ Cristomo cai duillamona, cue amatiaí isoi itomoi. Asia railla eniruemo jaie eo duere sefuidícue. Iena omoí raise uiñollena, ie rafuena dane omoímo lloiacadícue. Eo duere cue sefuilla jira, cue comeci niadedi ocuiñoñedícue. Niadedi fiodaitícue.

⁹ “Naie facaise fiodaitícue” raillanomo cue comeciaina facadícue. Cue finoca rafuemona dama jillonidícue; ia Jusiñamui uai siñona jira, naimie cuena jillotate. Fiodaitinona naimie jillotarede. Niadedi fiodaitinona jiaí jillotarede. Naimiedi naimie cuena jillotajana cue inuana jitaide.

¹⁰ Naie facaise eo duere sefuillamona cuena jillotate. Ico cue duere sefuia, iemona dane cue jilloillena inoticue.

¹¹ Iena cue facaina omoí jicabi. Jusiñamui fairiua meinomo, ailluena comini cue facaina Jusiñamuimo iobillacinona fecaitimaci. Cuená Jusiñamui canua jira, iobillacinona fecaitimaci.

Pablo Corintomo navui jaiñede

¹² Cuená gaiñedino cuena nibai jeare ñaitimaci; ia daje rafueri abina íedotícue. Cue comeci mona iena uiñoticue. Cristona inoñedinona marena finodícue. Omoína marena finodícue. Jusiñamui jitaillacino finocana jaidícue. Jusiñamuimona jeacinona finoñecana jaidícue. Cue comeciaina facajacinomona íese jaiñedícue; ia Jusiñamui cuena canuamona, íese jaidícue.

¹³ “Íese cuetío; íadedi o comecimo jiaíe rafue ite diga caímo cuetío” raitomoi. Omoína jífueiacaiñedícue. Cue cueda cartaiaina jai facadomoi. Cue cueda rafue omoí raise cacajana jitaídícue.

¹⁴ Cuená nia eo raise uifioñedomoi; ía cuena uifiocana omoi jaillanona, cueri omoi iobillana jitaídícue. Cai Nama Jesús abído bia, omoiíri cue iobilla isoi, cueri omoi iobillana jitaídícue.

¹⁵ Omoímo íese cue comecina facajamona, omoi díne navuí jaiacadícue. Macedoniamo cue jaiacadícuemo, raise omoína cue iobitallena, omoi díne nano navuí jaiacadícue.

¹⁶ Macedoniamona cue abído bia, omoi díne navuí dane jaiacadícue. Judeamo cue díga jaillena, omoímona damieriena omoi oretajana jitaídícue. Íese cue jaillemo navuí comecina facadícue.

¹⁷ Omoi díne cue jaiñena jira, cue comeci naganomo illa isoi, comeciaina facadomoí. Damierie íe lloga uaina jaca finoñedímací. Dani naimací rafuemo comeciaina facadímací. “J#” raitímací; ía: “Dama íte” comeciaina facadímací.

¹⁸ Íese íñedícue. Jusiñamuí uanaicínona jaca llua isoi, cue comeci naganomo íñede. Omoímo cue lloga uai finodícue.

¹⁹ Jusiñamuí Jito Jesucristo rafuena omoímo navuí llotícue. Cristo íe llogacínona jaca meidoñede. Silvano íena jiaí llofúete. Timoteo íena jiaí llofúete. Nagaruí daje isoide rafuena llofuetícaí. Jiaíruido jiaíe Cristo rafuena llofueñedícaí.

²⁰ Nana Jusiñamuí jai lloga uai Cristo finoca rafuemoná suícabide. Jusiñamuína caí sedaía: “Cristo íe rafuena raise finode” caí lloía, Jusiñamuína iobitadícaí.

²¹ Jusiñamuí Cristo díbeímo caína jai ítatate. Íe rafuena caí llollena, caína jai fetode.

²² Íe comínina caína ítatate. Íena caí uifíollena, íe Joreño caímo jai ítatate.

²³ Jusiñamuídí cue uanaicínona llua uifíote. Uanaicínona cue lloñenia, Jusiñamuí cuena duere finuana jitaídícue. Omoi finoca rafue jai cue uifíuamona, omoímo cue ríire lloí raillano, omoi díne navuí dane jaiñedícue.

²⁴ Cristóna jai omoi #nuana uifíotícue. Cristóna #nocana omoi jailla jira, omoi finolle rafuena lloñedícue; ía omoi íocíre íllana jitaídícue.

2

¹ Omoi díne nia cue jaiñellemo comecina facadícue. Omoi díne navuí cue ía, íocíre coníníri íñedícaí.

² Omoína jai ícídícue. Cueri omoi iobillana jitaídícue; ía omoína cue dane ícía, coníníri íocíre íñeítícaí.

³ Omoímo cartana navuí oredícue. Omoi díne íte rafuena raise finollena, íena oredícue. Cuená íobítajana uifíotomoí. Omoi díne íte rafuena omoi raise finoía, coníníri íocíre íítícaí. “Cuená íobítaitomoí” raillanomo cue comecina facadícue.

⁴ Cue comeci eo sunaillamona, cue comeci eo eíamona, carta navuí oredícue. Omoína ícíaíñedícue; ía omoína cue eo ísírúíllana omoi uifíuana jitaídícue. Íe jira omoi díne íte rafuena raise fino.

Maraiñede rafuena finodímíe rafuena feita

⁵ Maraiñede rafue navuí damíe finua jira, sunaitícaí. Naimíe muidóna cue comecído duere jaide; ía daje isoi omoi comeciái jiaí duere jaide.

⁶ Omoi nabei díne íte comínímona naimíe jai duere sefuílla jira, dama íesede. Naimíena dane duere finoñeno;

⁷ ía naimíe finoca rafuena maí feita. Íena dane llínoñeno. Naimíe comecina ocuíñota. Naimíena íese omoi canoñenia, omoímona duere sefuíllamona, abído danomo jaíte.

⁸ Íe jira: “Oná nia ísírúítícaí” naimíemo llono. Íena eo jitaídícue.

⁹ Nana cue llua omoi #nuana cue facacíllena, carta omoi díne navuí cuetícue.

¹⁰ Naimíe finoca rafuena omoi feitaía, íena cue jiaí feítaitícue. Cristo rafuena omoi #nocana jaillana cue jitaílla jira, naimíe rafuena feítaitícue. Cristo cuena uifíuamona, íena feítaitícue.

11 Tai fe ramo cai faiana uiñoticaí. Cristo rafuedo cai raise jaiñellena, naimie jitaillana uiñoticaí. Cristo dibeimona caina Tai fe itatañenia, omoi motomo itimie finoca rafuena feitaicaí.

Troamo navui Pablo ia, uri iñede

12 Troamo navui jaidicue. Cristo rafuena cue lollena jaidicue. Cai Nama comini comeciaina jetajamona, naimie dibeimo cue maijiamona, ie rafuena lloticue.

13 Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaína facaduanona, Macedoniamo jaidicue.

Jusiñamuidi Cristo dibeimo iñedinona anafefitaite

14 Jusiñamui fue eo mare. Cristo dibeimo iñedinona naimie anafefitajanona, Cristo comina cai illamona, naimie rafuena uicana jaidicaí. Ie rafuena cai lloia, iena comini ñinoia, Jusiñamui naimacina jai caimare itatate.

15 Cristomo cai duillamona, ie rafuena cai lloia, Jusiñamuina iobitadicaí. Cai llumona, damierie jillodimaci. Iena jitañenamona, damierie faifidimaci.

16 Iena cacajamona, damierie faificana jaidimaci. Jusiñamui illanomo jaca iñeitimaci. Iena cacajamona, jiaño Jusiñamui illanomo jaca iitimaci. Jamaí bue isoidicue; ia bie rafue llocana jaidicue.

17 Damierie Jusiñamui rafuena llumona, ucubena oiacadimaci. Omoimo comeciina facañedimaci; ia iese llofueñedicue. Omoimo cue comeciina facajanona, bie rafue cue llumona, buena oñedicue. Jusiñamui mona cue llogacinona oticue. Jusiñamui cuena cúa jira, Cristomo cue duilla jira, uanaicinona jaca lloticue.

3

Cristo caimo lloga rafuedo birui jaidicaí

1 Omoi dine damierie llofueraini jaia, cartaiaina uicabitimaci. Naimaci cartaiaimo jiaínodi: “Bie llofueraini mare” raillanona cuetimaci. Omoimona jiaño cueba cartaiaina: “Bie comini mare” raillana jitañedicue. Cuemona jiaño cueba cartaiaina: “Pablo mare” raillana jai jitañedomoi.

2 Omoi marenana jai uiñotocue. Cue marenianana jai uiñotomoi. Carta isoidomoi. Jusiñamui dibeimo omoi comeciái meiduamona, cue comeci mona omoína raise uiñotocue. Omoi birui illamona, omoína fidiamona, nana comini omoína raise uiñotimaci. Ie jira jiaínodi: “Bie comini mare” raillana omoimona jitañedicue.

3 Cristo rafuena omoimo lloticue; ia Cristo omoi comeciaina jai meidotaja jira: “Omoi mare” raillanona naimie jai cuedadena, nana comini uiñotimaci. Tinta diga naimie cueñede. Jusiñamui Moisés micorimo jaie lloga rafue jamaí noficimo cueba. Cai cajede Jusiñamui birui iese cueñede; ia naimie Joreño uaido omoi comeciaina birui meidote.

4 Cristomo cue jai duilla jira, Jusiñamuina cue ñnuamona, omoína iese lloticue.

5 Cue finoca rafuemona iese lloñedicue; ia Jusiñamui uai cuemo illamona, iese omoimo lloticue.

6 Jiaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

7 Moisés micorimo lloga rafuedo jaillamona, Jusiñamui dine buna jaca iñena. Noficimo Jusiñamui cueba. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamui mona naimie abido bia, Israel comini Moisés micori uiecomo eruainidimaci. Nagarui Jusiñamui diga naimie ñañenia, naimie micori uieco ja muidomo queninide.

⁸ Jusiñamui Moisés micorimo jaie lloga uai ebirede; ia Jusiñamui Joreño birui caimo lloga uai baifemo ebirede.

⁹ Moisés micori rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite.

¹⁰ Moisés micori rafue jaie ebirede; ia jaie rafue birui illa jira, Moisés micori rafue jai birui ebinide.

¹¹ Birui ite rafue jaca saiñena jira, ua eo ebirede.

¹² Iena cai uiñuamona, bie rafuena marefodo jaciruiñeno lloticue.

¹³ Iniroi diga, Moisés micori isoi cue uiecona ibaiñedicue. Naimie micori ie uieco ibaide, ja muidomo ie uieco quenirena feioicaillana comini cioñellena; ia cue lloga rafuena marefodo llocabiticue.

¹⁴ Moisés micori comini Jusiñamui rafuena jaca ñnoñedimaci. Naimaci comeciai jitaiñena jira, ñnoñedimaci. Moisés micori rafuena birui judíuai comini facaia, iena nia raise cacaiñedimaci. Dani Cristona ñnuamona, naimaci comeciai raise cacareitimaci.

¹⁵ Cristo rafuena birui naimaci ñnoñena muidona, Moisés micori rafuedo nia jaidimaci.

¹⁶ Cai Nama dibeimo bu jaia, naimie comeci raise cacade. Moisés micori rafuedo naimiedi cai jaiñenana raise uiñote.

¹⁷ Cai Nama Joreña lloticue. Cristo dibeimo cai jaia, naimie Joreño caimo jiai ite. Cristona cai nabaillamona, jeacino anamo jai iñedicaí. Moisés micori rafue anamo jai iñedicaí.

¹⁸ Cristomo jai cai duilla jira, naimiena cai comeciamona raise uiñua jira, ie ebirede uaina uiñoticaí. Acaranimo cai eruaillamona, cai abina ciodicaí. Ie isoide. Cai illamona jaie comini Cristona uiñotimaci. Cai Nama Joreño caina canuamona, naimie ebirena isoi cai illena, icana jaidicaí.

4

¹ Jusiñamui cuena duenaillamona, cue comecina ocuiñocaida, Cristo rafuena llocana jaidicue.

² Meirede rafuena llofueñedicue. Iena bainino llofueñedicue. Jifuianona omoína llofueñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uiñuamona, naimie rafuena uanaicinona llofuecabiticue. Cue llofuiana bu raise cacaia, uanaicino cue llofuecabillana uiñoite.

³ Faificana jaidinodi cue mare lloga rafuena raise cacaiñedimaci.

⁴ Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uiñuana jitaiñede.

⁵ Cue finoca rafuena llofueñedicue; ia Jesucristodi cai Namanana llofuecabiticue. Naimie dibeimo cue maijiamona, omoína canollena, naimie rafuena llofuecabiticue.

⁶ Enirue finua facaise Jusiñamui llote: “Jitiredino nana eniruemo iñellena, useredino mai iite”. Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

Cai comeciai ocuiñocaida ñnocana jaidicaí

⁷ Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uiñotomoi; ia ie uai siñonana illamona, Jusiñamui illana uiñotomoi.

⁸ Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefiñeno comecina ocuiñocana jaidicue.

⁹ Damierie cuena duere finodimaci; ia Jusiñamui cuena fainonocaiñeno cuena canode.

¹⁰ Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue.

¹¹ Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uiñotomoi.

¹² Naimie rafue cue llua muidona, cuena meineiacadimaci; ia bie rafuena omoi ñnuamona, Jusiñamui illanomo jaca iitomoi.

¹³ Jusiñamui facaina lloraima jaie cuega: “Cue ñnua jira, iena llofueticue”. Naimie isoi cue ñnua jira, bie rafuena jiai llofuecabiticue.

¹⁴ Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiai jillotaite. Jesúmo cai duilla jira, naimie illanomo danomo caina ico itataite.

¹⁵ Omoi facaina nana cue rafue finodicue. Cristo rafuena comini uiñollena, duere sefuidicue. Iemona Jusiñamui naimacina duenaillana uiñoitimaci. Jusiñamui ñibeimo naimaci illamona, naimiemo iobillacinona fecacabitimaci. Ieri naimiena iobitaitimaci.

¹⁶ Ie jira iena sefuiruiñedicue. Cue mairici fuicana nagarui jaide; ia cue comeci nagarui ñnocana ocuiricana jaidicue.

¹⁷ Birui duere sefuidicue; ia iemo cue comecina eo facañedicue. Cristo rafue muidona birui duere cue sefuia, Jusiñamui illanomo ico cue ia, nainomo ebire marena iiticue. Iemo cue comecina eo facadice.

¹⁸ Cuemo birui suide rafuemo comecina eo facañedicue. Jusiñamui illanomo cue nia cioiñena rafuemo comecina eo facadice. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5

¹ Caïmo ite abi rifaillemona, Jusiñamui illanomo cai illemona, Jusiñamui jiaie isoide abi caïmo itataite. Nainomo cai abi jaca rifaiñeite.

² Birui cue duere sefuillamona, Jusiñamui cuemo ico itatalle abina eo oiacadice.

³ Cue fiodailla mei, Jusiñamui cue joreñomo jiaie isoide abina itataite.

⁴ Cue jiaie isoide abi cuemo illena, cue jamai fiodaiacaiñedicue; ia iena eo oiacadice. Jusiñamui cuemo jiaie isoide itataiacade abina eo oiacadice. Cue fiodaille abi ifomo jaca ille abina cuemo iite.

⁵ Jusiñamuidi ie Joreño caïmo itatajamona, cai abiaina iese jiai itatajana uiñoticaï.

⁶ Iena cue uiñuamona, ñie isoide rafue ia, ñnocana jaca jaidicue. Nia cue fiodaiñenia, cai Nama illa ecimo nia iñedicue.

⁷ Naimiena birui cioiñedicue; ia naimiena ñnocana jaidicue.

⁸ Iese jaidicue. Cue Nama diga cue illena, fiodaiacadice;

⁹ iadedi nia cue fiodaiñenia, naimiena jaca iobitaiacadice. Cue fiodaia, naimiena jiai jaca iobitaiacadice.

¹⁰ Naimie llua jira, Cristo uicomo ico nana iiticaï. Cai bene finoca rafuena uiñotaite. Maraiñede rafuena cai bene finua ñiese, naimiemona ibana feiñoñeiticai. Mare rafuena cai bene finua ñiese, naimiemona ibana feiñoiticaï. Ie muidona naimie jitaillacinona jaca finoacadice.

Jusiñamui diga cai uri illafue

¹¹ Cue Nama uicomo ico cue illemona, iena cue jaciruillamona, naimie ñibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaïdicue.

¹² “Cuedi maremedicue” lloñedicue; ia cue abi facaina omoi riidollena, bie rafuena lloticue. Omoi motomo damierie llofueraini naimaci llofuiacino diga abina iedotimaci; ia naimaci comeciaino iticino diga abina iedoñedimaci.

¹³ “Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoína llofuellena, omoí facaina maijidicue.

¹⁴ Nie isoidicuenta, Cristo cuena isiruillana cue uiñuamona, jaca llofueiacadicue. Nana comini facaina damie fiodaillana jai ñnoticue. Naimaci jeacino ifomo naimie jai fiodaite.

¹⁵ Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai ñnoñenia, dani cai comeciaino ite rafue diga iobidicai; ia naimiena jai cai ñnua mei, dani cai comeciainona naimiena cai iobitajana naimie jitaide. Ie jira cue illana jai uiñotomoi.

¹⁶ Damierie llofuerañidi jiaínomo eruailamona, naimaci comeciaina facajamona: “Naimaci mare” raitimaci. Jiaicaiño: “Naimaci marañede” raitimaci; iadedi Cristona cue ñnua facaisemona iese cominimo eruañedicue. Naimiena nia cue ñnoñenia, Cristona jaiie raise uiñoñedicue. “Naimiedi jamai ñima” raillamo comecina facadicue; ia iese naimiemo birui comecina facañedicue.

¹⁷ Cristona cai ñnua mei, naimiemo jai cai duillamona, cai comeciainuaina meidoticaí. Jai jiaie isoidicai. Jiaie rafuedo jai jaidicai. Jaiie caino ite rafuedo jai jañedicai.

¹⁸ Jusiñamui cai comeciainuaina meidotade. Cristo fiodaillamona, Jusiñamui ñibeimo caina itatate. Iemona naimiena jai nabairedicai. Naimacimo ie rafuena lollena, cuena fetode, jiaie cominina ie ñibeimo itatallena.

¹⁹ Cristo finoca rafue muidona, Jusiñamui ñinena cominina nabaiacade. Naimaci jeacino facaina ñbana jai oiacañede. Bie rafuena lollena, cuena jai fetode.

²⁰ Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoí nabaillanona, naimie diga uri i.

²¹ Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicai.

6

¹ Bie rafuena nia lliacadicue. Jusiñamui facaina cai maijiamona, naimie ñibeimo cominina itataticai. Naimie caina duenaillana uiñoticue. Iena omoí ñnocana jaillana jitaídicue.

² Jaiie Jusiñamui cuetatate:

Cue jitailla facaise omoí jitaillacinona jai cacadicue.

Omoí jilloillena, omoína jai canodicue.

Ero, Jusiñamui birui omoína cacaacade. Birui omoína canuanona, omoína jillotaiaacade. Ie muidona naimiena ñnocana jai.

³ Bie rafuena omoí ñnoñellena, cue llofuiacinona omoí jamañellena, bu diga rafuena comuitaicañedicue.

⁴ Jusiñamui ñibeimo cue maijiamona, nie isoide rafuemona ramo cue jiria, cue illamona naimiedi: “Mare” cuena raillana jitaídicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue.

⁵ Damierie cuena fatimaci. Cárcelmo cuena jonetimaci. Naimaci illanuaímona cuena riire dotadimaci. Eo cue maijia jira, diga icaiño eo raise ññedicue. Aime guisoidicue.

⁶ Jearede rafuena ebiruñedicue. Cristo rafuena uiñocana jaidicue. Icirñedicue. Jiaínona canocabidicue. Jusiñamui Joreño anamo iticue. Cominina raise isiruiticue.

⁷ Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taifena emodofillena, Jusiñamui jitailla isoi, marecinona finocana jaidicue.

⁸ Damierie cuena marena jai ñaitimaci. Jiaíno cuena jeare nia ñaitimaci. Damierie cueri jai iobidimaci. Jiaíno cue joreño jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue.

⁹ Damierie: “Jamai bue isoidio” cuena raitimaci; ia jiaino cuena raise uñuamona, naimaci dinena jamai bue isoñedicue. Nagarui niadedi fiodaicabiticue; ia nia iticue. Duere sefuicana jaidicue; ia Jusiñamui cue comecina ocuiñotacana nia jaidicue.

¹⁰ Sunaiticue; ia iocire jaca iticue. Dueredicue; ia ailluena comini comeciaina eo camaretadicue. Buenidicue; ia Jusiñamuimona ailluena marecinona feiñotitcue. Iese jaca jaidicue. Cue illamona: “Naimiedi mare” cuena omoi raillana jitaidicue.

¹¹ Corintomo itino, cue nabaiñiai, cue comecimo ite rafuena marefodo jai lloticue. Cue comecimona omoi diga marena iacadicue.

¹² Cuemona omoina raise isiruiticue; ia omoi dinena nia cuena eo isiruiñedomoi.

¹³ Cue uruiiai omoi isoilla jira, omoi diga ñaiticue. Omoina cue isiruilla isoi, cuena omoi isirui.

Jusiñamui cai comeciaino illanodica

¹⁴ Creyentedimie mo jearede ramo faitatai raillano, daje isoide rafuedo iaiaiaia jaiñena jira, daje isoi rafuena iaiaiaia comeci lloñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimiena creyentediñaiño oñena. Marecinodo jaiacadimiedi maraiñedicinodo jaiacadimie daje isoi diga nabairinide. Jusiñamuina uanaicinona uñotimiedi useredinomo jai ite isoide. Jeacino anamo nia itimie jitedinomo nia ite isoide. Cristo rafuena naimie uñoñede; ia Cristo rafuena omoi uñuamona, useredinomo jai itomoi isoidomoi.

¹⁵ Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comecina facañede.

¹⁶ Creyenteñedimiedi Jusiñamuina sedañede; ia jiraraina sedade. Creyente comecimo Jusiñamui illamona, Jusiñamuina sedade. Nana creyentiaia comeciaino Jusiñamui ite. Iena jaie Jusiñamui llote:

Comini motomo iiticue.

Naimacina nabaiticue.

Naimaci Jusiñamuiniticue. Cue comininitimaci.

¹⁷ Ie muidona cuena ñnoñedino diga daje rana namatañeno.

Naimaci jearede jetaca rafuena abimo oñeno.

Iemona omoina raise feiñoitcue.

¹⁸ Omoi Moona iiticue. Cue uruiaina jaitomoi.

Siño jitodicue.

7

¹ Cue isiruiganodomoi. Bie llogacino Jusiñamui caino jai llua jira, naga maraiñede rafuena fañonocaida, cai jailla. Naga cai comeciaina jearetade rafuena fañonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo ciegacino diese finodimaci

² Omoi comeciainona cuena raise feiño. Buna jeare finoñedicue. Buna jifueñedicue.

³ Maraiñede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoina jaca uibiñocabiticue.

⁴ Cue llucanona omoi ñnuana raise uñotitcue. Omoiri iobidicue. Omoi diga jai uri iticue. Duere sefuidicue; ia iocire iticue.

⁵ Macedoniamoi navui cue jaidicuemo, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentiaina naimaci itatallemo cue comeci jarire ite.

⁶ Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade.

⁷ Cue dine naimie ria, iocire iticue. Omoimo ite rafue cue cacajamona, jiai iocire iticue. Cuen a omoi cioacanana llote. Cue comeci jarire illari sunaitomoi. Cuen a riidoiacadomoi. Iena cue cacajanona, iocire iticue.

⁸ Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue.

⁹ Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cueda carta muidona iciriñedomoi; ia Jusiñamui jitailla isoi sunaitomoi.

¹⁰ Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoia, sunaiñede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite.

¹¹ Jusiñamui jitailla isoi omoi sunaillamona, omoi comeciaina raise finodomoi. Maraiñede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuen a dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, maraiñede rafuena finodimiena duere finodomoi. Nana bie rafuena raise fuidodomoi.

¹² Carta navui omoi dine cue oretaia, maraiñede rafuena finodimie mo cue comeci na eo facañedicue. Naimiemona duere sefuidimie mo cue comeci na eo facañedicue. Cuemo omoi comeciaina facajana omoi uiñollena, navui cueticue. Jusiñamui iena uiñote.

¹³ Ie jira cue comeci na ocuiñoticue. Tito jiai iocire illa jira, dane iobidicue. Naimie comeci na camare omoi itataja jira, iobidicue.

¹⁴ Omoi dine Tito nia jaiñenia, naimie mo omoina lloticue. “Naimaci ona feiñoitimaci. Naimaciri iobidicue” naimie mo navui lloticue. Iese naimiena omoi feiñua jira, ieri meidaiñedicue. Omoimo uanaicinona jaca lloticue. Naimie mo cue llua isoi jiai suide.

¹⁵ Naimie llofuiacino omoi ñnoiacana jira, naimie omoina birui raise isiruite. Meiruioicaida, comeci ai jarire illamona, naimiena feiñotomoi.

¹⁶ Omoina raise uiñoticue. Cristo ñnocana omoi jaillana raise ñnoticue. Omoiri iocire iticue.

8

Creyentia Jusiñamuimo ucubena fecaja rafue

¹ Cue amatiai, omoimo jiaie rafuena lloiacadicue. Jusiñamui naimacina canuamona Macedoniamoi ite creyentiaina omoi uiñuana jitaidicue.

² Eo duere sefuidimaci. Jiai eo dueredimaci; ia iocire illamona, jiaie creyentiamoi ucubena caidiñeno fecacabidimaci.

³ Naimacimo ite ucube diese fecadimaci. Iena uiñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue.

⁴ Naimacimo iese lloñedicue; ia iena naimaci eo fecaacana jira, jiaie creyentiaina canollena, cuemo iena eo jicanotimaci. Ucube diga jiaino creyentiaina naimaci canuana cue llua na eo jitaidimaci.

⁵ Cue comeci na facaja isoi, fecañedicue. Ucubena fecadimaci; ia: “Cai Nama dibeimo maiñiacadica” jiai llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci.

⁶ Omoi dine Tito dane jaillena jitaidicue. Omoi dine naimie navui ia, ucube omoi uana naimie canode. Iemona janore tainedomoi. Jiaie creyentiaina omoi canuana raise fuiduana jitaidicue.

⁷ Cristona ñnocana jaidomoi. Iena jiañonomoi llocabitomoi. Cristo rafuena raise uiñotomoi. Cristo jitaillacinona eo finocana jaidomoi. Cuen a jiai isiruitomoi. Ie muidona omoi ucube diga, jiaie creyentiaina omoi raise canuana jiai jitaidicue.

8 Omoïna iese riire lloñedicue. Macedoniamō ite creyentiaïna eo canuana omoï uiñuamona, jiaï creyentiaïna omoï canoia, Cristona omoï isiruillana uiñoiticaï.

9 Cai Nama Jesucristomona cai fueua. Naimie caina duenailana uiñotomoi. Ie Moo ecimo naimie nano illamona, naga ra naimiemo ite; ia eniruemo ie billamona, caina canollena, imana jaillanona, duere ite. Iemona Jusiñamui rafuena cai cacaja jira, duere iñedicai.

10 Ie jira omoïmo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaïdicue.

11 Omoï jitaïllamona bie rafuena fuido. Omoïmo ite ucube diese feca.

12 Ailluena ucubena omoïmo iñenia, dama iesede. Omoï jitaïlla jira, omoïmo ite ucube diese omoï fecaïa, Jusiñamuimona mare;

13 ia omoï jitaïlla rana omoï ollena, omoï ucube iñeni raillano, omoï jitaïlla baifemo omoï fecajana lloñedicue.

14 Jiaïe creyentiaïmo ra birui raise iñena jira, naimacina omoï canuana jitaïdicue. Omoï ra ico iñenia, naimaci dinena omoïna canuana jitaïdicue, nana omoïmo daje isoi omoï ra illena.

15 Moisés micori illa facaise ite cominimona cai fueua. Naimacina jaie iese cueda: “Jusiñamui oretaga guiga ramona ailluena guillena, nagarui damierie iraiuidimaci. Jiaïno janore guillena, iraiuidimaci; ia coniniri fecajamona, imaci jitaïlla diese nagarui nana gutimaci”. Ie muidona omoïmo ite ucubemona naimaci jitaïlla ra illena, jiaïe creyentiaïmo omoï fecajana jitaïdicue.

Pablo Titona ñaite

16 Omoï dine Tito dane oretaiacadie. Cue isoi naimie omoïmo comecina facade. Omoïna canoacade. Naimie comecina Jusiñamui iese itataja jira, Jusiñamui iobidie.

17 Omoï dine jaillena naimiemo lloticuemo, naimie dinena: “Jee” raite. Naimiemo nia iese cue lloñenia, omoïna naimie eo canoïacana jira, naimie omoï dine jaillemo ie comecina facade. Omoï dine raire jaite.

18 Naimie diga jiaïmie oretaitie. Naga nairaïmo ite creyentiaïdi: “Cristo rafuena eo raise llofuecabite” naimiena raitimaci.

19 Cue diga jaillena, naimiena fetodimaci. Dueredonomo omoï ucubena cue uillena, cue diga naimie jaite. Iemona cai Namana iobitaiticaï. Iemona nana creyentiaïdi naimacina cue canuana uiñoitimaci.

20 Omoï ucubena raise cue sedajana jitaïdicue. Iemona: “Pablo cai ucube fiide” omoï lluaana jitaïñedicue. “Iena Pablo raise fecañede” omoï lluaana jitaïñedicue.

21 Iena raise marena sedaacadie. Jusiñamui iena uiñote. Nana creyentiaï iena uiñuana jiaï jitaïdicue.

22 Iaïmaïaï diga jiaïmiena jiaï oretaitie. Naimie Cristona eo inocana jaillana raise uiñotie. Omoï rafuena naimie fidiano, jiaïe creyentiaïna omoï canuana naimie inuanona, omoï dine naimie eo jiaïacade.

23 Omoïmo Titona bu jicanoïa, naimacimo naimiena raise llono. Danomo Cristo dibeïmo maïjdicoco. Cue diga omoïna canode. Jiaïe iaïmaïaïna bu jicanoïa: “Jiaïe creyentiaï iaïmaïaïna fetuamona bitiaïmaïaï” llono. Cristona iobitaiacadiaïmaïaï.

24 Cuenamō omoï isiruillamona: “Omoï mare” omoïna cue lluaamona, naimacina raise nafue. Nana cue jitaïlla rafuena omoï finuana naimaci uiñuana jitaïdicue. Omoï ucubena eenuana raise fuiduana jitaïdicue. Iena omoï finuamona, abido naimaci bia, naimacina oretaga creyentiaïmo iena lloïtimaci.

9

Jiaïe creyentiaïna canollena, omoï ucube olle rafue

1 Bie rafuena omoï jai uiñua jira, iena dane lloñeitie.

² Ucubena omoï jai fecaacana uifnoticue. “Benomo Macedoniammo ite creyentiammo omoïri iobidicue” llocabiticue. “Navuidi añomona fecaacadomoi” llocabiticue. “Acaya raila provinciammo ite creyentiaï fecaacadimaci” llocabiticue. Iese omoï illamona, bene ite creyentiaï jiaïno creyentiaïna jiaï canoacadimaci.

³ Iese uifnoticue; ia omoïna cue canollena Titona oretaiticue, cue jitaillacino omoï raise fuidollena. Ucubena dajena uana raire jitaïdicue.

⁴ Omoï dine Macedoniammo ite creyentiaï diga cue rillanona, omoï ucube dajena nia iñenia, iese omoïna cue lluaconi meidaiticue. Omoïdi jiaï meidaitomoi.

⁵ Ie muidona Tito idai jaillana jitaïdicue. Ucube dajena uana omoï llua isoi, omoïna canoite. Omoï ucube dajena uana lloiacaiñedicue; ia omoï comeciamona jiaïno creyentiaïna canuana omoï jitailla jira, iena jitaïdicue.

⁶ Jiaïe rafuedo iena lloiticue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua jira, omoï ucube dajena oia, eo caïmare iñeitomoi; ia omoï comeciaï jitaillamona omoï ucubena dajena oia, eo caïmataïtomoi.

⁷ Ucube dajena omoï oia, nagamie ie comecina facajamona fecaja. Naimie jitaïñenia fecañena. Naimie jitailla jira, naimie fecaja. Jiaïmie omoïna ñai raillano, “Caï ucubena fecaiticaï” raiñeno; ia o jitaillamona iena feca. Comeciaï iocire illamona omoï fecaia, Jusiñamuina iobitadomoi. Iena Jusiñamui jitaïde.

⁸ Jusiñamui omoï jitailla baïfemo omoïmo fecarede. Nana omoï jitailla ra omoïmo naimie illamona, jiaïnommo omoï fecaia, naimacina canorenitomoi.

⁹ Jusiñamui facaina lloraima micori iena jaie cueda: “Jusiñamuina ñnotimie dueredinona canocabide. Mare rafuena finocana jaïde”. Ie omoï finollemmo, Jusiñamui omoïna canoite.

¹⁰⁻¹¹ Ero, illimo maïjiraïnimmo Jusiñamui iduaina itatate. Iena sicuamona, monaïllamona, nainommo maïjiraïnidï naiemona guicabite. Ie isoïde. Omoïmo Jusiñamui nana omoï jitailla rana jaca itataite. Iemona jiaïe creyentiaïna raise canorenitomoi. Omoï ucubena caï uia, iena jiaï creyentiaï feiñoia, Jusiñamuïmo iobillacinona eo fecaitimaci.

¹² Ucubena omoï oretaiïa, duerede creyentiaïna canodomoi. Omoï muidona naimaci Jusiñamuïmo iobillacinona jiaï fecadimaci.

¹³ Iemona Cristona omoï raise ñnuana uifnotimaci. Ieri Jusiñamuïmo iobillacinona fecaitimaci. Omoï iga ucube facaina iobillacinona Jusiñamuïmo fecaitimaci. Naimacina canoitomoi. Iemona nana jiaïe creyentiaïna canoitomoi.

¹⁴ Omoï facaina Jusiñamuïmo jiaïtimaci. Omoïna naimaci isiruïllamona, Jusiñamui omoïna eo canuana naimaci uifnuamona, omoï facaina jiaïtimaci.

¹⁵ Jusiñamui caina eo canua jira, iobillacinona naimiemmo caï fecallena, caï uai raise iñede. Uainicaïdicaï. Naimie eo mare. Naimiena caï iobillasa.

10

Caï Nama Pablona fetua jira, ie uai Pablommo ite

¹ Jiaïe rafuena lloiacadicue. Omoïmona damierie llotimaci: “Caï dine Pablo ia, naimiedi caina jaciruite. Riire caïmo naimie rafuena lloñede; ia caï dine naimie iñenia, riire caïmo naimie rafuena llote” llotimaci. Ero, Cristo iciricabiñena isoi iacadicue. Naimie isoi omoïmo lloiacadicue.

² Riire omoïmo lloiacaiñedicue. Omoïmona damierie cuena raitimaci: “Pablodi Cristona ñnoñedimie isoi icabite”. Naimaci iese nia lloia, omoï dine cue ria, naimacimmo jaciruiñeno riire lloiticue.

³ Comena iticue; ia comini diga cue rafue iñede.

⁴ Taife dibeïmo itino diga cue rafue illa jira, jamai cue uai diga naimacina llïcaitaïñeiticue; ia Jusiñamui uai diga naimacina llïcaitaiticue.

⁵ Cristo uai diga Jusiñamui dibeimo iñedino llucinoconi uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacina uainicaitaticue, naimacina Cristo rafuena cue iñotallena.

⁶ Cristo anamo omoi raise ia, cue lloga uaina omoi raise iñocana jaia, omoi mona raise iñoñedinona duere finoiticue.

⁷ Cominimo jamai eruailamona: “Naimaci mare” raitomoi. Jiaicaiño: “Naimaci maraiñedinimaci” raitomoi; ia naimaci comeciaina uiñoñedomoi. Omoi mona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie faiñede”.

⁸ Abina iedoñedicue; ia cue abi iedoia, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacaiñedicue.

⁹ Omoimo riire lollena cue uai ite; ia cue carta diga omoina jacinaitaiacaiñedicue. Omoina canoiacaducue.

¹⁰ Omoi mona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riinide. Cristo rafue raise llua raise uiñoñede”.

¹¹ Iese iñedicue. Omoi motomo cue ia, cartana cue cueia, daje isoi llofuecabiticue.

¹² Omoi mona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedinimaci. Naimaci isoi cue illemo cue comecina fañedicue.

¹³ Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue.

¹⁴ Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue.

¹⁵ Jiaie llofueraini llofuiamona buena oiacañedicue. Cristo rafuena omoi iñocana jaillamona, omoi motomo cue illamona, Jusiñamui jitailla diese omoina canoacaducue.

¹⁶ Jiaie nairaii illanuaimo Cristo rafuena nia lloiacadicue; ia nainomo jaie llofueraima llofuiamona buena oiacañedicue.

¹⁷ Bu abina iedoiacania, cai Nama finua rafueri naimie abina iedua.

¹⁸ Ie llofua diga bu abina iedoia, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

11

Pabloci Cristo oretaganona abi caitadinona llote

¹ Abina cue raise uiñoñenia, cue diga iciriñeno. Cue llua nia cacarei.

² Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Hima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina feaacadicue. Omoimo jeacino iñena isoilla jira, omoina Cristomo feaacadicue.

³ Jiaie rafuemo omoi comeciaina facacana omoi jaillamo jacinaiticue. Jiaie jaiona eruailamona, Taife Eva micorina jifuate. Jiai llofueraini Cristo rafuedo omoi raise jaiñenana itatajamo jacinaiticue.

⁴ Diga llofueraina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedinimaci. Jusiñamui Joreño omoimo illana cue isoi llofuecabiñedinimaci. Cue mare lloga rafue isoi llofuecabiñedinimaci; ia naimacina jaca feiñotomoi. Ie jira Cristo dibeimona omoi jaillemo jacinaiticue.

⁵ “Cristo oretaganodicai” raitimaci; ia naimaci cue baifemo faiamo cue comecina fañedicue.

⁶ Naimaci isoi rafuena jino llua eo uiñoñedicue; ia Cristo rafuena eo raise uiñoticue. Nana cue finoca rafuemono omoina iena diga icaiño uiñotadicue. Uanaicinona omoina jaca llofuecabiticue.

⁷ Omoïmo Jusiñamui rafuena navui cue lloia, omoïna ibatañedicue. Omoïmona ucubena jicañedicue. Cue ucube ollena, dama jiaie rana maijidicue. Iese cue illa jira, damierimona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi.

⁸ Omoïna cue canollena, jiaie creyentiaïmona ucubena feiñoticue. Omoï facaina naimacïmona feiñoticue.

⁹ Rana cue jitailla facaise omoïmona ucubena jicañedicue; ia Macedoniamona bite creyentiaï cuena canodimaci. Omoïmona navui ucubena cue oñena jira, birui cue oñena jira, cuemona ibana oñeitomoi.

¹⁰ Cristo cue illana uiñuamona, naimie uanaicïnodo cue jaillamona, nana Acaya raila provinciamona iena jaca lloiticue.

¹¹ Omoïna cue isiruilla jira, ucubena omoïna jicañeiticue. Jusiñamui cue comecina raise uiñote.

¹² Abina iedeamona omoï motomo damierie: “Pablo isoi llofueticaï” raitimaci. Ucubena omoïmona feiñotimaci. Naimaci isoi iacaiñedicue. “Daje isoi maijidicaï” naimaci raiñellena, ucubena omoïmo jaca jicañeiticue.

¹³ Cristo oretaganona abi caitadinodimaci. Cristo dibeïmo raise maijiñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci.

¹⁴ Ieri rajicaiñedicue. Cominina jifuellena, Taïfedi Jusiñamui jaienicina abi caitadimïena jaicabide.

¹⁵ Taïfe dibeïmo itinodi Jusiñamui ie mare rafuena llofuerainina jaicabidimaci. “Cai lloga rafuedo omoï jaia, Jusiñamui mona marebicaitomoi” llofuecabitimaci. Naimaci finolle rafue diese Jusiñamui mona duere sefuitimaci.

Cristo oretagamïena naimie illa jira, Pablo duere sefuide

¹⁶ “Pablo abina uiñoñedimie” raillamo omoï comeciaina facañeno; ia iese cuena omoï comeciaina facaia, cue llamo nia cacarei. Omoï motomo ite llofueraini abina iedua isoi, iacaiñedicue; ia janore cuemo iticino diga abina iedoticue.

¹⁷ Abina iedeamona cue lloia, cai Nama Cristo isoi lloñeiticue. Naimie cuemo llua jira, iena lloñeiticue; ia abina uiñoñedimie isoi lloiticue.

¹⁸ Omoï dine damierie llofueraini naimaci illa diga abina iedua isoi lloiticue.

¹⁹ Abina uiñoñedimaci; ia: “Abina eo raise uiñoticaï” omoï llamona, naimaci llofuiacinona cacacabidomoi.

²⁰ Naimaci anamo omoïna itataiacadimaci. Omoïmo ucubena jicacabidimaci. Omoïna ocuicabidimaci. Icirillamona, omoï uiecuaina bofedimaci. Iese omoïna finocabidimaci; iadedi buena naimacïmo finoñedomoi. Imana oñedomoi.

²¹ Iese omoïmo finoñedicue, omoïna cue jaciruilla jira.

Cue illana omoïmo ja lloiticue. Nibai abina raise uiñoñedicue; ia naie llofueraini isoi cue illa diga abina iedoiticue.

²² Omoï motomo ite damierie llofuerainina ja lloiticue. Judíuai uaido ñaitimaci. Iena jiaï ñaiticue. Judíuai nairai imaci. Daje isoidicue. Judíuai nairai imiedicue. Abraham micori uruiadimaci. Jiaï naimie micori uruedicue.

²³ “Cristo dibeïmo maijidicaï” raitimaci. Abina uiñoñedimie isoi lloticue; ia naimaci baïfemo Cristo dibeïmo maijidicue. Naimaci baïfemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fio-daicabiticue.

²⁴ Judíuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci.

²⁵ Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui naio monaillaimo botedo jamai fuiri baiticue.

²⁶ Eo jacirede illedo jaicabidicue. Firiruidino eo illa jira, jaciruoicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaímo cue ia, diga icaiño duere sefuidicue. Naisodo cue macaria, duere sefuicabidicue. Monailaido cue jaia, duere sefuicabidicue. Cristo rafuena llorainina abi caitadinomona jiai duere sefuicabidicue.

²⁷ Cue ucube ollena, duere maijicabidicue. Diga icaiño raise iniñedicue. Diga icaiño aime guiticue. Rollimemona duere sefuicabidicue. Iniroininamona jiai duere sefuidicue.

²⁸ Diga jiaie rafuemona duere sefuicabidicue. Duenailamona naga creyentiaí illanuaímo cue comecina nagarui eo facadicue. Iemo nagarui cue comecina cue facaia, duere sefuicabidicue.

²⁹ Nie creyente Cristo rafuedo nia raise inoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue.

³⁰ Cue abina iedoiacania, jamai bue isoidimiedicuena lloiacadicue.

³¹ Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue llua uñote.

³² Cue illana nia lloiacadicue. Damascomo jaie creyentena cue jailla facaise cuena gaitatallena, Aretas railla illaima anamo ite gobernadori nairai llaiga nasena sedatate;

³³ iadedi llaigafo ecimo ite jofa a ite ventanamona cirigai isoide diga ana jaillanona, naiemona jillodicue.

12

Pablo nicairilla isoide rafuena cide

¹ Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina ridoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue.

²⁻³ Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uiñoñedicue. Nibai dama cue joreña uite. Dama Jusiñamui iena uñote. Naimie mare illanomo iticue.

⁴ Nainomo cue ñainina rafuena cacadicue.

⁵ Ie diga abina iedoñeiticue. Cue jamai bue isoidimie diga abina iedoiticue.

⁶ Uanaicinona cue llua cuena cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitaiñedicue.

⁷ Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue.

⁸ Cuemona iena naimie oni oretallena, cai Namamo dacaiño amani jidicue;

⁹ ia cuemo llote: “Ona jillotañeiticue; ia cue ona duenailacínodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uiñoiticue.

¹⁰ Cristo muidona duere cue sefuia, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoia, cue comecina ocuiñoiticue. Cue duere sefuia, cue Nama cuena eo canode.

Pablo Corintomo ite creyentiaímo comecina eo facade

¹¹ Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena ridoñedomoi; ia jaino eo mare railla llofueraínina raise feñotomoi. Jamai bue isoidicue; ia naimaci cue baifemo faiñedimaci.

¹² Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiño omoi motomo iticue.

13 Cuemona duere sefuiñedomoi. Jiaie creyentiaí omoi baífemo faíamo cue comecina facañedicue. Nibai íese omoi comeciaina facadomoi. Omoímo ucubena cue jicañena jira, jiaie creyentiaí isoíñedomoi. Iena omoi gaiñenia, iena feita. Cue diga iciriñeno.

14 Menacaiño navui omoi ðine jaidicue. Omoi ðine dane jaiacadícue. Omoímo ucubena jicañeitícue. Omoi rana jitaíñedicue; ía Cristo ðibeímo omoi íllana, naimíena omoi raise ñnuana jitaídícue. Cue uruiaí isoídomoi. Rana eenoñedomoi, omoi mootiaí íena; ía omoi mootiaí rana eenotímaci, omoiéna. Íe isoíde. Cue uruiaí isoí omoi íllamona, omoímona rana jitaíñedicue; ía omoímo rafuena íacadícue.

15 Nana cuemo íte ra omoímo fecaacadícue. Nana cue comecímo íticínona omoímo jiaí íacadícue. Omoína eo ísiruitícue; ía cuena janore ísiruitomoi.

16 “Caimona ucubena jicañedio; ía jífuecana caimona otío” raicabítomoi.

17 Ero, omoi ðine menamíena cue oretajamona, omoímona ¿níe isoíde rana otíaímaíai? ¿Níese omoína jífuetíaímaíai?

18 Omoi ðine Titona oretatícue. Jiaísie creyente ímíena Tito diga oretatícue. ¿Níese Tito omoína jífueíe? Omoímo coco comecina daje isoí facadícoco. Daje rafuedo jaca jaidícoco. Omoína jaca jífueñedicoco. ¿Níese omoi comeciaina raitomoi?

19 “Caimona íe abína riídote” cuemo nibai comecina facacabídomoi. Jusiñamui cuena uíñuamona, Cristomo cue duíllamona, bie rafuena llotícue. Cue ísiruíganodomoi. Cristo ðibeímo omoi raise íllena, naimíena raise omoi ñnollena, bie rafuena llocabítícue.

20 Omoi ðine cue ía, cue jitaílla isoí omoi íñenamo jacinaitícue. Íese omoi ía, omoi diga cue íllana jiaí nibai gaiñeitomoi. Íeri cue comeci jaríre íte. Nibai nía uaina uaitatomoi. Nibai nía abína íedotomoi. Nibai nía ícírícabítomoi. Nibai nía omoi rana caídícabídomoi. Nibai nía jiaínona jeare ñaicabítomoi. Nibai nía jiaíno joreñona ñaicabítomoi. Nibai nía abína uradóídomoi. Nibai daje isoí comeciaina nía lloíñedomoi. Omoi íese íllari cue comecí ði jaríre íte.

21 Omoi ðine dane cue ía, omoi muidona Jusiñamui cuena meídaitajamo jacinaitícue. Cristo ðibeímo omoi raise íñenia, sunaitícue. Jearede rafuena omoi nía faínocaiñenia, omoi aíñede riño diga íllana omoi faínocaiñenia, omoi íníñede íma diga íllana omoi faínocaiñenia, sunaitícue.

13

Iraicaiño Pablo naimacína llofueíe

1 Menacaiño omoi ðine navui jaidícue. Omoi ðine dane jaitícue. Conínimo omoi rafue ía, íena raise fíno. Moisés mícorí íaie llote: “Mena íaímaíai daje isoí lloíllamona, daje amani daje isoí lloíllamona, maraíñedicínona fínodímíena duere fínua”.

2 Maraiñede rafue fínodínomo navui riíre llotícue. Nana omoímo riíre llotícue. Omoi ðine navui cue ílla isoí, íena dane riíre lloíacadícue. Omoi ðine cue ía, naimací comeciái íuai nía meídoñenia, naimacína duere fínoítícue.

3 Íemona Cristo uai cuemo íllana uíñoítomoi. Naimíena omoi ñnuamona, naimíe uai síñonana uíñotomoi. Jamai uaido naimíe omoína jillotañede; ía íe síño uaido omoína jai jillotate.

4 Jamai bue ísoídímíe isoí cruzmo naimíe fíodaíte; ía fíodaíllamona Jusiñamui uaido jillode. Cristomo cue duíllamona, jamai bue ísoídímíena ítícue; ía Jusiñamui uai cuemo íllamona, omoímo íte rafuena raise fínoítícue.

5 Cristona ínocana omoi raise jaiíllamo omoi comeciaina faca. Cristo jitaíllacíno omoi fínollemo comeciaina faca. Cristomo omoi duíllamona, Cristo omoi diga íllana uíñotomoi. Cristomo omoi ðuíñenia, naimíe omoi diga nía íñede.

6 Cristo omoi diga íllana omoi uíñuamona, Cristo uai cuemo íllana jiaí uíñoítomoi.

7 Maraiñedicíno omoi fínocana jaíllana jitaíñedicue. Jusiñamuímo íena jaiítícue. Omoi comeciái íuai omoi meídoñenia, Cristo uai diga omoína duere fínoacaiñedicue. Omoi

comeciai iuai meiduana jitaídícue; ia Cristo uai díga omoína cue duere finoñenia, Cristo uai cuemo illana níbai uíñoñeitomoi.

⁸ Cristomona cue uai illana omoi uíñoñellena, maraiñedicino omoi finuana jitaíñedicue. Mare rafuena omoi finocana jaillana jitaídícue. Iena finocana jiaí jaiacadícue.

⁹ Cristo rafuena inocana omoi raise jaia, iobidícue. Omoimo cue riire lloñenia, iobidícue. Cristo jitaíllacino eo raise finocana omoi jaillena jicabidícue.

¹⁰ Birui bie rafuena cuetícue. Omoi díne iñedicue; ia bie cartana omoi feiñua mei, omoi comeciaína raise finuana jitaídícue. Cai Namamona cue uaina feiñotícue. Iedo omoimo riire lloiacaiñedicue; iadedí iedo naimie díbeimo omoi raise itataiacadícue.

¹¹ Cue amatiái, bie carta cuiana jai fuidoacadícue. Marena omoi i. Omoi comeciaína raise fino. Cue lloga rafuemo raise cacarei. Nana omoi creyentiaí comeciaí daje isoi lloicana jai. Coniniri uri omoi i. Iemona Jusiñamui omoína isiruillana uíñoitomoi. Jusiñamui omoína uri itatajana uíñoitomoi.

¹² Nana creyentiaína eo caimare uaido.

¹³ Nana cue díga ite creyentiaí imací uaina oredímací.

¹⁴ Cai Nama Jesucristo omoína jaca duenaite. Jusiñamui omoína jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitaídícue. Mai. Macaibaite. Pablodícue.

GALACIAMO ITE CRISTONA HNOTINOMO PABLO ORETAGA RABE

Uaiduacino

¹⁻² Galaciamo ite creyentiaí, omoí dñe bie carta oredicue. Pablodícue. ¿Nigacino? ¿Ñie isoidomoí? Omoímo cue uai oredicue. Nana cue diga ite creyentiaídi imaci uaina jiaí oredimaci. Jesucristo fetocamiedicue. Cai Moo Jusiñamui jiaí fetocacue. Jesucristo fiodaillamona, Jusiñamuidi naimiena jillotate. Mare rafuena cue llollena, cuena orediaímaiaí. Comini cuena oreñedimaci. Cue lloga uaina cominimona jiaí oñedicue.

³ Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoí jai. Omoína uri jai itatatiímaiaí. Iena omoí uiñocana mai omoí jai.

⁴ Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite.

⁵ Cai Moona jaca cai iobillasa. Iena jitaídícue.

Pablo lloga rafuedi jaca dajede

⁶ Jusiñamuina raire omoí fainonocallari rajicaídícue. Cristo díbeimo omoí illena, omoína Cristo duenaillamona, Jusiñamui omoína jai uaidote; iadedi omoí jeacinomona omoí jilloillena, jiaíe rafuedo jai jaidomoí.

⁷ Jiaíe mare rafue jaca iñede; iadedi Cristo rafuena jiaíforiedo llofuiamona dajerie omoí comeciána uri itatañedimaci.

⁸ Jesucristo rafuena omoímo jaie llotícaí. Jiaíe rafuena llotícaídena, Jusiñamui riicaillafue anamo nia cai illasa. Jusiñamui jaienicí jiaíe rafuena llotena, Jusiñamui riicaillafue anamo jiaí naimie illasa.

⁹ Omoímo jaie iese llotícue. Dane ja lloitícue. Cai llua isoi Cristo rafuena omoímo bu lloñenia, Jusiñamui riicaillafue anamo naimie illasa.

¹⁰ Comini cueri iobillana jitaíñedicue; iadedi Jusiñamui cueri iobillana jitaídícue. Cominina iobitaiacadícuaena, Cristo díbeimo nia maijñedicue.

Ie oretagamiena jaillena, Cristo Pablona fetua rafue

¹¹ Cue amatiaí, cue lloga rafuena omoí raise uiñuana jitaídícue. Omoí jeacinomona omoí jilluana jaie llotícue. Bie rafuena comini comeciái facajacinomona oñedicue.

¹² Cominimona oñedicue. Bu jaca cuena iena llofueñede; iadedi Jesucristo cuena uiñotade.

¹³ Jesucristona nia cue ñnoñenia, cue judíuai einamací lloga rafuedo cue jaillana jai fidídomoí. Cristona ñnotinona jaie eo duere finodícue. Naimacína fuidoacadícue.

¹⁴ Cue einamací jaie llua isoi, Jusiñamuina raise ñnotícue. Naimací llogacínuaído eo duere cue jailla jira, daje facai cue diga itino baífemo ñnotícue;

¹⁵ iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote.

¹⁶ Omoí judíuaiñedomoímo naie Jito rafuena cue llollena, cuemo ie Jitona jaie bairetate. Naie facaise cuemo jai suide rafuena bu diga ñañedicue;

¹⁷ ia Arabia railla eníruemo jaidícue. Nainomo comini iñena jira, cuemo jai suide rafuemo comecina facadícue. Jerusalémo Jesucristo nano oretagano dñe jaiñedicue. Cuena Jesucristo nia oretañenia, naimacína orede, ie uai llollena. Arabia railla eníruemo cue illa mei, Damasco railla nairáimo abído jaidícue.

¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dñe jaidícue. Naimie dñonomo quince dígarui itícue.

¹⁹ Naie facaiseconi nana Jesucristo oretaganona cioñedicue. Pedrona ciodicue. Jacobona jiaí ciodicue. Naimiedi cai Nama ie ama Jiaínona cioñedicue.

²⁰ Omoímo nana cue ciegacínodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue.

²¹ Jerusalémo cue illa mei, Siria railla eniruemo jaidicue. Cilicia railla eniruemo jiaí jaidicue.

²² Judeamo ite Cristona ñnotinodi cuena nia cioñedimaci.

²³ Cuena iese fididimaci: “Navui caína duere finocabidimiedi Jesucristo rafuena jai llote. Jesucristona cai ñnuana navui jitaiñede. Caína fuidoacade”. Jiaíe cue finoca rafuena fidiñedimaci.

²⁴ Ie fidiamona, cueri Jusiñamuimo iobillacínona jai fecadimaci.

2

Jerusalémo Pablo jailla rafue

¹ Catorce años illanona, Jerusalémo dane jaidicue. Bernabé cue diga jaide. Titona uiticue.

² Jusiñamui cuemo llua jira, nainomo ite creyentiaímo jaidicue. Judíuaiñedíno Cristo rafuena jai ñnuana cue llollena, jaidicue. Cue llofuiana naimaci raise uiñollena, creyentiaí illaícomínímo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaía mei, cue llofuiana: “Mare” raitimaci.

³ Tito cue diga ite. Naimiedi judío nairaí imieñede; iadedí naimaci abína detacabilla isoi, creyentiaí illaícomíní ñnena naimie abi detatajana lloñedimaci.

⁴ Creyentiaína abi caitadíno billa jira, Tito abína detatajana siadoticaí. Naimacína cai uaidoñeno bitimaci. Moisés micorí llogacínuaí anamo cai iñenana naimaci uiñollena, bitimaci. Cristo Jesús cai ñnuana jira, Moisés micorí llogacínuaído jai jaiñedicaí. Moisés micorí llogacínuaí anamo caína dane itatallena, iena uiñoiacadimaci.

⁵ Cai mare rafuena jiaíena jaca meidoñellena, naimaci ñaiana dallu cacareiñedicaí. Uanaicínona omoí uiñuana jitaídicaí.

⁶ Naie creyentiaí illaícomíní omoímo llollena, cuemo jiaíe rafuena lloñedimaci. Illaícomínína raillanodimaci; iadedí cuemona jamai bue isoidimaci. Jusiñamui nana comíní daje isoi feiñua jira, naimaci uai cue uai baífemo faiñede.

⁷⁻⁹ Cue llofuiana rairuiñedimaci; iadedí creyentiaí illaícomíní cuena Bernabé diga marena feiñotimaci. “Daje isoi comeciána facadicaí” raillamona, cue llofuiana: “Jai mare” raitimaci. Creyentiaí illaícomínídi Jacobo, Pedro, Juan digamie. Judíuai ñnena Pedrona Jusiñamui oretaja isoi, cue lluaímona judíuaiñedíno ñnena Jusiñamui cuena oretajana uiñotimaci. Pedro lluaímona Jusiñamuidí ailluena judíuaína creyentiaína itatate. Cue lluaímona, Jusiñamuidí ailluena judíuaiñedínona creyentiaína jiaí itatate. Iemona Jusiñamui uai cuemo illana jai uiñotimaci. Judíuaiñedíno Jucristo rafuena llocana nia coco jaillana jitaídimaci; iadedí judíuaiímo Jucristo rafue llocana nia jaidimaci.

¹⁰ Daje rafue cocomo llotimaci. “Duerede creyentiaína canocabi” llotimaci. Iena iocíre finoacadícue.

Antioquíamo suide rafue

¹¹ Antioquíamo cue jailla mei, Pedro nainomo jiaí jaide. Nainomo Pedro bia, marañedífue naimie finua jira, naimie uiecomo naimie mo riire lloticue.

¹² Nainomo Pedro nano rilla mei, nana creyentiaí diga nainomo naimie guisoide. Judíuai creyentiaí diga, judíuaiñede creyentiaí diga, danomo guisoide. Iemei Jacobo ñnena damerie bitimaci. Moisés micorí llogacínodo jaisoidimaci. Moisés micorí llogacínodo Pedro jai jaiñede; iadedí naimaci billa mei, naimacína naimie jacíruilla jira, judíuaiñede creyentiaí diga Pedro jai guiñede. Ie ñnoga rafuedo naimie jai jaiñede.

¹³ Naimie iese illamona, judúai creyentiaidi judúaiñede creyentiaí diga jai jiaí guiñedimaci. Pedro illa isoi, Bernabé iedo jiaí jaide.

¹⁴ Naimaci iese illa jira, Jesucristo rafuedo raise jaiñedimaci. Uanaicínodo jaiñedimaci. Iena cue uiñua jira, nana comini uicomo Pedromo lloticue: “Judío nairai imiedio; iadedi o jeacínomona o jilloillena, cai einamaci llucínodo birui jaiñedio. Ie jira, ¿bue ñellena judúaiñedino cai einamaci llucínodo jaillana jai jitaideo?”

Judúaidi creyentiaína jailla mei, Moisés micori llogacínuaído jai jaiñedimaci

¹⁵ Nia lloticue: Judúaiñedinodi Moisés micori lloga uaina jaie uiñoñedimaci. Caidi judúaina jeicigacai. Ie muidona Moisés micori llogacínuaí anamo jaie jeicigacai.

¹⁶ Iese iticai; iadedi Moisés micori llogacínuaído jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñnuamona marebicaidicai. Iena uiñoticaí. Ie jira Cristo Jesúsna ñnoticaí, cai marebicaillena. Cai marebicaillena, Moisés micori llogacínuaína ñnoñedicai. Moisés micori llogacínuaína ñnuamona, jaca buna marebificainide.

¹⁷ Jusiñamui mona cai marebicaiacallena, Cristona cai ñnuamona jeacino finoraññedicai. “Cuen a ñnuamona, marebicaitomoi” Cristo iese llofueuide. Naimie llua isoi cai marebicaiñenia, cai jeacínomona nia cai jilloñenia, Cristo muidona; iadedi iese iñedicai.

¹⁸ Moisés micori llogacínuaí jai jamaiñocaidicue. Ie jira naicínuaí dane abido cue oia, iena birui cue ñnoñena jira, jai jeacino finoraímiedicue.

¹⁹ Iemona cue marebicaiñena jira, Moisés micori llogacínuaí cuemo jai duiñede. Ie anamo jai iñedicue. Ie muidona Jusiñamui llogacínuaído jai jaidicue. Cristo anamo jai iticue.

²⁰ Naimie díbeimo jai iticue. Cristo cuemo ite. Cristo cuena namatade. Jusiñamui Jitona cue ñnocana jai jaidicue. Cuen a isiruillamona, naimie jitaillamona, cueri fiodaite.

²¹ Jusiñamui caína duenaillana jamaiñedicue. Jusiñamui jitailla isoi, Moisés micori llogacínuaína cai ñnuamona marebicaidicaína, Cristo tainomo niade fiodaite.

3

Jesucristona ñnuamona judúaidi Jusiñamui Joreñoña feiñotimaci

¹ Gálatas imaci, abina jai uiñoñedomoi. Jiaíno omoína birui jifujete. Omoímo Jesucristo cruzmo fiodailla rafuena jaie marefodo lloticue. Iena raise cacadomoi.

² Ie jira omoímo buena jicanoiacadicue: ¿Ñiese Jusiñamui Joreñoña jaie feiñotomoi? Moisés micori llogacínuaído jaillamona iena feiñoñedomoi. Jesucristo rafuena omoí cacajamona, ñnotomoi. Ie mei Jusiñamui Joreñoña feiñotomoi. ¿Ñiese birui abina uiñoñedomoi?

³ Omoí marebicaillena, Jusiñamui Joreño omoímo jai ite; iadedi Moisés micori rafuena dane omoí jaiacanamona, omoí jiaíe finolle rafuemona jai marebicaiacadomoi.

⁴ Jusiñamui Joreño mona diga marecínuaína feiñotomoi; iadedi iena jai jitaíñedomoi. Iese omoí illaña ñnoñedicue.

⁵ Dane jicanoíticue: ¿Ñiese Jusiñamuidi ie Joreño omoímo fecade? ¿Ñiese siño rafuena omoíri finode? Moisés micori llogacínuaído omoí jaillamona ie Joreño omoímo fecañede. Moisés micori llogacínodo omoí jaillamona, siño rafuena omoíri finoñede; iadedi Jesucristo rafue omoí cacajamona, iena omoí ñnua jira, ie Joreñoña fecade. Iemona siño rafuena omoíri jiaí finode.

Abraham micori Jusiñamuína ñnua muidona marebicaide

⁶ Abraham micori ie rafuena lloticue. Naimie micorimona fueoiticaí. Moisés micori naimiena cuete: “Abraham micori Jusiñamuína ñnua jira, Jusiñamui mona naimiedi marebicaide”.

⁷ Iena cai cacajamona, Abraham micorí isoi cai ñnuamona, naimie ua cominina cai illana uiñotícaí.

⁸ Jusiñamuidí judíuaiñedíno íco marebicaillena jaie uiñote. Naimiena íco naimací ñnollena jaie jiaí uiñote. Iena uiñuamona, Jusiñamuidí íco suille rafuena Abraham micorímo jaie llote. Mare rafue naimiemo llote: “Nana cuena o isoi ñnotinona marebicaitaicue” llote.

⁹ Abraham micorídi ñnote. Jusiñamui naimiena marebicaitate. Ie isoide. Nana Jusiñamuina ñnotinona marebicaitate;

¹⁰ iadedí nana Moisés micorí llogacínuaído jaidíno jai faidobidímaci. Moisés micorí iena jaie cuega: “Nana cue lloga uaido jaiñedíno jai faidobide”. Buna nana naie lloga uaido jaiñena jira, nana faidobidícaí.

¹¹ Biena uiñotícaí. Moisés micorí llogacínuaído jaillamona, Jusiñamuimona jaca buna marebicaiñede. Jusiñamui facaina lloraima iena jaie cuete: “Jusiñamuina ñnuamona marebicaidímaci. Ie mei jaca iitimací”.

¹² Moisés micorí llogacínuaí daje isoíñede. Nana Moisés micorí llogacínuaína finuamona cominí marebicaide. Moisés micorí iena jaie cuega: “Cue lloga uai finuamona, marebicaidímaci. Iemei jaca iitimací”. Jusiñamuina ñnuana lloñede: ia ie lloga uai finollena cominímo llote. Nana ie lloga rafuena finuamona, cominídi marebicaidímaci.

¹³ Moisés micorí llogacínuaí anamo jaie cai illa jira, faidobidícaí; iadedí cai facaina naimie fiodailla jira, Cristodí iemona caína jillotate. Cruzmo Cristo cuinaja jira, cai facaina naimie jai faidobide. Moisés micorí iena jaie cuega: “Cruzmo cuinacamie Jusiñamuimona jai faidobide”.

¹⁴ Jusiñamuina naimie ñnuua jira, Abraham micorí jaie marebicaide. Jesucristo fiodailla muidona, naimiena judíuaiñedíno ñnuamona, Abraham micorí isoi marebicaidímaci. Jusiñamuidí ie Joreñona caímo fecallena jaie llote. Ie muidona Jesucristona ñnuamona, Jusiñamui Joreñona birui feiñotícaí.

Jusiñamui lloga rafue

¹⁵ Cue amatíai, bie rafuemo comeciaina faca. Nie isoide rafuena menamie finoacania, naie rafuena feitañellena, rabemo cuetíaiimaíai. Iaimaíai mamecina nainomo cuia mei, jiaíruido damie naie rafuena jiaífo dama meidonide.

¹⁶ Ie isoide. Jusiñamuidí Abraham micorímo íco suille rafuena jaie llote. Iena naimie llua jira, iena meidonide. Ie uruaímo íco suille rafuena lloñede; ia daje uruemo íco suille rafuena llote. Cristona ñaite.

¹⁷ Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorímo rafuena llote. Cuatrocientos treinta años illanona, Moisés micorímo Jusiñamuidí jiaíe rafuena llote; iadedí Abraham micorímo jaie lloga rafuena meidoñede.

¹⁸ Jusiñamui llua jira, Abraham micorí jillode; iadedí Moisés micorí llogacínuaído cai jaillamona, cai jilloiadedí, Abraham micorí isoi jilloñedícaí.

¹⁹ Iese itena, ¿bue ñellena Jusiñamui Moisés micorímo jiaíe rafuena llote? Naiemona jeacínona cai uiñollena, iena llote. Naie rafue íte, Cristo eníruemo nia biñenia. Jusiñamuidí Abraham micorímo lloga rafue Cristomo duide. Naimie billamona Moisés micorímo lloga rafuena oñedícaí. Jusiñamuidí ie jaienisaímo naie rafuena llote, Moisés micorímo iena llollena. Ie mei Moisés naie rafuena cominímo llote;

²⁰ iadedí Jusiñamuidí Abraham micorímo ie rafuena atona llote. Jiaímíemo iese lloñede, Abraham micorímo iena llollena.

²¹ Moisés micorímo Jusiñamui rafuena llote; ia naiemona Abraham micorímo llogacínomo nia saíñede. Cai jilloillena, cai jaca illena, Moisés micorímo Jusiñamuidí rafue finuana llotena, naie rafuena cai finuamona marebicaidícaí;

²² iadedi Moisés micori ciegafuiaidi nana comini jeacino anamo illana llote. Moisés micori llogacinuaido jaillamona, jeacino anamona jilloñedicaí. Jesucristona cai ñnuamona Jusiñamui llua isoi, jeacino anamona jillodicaí.

²³ Jesucristona ñnuana nia cai uiñoñenia, Moisés micori llogacinuai anamo iticaí. Jesucristo billamona, naimiena ñnuana uiñoticaí.

²⁴ Moisés micori llogacinuaidi cai lletarafue. Cristo ñibeimo cai illena caina lletade. Cristona cai uiñuamona, naimiena cai ñnuamona, marebicaidicaí.

²⁵ Naimiena ñnuana jai cai uiñuamona, naie lletarafuena jai oñedicaí.

Abraham micori ua uruiai

²⁶ Cristo Jesúsna ñnuamona, nana omoi Jusiñamui cominidomoi.

²⁷ Cristo ñibeimo omoi illamona, bautizagaomoi. Iemona naimie Moodi jiai omoi Moo.

²⁸ Jusiñamuimona dajena itomoi. Naimiedi nana cominina feiñote. Judíuaina omoi illamona, omoína feiñote. Judíuaiñedinona omoi illamona, omoína feiñote. Mullaiaína omoi illamona, omoína feiñote. Mullaiaíñedinodomoidena, omoína feiñote. Iñiaína omoi illamona, omoína feiñote. Riñoniaína omoi illamona, omoína feiñote. Jesucristona omoi ñnua jira, jaca damacidomoi.

²⁹ Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiai jainaiaidomoi.

4

Jusiñamui uruiaína jaidicaí

¹ Moisés micori llogacinona dane lloiticue. Jiaie rafuedo iena lloiticue. Riaí uruiaí moo fiodailla mei, ie moo raruaídi nano doforamiemo fiebide. Naie nano doforamiemo uruenia, naimie mamecido naimiemo jide. Naimiemo nia raise jide. Naimiedi nia jamai ite isoide. Naimie ie jofomo mullaiaí isoi ite.

² Naimie moo llua ñnori jiaíno anamo naimie ite. Ie moo raruaí jiaíno anamo jiaí ite. Naimie jai eimiena illemona naimie moo raruaídi naimiemo raise jai duite.

³ Jaie daje isoidicaí. Uruiaí isoidicaí. Cai jaiagai llogacinuai anamo iticaí;

⁴⁻⁵ iadedi ie jitailliruimo Jusiñamuidi ie Jitona orede, naicinomona caina jilloitallena. Jusiñamui uruiaína cai jaillena, ie Jitodi naicino anamo riñomona jeiciga.

⁶ Naimie uruiaídicaína jira, Jusiñamuidi ie Jito Joreño cai comeciámo orede. Naimiena cai feiñuanona, naimiedi caina Jusiñamuina: “Cai Moo” raitatate.

⁷ Ie jirari jiaíno anamo jai iñedomoi; iadedi Jusiñamui uruiaidomoi. Jusiñamui uruiaidomoina jira, nana naimie lloga rafue omoimo jai duide.

Moisés micori llogacinuai anamo omoi jaia, danomo abido jaidomoi

⁸ Jaie Jusiñamuina nia omoi uiñoñenia, ua jusiñamuillaíñede ra anamo itomoi. Naie isoide rana sedauidomoi.

⁹ Jusiñamuina jai uiñotomoi. Naimie omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi.

¹⁰ Judíuai comini rafuena finocabillaruimo jiai finocabidomoi. Iemona: “Marebicaiticaí” raillanona iese finocabidomoi.

¹¹ Cue lloga uai omoi finoñena jira, omoimo tainona jai lloticue. Nibaí jai tainomo maijidicue.

Pablo naimaci diga illana uibiñote

¹² Cue amatiaí, omoi ñine nano cue jaia, Moisés micori llogacino anamo iñedomoi. Naie llogacino anamo jaie iticue; ia birui ie anamo iñedicue. Birui cue illa isoi omoi illana jiai jitaídicue. Omoi ñine cue nano ia, cuena raise feiñotomoi.

¹³ Cristo rafuena omoimo nano cue llua facaiseconi duidicue. Iena uiñotomoi.

¹⁴ Cue duico omoimona jacire eruaide; iadedi cuena jearuiñedomoi. Jusiñamui jaienici omoi dine billa isoi, cuena feiñotomoi. Jesucristo omoi dine billa isoi, cuena jiai feiñotomoi.

¹⁵ Jaie caimare iticai. ¿Niese birui cue diga caimare iñedomoi? Cuena omoi canoitena, cuemo fecallena, omoi uisi jaie jino juiconoiacadomoi.

¹⁶ Omoimo jicanoiacadicue: ¿Uanaicinuai omoimo cue llua jira, omoi enoillamiena jai jaidicue?

¹⁷ Moisés micori llogacinuaido jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitañedimaci.

¹⁸ Mare comeciaimona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiai mare.

¹⁹ Cue uruai, Cristo omoi comeciaina raise namataja dinori, omoi cue comeci eo duere dane llicidaite.

²⁰ Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue llua raise uiñoñedicue.

Jesucristo rafue Moisés micori llogacinuai baifemo faite

²¹ Moisés micori llogacinuai anamo iacadino, omoimo daje rafuena jicanoiacadicue: ¿Moisés micori ciegafuiaina raise cacadomoi?

²² Moisés micori jaie cueda: “Abraham micorimo mena jito ite. Daje jito ie mullañomona comuide. Jiaie jito ie mullaiañediñaiñomona comuide. Naiñaiñodi ie nanoca ai.

²³ Abraham micori jitailla jira, ie mullaño jitona comuitate; iadedi ie mullaiañediñaiño jito comuide, Jusiñamui llua jira”.

²⁴⁻²⁵ Naie rafuemona cai fueolle. Ie iañuaidi mena jai lloga rafue isoidiañuai. Abraham micori mullaño mameci Agar micori. Naiñaiñodi Sinaí railla anedumona lloga rafue isoide. Arabia railla enruemo Sinaímona Jusiñamuidi Moisés micorimo rafuena llote. Naiñaiño mullañona jira, ie urue mullaímana jeiciga. Ie nama anamo jaca ite. Ie isoide. Moisés micorimo llogacinuaido jaidinodi naie rafue anamo itimaci. Jerusalémo itino Moisés micori llogacinuai anamo jai nia illa jira, Agar micori Jerusalén railla nairai isoide.

²⁶ Jiañaiñodi jiaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullañoñena jira. Nainomo jainaiaidicai, Moisés micori llogacinuai anamo jai cai iñena jira.

²⁷ Isaías micori iena jaie cuete:

Oñiño, mai iobi.

Urue nia jocoñediñaiño, ado iobi.

Ñirediñaiño baifemo eo uruairenitio.

Iemona Moisés micori llogacino anamo iñedinomona Cristona ñnotinona ailluena jailana uiñoticaí.

²⁸ Cue amatiai, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruaína jaidicai.

²⁹ Ero, mullaño jitodi mullaiañediñaiño jitona jaie duere finouide. Daje isoi Moisés micori llogacinuai anamo itinodi Jusiñamui Joreño anamo itinona birui duere finocabidimaci.

³⁰ ¿Niese cai nibaille? Moisés micori Sara micori llua jaie cuete: “ ‘Mullañona, naiñaiño jito diga, oni dota. Ie moo fiodailla mei, mullaño jito ie moo raruaína feiñoñeite. Dama mullaiañediñaiñoñede jito ie moo raruaína feiñoite’ llote”.

³¹ Ie jira mullaño urue isoñedicai Moisés micori llogacinuai anamo jai cai iñena jira, mullaiañediñaiño urue isoidicai.

5

¿Nie isoide rafuedo jaitomoi?

¹ Moisés micori llogacinuai anamona Cristodi caina jai jillotate. Ie jira omoi comeciaina ocuiño. Jaie omoi illa isoi, dane jaiño. Omoi marebicaitañede rafue anamo jaie itomoi. Ie jira Moisés micori llogacinuai anamo iño. Iemona marebicaiñeitomoi.

² Jeacinomona omoi jillobillena, Moisés micori llogacinodo omoi jaiacanamona, omoi abiaina omoi detataia, Cristo rafuena jai jitañedomoi.

³ Dane lloiticue: Jeacinomona omoi jillobillena, naga abina detatagamie nana Moisés micori llogacinuaina inua. Nana iena inoñenia, naimie jilloñeite.

⁴ Moisés micori llogacinuaina inuamona omoi marebicaiacania, Cristo rafuena jai duiñedomoi. Jusiñamui caina duenaillamona, Cristona jaie cai dine orede. Moisés micori llogacinodo omoi jaiacania, Cristo rafuena jai jitañedomoi.

⁵ Moisés llogacinuaina inuamona marebicaiñedica; iadedi Jesucristona cai inuamona, Jusiñamui Joreño caina canuamona, cai marebicaillemo iocire ocuridica.

⁶ Abina detatajamona, cai jeacinomona jilloñedica. Abina cai detatañenamona, jai jilloñedica. Dama Cristona cai inuamona jillobidica. Naimiena cai inua jira, nana cominina isiruicana jaidica.

⁷ Cristo rafuedo navui marena jaidomoi; ia damerie uanaicinona omoi inuana jai jitañedimaci.

⁸ Jusiñamuimona naimaci uaina oñedimaci. Jusiñamui omoina navui uaidote, naimie dibeimo omoi illena.

⁹ Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jaia, diga cominina jifuerede, naimie jailla dibeido jaillena.

¹⁰ Jiaie rafuedo omoi jaiñellemo cue comecina jai facadicue. Cai Nama cue inua jira, cue lloga uaido omoi jaillemo cue comecina jai facadicue. Omoi comeciaina naganomo itatatiniena uiñoñedica; iadedi Jusiñamui naimiena duere finoite.

¹¹ Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira.

¹² Omoi comeciai naganomo itatatinodi raitimaci: “Janore jisa abina detatajamona, cai jeacinomona jillobidica”. Iese itena, Jusiñamuina uiñoñedino finua isoi, naimiena naimaci abiai diana jiai jitaidica.

¹³ Moisés llogacinuai anamona Jusiñamui omoina jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano.

¹⁴ Moisés micori iena jaie llote: “O abi o isiruilla isoi, o ecimo itinona isirui”. Iena omoi finoa, nana Moisés micori llogacinuaina jai finodomoi.

¹⁵ Iese omoi finoñenia, conima diga omoi riire iciria, jaca danomo iñeitomoi.

Jiaie cominina omoi isiruilla rafue

¹⁶ Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite marañedecinodo omoi jaiño.

¹⁷ Cai comeciaino ite marañedecinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena;

¹⁸ iadedi Jusiñamui Joreño anamo omoi raise ia, naimie lluaana omoi raise inoia, Moisés micori llogacinona jai jitañedomoi.

¹⁹ Ero, marañede comeciaino itacinodo omoi jaia, bie isoidicinona finocabidomoi: añede riño diga illacina, iniñede ima diga illacino, jeare ñaiacino, diga eo jearede rafuena finuacino,

²⁰ jiraraína sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino,

²¹ dama abina uradoillano, rana bairuacino, comena meiniacino, jifailacino, aifuerillacino, ie isoidicino. Omoimo jaie lloticue. Dane lloticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiañeite.

²² Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, rare iciriraininacino, duenaillacino, jiaie cominina canuacino, ie lloga uaina finuacino,

²³ uai oñenacino, abina eenuacino. Moisés micori llogacinuai bie isoidicinona ñañede.

²⁴ Cristo Jesúmo jainaiaidinodi naimaci marañede comeciai jitaillacino anamo iñedimaci.

²⁵ Jusiñamui Joreño caimo illa jira, naimie cai comeciaina namatajacinodo cai jaillesa.

²⁶ Iemona abina cai biriñellesa. Abina jiai cai iedoñellesa.

6

Jiaie llofuiacino

¹ Cue amatiai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise iciñeno llono. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoia raillano, nagamiiai abi rairuillesa.

² Bu duere sefuia, bu Taife ramo faia, coninina cano. Iese omoi canoia, Cristo llogacinuaina jai inotomoi.

³ “Cuemo iese suiñeite. Dama abina sedadicue. Jamai bue isoñedicue” comecina facadimie dama abina jifueite. Naimie jamai bue isoide.

⁴ Marañeni raillano, ie finoca rafueconi iobillena, nagamiiai ie finoca rafuena abido facaja. Dama ie majia rafueconi iobilla. Dama ie majia rafuedi naimiemo duide. Jaiñiemo ite majia rafuedi naimiemo duiñede.

⁵ Naimie finoca rafuemono nagamie jeacinona finoia, dama naimie muidona.

⁶ Naga Jesucristo rafuena fueotimiedi ie llofuegamie mo mare ra fecalle.

⁷ Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feiñoite.

⁸ Ie comecimo ite marañede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faifñeite.

⁹ Jusiñamui Joreño jitaillacinona finuana sefuiruiñeno. Cai comeciai cai ocuiñoia, Jusiñamui jitailla facaiseconi ibana feiñoitica.

¹⁰ Ie jira nana cominina canocabi. Nana creyentiaina ua eo canocabi.

Facaduacino

¹¹ Ero, jerie cuiano omoimo bie facaimo cueticue.

¹² Jiaie cominimona iobillacinona omoi abiaina detatajana jitaidinodi feiñoiacana jira, omoi abiaina detatajana jitaidinodi. Cristo rafue lloticainadedi: “Cristo rafuena uiñoñedinodi niade duere caina finodinodi” raillanomo comeciaina facajamona, iese jitaidinodi.

¹³ Omoi abiaina detatajana jitaidinodi Moisés micori llogacinodo raise jaiñedinodi. Nana iena inoñedinodi. Omoiri abina iedoiacana jira, omoi abiaina detatajana jitaidinodi;

¹⁴ iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiañedicue. Naie rafue anamo jai iñedicue.

¹⁵ Abina diamona cai jeacinomona jilloñedicaí. Abina deñenanomona jaca jilloñedicaí; iadedi Jusiñamui Joreño caina comonori comuitajamona jillobidicaí.

¹⁶ Jusiñamuidi nana bie llucinodo jaidino uri itatatesa. Naimie naimacina duenail-lasa. Jusiñamui cominidi ua jaca iese illasa.

¹⁷ Bie isoide rafue illamona, cuena duere finoño. Jesucristo rafuena cue llua jira, diga icaiño cue abimo bofellañoa jai oticue.

¹⁸ Cue amatiaí, cai Nama Jesucristo omoína duenaillasa. Mai. Pablodicue.

EFESOMO ITE CRISTONA #NOT#NOMO PABLO ORETAGA RABE

Efesomo ite creyentia#mo Pablo cartana orede

¹ Efeso railla naira#mo ite creyentia#, Pablod#cue. Bie carta omoi#dine ored#cue. Ie rafue llollena, Jusi#namui jitailla jira, Jesucristo oretagam#ed#cue. Naim#emo omoi#jai jaina#i#illa jira, Jesucristona #nocana jai jaidomoi.

² Cai Moo Jusi#namui, cai Nama Jesucristo d#ga, omoi#na duenaicabillana ui#nocana mai omoi#jai. Iaima#i# omoi#comeci#ina uri itatajacabillana ui#nocana mai omoi#jai.

Cristomo jai cai jaina#i#illa jira, Jusi#namui marena itatajac#nona fei#not#ica#

³ Cristomo cai jaina#i#illa jira, Jusi#namui ca#na eo marena itatate. Ie jira cai Moo Jusi#namuimo iobillac#nona cai fecacabillasa, naim#edi Cai Nama Jesucristo ie Moo il#lanona. Cristomo cai jaina#i#illa jira, cai comeci#i marena itatajac#nona Jusi#namuimona jai fei#not#ica#.

⁴ Iena ja lloit#cue. En#rue nia i#nenia, Jusi#namui nana naim#iena #not#inona jaie fetode. Cai faca#na Cristo #co fiodaillena naim#ie ui#nuamona, ca#na jaie fetode. Naim#iemona cai marebicail#lena, jeac#nona cai fino#nellena, ca#na fetode.

⁵ Ca#na isiruillamona ca#na fetode. Naim#ie eo jitailla jira, naim#ie uruia#ina cai jaillena, ca#na fetode. Jesucristo fiodaillamona Jusi#namui uruia#ina jaid#ica#.

⁶ Naim#ie ca#na fetuamona, naim#ie ca#na duenaillana jai ui#not#ica#. Iemona naim#edi eo mareuid#m#ena j#ai jai ui#not#ica#. Ie isiruiga Jitomo cai jaina#i#illamona iena ui#not#ica#. Naim#emo buena cai fino#nenia, ca#na duenaite. Naim#iena cai iobitallena, ca#na fetode.

⁷⁻⁸ Ca#na eo duenaillanona, ie Jito fiodailla jira, Jusi#namuid#i jeac#no anamona ca#na jai jillotate. Cai jeac#no oni dotajamona, #bana j#ai o#eite.

⁹ Naim#iena cai raise #nollena, ca#na ab#na jai ui#not#ade. Jusi#namui ca#na naim#ie nana ca#na birui jilloitaiacanana jai ui#not#ade. Cai com#n#di iena jaie ui#no#ned#mac#i; iaded#i Jusi#namui jitailla d#ese Cristo fino#ca rafuedo ca#na iena jai ui#not#ade.

¹⁰ Naim#ie jitailla facaiseconi, nana ca#mo ie fino#acalle rafue fuiduanona, Cristo anamo naim#ie nagam#iena raise itataite. "Cristo cai Nama" rait#mac#i.

¹¹ Ie jira naga suide rafue suicana jaide, Jusi#namui jitaillac#nona fuidollena. Nana naim#ie jitailla d#ese, naim#ie comeci#i jitailla jira, nana iena finode. Nano facaiseconi naim#ie com#n#na cai jaillana naim#ie ui#nuanona, ca#na jaie fetode. Ie muidona naim#ie com#n#na jai jaid#ica#.

¹² Naim#ie ca#na fetuanona Cristona jaie #not#ica#. Naim#ie d#ga #co jaca cai illemo birui ocuirid#ica#. Naim#iena cai iobitallena ca#na fetode. "Naim#ie fue eo mare" cai raillena ca#na fetode.

¹³ Cristona jai birui #not#omoi. Uanaic#no rafue omoi#jai cacajamona, naie mare rafue omoi#cacajamona, omoi#jeac#nomona jai jillobidomoi. Jusi#namui Jore#no omoi#mo illano, navui Cristo lua isoi, naim#ie d#beimo omoi#illana ui#not#omoi.

¹⁴ Jusi#namui Jore#no ca#mo jaca illa jira, Jusi#namui d#ga #co cai jaca illena ui#not#ica#. Jusi#namuid#i ca#na ie com#n#na jai jaitate, naim#iena cai iobitallena. "Naim#ie fue eo mare" cai raillamona, naim#iena iobitait#ica#. Naim#emo cai jaina#i#illa jira, naim#iemona nana cai comeci#i marena itatajac#nona fei#not#ica#.

Naim#aci faca#na Pablo j#de

¹⁵ Cai Nama Jes#na omoi##nuana jai fid#d#cue. Nana j#ai#e creyentia#na omoi#isiruillana j#ai fid#d#cue.

¹⁶ Ie jirari Jusi#namuimo cue j#ia, omoi#na feita#ned#cue. Omoi#faca#na naim#emo iobillac#nona jaca fecad#cue.

17 Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jñanona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimiena raise uiñocana omoi jaillena jicanoticue. Iese omoi facaina jicanocabiticue.

18 Naimie dibeimo omoina naimie jai uaidua jira, naimie diga ico jaca omoi illemona, iena omoi raise uiñuana jitaidicue. Naimie cominina omoi jai jailla jira, naimie illanomo ico eo marena iocire iitomo. Iena omoi raise uiñuana jitaidicue.

19 Naimie uai ua eo siñonana omoi uiñuana jitaidicue. Naimiena cai ñnua muidona, ie uaido naimie caina canorede. Iena omoi raise uiñuana jitaidicue.

20 Fiodaillamona Cristona ie uaido Jusiñamui jai jillotaja jira, naimie uai siñonana uiñotomo. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate.

21 Ie jira Cristo nana Jusiñamui jaienisa afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaimaia isoide joreñuai afemo naimie ite. Birui iese ite. Ico iese nia iite.

22 Jusiñamuidi naga ra Cristo anamo ua jai itatate. Cristona nana creyentia imaci illaimana jiai ua jai itatate.

23 Cristomo daajena nana cai creyentiaidicaidi duidicai. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

2

Jusiñamui caina isiruilla jira, cai jeacinomona jai jillobidicai

1 Jusiñamuina jaie omoi nia ñnoñenia, naimiemo omoi duiñena jira, naimiemona fodaitino isidomo. Jeacino anamo omoi illa jira, naimiemona fodaitino isidomo. Jeacino finocana jaidomo. Marañedicinona finocana jaidomo.

2 Jeacina ebiruitomo Jusiñamui dibeimo iñedino rafuedo jaidomo. Taife dibeido jai jaisoidomo. Jusiñamuina oiacañedino Taife jitailla rafuedo jaisoidimaci.

3 Naimaci isoi jaie nana iticai. Cai comeciamo ite jearede jitaillacinona finodicai. Iedo jai jaisoidicai. Ie jira Jusiñamui ricaillafue anamo jaie iticai. Iese jaie nana iticai.

4-5 Jeacina jaie cai finua jira, jeacino anamo iticai. Jusiñamuina ñnoñedicai; iadedi Jusiñamui caina eo duenaillanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticai.

6 Cristona jillotaja mei, Jusiñamui ie ecimo naimiena dane itatate. Cristomo cai jai jainaiaila jira, Jusiñamui nainomo caina jiai jainaiatate.

7 Cristo finoca rafuemona caina iese jai itatate. Caina iese jai itatajamona, nana cominidi Jusiñamui caina eo duenaillana uiñoitimaci.

8 Naimie caina duenaillanona, caina jai jillotate. Jaca buena cai finuamona jillobidicai; iadedi naimie jitailla jira, naimie caina jai jillotate.

9 Cai jilloillena jaca buena cai finoñena jira, abina iedoñedicai.

10 Jesucristomo cai jainaiailamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

Cristomo jai cai duilla jira, jiaie nairaia diga birui uri iticai

11 Omoi jaie isoillana uiñotomo. Iena comecitomo. Jusiñamuina jaie uiñoñedomo. Judíuainedionona omoi jeicñena jira, cai judíuai comini isoi abiaina detatañedomo. Ie jira cai cominimona marañedomo.

12 Omoi jeacinomona Cristo omoina jilloitaiacanana naie facaiseconi uiñoñedomo. Cai judíuai nairaimo jainaiainedomo. Ie muidona Jusiñamui cai judíuai cominimo jaie lloga

rafuena uiñoñedomoi. Jusiñamuina nabaillana uiñoñedomoi. Jusiñamui diga omoi ico jaca illena uiñoñedomoi. Jusiñamuina omoi uiñoñena jira, naimiena sedañedomoi.

¹³ Naimie dibeimo jaie jaiñedomoi; iadedi Jesucristomo birui duidomoi. Jusiñamui jaie ñnoñedomoi; iadedi Cristo jai fiodailla jira, naimiena birui ñnotomoi. Naimiena omoi jai ñnuamona, cai diga naimie dibeimo jai itomoi.

¹⁴ Naimie omoi comeciai jai uri itatate. Cai comeciai jiai jai uri itatate. Cai judíuaimona omoi na jaie jearuiticai. Iese jaie iticai; iadedi Cristo muidona dani coninina nana birui nabaidicai.

¹⁵ Cristo fiodaillamona Moisés micori jaie llogacino anamo jai iñedicai. Naie llogacino dani cai judíuaimo duilla jira, Jusiñamui dibeimo jaie iñedomoi; iadedi Cristo finoca rafue muidona, birui daajena jaidicai. Omoi na jaie cai gaiñena jira, omoi na jaie nabaiñedicai; iadedi Cristomo daajena cai duilla jira, birui nabairedicai.

¹⁶ Cruzmo Cristo fiodailla jira, Jusiñamui dibeimo cai illamona, mena nairaimona caina daje nairaina jai itatate. Ie jira daje nairaina uri iticai.

¹⁷ Cristo jaie billanona, mare rafuena llote. Omoi judíuaiñedinomo, cai judíuaimo, comeciai uri illana llote. Nana caina jilloitaiacanana llote.

¹⁸ Naimie muidona Jusiñamuina jai nabairedicai. Jusiñamui Joreño caina canuamona, naimie diga birui nabairedicai.

¹⁹ Jusiñamui cominina omoi jai illa jira, nana naimiena ñnotino diga Jusiñamuimo daajena duidomoi. Caimona birui jiaie cominiñedomoi.

²⁰⁻²² Jofo isoidicai. Jofona cai finoacania, naie ibiri nano finodicai. Ie mei diga rana cai atiamona, iena niticai. Ie isoide. Diga jiaie isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena ñnoticai. Iena cai ñnuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaino jai ite.

3

Judíuaiñedinomo Pablo Cristo rafuena llofujete

¹ Jesucristo rafuena omoi judíuaiñedinomo cue llofueuilla jira, cárcelmo iticue.

² Omoi na naimie duenaillanona, omoi na llofuellena, Jusiñamui cuena oretate. Iena jai uiñotomoi.

³ Jusiñamui cuemo jaie uiñoñega rafuena jai llote. Naie rafuena janore como jai cueticue.

⁴ Bie carta omoi facaia, Cristona jaie uiñoñega rafuena cue jai uiñuana uiñoitomoi.

⁵ Jusiñamuidi cominimo iena jaie raise uiñotañede; iadedi ie Joreñodo Cristo facaina llorainina iena birui jai uiñotade.

⁶ Iena lloiticue. Judíuaiñedomoi; iadedi Jusiñamui cuemo jaie llote: “Judíuaiñedinomo Cristona ñnuanona, omoi judíuai isoi jilloitimaci” llote. Omoi facaina Cristodi fiodaite. Naimiena omoi ñnoia, omoi na ie uruiaina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui diga ico jaca iitomoi. Jusiñamui cuena iena jaie uiñotade.

⁷ Jusiñamui jitailla jira, cuena naimie duenaillanona, naimie uai cuemo illamona, naie mare rafuena llofuecabiticue.

⁸ Creyentena nia cue jaiñena facaiseconi, creyentiaina jaie cue duere finouilla jira, jamai bue isoidicue. Nana jiaie creyentiai cue baifemo faitimaci; iadedi Jusiñamui cuena duenaillanona, ie rafuena cue llollena, cuena oretate. Cristo caina eo raise marena canocabillana llofuecabiticue.

⁹ Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate.

¹⁰ Judíuainedino judíuái diga creyentiaína jaillamona, Jusiñamui jaienisaí naimie uai siñonana uiñoitimaci. “Naimie fue eo mare” raitimaci.

¹¹ Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fodaite. Iemona Jusiñamui jitailla rafuedi suide.

¹² Cristona cai inua jira, Jusiñamui diga jaciruiñoeno birui jai ñairedicaí. Naimie caina cacajana jiaí uiñoticaí.

¹³ Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoí comeciaí sefuiruisiñoeno; iadedi Cristo rafue omoimo cue lluanona cue duere sefuia, iobicana omoí jai.

Cristo caina eo isiruite

¹⁴ Cai Moo Jusiñamui caina eo canocabillanomo cue comecina facaia, naimiemo jidicue.

¹⁵ Naimiedi nana creyentiaí imaci Moona jira, naimiemo jidicue.

¹⁶ Naimiemo cue jianona, omoí facaina jidicue. Naimiemo eo ebirede siño iticino illamona, ie Joreño do naimie omoí comeciaína raise ocuiñotallena jicanoticue.

¹⁷ Cristona omoí inuamona, naimie omoí comeciaína raise namatallena jicanoticue. Jusiñamuina omoí isiruicana jaillana jidicue. Jiaie cominina omoí isiruicana jaillana jiaí jidicue.

¹⁸⁻¹⁹ Cristo caina jaca eo isiruillana, nana jiaie creyentiaí diga jaca eo isiruillana, omoí eo raise uiñuana jidicue. Naimie caina eo isiruillacino cai comeciaí facajacino baifemo uailla jira, naimie caina eo isiruisoillacinona jaca raise uiñoñedicaí; iadedi iena janore cai uiñuamona, Jusiñamui omoí comeciaína namatallena jidicue. Iese omoí facaina jicabidicue.

²⁰ Ie jira Jusiñamuimo iobillacino cai fecajasa. Ie uaido cai comeciaí marena icana jaitate. Naimiemo cai jicajacino baifemo naimie fecarede. Cai comeciaí facajacino baifemo naimie jiaí finorede.

²¹ Ie muidona naimiemo iobillacinona nana cai creyentiaídicaídi fecacabillasa. Jesucristo finoca rafue muidona iobillacinona jiaí cai fecacabillasa. Mai.

4

Jusiñamui Joreño jai caimo illa jira, cai comeci daje isoi lloide

¹ Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaína omoí jai jailla jira, Cristo jitailla isoi omoí i. Jusiñamui omoína jai fetode naimie jitailla rafuena omoí finollena.

² Ie muidona abina jaca iedoñoeno. Raíre iciriñoeno. Jiaimie ona duere finoia, ibana oñoeno; iadedi uai oñoeno naimiena jaca isirui.

³ Jusiñamui Joreño omoimo illamona, omoí comeciaí daje isoi lloicana jai. Daje isoi omoí comeciaí lloillamona, omoí jitaillamona daní uri omoí i.

⁴ Iena nia lloiticue. Cristona cai inuamona, daajena naimiemo jainaiaídicaí. Jusiñamui Joreño nana caimo illamona, daní omoí comeciaí lloicana omoí jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridicaí.

⁵ Jaca dajede Nama sedacabidicaí. Caina jilloitallena, da naimiena inoticaí. Dama naimie facaina bautizaganodicaí.

⁶ Cai Moo Jusiñamui jaca dajede. Jaca dajede Jusiñamuina nana cai creyentiaídicaídi sedadicaí. Naimie anamo nana iticaí. Naimie jitaillacinona cai finollena, caina canocabide. Caina canollena, naimie Joreño caimo jaca ite.

⁷ Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaína naimiemo inotacana jaillena, ie uai caimo fecade.

⁸ Iena cai raise uiñollena, David micori jaie ciegafuemona fueoiticaí. Naimie cueda: “Monamo abido naimie jaillanona, illaimana naimie illamona, ie cominina naimie

ifuanona, naimacimo rana fecade”. Cristona ñaite. Iemona Cristo cai maijiacino caimo illana uiñoticaí.

⁹ Biemo omoí comeciaina faca. Monamo abido naimie jailla jira, monamona eniruemo Cristo nano billana uiñoticaí.

¹⁰ Eniruemo bite; iadedi monamo abido jaide. Nana cominina birui sedade. Naimie bai femo jaca buna iñede.

¹¹ Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino lollena, ie uaina fecade. Ie rafuena nia ñnoñedinomo lollena, damieriemo ie uaina fecade. Creyentiaina ie rafuena llofuellena, damieriemo ie uaina fecade.

¹² Iese ie uaina fecade, naimie facaina raise cai maijillena, nana jiaie creyentiaina cai canollena, Ie mei Cristo rafuena daajena ñnocana jaiticaí.

¹³ Iena cai ñnuamona, Jusiñamui Jitona raise uiñocana jaiticaí. Cai comecidi daje isoi lloicana jaiticaí. Naimie jitaillacinodo raise jaiticaí. Naimie marena icana illa isoi jaiticaí.

¹⁴ Cai uruiaí facaise cai comeciái naganomo ite. Naie facaise nie isoide rafuena cai cacajia, iena raire ñnoticaí. Cristo ñnocana cai jaillamona, uruiaí isoi cai iacaiñena. Damierie naga llofueraima uaido jaidimaci. Damierie llofuerañidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena;

¹⁵ iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uiñoticaí. Cristodi cai illaimana jira, caina ocuide.

¹⁶ Naga creyente naimiemo jainaiaide. Aillosiedicaí; iadedi daajena naimiemo jainaiaidicaí. Daajena naimiemo cai jainaiailamona, naimie jitaillacino cai finoa, naimiena ñnocana jaiticaí. Iemona daní coninina isiruicana jaiticaí. Daajena naimiemo cai jainaiaila jira, cai comeciái daje isoi lloicana cai jailla.

Cristomo jai cai duilla jira, naimie rafuedo birui jaidicaí

¹⁷ Omoimo nia lloiticue. Cai Namamo cue duilla jira, biena lloiticue. Jusiñamuina ñnoñedino isoi dane omoí iñeno. Jaie naimaci isoi itomoí. Naimaci comeciáidi tainomo jai jaide isoide. Cacarefiacaiñedimaci.

¹⁸ Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui díbeimo illana jaca uiñoñedimaci. Uanaicinona uiñoiacaiñedimaci.

¹⁹ Jearede rafuena naimaci finoa, meiruiñedimaci. Naimaci comeciái oiacana rafuedo jai jaidimaci. Naga jearede isoide rafuena eo finocana jaidimaci;

²⁰ iadedi Cristo rafuena omoí cacajamona, naimiena omoí raise uiñuamona, naimaci isoi omoí illena fueoñedomoí. Cristo rafuena omoí cacajamona, jiaiena illena jai fueotomoí.

²¹ Naimiena cacajanona iena ñnotomoí. Naimiena cue llofuiamona, naimiena Cristo facaina llorañi llofuiamona, danomo omoí roracomo omoí ofia, Cristo uanaicinona cacadomoí.

²² Biena omoína llofuecabiticue. Cristona jaie nia omoí ñnoñena isoi, omoí jaiñeno. Omoí comeciáimo jaie iticinodo jaiñeno. Naga jearede rafue omoí comeciái oiacanamona faificana jaie jaidomoí. Iedo birui jaiñeno;

²³ iadedi Cristo díbeimo omoí jai illanona, naimiemo omoí comeciái facajano, Jusiñamui omoína canuamona, omoí comeciái iuailaina meidocana jai.

²⁴ Cristo rafuena birui ñnotomoí. Naimie jitaillacinodo omoí mai jai. Jusiñamuidi jeacino finocana omoí jaiñenana jitaide. Naimie marena isoi, marena icana omoí jaillana jitaide.

²⁵ Ie jira tainona lloñeno. Cristomo daajena jai jainaiaila jira, coninimo uanaicinona jaca omoí llono. Jiañona omoí jifueño.

²⁶ Marañediciónona bu finoia, naimiemo riire lloño; iadedi iese o lloia, naimiena jeare ñañeno. Jiaimie ona icia, naimiena jeare ñañeno. Naimie diga o rafue ia, naie rafue nairuido marena fino,

²⁷ Taife ramo o fai raillano. Bu diga o nicino ia, iena raire marena o finoñena, ibana oiacanitio. Naie raire o feitaña jira, Taife ona jeaciónona finotaite. Iese suiñellena, naicino raire marena fino. Iena feita. Iena dane abido linoño.

²⁸ Naimiemo ra illena, fiamona omoimona navui bu ia, creyentena naimie jai jailla jira, naimie dane fiñena; iadedi ra naimie jitaia, naimie maijiite. Ie maijiamona ie ra ollena, ucubena feñoite. Ie mei dueredinona naimie jiai canoite.

²⁹ Jeare ñañeno; iadedi nie isoide rafue ia, maredinona ñaino. Ie mei naiemona jiaie cominina canoitomoi, Jusiñamui dibeimo naimaci raise illena.

³⁰ Jusiñamuimo omoi jai jainaiaila jira, jeaciónona finoño. Jeacino omoi finoia, Jusiñamui Joreñodi sunaite. Naimiena sunaitaño. Naimie caimo illamona, cana jillotajana uiñotica. Cristo dane abido billemona, naimie dine cai jaca illena, cana jai jillotate.

³¹ Jiaie cominina icineno. Iciriño. Uaina uaitaño. Jiaie cominina jeare ñañeno. Naimacina duere jeare finoño;

³² iadedi coninina canua. Jiaie cominina duenai. Jiaimie diga omoi nicino ia, naimie finoca rafuena faitajanona, naimie diga marena ñaino. Naie rafuena dane abido linoño. Cristo finoca rafue muidona, Jusiñamui omoi jeaciónona jai faitaja isoi, jiaimie diga omoi rafue ia, naifueno omoi feita.

5

Jusiñamui cominina jai cai illamona, naimie jitaillacinona fñoitica

¹ Jusiñamui isiruiga uruiadomoi. Naimie maredinona finua isoi, omoi fino.

² Cristo cana isiruilla isoi, coninina isiruicana omoi jai. Naimie jitailla jira, cana isiruillamona, cai facaina naimie fodaite. Cai jeacino oni dotallena naimiedi fodaite. Naimie iese fodailla jira, Jusiñamuina eo iobitade.

³ Jusiñamui cominidomoi. Omoi añede riño diga iño. Omoi iniñede ima diga iño. Rana nicidoño. Jearede rafue finuamo omoi comeciaina facaño.

⁴ Jearede rafuedo jaiño. Jamai ebena ñañeno. Meirediciónona ñaicana jaiño. Naie isoide rafuedo creyentedi jaiña; iadedi Jusiñamuimo iobillacinona fecacana omoi jai.

⁵ Ie añede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede ima diga icabitñaiñodi Cristo ie cominina sedajanomo jai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi.

⁶ “Creyente naie isoide rafuena finorede” bu lloia, naimie omoina jifueiacade. Naimie iese lluaña ñño. Jusiñamui naie jeaciónona finocana jaidinona duere finoite.

⁷ Ie jira naimaci jearede finoca rafuedo jaiño. Naimacina nabaiño.

⁸ Jusiñamuina jaiie omoi uiñoña jira, jitiredinomo itomoi isoidomoi; iadedi cai Namamo omoi duillamona, uanaicinona ñnocana omoi jai.

⁹ Jusiñamuina omoi jai uiñoia, jeaciónona omoi fañonocaia, Jusiñamui jitaillacinona finocana jaitomoi. Uanaicinona llocana jaitomoi.

¹⁰ Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai.

¹¹ Jitiredinomo nia itino finoca rafuedo omoi jaiño. Naimaci finoca rafuemono maredinodi jaca comiñede. Naimacimo: “Marañede” lloño.

¹² Iena cue meidailla jira, naimaci jearede bainino finoca rafuena ñaicaiñedicue.

¹³ Maredinona omoi jaca finuamona, jiaie comini naimaci finoca rafue eo marañenana raise uiñotimaci.

¹⁴ Cai ofia, naiena rocabiticaí:

Mai casi. Iniñeno.

Jai fioidaitino isoidomoi;

iadedi omoi comeciaina Cristo jai lligaiñoite.

¹⁵ Ie jirari omoi marena illena, abina rairuicana omoi jai. Jusiñamuina ñinoñedino ebena jaicabidimaci. Naimaci isoi jaiñeno.

¹⁶ Diga maraiñede rafue birui comuicabilla jira, cominina Cristo ñibeimo raise omoi itatajallena, nagarui Cristo jitaillacinona finocana omoi jai.

¹⁷ Ie jira ebe isoi jaiñeno; iadedi Cristo jitaillacinona uiñocana omoi jai.

¹⁸ Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jai iitomoi.

¹⁹ Danomo omoi ofia, nana omoi comeciaimona diga isoide ruana iocire ro-rona. Omoi ruamona jiaie creyentiaí comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitaitomoi.

²⁰ Cai Nama Jesucristomo omoi duillamona, ñie isoide rafue omoimo ia, cai Moo Jusiñamuimo iobillacinona jaca feca.

Cristomo jai cai duilla jira, cai comini diga marena iacadicaí

²¹ Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi coninina nagamiaina cano.

²²⁻²³ Inirediñaiñuai, omoimo rafuena lloiacadicue. Cai Nama Cristomo omoi jainaiaila jira, naimie jitailla jira, omoi iniñiaí anamo raise omoi i. Naimaci uaina raise ñino. Cristo nana creyentiaí afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiaí imaci jeacinomona jillotajamona, naimie anamo itimaci.

²⁴ Cristo anamo nana creyentiaí illa isoi, naiñaiñuai iniñiaí uaina jaca ñnua.

²⁵ Airedino, omoimo jai lloiticue. Nana creyentiaína Cristo isiruilla isoi, omoi ainiaína isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaína omoi isirui.

²⁶ Nana creyentiaí marena illena naimie fiodaite. Jusiñamui jitailla isoi, caina marebi-caitate. Cristo fiodailla jira, Cristo jai lloga rafuena cai ñnuamona, cai jeacinomona jai jillobidicaí.

²⁷ Fiodaite, nana cai creyentiaí comeciái marena illena. Cai comeciái jeaninana jitaide. Cristo abido bille facaisemo, Jusiñamui jitailla isoi cai marenana jitaide.

²⁸ Naimie abi naimie isiruilla isoi, naga ini ie aina isiruilla. Iaimaiaí daajena jira, ie aina isiruitimiedi ie abina jai isiruite.

²⁹ Jaca bu ie abina enoiñede; iadedi ie abina sedade.

³⁰ Naimiemo nana cai creyentiaí duilla jira, Cristo caina isiruillamona, caina sedade. Ie isoi nagamie ie aina isiruilla.

³¹ Bie jaie lloga uaimona iena uiñoticaí. Moisés micori Jusiñamui lluaña jaie cuega: “Ie aina ollena, ñima ie moona, ie ei diga fañonocaite. Iemei dajena iitiaímaiaí”.

³² Naie llofuiacinomona jai rafuena fueoiticaí. Cristona ñaiticue. Creyentiaína ñaiticue. Naimiemo cai duillamona, daajena iticaí.

³³ Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno ñnua.

6

¹ Uruiaí, omoimo rafuena lloiacadicue. Cai Nama jitailla jira, omoi eiñiaí uaina ñino. Omoi mootiaí uaina jai ñino. Jusiñamuimona marenana jira, iaimaiaí uaina ñino.

2-3 Moisés micorí Jusiñamui lloga uaina jaie cuega: “O moo uai ñno. O ei uai ñno. Marena o illena, raire o fioldañellena, iaímaiaína o isiruillamona, iaímaiaí uaina ñno” cuega. Jusiñamui díga lletarafuena llofe; iadedí bie nanoca rafuena llofe.

4 Mootíai, omoímo lloiticue. Omoí uruíaina jamái ícñeno; iadedí naimacína caí Namana naimací uíñollena llofue. Naimací ñnoiacaíñenia, abína naimací uíñollena, naimacína isiruillamona, naimacína duere fino.

5 Patrón anamo itino, omoímo lloiticue. Omoí patrones ocuica uaina ñno. Omoí maijiana naimací ocuía, naimacína iobitallena, jacíruioicaída raise maijí. Omoí comeciaímona naimací jitailla rana maijí. Cristo iedena, naimací ocuica uaina ñno.

6 Omoímo naimací eruaiá, naimacína iobitallena, marena maijí; iadedí omoímo naimací eruaiñenia, naimacína iobitallena, nia marena maijí. Naimacína iobitallena maijí; iadedí Cristomo omoí duilla jira, Jusiñamui jitailla jira, omoí comeciaí maijí raillamona, marena omoí maijí.

7 Patrón facaina maijiaínomo daní comecína facañeno; iadedí iocire maijí, caí Nama facaina omoí maijídómoídena.

8 Biena uíñoticaí: Marena bu maijía, caí Nama Cristomona íbana íco feiñoite. Patrón anamo itino iena feiñoitimací. Patrón anamo íñedíno iena jiaí feiñoitimací.

9 Patrones, omoímo lloiticue. Omoí Nama Cristo monamona omoímo eruaiilla jira, Cristo monamona naimacímomo jiaí eruaiilla jira, omoí anamo itínona marena fino. Naimacína riire ocuñeno. Naimacína jeare finoñeno. Cristo nana naimie comínímo dajé isoi comecína lloide. Ie jira omoí anamo itínona marena fino.

Cristomo jai caí duilla jira, naimie caí comeciaína ocuñotaite

10 Ie muidona nia lloiticue. Caí Namamo omoí duilla jira, naimiedí omoí canocabillamona, omoí comeciaína ocuñotacana omoí jai.

11-12 Ero, Taife caína ramo jífueoicaída faíte. Caína anafefitaiacade. Naimie isoidíno caína jiaí anafefitaiacadímací. Naimacídí aillosie. Naimací anamo nana Jusiñamuína ñnoñedíno jai itímací. Jitiredínomo naimací illanona, Jusiñamui díbeímo íñedímací. Beno eníruemo itímací. Jusiñamui illanomo duiñedímací. Comínina ñañedícue. Taífena, Janabana, Dofína, jananiána, Dusisiñona ñañíticue. Naimací isoide joreñuaina ñañíticue. Caí díbeímo íñedímací. Naimacímoma abína omoí rairuí.

13 Jobaíme illa facaiseconí, soldaduaí imací ra díga imací abiaína riidotímací. Cinturón jítadímací. Lloemamona finoca ra jogobemo jítadímací. Zapatona jítadímací. Uico riidollena, naimací uico riidua rana llinotímací. Ífogi icona jítadímací. Lloebína llinotímací. Ie isoide.

14 Cristomo omoí comeciaí facajanona, uanaicínona jaca llono. Jusiñamui jitailla isoi, marecínona finocana omoí jai.

15 Cristo rafuemona omoí comeciaí urí itatajamona, iena meiruíñeno llocana uíño.

16 Taífemona nana jearede rafuedí comuíde. Naimiedí ramo faíacana jai jaide. Cristona omoí ñnuamona, Taife ramo faíacínona jamái.

17 Jusiñamui caína jai jilloitajana jai uíñotómoí. Iena omoí uíñuamona, Taife ramo faíacínona ñnoñeno. Taífena anafenollena, Jusiñamui Joreñodo Jusiñamui uaimona fueo.

18 Jusiñamui Joreño omoína canuamona, Jusiñamui díga ñañicabí. Taife ramo omoímo faía, iena omoí ñnoñellena, Jusiñamui omoína canoite. Iese abína omoí rairuí, Taífena anafefitaitómoí. Taife ramo faíacino naimací ñnoñellena, nana jiaíe creyentiaí facaina jiaí jñicabí.

19 Cue facaina jiaí omoí jñí. Marefodo nana Cristo íe rafuena cue lluaña omoí jñí. Cristo nana comínina jilloitaiacanana nia lloiacadícue.

20 Naíe rafue cue llollena, Cristo cuena oretate. Naíe rafuena cue llua muidona, cárcelmo itícue. Cue jitailla díese iena marefodo cue lluaña maí omoí jñí.

²¹⁻²² Tíquico omoi dine oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai ocuiñoitomoi.

²³ Cai Moo Jusiñamui, cai Nama Jesucristo diga, omoina uri itatajamona, Cristona jai omoi ñnuamona, coniniri uri icana jaillana jitaidicue. Iaimaiai omoina isiruillamona, iaimaiaina omoi ñnuamona, nana jiaie creyentiaina isiruicana omoi jai.

²⁴ Cai Nama Jesucristona omoi eo isiruilla jira, Jusiñamuidi omoina duenaillasa. Mai. Pablodice.

FILIPOMO ITE CRISTONA HNOTINOMO PABLO ORETAGA RABE

Uaiduacino

¹⁻² Filipomo ite creyentiai, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiai illaicominimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaia omoina uri jai itatate. Iena omoi uiñocana mai omoi jai.

Jusiñamuimo iobillacino fecade

³ Naga icaiño omoina cue comecia, Cristo rafuedo omoi jailla jira, Jusiñamuimo iobillacinona fecadicue.

⁴ Naga icaiño Jusiñamui diga cue ñaia, omoi facaina caimare jidicue,

⁵ Jesucristo rafuena cue llua cuena omoi canua jira. Nano bie rafuena omoi cacajamona, cuena canodomo. Cuena nia canodomo.

⁶ Jusiñamuidi omoi comeciaina jaie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruimo Jusiñamui bie rafuena fuidoite. Iese fuidollemo ocuridicue.

⁷ Omoimo iese cue comecina cue facajia, omoina cue isiruilla jira, cuemona mare. Cárcelmo cue illamona, Jesucristo rafuena cue riduano, Jesucristo rafuedi uanaicino cue llua, Jusiñamui cuena canocabide. Iemona naimie cana duenaillana jai uiñotica.

⁸ Cuena omoina Cristo Jesús isiruitajamona, nana omoina isiruiticue. Jusiñamuidi uanaicinona cue llua uiñote.

⁹ Jiaie cominina eo isi-isiruicana omoi jaillena, Jusiñamuina raise omoi uiñollena, nie isoide rafue omoimo ia, abina raise omoi uiñollena, Jusiñamuimo jicabidicue.

¹⁰ Iese omoina jitaidicue. Mare rafuedo omoi jaiacanana jitaidicue. Jiaruido Cristo abido biite. Ie jira omoi comeciai jeanillena jitaidicue, Jusiñamui jitailla isoi omoi comeciai marena illena.

¹¹ Jusiñamui jitailla isoi omoi illamona, mare rafuena jaca omoi finuana jitaidicue. Jesucristona omoi hnuamona, naimie omoina iena finotarede. Iese omoi finocana omoi jia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

¹² Cue amatiai, bie rafuena omoi uiñuana jitaidicue. Cárcelmo cue illamona, diga comini Jesucristo rafuena cacadimaci.

¹³ Cai illaia jofomo itino cacadimaci. Nana bene itino jiai cacadimaci. Jesucristo rafuena cue llua jira, cárcelmo iticue. Iena jai uiñotimaci.

¹⁴ Cárcelmo iticue; ia jaciruiño Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiño marefodo birui cue isoi llotimaci. Navui jaciruitimaci.

¹⁵ Cuena uradoillamona, cue afemo iacanamona, damerie Cristo rafuena llofuetimaci. Jiaie llofueraini marecinona finuacanamona llofuetimaci.

¹⁶ Cuena naimaci isiruilla jira, llofuetimaci. Cristo rafuena cue riduamona, cárcelmo cue illana uiñotimaci.

¹⁷ Cue afemo iacacino mare comeciainona llofueñedimaci. Iemona cuena duere finoacadimaci.

¹⁸ Iese itimaci; iadedi uradoillamona naimaci llofuia, marecinona finuacanamona naimaci llofuia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue.

19 Cueri Jusiñamuimo omoi jiano, Jesucristo Joreño cuena canuano, nana cuemo ite rafuemonu jilloitucue. Iena cue uñuamona, nia iobitucue. Jesucristo Joreño ie Moo diga daje.

20 Cue finolle rafuemonu cue meiruiñellena eo jitaiducue. Jaie cue finocabilla isoi, Cristonu marefodo birui iobitaiacaducue. Cue nia fioidañenia, naimiena iobitaiacaducue. Cue fioidallemonu naimiena jiai iobitaiacaducue. Iemonu jiaie creyentiaidi Jusiñamuimo iobillacinona fecaitimaci.

21 Nia cue fioidañenia, Cristo rafuenu nia lloitucue. Mare; iadedi cue fioidaia, naimie dine cue illenu jiai eo mare.

22 Nia cue fioidañenia, diga cominimo Cristo rafuenu nia lloitucue. Ie jira nie isoide cue illanu cue comeci niese rainide.

23 Nia raise uñuñeducue. Jiaicaiño fioidaicaiñeducue. Jiaicaiño fioidiacaducue. Cue comeci Cristo dine jaiacade. Nainomou cue illenu cuemonu eo mare;

24 iadedi omoina cue canollenu, nia fioidaicaiñeducue. Cue nia fioidañenia, omoina nia canoacaducue.

25 Cue comecina jai facajano, raite: “Nia fioidañeitucue. Omoi diga nia cue illanu uñotucue”. Cristonu omoi ñnotacana omoi jaillanu jitaiducue. Omoi ñnuamona, caimare omoi illanu jiai jitaiducue.

26 Iemei omoi dine dane cue illa jira, cueri Cristomou iobillacinona eo fecaitomoi.

27 Cue fioidaia, cue fioidañenia, Cristo ie mare rafuedo omoi jai. Omoina cue cioia, omoina cue cioñenia, mare rafuenu omoi finuana fidiacaducue. Cristo rafuenu ñnocana omoi jaillanu, omoi comeciai daje isoi lloillanu, Cristo rafuenu omoi riiduana fidiacaducue.

28 Omoi dibeimo iñedinona omoi jaciruiñenana fidiacaducue. Iese omoi ia, Jusiñamuidi omoi dibeimo iñedino faifillanu uñotaite; iadedi naimiedi omoina omoi jilluanu uñotaite. Naimie diga omoi jaca illenu, omoina jai jillotate.

29 Jusiñamui Cristonu omoi ñnollenu omoina fetode; iadedi Cristori omoi duere sefuillenu omoina jiai fetode.

30 Omoi nairaimo cue nana illa faicise Cristonu ñnoñedinomona duere sefuiducue. Iena cidomoi. Cárcelmo birui cue illamona, naimacimona iese nia birui duere sefuiducue. Iena birui fididomoi. Naimacimona cue isoi birui jiai duere sefuidomoi.

2

Jiaie creyentiai diga raise omoi illacino

1 Jiaie creyentiai diga omoi marena illenu, dajerie rafuenu lloiacaducue. Cristomou omoi duilla jira, coninina omoi comeciai ocuiñotajamona, Cristo omoina isiruillanu omoi uñuamona, Jusiñamui Joreño nana omoina nabaitajamona, coninina omoi comeciai eo duenaillacino illamona,

2 cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata.

3 Jaca buena finoño, jiaimie afemo jamai omoi illenu. Abina iedumona buena finoño. Abina iedoño jiaimacimo comeciaina faca: “Naimaci cue baifemo faite”.

4 Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca.

5 Cristo Jesús illa isoi omoi illa. Ie rafuemo comecina janore facade; iadedi naimacina canollenu, jiaie cominimo ite rafuemo naimie comecina eo facade.

6 Naimiedi jaca Jusiñamui; iadedi naimiedi Jusiñamui diga danomou jaca illanu jitañede. Naimie comecina iemo facañede;

7 iadedi iena faionocaida, ie Moo ocuica rafuenu finollenu, imana naimie jaide.

8 Jamai bue isoidimienajaidede; iadedi ie Moo uaina ñnote. Ie Moo jitailla jira, fioidaite. Marañede rafue finodimie isoi, cruzmou fioidaite.

⁹ Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade.

¹⁰ Jesúsna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisaí naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiaí fecaitimaci.

¹¹ Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

Maraiñedino comeciaina lligaiñotomoi

¹² Cue isiruiga amatiaidomoi. Ie Moona Jesucristo ñnua jira, cue llua nia ñnocana omoi jai. Jaie omoi diga cue ia, Cristo rafuena raise ñnotomoi. Birui omoi diga iñedicue; iadedi Jusiñamuina omoi ñnua jira, naimie jitailla rafuena jaciruoicaida, finocana omoi jai.

¹³ Ie jitailla rafuena omoi finollena, Jusiñamui omoi comeciaina birui marena itatate. Naimie omoina iena finotaiafade. Naimie mare jitaillacinomona, omoina iena finotaite.

¹⁴ Nana omoi finolle rafuemo abi jafueoicaíñeno fino. Uai uaitañeno fino,

¹⁵ jiaie comini omoiri ñai raillanona, Jusiñamui uruiaina omoi illa jira, omoi comeciái jeanidemonona marena omoi i. Maraiñede comini motomo itomoi. Naimaci comeciái jearede. Naimaci comeciaina lligaiñotomoi, naimacimo ite jeacinona uiñotallena.

¹⁶ Jesucristo rafuena llocana uitomoi. Iena naimaci ñnuamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: “Tainona jaie lloticue” cue raillano, Jesucristo rafuena llocana nia omoi jai.

¹⁷ Jusiñamuina omoi ñnua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiaí jitaia, iobiticue. Omoi diga jiaí caimataiticue.

¹⁸ Ie muidona caimare itomoi. Cue diga caimataitomoi.

Pablo Timoteona orede

¹⁹ Cai Nama Jesús jitaia, omoi dine Timoteona raire oretaiacadícue. Cue dine abido naimie bia, omoi rafuena cue fidiano jiaí iobiticue.

²⁰ Cue dine jaino naimie isoi iñede. Dama naimie omoi ite rafuemo comeciaina facade.

²¹ Jaino dani naimacimo ite rafuemo comeciaina facadimaci. Jesucristo rafuemo comeciaina facañedimaci.

²² Timoteodi mareuidimienona uiñotomoi. Cue jito isoide diga, Cristo rafuena lloticoco.

²³ Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadícue.

²⁴ Cárcelmona cue jino jaillena cai Nama jitaia, omoi dine jiaí raire jaiacadícue.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimiena oredomoi, cuena canollena. Naimiena omoi dine abido oretaiacadícue,

²⁶ omoi dine naimie illemo naimie comeciaina facaja jira. Naimie navui duillana omoi fidia jira, naimie uri iñede.

²⁷ Navui niadedi fiodaiaacanamonona jillode, Jusiñamui naimiena duenailla jira. Naimie fiodaillamona, eo cue duere sefuiñellena, Jusiñamui cuena jiaí duenaite.

²⁸ Ie jira Epafroditona eo raire oretaiacadícue, naimiena omoi ciuanona omoi iobil-lena. Iemei jiaí uri iiticue.

²⁹ Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita.

³⁰ Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

3

Moisés micorí llogacínuaído jaidínomona abina rairui

¹ Cue amatiai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite.

² Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciai nia raise finoñedimaci.

³ Cai abiaina detatajamona, cai comeciai raise finobiñede. Cai comeciai raise finuamona, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiaina detatañedicai.

⁴ Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoiñedicue.

⁵ Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micorí. Benjamín isie imiedicue. Cue cominidi judíuai imacina jira, cue uruenamona judíuai uaido ñaiticue. Fariseo cue imiena jira, Moisés micorí llogacínuaído fainonocaiñeno iedo eo jaidicue.

⁶ Iena eo cue jitailla jira, Cristona ñnotinona duere finodicue. Nana Moisés micorí llogacínuaído eo raise jaidicue. Iena raise finodicue.

⁷ Iese jaie iticue. Cue comeci iena: “Mare” raite; iadedi Cristona jai cue ñnua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue.

⁸ Dane lloticue: Cue Nama Cristo Jesúsna cue uiñoiacana jira, jaie rafue cuemona ieñedicino. Naimiena cue uiñuacínodi nana jaie rafue baifemo faite. Jeacuai isoi jai marañena jira, naimie muidona cue jaie illacínona jai sofecaidicue. Iena sofeticue, Cristo díbeimo raise cue illena,

⁹ naimiemo raise cue duillena. Moisés micorí llogacínuaído cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate.

¹⁰ Cristona raise uiñoiacadicue. Naimie fiodaite; ia iemona jillode. Naiemona cue comeci marena illena, naimiena jillotate uaina uiñoiacadicue. Naimie rafuena cue llamona, naimie isoi duere sefuiticue. Iemona ñbai fiodaiticue.

¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiena uiñocana jaiacadicue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote.

¹³ Cue amatiai, iena nia iñedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue.

¹⁴ Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena.

¹⁵ Caimona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite;

¹⁶ iadedi caimo jai ite uiñuacínodo mai cai jailli.

Pablo illa isoi cai illa

¹⁷ Cue amatiai, Cristona cue ñnua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena.

¹⁸ Jaie omoimo lloudicue. Cue sunaillamona dane lloiticue. Ailluena comini Cristo fiodailla rafuena birui jitañedicaci.

¹⁹ Ja muidomo faifitimaci. Naimaci Jusiñamuidi imaci guille, daní guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena.

²⁰ Monamo ite Jusiñamuimo cai jainaiaila jira, monamona cai Jilloitaraíma abido dane billemo ocuiridicai. Cai Nama Jesucristodi cai Jilloitaraíma.

²¹ Naimie bia, cai fiódaille abina meidoite, naimie ebirede abi isoi cai illena. Nana ra naimie anamo itatate uaido caína iese meidoite.

4

¹ Ie jira Cristo rafuena inocana nia omoi jai. Cue amatai, omoína isiruiticue. Omoína cioacadicue. Omoiri iobidicue. Cue llumona Cristona jaie inotomoi. Ie rafuedo omoi jailla jira, iobidicue.

² Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo iaiñuai duilla jira, iaiñuai comeci daje isoi lloillana jitaídicue. Coniño diga icirillana jitaíñedicue.

³ Cue mare nabai, omo jicanoticue, iaiñuaina canollena, coniño diga iaiñuai dane marena ñailena. Cristo rafuena cue diga llotíaiñuai. Clemente diga llotíaiñuai. Cue diga llofueuidino diga llotíaiñuai. Monamo ite rabenicomo nana naimaci mameciai jai cueda. Jusiñamui diga monamo jaca iite comini mameciai diese cueda.

Iobillacino, uri illacino diga

⁴ Cai Namamo omoi duilla jira, jaca iobi. Dane lloiticue: Iobi.

⁵ Omoi riinana nana comini uiñuana jitaídicue. Cai Nama dane abido billirui iairei ite.

⁶ Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jia, naimiemo iobillacinona jiai feca.

⁷ Iemei Jusiñamui omoi comeciaina uri itataite. Omoi comeciai facajacino baifemo omoína uri itataite. Cristo Jesúsna omoi inuano, omoi comeciaina eenoite.

⁸ Cue amatai, ie muidomo daje rafuena nia lloiticue. Uanaicino comeciaina faca. Inogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca.

⁹ Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi cúa rafuedo omoi jai. Iemei omoi comeciaina uri itatajanona, Jusiñamui omoi diga iite.

Filipomo ite comini Pablona eo canodimaci

¹⁰ Cai Namari iobidicue, diga irui illamona dane cuena omoi comecia jira.

¹¹ Cuemo comeciaina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue.

¹² Duere cue illana uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue.

¹³ Nie isoide rafue cuemo ia, Cristo cue comecina ocuiñotaja jira, naga rafuena finocana jaiticue.

¹⁴ Cue duere sefuillamo cuena omoi duenailamona, cuena omoi canua jira, cuemona mare.

¹⁵ Omoimo Cristo rafuena nano cue llumona, cuena canodomoi. Macedoniamona cue jailla mei, jiaie creyentiai cuena canoñedicue. Dani omoi cuena canodomoi. Iena uiñotomoi.

¹⁶ Tesalónicamo nia cue ia, diga icaiño ucube cuemo oredomoi;

¹⁷ iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue.

¹⁸ Nana cue jitaile rana jai feiñoticue. Ailluena cuemo ite. Epafroditomona cuemo omoi oretaga rana feiñoticue. Jusiñamuimo fecadomoi isoide. Jusiñamui dibeimo cue maijia jira, mare rana finodomo. Ie jira Jusiñamui iena gaide, caimare soride rana cai gaia isoi. Naimie iena jiai feiñote.

¹⁹ Naimiemo ailluena ite ramona cue Jusiñamui nana omoi jitaile rana fecaite, Cristo Jesúmo cai duilla jira.

²⁰ Cai Moo Jusiñamuimo iobillacino jaca cai fecacabillasa. Iena jitaidicue.

Fuiduacino

²¹ Cristo Jesús mamecido cue facaina nana creyentiaimo cue uaina lloño. Cue diga amatiai imaci uaina jiai oredimaci.

²² Nana benomo ite creyentiai imaci uaina oredimaci. Cai illaima César jofomo maijidino imaci uaina ua oredimaci.

²³ Cai Nama Jesucristo omoi comeciaina jaca caimare itatajana jitaidicue. Mai. Pablodicue.

COLOSAMO ITE CRISTONA HNOTINOMO PABLO ORETAGA RABE

Colosamo ite creyentiam Pablo carta orede

¹⁻² Colosas railla nairaimo ite creyentiai, Pablodicue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue lollena, Jesucristo oretagamiedicue. Naimiemo jai duidomoi. Naimiena raise inocana jaidomoi.

Naimaci facaina Pablo jide

³ Cai Nama Jesucristo Moodi Jusiñamui. Omoi facaina Jusiñamuimo coco jiaa, naimiemo iobillacinona jaca fecadicoco.

⁴ Jesucristona nia omoi inuana coco fidia jira, nana creyentiana nia omoi isiruillana coco fidia jira, iobillacinona jaca fecadicoco.

⁵ Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino.

⁶ Diga illanomo, diga comini iena jiai jai cacadimaci. Iena inuamona Cristo dibeimo naimaci comeciai jai meidoga. Iena inuamona marecinodo jai jaidimaci. Ie isoidomoi. Jusiñamui omoina duenaillana jai uñotomoi. Uanaicinona omoi raise uñuamona, iedo jaidomoi. Ie marecinona inocana jaidomoi.

⁷ Epafra lluamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana maijide. Omoi motomo cai inena jira, Cristo dibeimo cai facaina naimie raise maijuide.

⁸ Naimiemono omoimo ite rafuena fididicoco. Jusiñamui Joreño omoina canuamona, jiaie creyentiana omoi isiruillana fididicoco.

⁹ Ie jirari omoi facaina jaca jidicoco. Omoi rafuena coco fidiamona, Jusiñamuimo omoi finolle rafuena omoi eo raise uñollena jidicoco. Nana naimiemo ite abi uñuacinona omoi eo raise uñuana jitaidicoco.

¹⁰ Cai Nama: "Mare" omoina raillana jitaidicoco. Naga mare rafue omoi inocana jaillana jitaidicoco. Jusiñamuina raise omoi uñocana jaillana jitaidicoco.

¹¹ Nie isoide ramo omoi jiria, nana naimie siño ebirede uaido naimiedi omoi comeciaina ocuiñotajana jitaidicoco. Iocire omoi illana jitaidicoco.

¹² Caina ie cominina naimie jai itataja jira, nana ie comini diga naimie illanomo ico jaca iiticai. Ie muidona naimiemo iobillacinona omoi fecacabillasa.

¹³ Jeacino anamo navui cai illa jira, jitreñonomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate.

¹⁴ Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai feitete. Naiena ico abido linoñeite.

Cristo muidona Jusiñamui ricailifue anamo inedicai

¹⁵ Jusiñamuina cionidicai; iadedi Cristomona naimiena uñoticai. Jaca bue nia inenia, Crsito nano jaca ite.

¹⁶ Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioñena rana finode. Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode.

¹⁷ Nano dofoconi Cristo jaca ite. Naimie uaido naga ra marena icana jaide.

¹⁸ Naimiedi nana creyentiai imaci illaïma. Fiodaitinomona naimie nano jillodimiena jira, cai fiodaia, ico jiai jilloiticaï. Naimiedi naga ra baifemo faite. Naimiedi nana comini baifemo jiai faite.

¹⁹ Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite.

²⁰ Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo iñedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai ñnoia, Jusiñamui ricailifue anamo jai iñedicaï.

²¹ Jusiñamui dibeimo navui iñedomoi. Naimiena nabaillana jitaiñedomoi. Omoi comeciïmona naimiena enoidomoi. Maraiñedinona finouidomoi;

²² iadedi cruzmo naimie abi illanona, nainomo Cristo fiodailla jira, naimiedi naimie dibeimo omoïna itatate. Jusiñamuimona mareuidinona omoi illena, omoïmo nicino iñellena, Jusiñamui dine ico omoi ia, naimie dibeimo omoïna jai itatate.

²³ Naimiena raise ñnocana omoi jaia, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

²⁴ Omoïmo Cristo rafue cue llua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue.

²⁵ Jusiñamui cuena oretaja jira, naimie rafuena ailluena cominimo eo raise cue llollena, omoi creyentiai facaina llofueticue.

²⁶ Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci.

²⁷ Jusiñamui naimacina iena uiñotade. Naie rafuedi eo ebirede. Judíuuiñedinodomoi; iadedi bie rafue omoïmo jai duide. Omoi comeciïmo Cristo illana jai uiñoticaï. Ie jira naimie ebirede illanomo ico omoi jaca illemo ocuridomoi.

²⁸ Cristo rafuena llofueticaï. Nana cominimo Cristo dibeimo naimaci iacanana lloticaï. Cristona naimaci eo raise ñnollena, Cristo isoi naimaci marebicaillena, naimaci abi uiñuana lloticaï.

²⁹ Ie jira bie rafuena llofuecabiticue. Nana Cristo cuemo iga uaido eo llofuecabiticue.

2

¹ Omoïmo eo comecina facadicue. Iena omoi uiñuana jitaïdicue. Laodicea railla nairaïmo jiai eo comecina facadicue. Diga comini cuena nia cioiñedimaci. Naimaciïmo jiai eo comecina facadicue.

² Omoi comeciïna ocuiñotallena, iese omoïmo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoïmo comecina facadicue. Naie rafuedi Cristona llote.

³ Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide.

⁴ Naimaci ñaiïmona omoïna bu jifuei raillanona, biena omoïmo lloticue.

⁵ Omoi dine iñedicue; iadedi cue comecidi omoi dine ite. Omoïmo cue comecina facadicue. Danomo omoi marena illa jira, Cristona omoi raise ñnocana omoi jailla jira, iobidicue.

⁶ Cai Nama Jesucristona omoi ñnuamona, naimie lloga rafue finocana omoi jai.

⁷ Naimie dibeimo raise icana omoi jai. Naimiena ñnocana omoi jai. Omoi lloraini omoïna llofuia isoi, naimiena ñnocana omoi jai. Jusiñamuimo iobillacino eo fecacana omoi jai.

Cristona cai ñnuano, cai illa rafue

⁸ Jiaie comini naimaci jamai comeciai facajacinomona omoi jifuei raillanona, abina omoi rairui. Uanañedicinomo comeciaina jamai facadimaci. Naimaci einamacimona iena otimaci. Naie rafuedo omoi jaillana jitaidimaci. Cristo rafuedo omoi jaillana jitañedicimaci.

⁹ Ero, Cristomo nana Jusiñamui uai ite. Eniruemo billanona, Cristo imana jaide. Naimiemona Jusiñamuina uiñoticaí.

¹⁰ Cristomo omoi jainailla jira, naimiemona nana omoi jitaillacinona oitomoí. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite.

¹¹ Cristomo omoi duilla jira, omoi comeciaino ite jeacino anamona omoína naimie jillotate. Omoi abiaína detatajamona naimie iena finoñede; iadedi omoi comeciaino ite jearede iuai meidumona jillobidomoí. Naimie iena finode.

¹² Naimie ðibeimo cai illamona, jai bautizagacai. Naimie ðibeimo cai illamona, cai jeacino anamo jai iñedicaí. Cristo fodaite; iadedi fodaillamona Jusiñamui naimiena jillotate. Jusiñamuina omoi inua jira, jeacino anamo jai iñedomoí. Naie anamona Jusiñamui omoína jiai jillotate.

¹³ Jeacino anamo jaie omoi illamona, naimiemona fiodaitino isoidomoí. Omoi marañede jitaillacino anamo jaie itomoí. Cristomo omoi jai duillamona, omoi jeacinona oni dotajamona, naie anamona Jusiñamui omoína jai jillotate. Cristo ðibeimo omoína itatate.

¹⁴ Moisés micori jaie llogacinona jaie cai inoñena jira, Jusiñamui ricailifue anamo iticaí; iadedi cruzmo Cristo fodailla jira, naie llogacino anamo jai iñedicaí. Ie muidona Jusiñamui caimo ibana oñeite.

¹⁵ Cruzmo Cristo fodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uiñoticaí.

Cristomo ite rafuedo omoi jai

¹⁶ Cristo rafuedo omoi jailla jira, omoi guiga rana bu fimaia, naimaci ñaíamo cacarefiño. Judíuai einamací rafue ðine omoi jaiñenia: “Omoi mareñedomoí” bu raia, naimaci ñaíamo cacarefiño.

¹⁷ Naie isoide rafuedo jaie jaidicaí; iadedi iedo birui jaiñedicaí. Cristo rafuedo birui jaidicaí.

¹⁸ Dajerie llofueraíni jiaie rafuedo jaidimaci. “Abina iedoño” raitimaci. “Jusiñamui jaienisaina seda” raitimaci. Nicairillacinodo jaidimaci. Naimaci isoí omoi jaiñenia: “Marañedomoí” omoína naimaci raia, naimaci ñaíamo cacarefiño. Naimaci illa isoí iño. Naimaci llucacino anamo iño. Naimaci llucacino omoi jaia, omoi jitaillanomo Cristo ðine riñeítomoí. Naimaci comeciai jearena jira, jamai buena uiñoñenano abina iedotimaci.

¹⁹ Cristo rafuedo jaiñedicimaci. Cristomo cai duilla jira, naimie caína ocuicabide. Naimiemona cai illena Jusiñamui jitailla isoí, fueoticaí. Jusiñamui jitailla isoí, naimie ðibeimo cai raise illena, naimiena cai raise inollena, naimiemona fueoticaí. Cristomo cai duilla jira, ðani coninina nabaidicaí.

²⁰ Cristo fodaillamona, jiaie rafue anamo jai iñedicaí. Naimiena inoñedino rafue anamo jai iñedicaí; iadedi naie rafuedo nia jaidomoí. Damerie llofueraíndi ðiga rana fimaidimaci.

²¹ “Biana jetaño. Biana guiño” raitimaci.

²² Ero, naie fimaica guille ra ite, cai guillena. Iena cai guilla mei, jai buena iñede. Naimaci fimaiduacino cominimona otimaci. Jusiñamuimona oñedicimaci.

²³ Naie fimaiduacino ði eo abi uiñuacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicaí. Cai abina isiruiñedicaí” raitimaci; iadedi naie

isoide lluacínodo bu jaia, naimie comecimo ite jeacínomona jilloñede. Naimiedi jeacino finocana nia jaide.

3

¹ Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite.

² Cristomo ite rafuemo omoi comeciaina facacana jai. Bene ite marañede rafuemo omoi comeciaina facañeno.

³ Bene ite marañede rafue anamo jai iñedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoina naimie canoite.

⁴ Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

Omoi comeciaino ite jeacínona fainonocai

⁵ Cristomo omoi jai duilla jira, omoi comeciaino ite jeacínona fainonocai. Omoi añede riño diga iñeno. Omoi iniñede iima diga iñeno. Jeare finoca rafuemo omoi comeciaina facañeno. Omoi marañede jitaillacínodo omoi jaiñeno. Rana nicidoño. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi.

⁶ Naie isoidicínona comini finua jira, naimiena naimaci iñoña jira, Jusiñamuidi naimacina duere finoite.

⁷ Naie isoide rafuedo jaie jaidomoi.

⁸ Nana bie isoide rafuedo jaiñeno. Icirriño. Omoi ecimo itinona jeare finoño. Jiaie cominina jeare ñaiño. Jearede rafuena ñaiño.

⁹ Tainona lloño. Omoi comeciaino ite jeacino anamo jaie itomoi. Naicino anamo omoi jai iñena jira, naicínodo jaiñeno;

¹⁰ iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate.

¹¹ Cristo rafuedo birui omoi jailla jira, Jusiñamuimona nana creyentiaidomoidi daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detatañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo iñedinodomoi. Cominimona iese itomoi; iadedi Jusiñamuimona daje isoidomoi. Cristo dibeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite.

¹² Jusiñamui omoina fetode. Omoi comeciaina maretate. Omoina isiruite. Ie jira jiaie cominina duenai. Jiaie cominina cano. Abi iedoño. Abi biriño. Icirriño.

¹³ Dani omoi ibana oño; iadedi bu diga omoi icirillafue ia, naiena raise fino. Iena raise finuanona, abido ietaño. Iena feita. Ie mei naimie diga marena ñaino. Ero, cai Nama omoi jeacínona oni dotade. Ie muidona omoi ecimo itino diga icirillafue omoi finoa, iena feita.

¹⁴ Coninina omoi isiruicana jai. Isiruillacino nana jiaie lluacino baifemo faite. Coninina omoi isiruia, danomo marena iitomoi.

¹⁵ Jusiñamui omoina fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciaino uri illamona, Jusiñamuimo iobillacínona feca.

¹⁶ Cristo rafuena omoi eo iñuana jitaídícue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacínona fecajanona, nana omoi comeciainona iocire rono. David micori cuela

salmos omoi roia, Jusiñamui Joreño omoina birui cuetataga ruana omoi roia, omoi comeciainona iocire rono.

¹⁷ Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jia feca.

Coniniri creyentia illa rafue

¹⁸ Inirediñaiñuai, omoimo rafuena lloiacadicue. Cai Namamo omoi jainaiilla jira, naimie jitailla jira, omoi iniñiai anamo raise omoi i. Naimaci uaina raise ñno.

¹⁹ Airedino, omoimo jia lloiacadicue. Omoi ainaiina isirui. Naiñaiñuai diga iciricabiñeno. Naiñaiñuaimo riire lloñeno.

²⁰ Uruiai, omoimo rafuena lloiacadicue. Nana omoi mootiai uaina ñno. Nana omoi eiñiai uaina ñno. Iena omoi ñnoia, cai Nama eo iobite.

²¹ Mootiai, omoi uruiaina jamai iciñeno. Naimacina omoi jamai icia, comecina facaitimaci: “¿Niese cai mootiai uaina raise ñnoitica? Iena eo sefuiruitica?”. Ie muidona omoi uaina raise ñnoñeitimaci.

²² Patrones anamo itino, nana omoi patrones ocuica uaina ñno. Omoimo naimaci eruaiñenia, omoi patrones facaina raise maiji. Cai Namana omoi ñnua jira, cai Namana raise omoi iobitaiacana jira, omoi patrones facaina raise maiji.

²³ Buena omoi maijia, omoi comeciainona maiji. Dani comini facaina maijiñedomoi; iadedi cai Nama facaina maijidomoi. Ie jira raise maiji.

²⁴ Naimie jai lua isoi, cai Namamona ibana ico feiñoitomoi. Cai Nama Cristo facaina omoi maijidomoi;

²⁵ iadedi Jusiñamui raise maijiñedinona duere finoite. Jusiñamuimona naga maijidimie ie maijia diese feiñoite.

4

¹ Patrones, omoimo lloiticue. Naimaci omoi anamo illa jira, omoi diga maijedinona raise iba. Naimacina jifueñeno. Omoi Nama monamo illamona, omoimo eruaide. Naimie anamo omoi illa jira, omoi anamo itinona marena raise fino.

² Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca.

³ Cristo rafuena llocana cue jailla jira, cárcelmo birui iticue; iadedi naie rafue nia lloiacadicue. Jusiñamui nana comini Cristo dibeimo jai jitaillana lloiacadicue. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadicue.

⁴ Naimaci iena raise cacaillena, naie rafuena raise lloiacadicue.

⁵ Creyentiañedino motomo omoi ia, marena omoi i. Naimacimo Cristo rafuena llono.

⁶ Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

Damierie ie uaina orede

⁷ Tíquicodi nana cuemo ite rafuena omoimo lloite. Naimiena isiruitica. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide.

⁸ Cai illana omoi uiñollena, omoi dine naimiena oredicue. Omoi comeciaina ocuiñotaite.

⁹ Naimie diga Onésimo jia oredicue. Naimiedi creyente. Cristo rafuedo raise jaide. Naimiena jia isiruitica. Naimiedi omoi comini imie. Nana bene jai suide rafuena omoimo lloitiaimaia.

¹⁰ Cárcelmo Aristarco cue diga ite. Omoimo ie uaina orede. Marcos ie uai jia orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño.

¹¹ Jesús ie uai jiaí orede. Naimie mameci jiaí cidi Justo. Judíuaimona dani naimaci cuena canode. “Naimaci jeacinona naimaci faínonocaillamona, Jusiñamui ie díbeimo comínina jai jitaide” naimaci lluamona, cue comequina ocuiñotadimaci.

¹² Epafras ie uaina jiaí orede. Naimie omoi comíni imie. Jesucristo díbeimo naimie maijide. Jusiñamui díga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jicabide.

¹³ Omoi facaina naimie eo maijide. Laodiceamo itino facaina eo maijide. Hierápolismo itino facaina jiaí eo maijide.

¹⁴ Cai médico Lucas ie uaina jiaí orede. Naimiena isiruiticai. Demas ie uaina jiaí orede.

¹⁵ Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono.

¹⁶ Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiaí oredicue. Iena omoi jiaí faca.

¹⁷ Arquipomo llono: “Cai Nama fetocamedio. Naimie rafuena llocana raise o jai” llono.

¹⁸ Cue uaina omoimo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoi jii. Jusiñamui omoína duenaioillasa. Mai. Cue cuega rafue jai fuite. Pablodícue.

TESALÓNICAMO ITE CRISTONA HNOTHINOMO PABLO NANO ORETAGA RABE

Uaiduacino

¹ Tesalónicamo ite creyentiaí, omoímo cartana cueticue. Pablodícue. ¿Nigacino? ¿Nie isoidomoi? Silvano cue diga ite. Timoteo cue diga jiaí ite. Iaimaiaí uaina orediaímaiaí. Cai Moo Jusiñamuimo, cai Nama Jesucristomo jai jainaiaídomoi. Ie jira iaimaiaí omoí duenaillana uiñocana omoí jaillana jitaídicaí. Iaimaiaí omoí uri itatajana omoí uiñocana jaillana jiaí jitaídicaí.

Tesalónicamo ite creyentiaí Jusiñamui uaina raise #notimaci

² Jusiñamuimo cai jiaí, naimiemo omoí facaina iobillana jaca fecacabidicaí. Omoí facaina jicabidicaí.

³ Cai Moo Jusiñamuimo cai jiaí, omoína comeciticaí. Jusiñamuina #notomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoína comeciticaí.

⁴ Omoína naimie isiruillamona, Jusiñamui omoína fetuana uiñoticaí.

⁵ Jamaí cai uaido Cristo rafuena omoína llofueñedicaí; ia siño uaido iena llofueticaí. Jusiñamui Joreño uaido iena llofueticaí. Naie rafuena #nuanona llofueticaí. Omoí diga cai jaie ia, nie isoi cai illana raise uiñotomoi.

⁶ Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusiñamui Joreño omoína iocire itatajamona, Jusiñamui uaina iocire feiñotomoi.

⁷ Ie jira nana Macedoniamomo ite creyentiaí omoímona fueotimaci. Nana Acayamo ite creyentiaí omoímona jiaí fueotimaci.

⁸ Omoímona Macedoniamomo ite comini cai Nama uaina fididimaci. Acayamo ite comini jiaí fididimaci. Ailluena nairaiaí Jusiñamuina omoí #nuana jai fididimaci. Ie jira naimacimomo Cristo rafuena omoí #nuana jai lloñedicaí.

⁹⁻¹⁰ Omoí dine nano cai ria, caimare caina feiñotomoi. Cristo rafuena omoí cacajamona, jiraraina sedajana faionocaida, cajede nanoca Jusiñamuina jai sedadomoi. Jusiñamui jito abido billemo birui jiaí ocuridomoi. Iese jiaie creyentiaí omoína birui ñaicabitimaci. Cristo fiodaillamona Jusiñamui naimiena jaie jillotade. Naimiena cai #nuamona, Cristo Jusiñamui ricacillifuemona caina jai jillobitade.

2

Pablo Tesalónicamo llofui rafue

¹ Cue nabaiñiaí, omoí diga jaie cai ia, tainomomo jaiñedicaí.

² Omoí dine cai nia riñenia, Filipomomo iticaí. Nainomomo itinodi caina jeare finodimaci. Iena jai uiñotomoi. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoína llofueticaí. Ailluena comini iena jitaíñedimaci; ia iena llofueticaí.

³ Uanaíñedicinona jaca llofueñedicaí. Jearedicinona jaca llofueñedicaí. Jifuerillacinona jaca llofueñedicaí;

⁴ iadedi Jusiñamui uiñoganodicaí. Ie jira caina naimie oretajamona, ie rafuena llofueticaí. Cominina iobitallena llofueñedicaí; iadedi Jusiñamuina iobitallena llofueticaí, Jusiñamui cai comecina raise uiñua jira.

⁵ Cai llofuiacino diga omoína bifueñedicaí. Omoímona ucube ollena, iese llofueñedicaí.

⁶ Cominimona iobillacinona jitaíñedicaí. Omoímona jitaíñedicaí. Jiaínomona jiaí jitaíñedicaí; iadedi Cristo oretaganona cai illa jira, cai jitaia, omoímona iobillacinona jicaredicaí.

⁷ Uruiaina raise sedaraiño isoi, fecuise omoina llofueticaí.

⁸ Jusiñamui rafuena omoi raise uiñollena, omoina cai eo isiruillamona, niadedi omoi facaina fioidiacadicaí.

⁹ Omoi motomo cai ucube ollena, jiaie rana maijiuidicaí. Omoina cai duere finoñellena, nagarui iese maijiuidicaí. Iena raise uiñotomoi. Iese Jusiñamui rafuena omoina llofueticaí.

¹⁰ Omoi motomo cai illana raise uiñotomoi. Jusiñamui jitailla isoi, nainomo iticaí. Maraiñede rafuena finoñedicaí. Mare rafuedo jaca jaidicaí. Iena uiñotomoi. Jusiñamui iena jiaí uiñote.

¹¹ Omoi uruiaí omoi llofuia isoi, omoina llofueticaí. Omoimo diga icaíño Jusiñamui rafuena llofueticaí.

¹² Jusiñamui jitaillacinona omoi finollena, iena llofueuidicaí. Monamo ie cominina sedajanomo omoi jaca illena, naimie omoina jai fetode. Nainomo ie siño uai anamo jaca iitomoi.

¹³ Jusiñamuimo cai jia, omoi facaina iobillacinona fecacabidicaí. Jusiñamui rafuena caimona omoi jai cacajamona, iena raise feiñotomoi. Cominimona cai oga rafue isoi feiñoñedomoi; ia Jusiñamuimona cai oga rafuena feiñotomoi. Cai lloga rafue omoi comeciaí uai meidocana jaide. Ie jira Jusiñamuimo iobillacinona fecacabidicaí.

¹⁴ Judeamo ite creyentiaí isoi duere sefuidomoi. Omoi cominimona duere sefuidomoi. Naimaci judíuai cominimona duere sefuidimaci.

¹⁵ Judíuai comini cai Nama Jesúna jai meinetimaci. Jusiñamui facaina lloraini micoriaina jiaí jai meinetimaci. Caina jiaí birui duere finodimaci. Jusiñamuina iobitañedimaci. Jusiñamui rafue dibeimo jiaí iñedimaci.

¹⁶ Judíuaiñedinomo Cristo rafuena cai lluana jitañedimaci. Jusiñamui judíuaiñedinona jillotajana jitañedimaci. Iese jeacino finocana nia jaidimaci; ia ja muidomo Jusiñamui ricailifue anamo jai itimaci.

Tesalónica comini dine Pablo abido jaiacade

¹⁷ Omoimona cai billa mei, nigarui illanona, omoina dane cioacadicaí. Omoina cioiñedicaí; iadedi omoimo comecina facadicaí. Omoi dine eo jaiacadicaí.

¹⁸ Ua eo jaiacadicue. Diga icaíño jaiacadicaí; ia Taife cai jaillana jitañede.

¹⁹⁻²⁰ Caina omoi jaca iobitaja jira, omoina cioacadicaí. Jesús abido bia, naie facaise omoi eo iobiticaí. Iemo ocuiridicaí. Caina iocire itataitomoi. Omoi muidona iobiticaí.

3

¹ Cai comeci jarire illamona, Atenas railla nairaimo fiebidicoco;

² iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise ñnotallena, omoi comeciaina ocuiñotallena, naimiena oretaticoco.

³ Duere sefuillamona bu bie uai sefuiruillana jitañedicaí. Creyentena cai illamona, jaca duere cai sefuillana uiñotomoi.

⁴ Omoi motomo jai cai ia, iena llofueticaí. Omoi birui duere sefuillamona cai lluana raise uiñotomoi.

⁵ Cue comeci jarire illamona, Cristona omoi ñnuana raise uiñoiacadicue. Omoina Taife ramo faicabillamona, tainomo cai maijana jacinaiticaí. Ie jira Timoteona oredicoco.

⁶ Omoimona Timoteo jai abido billamona, omoie mare rafuena cocomo llote. Cristona ñnocana jaidomoi naimie llote. Coninina isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie llote.

⁷ Birui duere sefuidicaí; iadedi omoie rafuena cai cacajano, cai comeci marena ite.

⁸ Cristo rafuena ñnocana omoi jaillana jai cai uiñuamona, cai comeci marena ite.

⁹ Omoi eo caimare jai iticaí. Ie jira Jusiñamuimo iobillacinona eo feaacadicaí.

¹⁰ Omoina dane cai cioillena, naimiemo nagarui jidicai. Naimiena nia omoi raise inoñena, omoina naimiena raise inotaacadicai. Ie jira omoina cioacadicai.

¹¹ Iese omoi facaina, cai Moo Jusiñamuimo, cai Nama Jesúmo jicabidicai. Omoi dine caina naimie oretajana jidicai.

¹² Cai Nama coninina isiruitacana omoi jaillana jitaidicai. Caina omoi isiruilla isoi, nana jiaisona omoi isiruillana jidicai.

¹³ Omoi comeciai ocuiñollena, omoi comeciai Jusiñamui jitailla isoi, marena illena jidicai. Nana ie comini diga cai Nama Jesús abido bia, Jusiñamui dine omoi ia, omoi comeciai marena illena jitaidicai. Iese omoi facaina jicabidicai.

4

Naimaci marena illena llofuite

¹ Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaidicai. Iese birui itomoi; ia nagarui iese omoi illana jitaidicai. Ie jira cai llua isoi, omoi jai.

² Cai Nama Jesús jitailla jira, navui iena llofueticai.

³ Jusiñamui jitailla isoi omoi marena illena, omoi aiñede riño diga iñeno.

⁴ Nagamiai riñona ie aina otena, mare; ia maraiñede rafuena finoño. Nagamiai dajena daje riño uana Jusiñamui jitaide. Dañaiño diga ia imaijai jionaillena jia jitaide.

⁵ Naimiena inoñedino isoi, omoi ai uana jitañede. Naiñaiñuai abina jamai cioillena riñona otimaci.

⁶ Jiaie creyentemo jeacinona finoño. Naimie aina jamai aifiedoño. Naie isoide rafuena bu finoia, cai Nama naimiena duere finoite. Iena navui omoimo lloticue.

⁷ Jearede rafuena cai finollena, Jusiñamuidi caina fetoñede; iadedi mare rafuena cai finollena caina fetode.

⁸ Bie llofuiacino nie creyente inoñena, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jia jamaide.

⁹ Jiaie creyentiaina omoi isiruillana omoimo eo lloñeiticue. Jusiñamui omoina coninina isiruillana jai uiñotade.

¹⁰ Nana Macedoniamoi ite creyentiaina jai isiruitomoi; iade nia isiruicana omoi jai.

¹¹ Uri omoi i. Dani omoimo ite rafuena omoi uiuicai. Jiainomona ucubena jicaño; ia omoi ucube ollena, omoi onolli diga rairuioicaiño omoi maiji.

¹² Ie mei omoi jitailla ra iite. Iemona Cristona inoñedino omoina jia mameriñeitimaci.

Jesucristo dane abido billena llote

¹³ Omoi raise uiñollena, daje rafuena lloiticue. Omoi creyentiaimona dajerie jai fodaitimaci. Jesúna inoñedinomona bu fodaia, fodaillamona jilluamo naimaci ocuiriñena jira, sunaitimaci; iadedi naimaci sunailla isoi, omoi illana jitañedicue. Fodaillamona jilluamo jai ocuiridomoi.

¹⁴ Jesús fodaillamona naimie jilluana inoticai. Ie jira Jesús abido billa facaise, jai fodaite creyentiaina Jusiñamui jilloitajana jia jai inoticai.

¹⁵ Cai Nama llofui isoi, bie rafuena lloiticue. Jesús abido bia, jai fodaite creyentia, nia fodañede creyentia diga, daacaiño naimie dine a jaiticai.

¹⁶ Cai Nama Jesús abido bia, Jusiñamui dinena naimie billanona, caina jidaite. Ie jaienici caina uaidoite. Jusiñamui ie trompeta daacaiño jia fiite. Jai fodaitino nano jilloitimaci.

¹⁷ Iemei nia fodañedinodi como jillodino diga uillie motomo naimiemo dafaifillena, Jesús caina uite. Iemei naimie diga jaca iiticai.

¹⁸ Bie llofuiacino diga conini comeciaina omoi ocuiño.

5

¹ Bie rafue suilliruina uiñoñedicaí. Bie rafuena omoi jai uiñua jira, iena dane eo cueñeiticue.

² Cai Nama abido billana jai uiñotomoi. Fñredimie naiona ebena billa isoi, naimie abido biite.

³ “Uri iticaí. Marena iticaí” Cristona ñnoñedino raia, naie facaise naimacimo duere sefuillifue suite. Urue riño jigícomo casilla isoi, ebena suite. Naiemona jilloñeitimaci.

⁴ Naie facaise suia, Cristo billena omoi jai uiñuamona, fñredimie naiona ebena billa isoi, jacinaiñeitomoi. Cristona ñnoñedino isoi, iñedomoi.

⁵ Uanaicinona omoi jai uiñuamona, Cristo ie cominina jai jaidomoi. Jecino anamo omoi jai iñena jira, Cristona ñnoñedino ðibeimo jai ðuiñedomoi.

⁶ Ie jira abina sedacana omoi jai. Abina rairuioicaida omoi jai. Jifaidino isoi ebena omoi jaiñeno.

⁷ Cristona ñnoñedino abina sedacana jaiñedimaci. Rairuioicaida ebena jaidimaci.

⁸ Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogí icodi jiai ite. Ie isoide. Cai comeciaina eenollena, Cristona ñnocana mai cai jailli. Jiaíno isiruicana mai cai jailli. Jusiñamui ðine íco cai illemo ocuiricana mai cai jailli.

⁹ Caina duere finollena, Jusiñamui caina fetoñede; iadedí cai Nama Jesucristo finoca rafue muidona, duere finollemona cai jilloillena, caina fetode.

¹⁰ Cristo cai facaina jai fiodaite. Ie jira birui cai fiodaia, naimie bille facaise nia fiodañedinsona cai ie, naimie ðiga jaca iiticaí.

¹¹ Ie jira coninina ocuiñotacana omoi jai. Cristo ðibeimo coninina itatacana omoi jai. Iese birui jaidomoi; ia nia iese omoi jai.

Omoi creyentiaína llofueraíni uaina ñno

¹² Cue amatiaí, jiaíe rafuena lloiticue. Omoi creyentiaína llofueraíni uaina ñno. Cristo jitailla jira, omoi afemo itimaci. Cristo ðibeimo omoína raise itatallena, omoi facaina llofuetimaci.

¹³ Omoína naimaci canua jira, naimacína isiruillanona, naimaci uaina raise omoi ñno. Coniniri uri omoi i.

¹⁴ Omoi motomona maijacaiñedinsona imaci maijillesa ocui. Duere sefuillamona jai comeciina ocuiñonidinsona comeciina ocuiñota. Raise ñnollena, Cristona nia raise ñnoñedinsona jiai cano. Fecuisse naimacína ui-uillanona, naimacína cano.

¹⁵ Omoína jiaímie duere finoia, ibana oñeno; iadedí naimiemo mare rafuena fino. Nana cominimo mare rafuena fino.

¹⁶ Nie isoide rafue omoímo ia, caimare omoi i.

¹⁷ Jusiñamuimo nagarui jii-jii.

¹⁸ Nie isoide rafue omoímo ia, Jsuiñemui jitailla jira, naimiemo iobillacinsona feca. Jesucristomona Jusiñamui jitaillacinsona jai uiñoticaí.

¹⁹ Jusiñamui Joreñoa jamaiñeno.

²⁰ Jusiñamui Joreño uaido lloraíni llofuiana jamaiñeno;

²¹ iadedí Jusiñamui Joreño uaido naimaci llofuiana facaci. Mare rafuedo jaca omoi jai.

²² Nana marañede rafuemono eno oni omoi i. Naie isoide rafuena omoi abimo omoi oñeno.

²³ Ie jira Jusiñamuimo omoi facaina jiiiticue. Naimie omoína jai uri itatate. Naimie omoína nagarui marena itatacana jaillana jitaídicue. Iese omoi jaia, cai Nama Jesucristo dane abido bille facaise, naimie jitailla isoi, omoi comeciái marena iite.

²⁴ Jusiñamuidí ñnogamiéna jira, iese omoína finoite.

²⁵ Cue amatiaí, Jusiñamuimo cai facaina omoi jiiicabi.

²⁶ Cue facaido nana creyentiaína caimare uaido.

²⁷ Cai Namamo cai duilla jira, naimie jitailla jira, bie cartana nana creyentia uicomo
faca.
²⁸ Cai Nama Jesucristo omoina duenaillasa. Mai. Pablodice.

TESALÓNICAMO ITE CRISTONA HINOTINOMO PABLO IE EMODOMO ORETAGA RABE

Uaiduacino

¹⁻² Tesalónicamo ite creyentiaí, omoímo cartana cueticue. Pablodicue. ¿Nigacino? ¿Nie isoidomoí? Silvano cue diga ite. Timoteo cue diga jiaí ite. Iaimaiaí uaina orediaimaiaí. Cai Moo Jusiñamuimo, cai Nama Jesucristomo jai jainaiaidomoí. Ie jira iaimaiaí omoí duenaillana uiñocana omoí jaillana jitaídicaí. Iaimaiaí omoí uri itatajana omoí uiñocana jaillana jiaí jitaídicaí.

Cristo dane abido bia, naimiena inoñedinona duere finoite

³ Jusiñamuimo cai jiaí, omoí facaina naimiemo iobillacinona fecacabidicaí. Cristona inocana raise jaidomoí. Coniniri isiruicana raise jaidomoí.

⁴ Ie jira marena omoí illana jiaíe creyentiaí illanomo llocana uiticaí. Duere sefuidomoí; iadedi danomo abido jaiñedomoí. Cristona inocana jaidomoí. Iena llocana uiticaí.

⁵ Jainomona birui duere sefuidomoí; ia inocana jaidomoí. Iemona Jusiñamui omoí facaina illana uiñoticaí. Omoí duere sefuillamona, fueocana jaidomoí. Iemona naimie jitailla isoi, ja muidomo monamo ie cominina sedajanomo iitomoí.

⁶ Jusiñamui omoína duere finodinona ico duere finoite. Omoí facaina ibana oite. Iese naimie finoia, naimiemona mare.

⁷ Cai Nama Jesús abido bia, duere sefuillamona jilloiticaí. Monamona ie siño jaienisaí diga biite. Irai boua isoi ana biitimaci.

⁸ Jusiñamuina inoñedinona diese duere finoitimaci. Cai Nama Jesús rafuena naimaci inoñena jira, naimacina duere finoitimaci.

⁹ Inoñena jira, jaca faifitimaci. Jaca llegi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci.

¹⁰ Cristo bille facaise naimiemo iobillacinona fecaiticaí. Naimieri nana naimiena inotino rajicaitimaci. Omoímo cai lloga rafuena omoí jai inua jira, iese iitomoí.

¹¹ Ie jira omoí facaina jicabidicaí. Naimie jitailla isoi, omoína naimie marena itatajana jidicaí. Omoína naimie fetuamona, ie uaido mare rafuena finocana omoí jaillana jidicaí. Ie uaido naimiena inocana omoí jaillana jidicaí.

¹² Iese omoí jaillemona, naimie abido bille facaise naimiena iobitaitomoí. Omoiri naimie jiaí iobite. Jusiñamui, cai Nama Jesucristo diga, caina duenaillamona iese iiticaí.

2

Jesucristo abido bille rafue

¹ Cai Nama Jesucristo abido billena lloiacadicue. Naimiemo ico cai dafaifillena jiaí lloiacadicue.

² “Cai Nama jai abido bite” raillana omoí cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena inoñeno. Nie lloiraíma iena lloia, iena inoñeno. “Pablomona cue feiñoga carta iena llote” damie raia, iena inoñeno.

³ Naie isoide rafue diga omoína jiaíno jifueiacania, iena inoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite;

⁴ iadedi nano jiaíe rafuena finoite. Taife dinena naimie billanona, jiraraí baifemo iacanite. Jerusalémo Jusiñamui jofomo illanona, “Jusiñamuidicue” raite.

⁵ Omoí dne navui cue ia, bie rafuena omoímo lloticue.

⁶ Jusiñamui Joreño naimie nia billena rairuillana jai uiñotomoí. Jusiñamui jitaillirui facaise naimie biite.

7 Taife maraiñede rafuena birui bainino finotate. Jusiñamui Joreño naimiena maraiñede rafuena birui marefodo finuana rairuide. Jusiñamui Joreño naimie rairuiñena mei,

8 Taife dinena maraiñedimie biite; ia cai Nama Jesús abido ebire bia, fraiñuamona naimiena meineite.

9 Cai Nama Jesús nia abido biñenia, comini jifuellena, Taife uaido bie maraiñedimiedi diga siño rafuena finoite.

10 Cominina eo maraiñedicinodo jifueite. Naie comini ico faifitimaci. Jusiñamui ie uanaicinona naimaci ñnoñena jira, jilloiacaiñeitimaci.

11 Ie jira Jusiñamui naimacina tainocinona ñnotaite.

12 Jusiñamui ie uanaicinona naimaci ñnoñena jira, maraiñede rafuena naimaci ebiruilla jira, Jusiñamui naimacina duere finoite.

Jusiñamui omoina jai fetode

13 Jusiñamuina ñnoñedino isoi Jusiñamui omoina duere finoñeite. Naimie omoina jai fetua jira, naimiemo iobillacinona jaca fecacabidicai. Omoi jilloillena, nano dofoconi omoina fetode. Ie Joreño uaido naimie jitaillacinona omoi finollena, naimie uanaicinona omoi ñnuamona, omoina fetode.

14 Ie rafuena cai llumona, Jusiñamui omoina jai jillotate. Iemona cai Nama Jesucristo ebirede illanomo jaca iitomo.

15 Ie jira, Cristona ñnocana omoi jai. Cai llogacinodo omoi jai. Iena caimona jai cacadomo. Cai cartamona iena jiai cacadomo.

16 Omoi facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai.

17 Naimie omoi comeciaina nia ocuiñotallena jidicai. Nie isoide rafuena omoi finoia, naie rafue omoi marena finollena jidicai. Buena omoi ñaia, omoi marena ñaillena jiai jidicai.

3

Cai facaina omoi jiana jitaidicai

1 Daje rafue nia lloiacadicue. Cai facaina omoi jiana jitaidicai. Cai Nama rafue llocana jaillana jitaidicai. Omoi ñnua isoi, jiaino ñnuana jiai jitaidicai.

2 Maraiñedinomona cai jillobillena, omoi jiana jitaidicai. Ailluena comini Cristona ñnoñedimaci;

3 ia cai Nama jaca ñnogamie. Omoi comeciaina ocuiñotaite. Maraiñedicinomona omoina eenoite.

4 Cristomo cai duilla jira, cai llogacinona omoi jai ñnuana jai uiñotica. Iena nia ñnoitomo.

5 Cai Nama Jesús omoina Jusiñamui omoina isiruillana uiñotajana jitaidicue. Cristo duere sefuide; iadedi ie Moo jitailla rafuena sefuiruiño finocana jaide. Iese Jusiñamuimo omoi facaina juiticue.

Maijuillasa

6 Cai Nama Jesucristo jitailla jira, jiaie rafuena nia lloiticue. Jiaie croyente maijiacaiñenia, naimie diga eo nabairiño. Iena navui omoimo lloticue; ia damerie iese ia, naimaci diga eo nabairiño.

7 Caimona fueo. Navui omoi motomo iticai; ia cai ucube ollena, jaca maijidicai.

8 Guillena ibaño guiñedicai; ia nagarui eo maijidicai, omoina duere cai finoñellena.

9 Cristo facaina cai maijia jira, omoimona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaidicai.

10 Navui omoi motomo cai illa facaise lloticai: “Bu maijiacaiñenia, guiña”.

¹¹ Omoï motomo damierie jai maijiñenana jai fididicai. Maijiñeno jai itimaci.

¹² Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana jitaidicai.

¹³ Cue amatiai, nie isoide mare rafuena finollena sefuiruiñeno.

¹⁴ Cue jai cuega cartamo ite rafuena bu ñnoñenia, nana creyentiaina naimiena uiñota. Naimie meidaillena, naimie diga nabairiñeno.

¹⁵ Naimiena enoiñeno; ia creyentena naimie nia illamona, naimiena fecuise llofue.

Fuiduacino

¹⁶ Cai Nama omoï jaca uri itatajana jitaidicai. Naimie omoï diga jaca iite.

¹⁷ Cuenanollena, naimiemo cue llua isoi, jiaimie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablodicue.

¹⁸ Cai Nama Jesucristo nana omoïna duenailasa. Mai. Macaibaite.

TIMOTEOMO PABLO NANO ORETAGA RABE

Pablo Timoteona uaiduacino

¹⁻² Timoteo, bie carta omo cueticue. ¿Nigacino? ¿Nie isoidio? Pablodícue. Cristo Jesús oretagamíedícue. Ie rafue llollena, naimíe cuena orede Naimíena cue cioillena, naimíe isoi cue illena, naimíe abido billemo ocuridícue. Jusiñamui cuena jiaí orede. Naimíedi caí Jilloitaraíma. Cue llofuiacínomona Cristona o raise #nuua jira, cue jito isoi cue mamecao. Cai Moo Jusiñamui, caí Nama Jesucristo díga, ona jai duenaite. Iena uiñocana mai o jai. Ona jai uri itatatiáímaíai. Iena uiñocana mai o jai.

Cristo rafuena tainona llofueraíni llofuiacínodo jaiñeno

³⁻⁴ Macedoniamó jaie jaidícuemo, Efesomó o fiebicaillena omo llotícue. Nainomó dajerie Cristo rafuena raise llofueñedímaci; iadedi jiaíforíe llofuetímaci. Díga #gaíaiína faca-facadímaci. Imaci usumatíai mamecido siadocabitímaci. Iemona coníni uaina uaitaside. Jusiñamui jitailla isoi comíni marena illana llofueñedímaci. Jusiñamuina caí #nuuamona, marena itícaí. Iena llofueñedímaci. Ie jira naimíaci uaina llícaita.

⁵ Jusiñamuina comíni isiruillena, jiaíe comíni jiaí naimíaci isiruillena, Jusiñamui uaina llofuetícaí. Naimíaci comecíai jeanínana jitaídícaí. Jusiñamuina raise naimíaci #nuuana jiaí jitaídícaí. Ie jira Jusiñamui rafuena llofuecabitícaí.

⁶ Dajerie llofueraíni íese llofueñedímaci; iadedi jamai ñaitímaci.

⁷ Moisés micorí jaie llogacínuaído llofueiacadímaci; iadedi iena llofuiana uiñoñedímaci. Naie llogacínuaína ua uiñoñedímaci.

⁸ Iena raise llofuegana, Jusiñamuina uiñoñedínona naimíena uiñotallena, mare. Iena uiñotícaí.

⁹⁻¹⁰ Moisés micorí llogacínuaídi mareuidínomo jainaiáíñede. Jiaínomo jainaiáide: Jusiñamui uaina #noñedínomo lloga uaina #norainidínomo, Jusiñamuina jitaíñedínomo, jeacino finorainímo, jeare ñaicabitínomo, Jusiñamuina enoidínomo, eina meinetínomo, mooná meinetínomo, jiaíe comíni meinetínomo, aiñede riño díga itínomo, iniñede íima díga itíñaiñuáimo, daje isoide íima díga coníni aífuedotínomo, comena fíidínomo, taino llorainímo, taino lluaña jífueridínomo, uanaí rafue facaisena íñedínomo. Nana Cristo rafue facaina íñedínomo Moisés micorí llogacínuaí ua jainaiáide;

¹¹ ía naie rafue cuemo jai jainaiáíñede. Ie mare rafuena cue llollena, Jusiñamui cuena jai orede. Maremíena Jusiñamui illamona, naimíe rafue jiaí eo ebirede.

Jusiñamui caína duenaila jira, Pablodí íobide

¹² Cuena fetua jira, caí Nama Cristo Jesús íobidícue. Naimíena cue #nollena, naimíe cuena uiñuamona, cuena fetode, naimíe rafue cue llollena. Iena llollena, cue comecína jiaí ocuiñotade.

¹³ Jaie naimíena jeare ñaitícue. Naimíena #notínona jiaí duere finodícue. Abína cue uiñoñena jira, naie facaiseconi naimíena nia cue #noñena jira cuena duenailamona, naimíe cuena fetode.

¹⁴ Cuena eo duenaite. Iemona naimíena #notícue. Naimíena jiaí isiruitícue.

¹⁵ Bie lluaídi mare cue uiñuamona, nana comíni biena #nuuana jitaídícue. Maraiñedínona naimíaci jeacínomona jilloitallena, eníruemo Jesucristo bíte. Ero, nanoca jeacínona finoraímadícue;

¹⁶ íadedi Jesucristo cuena duenaite. Naimíena cue #nuuamó jaie fecuíse ocuríde. Nana jeacínona finorainímo fecuíse ocuríde, naimíena #nollena. Naimíena caí #nuuamona, Jusiñamui díga jaca íitícaí. Cuena duenaila jira, biruimona naimíena #noítínodí naimíe naimíacína duenailana uiñoítímaci.

¹⁷ Jusiñamuidi nanocamie. Jaca fioidañeite. Naimiena cionidicai. Naimie damiede. Jaiena iñede. Naimiena jaca iobicabillasa. Iena jitaidicue.

¹⁸ Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerañidi ona jaiel lotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena.

¹⁹ Cristona ñinocana o jai. O comecina marena finocana o jai. Dajerie naimaci comeciainuaimo comeciaina facañedimaci. Ie jira Cristona jai ñnoñedimaci.

²⁰ Iese ite Himeneo. Alejandro jiaijai daje isoide. Jai ñnoñediaimaiaia. Ie mei iaiaimaiaina Taife anamo jai itabicaítaticue, duere sefullena. Iaiaimaia fueollena, Jusiñamuina jeare ñañellena, iese itabicaítaticue.

2

Nana comini facaina jaiticai

¹ Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca.

² Uri cai illena, Jusiñamuina raise cai sedallena, Jusiñamui jitailla rafuena cai finollena, illacomini facaina cai jii.

³ Iese cai jiiia, Jusiñamuimona mare. Naimiedi cai Jilloitaraima.

⁴ Naimiedi nana comini naimaci jeacinomona jilluana jitaide. Uanaicinona naimaci uiñuana jiaijitaide.

⁵ Nana nairaiiaimaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie ñimananona, comini facaisena ñairede. Ie muidona comini diga Jusiñamui jai nabairedede. Jusiñamui diga comini jiaijai nabairedimaci.

⁶ Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uiñotade.

⁷ Bie rafue cue llollena, Jusiñamui cuena fetode. Judíuaiñedinomo cue llollena, bie rafue naimaci ñnollena, uanaicinona naimaci uiñollena, cuena orede. Tainona lloñedicue.

⁸ Ie jira naga roracomo ite iñiaia, cai comini onolliaia a ñuitacabilla isoi, comeciaino jeacino iñenanomona, Jusiñamuimo jiiiana jitaidicue. Naimaci comeciaino icirillacino iñedemo, Jusiñamuimo jii. Naimaci comeciaino uaitajacino iñedemo, Jusiñamuimo jii.

⁹⁻¹⁰ Riñoniaimo jiaijai lloiticue. Roracomo omoi jaia, abi ieduoamo comeciaina facañenamona, omoi ifotiena fino. Jamai ebinai raillano, abi ieduamona abina finora jitañeno. Jamai ebinai raillano, abi ieduamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina ñnoticai” omoi raillanona, naimie jitailla isoi, marena omoi finolle.

¹¹ Rollena comini ofia, ñaññenanomona, uaitañenamona omoi fueo.

¹² Omoi ofia, omoi iñiaia llofuiana jitañedicue. Nainomo omoi ñaññena. Iñiaia omoi anamo illana jitañedicue. Iese omoi riñoniaimo lloiacadicue.

¹³ Jusiñamui Adán micorina nano finua jira, iese lloticue. Adán micori finua mei, Eva micorina jiaijai finode.

¹⁴ Taifedi Adán micorina jifueñede; iadedi Eva micorina jifueite. Ie mei naie riño jeacinona finode.

¹⁵ Iemona jilloite; iadedi uruiajococana jaite. Riñoniaidi Jusiñamuina ñnoia, jiaie cominina isirua, Jusiñamui jitailla rafuena finoa, ie abina eenoa, jilloitimaci.

3

Creyentiaina sedaraini illa rafue

¹ Bicinodi uanaicino. Creyentiaina llofueraimana bu jaiacania, naimie começimo mare jitaillacino ite.

² Bie isoide llofueraimana jaiacadimiena jitaidicue. Naga comini naimie mare rail-lamie. Dañaiñona airedimie. Abi eenotimie. Ebena iñedimie. Inogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie.

³ Jifairuiñedimie. Fuirirainidimie. Raire icirirainidimie. Ucubena nicidoñedimie.

⁴ Naimie cominina raise sedadimie. Naimie anamo naimaci illanona, naimie uruiaie ie uaina raise inotadimie. Ie isoidimie llofueraimana jaillana jitaidicue.

⁵ Iese naimie iñenia, ie anamo itinona naimie raise sedañenia, çniese jiaie creyentiaina raise sedaite?

⁶ Como creyentena jaidimiena creyentiaina llofueraimana fetoneño, naie diga naimie abi iedoi raillano. Abi ieduamona, Taife isoi jeacino finoite.

⁷ Llofueraimana jaiacadimiena creyenteñedino: “Mare” raiñenia, naimiena fetoneño. Iese naimiena raiñenia, naimie joreña jeare ñaitimaci. Iemei Taife ramo jiai faite, naimie abido danomo uaillena. Ie muidona naimie uaina jaca cacarefiñeitimaci.

Diáconuai illa rafue

⁸ Diáconuai creyentiaie llofueraini isoi marena illa. Inouiganona illa. Jifairaiñena. Ucubena nicidoñena.

⁹ Naimacidi Cristona cai inua rafuena jeanide começaimona inua.

¹⁰ Bu omoi fetocania, naimacina nano facaci. Roracomo jiaie rana nano maijita. Iena raise finoa, diáconuaina jaite.

¹¹ Diáconuai ainiai jiai inogañaiñuaina illa. Jiaie comini joreña ñaiñena. Jirorainina. Naga rafuena marena raise finua.

¹² Nana diáconuai aidi dañaiñoriede. Diáconuai uruiaie naimaci uaina raise inua. Diáconuai imaci anamo itinona raise sedajana uiñua.

¹³ Diáconuai marena maijia, comini naimacimo iobillacinona fecaitimaci. Cristo Jesúna inuano, naimiena marefodo jiai lloitimaci.

Jusiñamuina inotino

¹⁴ Timoteo, raire o dine jaiacadicue; iadedi uicodo bie rafuena omo cueticue.

¹⁵ Are cue riñenia, dani omoi creyentiaie diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaie. Uanaicinona riidoticaie.

¹⁶ Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaie:

Eniruemo Cristodi imana jai bairede.

Jusiñamui Joreñodi caina naimie uai siñonana uiñotade.

Jusiñamui jaienisaie naimiena jiai cioidimaci.

Jiaie nairaiaimo naimiena lloticaie.

Iena cacajamona, ailluena cominidi diga nairaaimona naimiena birui inotimaci.

Monamo naimie abido jai jaide.

4

Jainodi jiaiforie rafuena lloitimaci

¹ Jusiñamui Joreño caimo raise llote: “Jesucristo nia abido biñena facaiseconi damerie creyentiaie Cristona faionocaitimaci. Taife dibeimo ite lloraini llwana cacarefillamona, Janabamona ite llucacino jaitimaci. Taifemona ite llucacino jaitimaci”.

² Naie llorainidi: “Uanaicinona lloticaie” raitimaci; iadedi taino llocabiitimaci. Naimaci começiai jai tainomo iite.

³ Hima riño ie aina ollena rairuitimaci. Riño ima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiai uanaicinona uiñuanona, iobillanona guillena, naimiedi naga rana finode.

⁴ Nana Jusiñamui comuitaga guille radi mare. Iobillano iena cai feiñuanona, guiticaí.

⁵ Jusiñamui llua jira, Jusiñamuimo cai jia, nana guille radi jai mare. Iemona maraiñede rafue jaca caimo comuiñeite.

Jesucristo rafuedo raise #nocana jai

⁶ Timoteo, cue llua creyentiaimo o lloia, Jesucristo dibeimo raise maijidio. Cristo uaina #nocana o jailla jira, mare llogacinodo o jailla jira, raise maijidio.

⁷ Jamai rafuemo, jamai #gaiaimo o comecina facañeno; iadedi Jusiñamui jitailla rafuena finocana o jai.

⁸ Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jairuido o jaillena, o comecina marena jiai raise finotaite.

⁹ Bie lluacínodi uanaicino. Ie jira iena cai #nua.

¹⁰ Cai jillobillena, cajede Jusiñamuimo ocuridicaí. Ie jira duere sefuillano maijidicaí. Jeacinomona Jusiñamuidi nana cominina jillobitaacade. Naimiena #notinona jai jil-lotate.

¹¹ Nana creyentiaimo cue llua raise llofue.

¹² Naimacina o llofueia, coniruena nia o illamona: “O afemo iticaí” naimaci raiadedi, damamai iese raitimaci. Mare illacínodo o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o #nuamona, o jeanide rafuena o finoñenamona, naimacidi fueoitimaci.

¹³ O dine nia cue riñenia, creyentiai ofia, Jusiñamuina ciegafuiaina ado faca. Iena llono. Iena llofue.

¹⁴ Creyentiaina llofueraini navui ofidemo, Jusiñamuimona o baitajacinona o feiñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fañonocaiñeno.

¹⁵ Iena eo uuiucaí, nana comini Cristona #nocana o jaillana uiñollena.

¹⁶ O comecina raise eeno. Marena raise llofue. Cristo uaina #nocana o jai. Iese o jai, jeacino finuamona jilloitio. Iese ona cacadino jiai jilloitimaci.

5

Timoteo afemo itino diga ie illa rafue

¹⁻² Eimiaiina illamona, o afemo itinona riire llofueñeno; iadedi o moomo o llua isoi, naimacina fecuise llofue. O anafemo itinona o amatiaimo o llua isoi, llofue. O afemo itiañaiñuaina o eimo o llua isoi, llofue. O anafemo itiañaiñuaina o miriñotiaimo o llua isoi, llofue. Naiñaiñuaimo jeare comecina facañeno.

³ Naiñaiñuaina canollena, feciñuai comini iñenia, naiñaiñuaina cano.

⁴ Feciñomo uruiai ia, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi ibana oite. Iese itena, Jusiñamuimona mare.

⁵ Feciñomo uruiai iñenia, da Jusiñamuimo naiñaiño ocuride, naimie naiñaiñona canollena. Jusiñamuimo nagarui jicabite. Bie isoide feciñuaina cano;

⁶ iadedi Jusiñamuimo duiñede rana ebiruiga feciñona canoñeno. Jusiñamui anamo naiñaiño jai raise iñenamona, Jusiñamuimona naiñaiñodi jai fioidaitiañaiño isoide. Fioidaite cominina jaca canoñedicaí.

⁷ Ie jira creyentiaimo biena llono, feciñuaina jeare bu ñai raillanona.

⁸ Ie cominina canoñedimie Cristo uaina jai fañonocaide. Naimiedi Cristona #noñedimie baifemo eo jearedimie.

⁹ Creyentiaina sedarainina canolle feciñuai mameciaina o joneia, iese jone: Jai jionaidiñaiñuai diese mameci jone. Dajede inirediñaiñuai mamecina jone.

¹⁰ Mare rafue naiñaiñuai finocabilla jira, jiaie cominidi naiñaiñuaidi mareñaiñuai railañaiñuai. Ie uruiari raise sedadiñaiñuai. Cominina nafuecabitñaiñuai. Jiai creyentiaina abina iedoño canocabidiñaiñuai. Duidinona canocabidiñaiñuai. Diese mare rafuena finocabidiñaiñuai mameci jone.

¹¹ Feciñuai diese mameci o joneia, nia jionaiñede feciñuai mameciaina joneño. Naiñaiñuai nano llotimaci: “Inina dane oñeiticaí. Da Cristona sedaiticaí” llotimaci. Ie mei uri iñenanomona, imana nicidumona, inina jitaitimaci. Ie jira naiñaiñuai mameci joneño.

¹² Naiñaiñuai navui llucinona jai fañonocaila jira, jiaie comini naiñaiñuai joreñuaina ñaitimaci.

¹³ Naiñaiñuai diga jofomo macariruillamona, rairaiëdimaci. Eo ñaillaredimaci. Naiñaiñuai ñaiñenacinuaido ñaitimaci.

¹⁴ Nia jionaiñede itiñaiñuai iese iñellena, naiñaiñuai inina dane uana jitaidicue. Ie mei uruiariënitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite.

¹⁵ Cristona dajerie fañonocaida, Taife ðibeimo jai jaidimaci.

¹⁶ Creyente cominimona feciño iade, da naimie naiñaiñona canua. Jiaie creyentiaimo naiñaiñona canolle rana jicañena. Ie muidona cominide feciñuaina canorenitimaci.

¹⁷ Creyentiaina llofueraini marena maijia, raise ibauiga. Naimaci lloia, naimaci jiai llofueia, eo raise ibauiga.

¹⁸ Moisés micori jaie ciegafuiai iena llote: “Trigo oni juillena jurareta saisia, ie fuena maiño, ie guillena”. Guillamona ibana jai ote. Cristo jaie llote: “Maijidimiedi ibauiga”.

¹⁹ Creyentiaí llofueraimana damie llogidoia, iena cacarefiño. Mena comini, nibai daje amani comini iese naimiena llogidoia, iemo cacarei.

²⁰ Creyentiaí llofueraimona bu jeacinona finocabia, nana creyentiaí uicomo naimiemo riire llono, jiaie creyentiaí daje isoi iñellena.

²¹ Dacinodo naga jeacino finoraímamo llono. Nagamiemo riidoño llono. Fecuisse damiemo lloño, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai ciodimaci. Ie jira dacinodo llono.

²² Jeacino naimiemo ia, naimie jeacino facaisena o iñellena, creyentiaí llofueraimana jaillena, buna raire fetofeno. Jeacinomona oni eneno o i.

²³ Eo o duia, da jinuina jiroño. O duicabilla jira, janore vino jiro, o jebe manollena.

²⁴ Jeacino dajerie finoia, iena uiñoticaí, juez isoi Jusiñamui iena nia lloñenia. Jeacino jiaíno finoia, iena uiñoñedicaí; iadedi jiaíruído Jusiñamui lloia, iena uiñoticaí.

²⁵ Ie isoide. Mare rafue bu finoia, iena uiñoticaí; iadedi birui iena cai uiñoñenia, jicarena finoñena jira, jiaíruído iena uiñoticaí.

6

¹ Jusiñamuina ñnote maijirañidi naimaci patrones eo ñnua. Ie mei Jusiñamuina ñnoñedino Jusiñamuina jeare ñaiñeitimaci. Cai llofuiaçinona jamaiñeitimaci.

² Jesucristona naimaci patrones ñnoia, maijirañi naimaci uaina jiai ñnua. Naimaci comeciaí facañena: “Patrón creyentena illa jira, dani conima cai isiruilla jira, raise maijñeiticaí”; ia: “Raise maijñiticaí” comeciaina facaja.

Uanaiñedinona llucino

³⁻⁴ Cai llogacino ñ uanaicino. Cai Nama Jesucristona lloticaí. Bie llogacino naimie jitaile isoi cai illanona, raise uiñoticaí. Jiaçinodo bu llofueia, abi iedote. Abi uiñoñede. Uai eo uaitaiaçade. Ie meinoconi comini abina uradoidimaci. Daajena comeciaina lloñedimaci. Jiaie comini joreña ñaitimaci. Cai fiiena bitimaci.

⁵ Uai uaitatimaci, naimaci comeciari marañeno illa jira. Uanaicinona jai uiñoñedimaci. “Cristo uai llumona, ailluena ucubena oiticaí” raillanomo comeciari facadimaci. “Iemona caimare iiticaí” raillanomo comeciari facadimaci.

⁶ Ie iadedi iese iñede. Cristona eo raise cai ñnuamona, caimo diese ite ra diga caimare iticaí.

⁷ Cai jeicia, jaca buenidicaí. Cai fiodailla mei, cai rana uiñeiticaí. Cai radi benomo fiebicaite.

⁸ Ie jirari, cai guille ia, cai iniroi ia, caimare bene cai illa.

⁹ Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodi diga marañede rafuena finodimaci. Ja muidomo imaci abi faifitimaci.

¹⁰ Ucubena ebiruillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fañonocaidimaci. Ie muidona eo duere sefuidimaci.

Jusiñamui uaina ñnocana jai

¹¹ Ero, Timoteo, odi Jusiñamui fetocamiedio. Nana cue como lloga rafuemona oni eneno o i. Mare rafuedo o jai. Jusiñamui jitailla rafuena finocana o jai. Jesucristona ñnocana o jai. Jiaie cominina isirui. Mare rafue dibeimo o comecina jone. Riicnodo cominina llofueño.

¹² Jeacino dibeimo o iñellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio.

¹³ Ie isoide Jesucristo. Poncio Pilato dine jaiie naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinona omo lloticue.

¹⁴ Cai Nama Jesucristo nia abido biñenia, nana omo cue llogacinuai ñno. Jearede rafuena finoño, jiaie comini naie llogacinuaina uaitañellena.

¹⁵ Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaíma. Cai nanoca Nama.

¹⁶ Da jaca naimie fiodañeite. Eo isire lligaiñote ra dinomo naimie ite. Nainomo jaca bu iairei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaídicue.

¹⁷ Eo ucuberedinomo llono: “Abina iedoño. Ucubedi fuirede. Ie jira ucubena uamo ocuiriño; iadedi Jusiñamuimo ocuiri”. Cai comeciari jaisillena, naimiedi caimo rana eo raise fecacabide.

¹⁸ Ucuberedinomo jiai llono: “Omoi ucube diga mare rafuena fino. Jiaie cominimo ucubena caidiño fecajana cano”.

¹⁹ Ie muidona iese naimaci finoia, monamo naimaci isiruiga rana iite, jiairuido iena. Iese naimaci jaiia, jaca itatajacinona marena raise ua uiñoitimaci.

Fuiduacino

²⁰ Timoteo, cue omo llogacinona fañeno raise uiuicai. Jamai rafuemo cacarefiño. “Uanaicinona eo uiñoticaí” dajerie raitimaci; iadedi uiñoñedimaci. Naimaci ñaiana cacarefiño.

²¹ Dajerie iena cacajano, Cristona nia uiñoñedimaci. Jusiñamui ona duenailasa. Jaca dinori omo rafuena lloticue. Mai. Pablodicue.

TIMOTEOMO PABLO IE EMODOMO ORETAGA RABE

Uaiduacino

¹⁻² Timoteo, carta omo dane cueticue. ¿Nigacino? ¿Nie isoidio? Pablodícue. Jusiñamui cuena jitailla jira, Cristo Jesús oretagamiedícue. Cominimo jaca itatajacinona llollena, cuena oretate. Cristo Jesús cai ñnuamona, naimie diga jaca iitícaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimaiaí. Iena uiñocana mai o jai.

Jusiñamuimo iobillacinona fecade

³ Mare cue comecimona cue usumatiaí micoriaí isoi, Jusiñamuina sedadícue. Timoteo, nagarui Jusiñamuimo cue jiaí, o facaisena iobillacinona fecadícue.

⁴ Cue comeci caímareficaillena, ona eo cioacadícue. Navui cue o facadoia, o eiana comecítícue.

⁵ Cristo Jesús o ñnuana dane jiaí comecítícue. O usuño Loidadí ñnote. O ei Eunicedí jiaí ñnote. Ie mei ñnotío. Naimiena o ñnuana jai uiñotícue.

⁶ Ie jira o comecina dane ocuiño, Jusiñamui uai o llofuellena. Cue onolli o ifogímo navui joneticue, ona fetollena, naimie uaina o llollena. Jusiñamuimona o baitajacinona naie facaiseconi feiñotío.

⁷ Jusiñamuidí cominina o jaciruillana jitaíñede. Cai comeciaina ocuiñotajanona, caina jiaíe cominina isiruitallena, cai comeciaina eenotallena, ie Joreño caímo fecade.

⁸ Ie jira cai Nama rafuena o llwana meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidícue. Naie rafue muidona duere o jiaí sefuia, rairuioícaíñeno i. Jusiñamui o comecina ocuiñotaite.

⁹ Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotaíñede; iadedí naimie jitailla jira, caina jillotate. Eníruie nia finoñena facaiseconi caina jaie duenaite. Cristo Jesús caina iena jai uiñotade.

¹⁰ Cai Jilloitaraimadí Cristo Jesús. Caímo Jesús jai bairia jira, Jusiñamui caina duenailana jai uiñotícaí. Fiodaillamona naimie jai jillode. Iemona jiaí jilloitícaí. Naimie mare rafuemona naimie caina Jusiñamui díbeimo jaca illacinona jai uiñotade.

¹¹ Bie rafuena llollena, cuena fetode. Cuena oretaja jira, buena llofuetícue.

¹² Ie jira duere sefuidícue; iadedí cue illana meiruiñedícue. Cue ñnogamiena cue uiñua jira, naimie bille dinori naimiedí nana cuemo naimie jai iga rafuena cue llofuellena, cuena raise eenoite.

¹³ Cue llua isoi o i. Uanaicinona llotícue. Cristo Jesús ñnocana o jai. Jiaíe cominina isiruicana o jai, Cristo Jesús mo o jainaiáilla jira.

¹⁴ Jusiñamui Joreño caímo illa jira, omo naimie lloga uanaicinona faínonocaiñeno uiuicai. Uanaicinona o faínonocaiñellena, naimie ona canoite.

¹⁵ Diga Asiamo ite cominidí cuena faínonocaidímací. Naimacimona Figelo cuena faínonocaide. Hermógenes cuena jiaí faínonocaide.

¹⁶ Onesíforo daje isoiñede. Diga icaiño naimie cue comecina ocuiñotade. Cuena meiruiñede. Cai Namadí Onesíforo jofomo itino duenailasa.

¹⁷ Romamo Onesíforo navui ria, cuena isire jenuano, cuena baite.

¹⁸ Efesomo jaie cue ia, naimie cuena jiaí canode. Iena raise uiñotío. Cai Nama íco abído bia, cai Namamona naimie íba feiñuana jitaídícue.

2

O maijia rafuena raise fuido

¹ Cuená fáinonocaidino isoi iñeno; iadedi cue jito, Cristo Jesús ona canuano, Cristo díbeimo o comecina ocuiñocana jai.

² Díga cominimo cue llwana navui cacadio. O uaina ñnotinomo cue llwana llono, iena jiaie cominina naimaci llofuellena.

³ Cristo Jesús rafue muidona duere o sefuia, rairuioicaiñeno i. Cai Nama rafuena o riiduamona, naimie soldado isoidio.

⁴ Ie illaíma uai naimie ñnoiacania, soldadodi soldadoñede rafuena maijiacaiñena. Ie illaíma iobitallena, ie illaíma ocuica rafuena finoacanite. Ie isoide. Da Cristo Jesús rafuena o fino, naimiena iobitallena.

⁵ Reglamientos llua isoi naimie raise jifanoñenia, jifanoraímadí bue isoide rana cioñede. Ie isoide. Ibana o feiñollena monamo o jaiá, Cristo Jesús lluado raise o jai.

⁶ Illimo duere maijiraímadí maijia jira, naiemona naie guilledí oga. Ie isoide. Duere o maiji, ibana feiñollena.

⁷ Cue llwamo o comecina facacabi. Cai Nama ona canoite, iena uiñollena.

⁸ Jesucristo fiodaillamona jillode. Iena comeci. Naimie usumadí David micori. Jesucristona cue llua jira,

⁹ marañedimie isoi cárcolmo duere jai sefuidícue; iadedí Jesucristo rafue nia llocana jaide.

¹⁰ Ie jira Jusiñamui fetocano facaina duere sefuidícue, Cristo Jesúsna naimaci ñnuamona naimaci jilloillena, monamo naimaci jaca illena.

¹¹ Bie lluacínodí uanaicino:

Naimie díbeimo cai jaillamona, naimie díga jaca iitícaí.

¹² Naimie muidona cai duere sefuia, naimie díga iitícaí, ie cominina naimie sedalle facaiseconi.

Naimiena cai janoia, naimie caina jiaí janoite.

¹³ Naimie raise cai ñnoñenia, naimie uai meidoñena muidona, naimiedi nia ñnogamie.

Timoteo illa rafue

¹⁴ O cominimo buena dane llono, iena comecillena. Jusiñamui facaina naimacimo llono: Uaina jamai uaitañeno, mare rafuena naicinomona comuiñena jira, naicinona cacadino comeciaina maretañena jira.

¹⁵ Marena maiji, Jusiñamui ori iobillena. O meiruiñellena, naimie o maijia jibuia, marena maiji. Uanaicino o uiñuamona, naimie uaina marena raise llofue.

¹⁶ Jamai ñaiana cacarefiñeno. Comini jamai ñainoicaia, Jusiñamui jitailla rafuena finocana jaiñedimaci.

¹⁷ Díga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiaí jaide.

¹⁸ Uanaicinona fáinonocaidiaímaiaí. Coco ñnua isoi, llofueñediaímaiaí. “Cai fiodaia, cai abí íco jilloñeite” llofuetiaímaiaí. “Cristona cai ñnua facaise jai jillodícaí. Cai fiodaia, cai joreño jaca iite” llofuetiaímaiaí; iadedí cai abí íco jillollena ñnoñediaímaiaí.

¹⁹ Ie ia Jusiñamui comini jaca ñnocana jaidimaci. Ie cominimo Moisés micori jaié llua-mona, iaímaiaí finoca rafuena jiaí ñaite: “Jusiñamuidí ie cominina uiñote. ‘Jusiñamuina ñnotícue’ raitimiedi marañede rafuemona eneno illasa” llote. Ie jira iaímaiaímona eneno o i.

²⁰ Ero, ucuberedimie jofomo díga guillirue joneuilla ra jai ite. Eo jitairede rana jai ite. Janore jitairede rana jiaí jai ite.

²¹ Ie isoide. Jusiñamui díbeimo itinomona naga isoide comini ite; iadedí jeacinomona eneno bu ia, Jusiñamui naimiena fetoite, ie eo jitaillé rafuena finollena. Jusiñamui díbeimo raise maijiite.

²² Ie jira conirueni comeciai jitailla maraiñede rafuemona eneno o i. Marena i, Jusiñamui jitailla isoi. Jesucristona ñnocana jai. Nana cominina isirui. Uri i. Mare comeciainona nana cai Namana sedadino diga iese i.

²³ Jamai ebena rafuemo iñeno. Naiemona icirillacinodi comuide. Iena uifnotio.

²⁴ Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Ricaiñena.

²⁵ Naimie uaina jitaiñedinona fecuise llofuega. Ie mei Jusiñamui naimaci comeciai iuaina nibai meidotaite, uanaicino dibeina uifnollena.

²⁶ Ie mei abi uifnuanona, Taife anamona jilloitimaci. Taifedi naimacina ie anamo jai itatate.

3

Jusiñamui ñibeimo iñedinomona abina rairui

¹ Bie llucainomo comecina raise faca. Jesucristo abido bille facaise iairei ia, creyentena illena eo sefuirenite.

² Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biruitimaci. Jusiñamuina eo jeare ñaitimaci. Naimaci moo uaina, naimaci ei uaina ñinoñeitimaci. Jiaie cominimo iobillacinona jaca fecañeitimaci. Jusiñamuina jaca jitaiñeitimaci.

³ Jiaie cominina duenaiñeitimaci. Comeciaina jaiarenitimaci. Jiaie comini joreñona eo jeare ñaitimaci. Naimaci comeciaina eenoñeitimaci. Ebe isoi naga rana duere finoitimaci. Mare rafuena jitaiñeitimaci.

⁴ Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciai jitailla rafuena finoacanitimaci. Jusiñamui rafuena isiruiñeitimaci.

⁵ “Jusiñamuina sedadicaí” raitimaci; iadedi Jusiñamui uaina jamaitimaci. Bie isoide comini diga nabairiñeno.

⁶ Naimacimona dajerie jiaie jofuemo macaritimaci, naie jofuemo ite riñoniaina jifuianona llofuellena. Diga jearede rafuena finuano, naie riñoniai ebena itimaci. Naimaci comeciai iuailai raire meidocana uitimaci.

⁷ Naga lloraima lluomo naiñaiñuai cacareidimaci; iadedi uanaicinona jaca uifnoñedimaci.

⁸ Naimaci comeciai eo maraiñede. Jusiñamui uaina ñinoñedimaci. Jannes, Mambres diga, Moisés micori lloga uai jaie uaitatiamai. Ie isoi bie comini uanaicinona birui jiai jitaiñedimaci.

⁹ Nana comini naimaci rafue jamai ebe isoi finoca rafue uifnuamona, Jannes iaímaiaí Mambres rafue jaie fuilla isoi, naimaci rafue raire fuite.

Timoteo uanaicinona ñnuanona jailla

¹⁰ Timoteo, cuena uifnotio. Cue llofuiana uifnotio. Cue illana uifnotio. Cue jitailla rafuena uifnotio. Cristona cue ñnuana uifnotio. Icirineno fecuise lloticue. Cominina isiruiticue. Duere cue sefuia, cue comecina ocuifnoticue. Iena uifnotio.

¹¹ Antioquíamo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade.

¹² Jusiñamui jitailla rafuena finuano, Cristo Jesús uaido jaidinodi duere sefuitimaci.

¹³ Ie facaiseconi maraiñedinodi maraiñede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci;

¹⁴ iadedi cue llofuia uaido ñnocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie ñnotio.

¹⁵ O uruenamona Jusiñamuina mare ciegafuiaina cacadio. Naie ciegafuiaí cai jilluana caimo llote. Cristo Jesúsna cai ñnuamona, jillobidicaí. Iena caimo jai llote.

16 Comini nana naie ciegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie ciegafuia Jusiñamuimona ite. Cominimona iñede. Ie jira naie ciegafuiaimona uanaicinona uñoticaí. Cai marañedicinona caimo llote. Cai comeciaí marena illena, Jusiñamui jitailla isoi, caimo llote.

17 Iese llote, naimiemo cai duillamona, nana Jusiñamui rafuena cai raise uñollena. Raise uñuamona, Jusiñamui rafuena raise llofuereniticaí. Naga Jusiñamui jitailla rafuena jiaí raise finoreniticaí.

4

1 Jiairuido Cristo Jesúsdi illaimana eniruemo abido biite. Illaíma isoi ie cominina sedajite. Naimiena ñnoñenamona nia cajedinona duere finoite. Jai fiodaitinona jillotajanona, naimiena ñnoñenamona, naimacina duere finoite. Jusiñamuidi birui caína jaca ciode. Cristo Jesús birui caína jaca ciode. Iena cue uñuamona, bie uai omo lloiticue.

2 Naimiena ñnoñedinona Cristo duere finoñellena, naimie rafuena naimacimo jaca llono. Comini o dafaífia, comini ofia, comini o dine ria, naimacimo iena lloitiosa. Naimaci jitaia, llono. Jitaiñenia, jiaí llono. Jeacinona bu finoia, naimacimo llono. Marena naimaci illena, naimacimo llono. Fecuisse jaca llofue.

3 Jiairuido dajerie uanaicinona jitaiñeitimaci. Jiaífueña jitaitimaci. Naimacimo dani naimaci cacaacana rafuena lollena, diga llofuerainina jenoitimaci.

4 Uanaicinona fañonocaida, ñgaaí icinuaído facajitimaci.

5 Timoteo, o comecina eeno. Duere o sefuia, rairuioicaíño i. Jesucristo rafuena llocana o jai. O llofuiacinona marena fuido.

6 Jai iarei ite cue meinellirui.

7 Cai Nama rafuena llocana cue jaillano, iena marena jai riidotícue. Cue illa ñinori jai fuiacade. Cai Namana fañonocaiñedicue.

8 Cai Namamona marena cue illa jira, monamo íbana feiñoitícue. Iemo jai ocuridícue. Iena cai Nama cuejena eenote. Naimie abido billirui iena feiñoitícue. Caína raise uñuamona, dama cuemo fecañeite; iadedi nana naimie abido billena jitaí ñonomo íbana jiaí fecaite.

Pablo damierena ñaia rafue

9 Timoteo, raire cue dine bi.

10 Biniemo ite rafuena Demasdi eo ebiruilla jira, Tesalónicamo naimie jaillano, cuena fañonocaide. Galaciamo Crescentedi jai jaide. Dalmaciamo Tito jai jaide.

11 Dama Lucas cue diga ite. Marcos o diga atí. Cuena canollena, naimiena jitaídícue.

12 Efesomo Tíquicono oredícue.

13 O bia, cue fiebide ñinroina atí. Troasmo Carpio jofomo fiebide. Cue libros atí, cue rabiaí diga.

14 Alejandro raillamie navui cuena jeare finode. Naimiedi lloeomona rana finoraíma. Cai Nama naimiemo íba oite.

15 Naimiemona o abí rairui. Naimie cue lluaña eo jitaíñede. Iena uaitate.

16 Illaícomini dine cue rafue nano cue riidoia, jaca buna cue facaina riidoñede. Nana cuena fañonocaidimaci. Jusiñamuidi naimacimo íba uana jitaíñedicue.

17 Cai Nama cue facaina ite. Cue comecina ocuiñotade, nana judíuaíñedinomo naimie uai raise cue lollena. Naimie muidona cue fiodaisaillanomona jillobidícue.

18 Cai Nama naga marañede rafuemona cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaídícue.

Fuiduacino

19 Diga cominimo cue uai oredícue: Priscamo, Aquilamo, Onesíforo jofomo itinomo.

20 Corintomo Erasto fiebide. Miletomo Trófimo duide fañonocaidícue.

²¹ Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentiai.

²² Cai Nama o comeci ocuiñotajasa. Naimie nana omoina duenaillasa. Mai. Pablocue.

TITOMO PABLO ORETAGA RABE

Uaiduacino

¹ Tito, omo cartana oretaiacadie. ¿Nigacino? ¿Nie isoidio? Pablodie. Naimie cominina cue illamona, naimie jitailla rafuena cue finuamona, Jusiñamui anamo llofuecabitie. Ie rafuena llofuellena, Jesucristo ie oretagamiedie. Jusiñamui fetocanona inotallena, naimacina uanaicinona uinotallena, Jusiñamuina naimaci raise sedallena, cuena oretate.

² Naimie diga jaca cai illemo cai ocurilla jira, Jusiñamuina sedadica. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede.

³ Iemei naimie jitaillarui caina ie rafuena jai uinotade. Naie rafuena cue lollena, naimie cuena oretate. Naimiedi cai Jilloitaraima.

⁴ Tito, bie carta omo cuetie. Cue isoi o inua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaia ona jai duenaitiaiaiaia. Iena uinocana mai o jai. Ona uri jai itatatiaiaiaia. Iena uinocana mai o jai.

Creyentiaina sedaraini illacinuai

⁵ Nainomo ite rafue o fuidollena, Creta railla uiasimo ona fainonocaidie. Creyentiaina sedallena, naga naira illanomo llofueraina o fetuana navui omo llotie.

⁶ Creyentiaina llofueraina o fetoa, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruia creyentiaina itimie. Nana comini naimie uruia mare raillamie. Naimie uruia ie uaina inotimie.

⁷ Jusiñamui facaina naimie maijia jira, creyentia sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena.

⁸ Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua.

⁹ Naie uai raise llofuiamona comini comeciaina ocuinotallena, naimie uaina uaitatona llucaitallena, cai llofua isoi uanaicinona inocana naimie jailla.

¹⁰ Ie isoidinona feto, ailluena comini Cristo rafuena raise inoñena jira. Tainocinuaina ñaicabitimaci. Cominina jifuecabitimaci. Judíuai creyentiaimona diga comini iese itimaci.

¹¹ Ie jira naimacina llucaita. Naimacidi diga cominina uri itatañedimaci. Uanaiñedicinona llofuetimaci, ucube bifuiano ollena.

¹² Naimacimona comini rafuena loraia navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillaredimaci. Rairaedimaci” raite.

¹³ Naimiedi uanaicinona llote. Ie jira creyentiaimo riire llono, naimaci Jusiñamui uaina raise inollesa.

¹⁴ Judíuai igaiaina naimaci inoñellena, comini lletarafuena naimaci inoñellena, naimacimo riire llono. Damierie uanaicinona jitañedimaci.

¹⁵ Ero, mareuidinomona naga ra mare. Jusiñamuina inoñedinomona naga ra jearede. Naimaci comeciadi jai jearena jira, jearerie comeciaina facacabidimaci.

¹⁶ “Jusiñamuina uinoticaia” raitimaci; iadedi Jusiñamuina uinoñedimaci. Naimaci finoca rafuemonona iena uinoticaia. Jusiñamui naimacina eo gaiñede. Buena inoñedimaci. Ie jira mare rafuena finuana uinoñedimaci.

2

Creyentia marena illena, uanaicinona llofue

¹ Tito, Jusiñamuina inoñedino isoi iñeno. Odi uanaicino llofue, naimaci marena raise illana uinollena.

² Uaicimaiaina llofue. Canamacina jiai llofue: Jifaiñeno. Hinogamiena jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefua, omoi comeciaina ocuiño.

³ Uaicinuaina llofue. Cañaiñuaina iese jiai llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuiai mare rafuedo jaitimaci.

⁴ Naiñaiñuiai inina isiruillena, naiñaiñuiai uruiaina jiai isiruillena,

⁵ uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuiai iniñiaia uaina ñnollena, jiaie comini Jusiñamui uaina jamaiñellena, naie cañaiñuaimona fueoitimaci.

⁶ Einamacimo llo. Coniruenimo jiai llo: Ieñede ramo omoi comeciaina facañeno. Uairico isoi iñeno.

⁷ Tito, naga rafue o finua diese, mare rafuedo o jai. O llofua, uanaicinona llo. Jamai ebe isoi llofueño.

⁸ Marena llofue. Marena o llofua, ¿ñiese comini o uai uaitaitimaci? Uaitañeitimaci. Iemei o dibeimo iñedino meidaitimaci, caimo jearede rafue iñenia. Ie jira cairi ñaiñeitimaci.

⁹ Patrón anamo itinomo iese llo: Omoi patrón uaina ñno. Naimie jitailla rafuena raise fino. Naimie uaina oñeno.

¹⁰ Rana fiñeno. Naimie raruiat raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai Jilloitaraima.

¹¹ Jusiñamui caina duenailana jai cai uiñua jira, naicinona llofue. Naimiedi nana cominina jillotaiacade.

¹² Naimie uai caimo llote: “Cue dibeimo iñede rafuena eneno faionocai. Maraiñede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide.

¹³ Jiai caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiai cai Jilloitaraima”.

¹⁴ Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote.

¹⁵ Naie rafuena llofue. Maraiñede rafue comini finoia, naimacimo llo. Illaima uai isoi llo. Cominidi o uaina jamaiñellena, raise llofue.

3

Creventia illacinuai

¹ “Omoi illaicomini uai anamo i” creventiaimo dane llo. Omoi illaicomini llucinona ñno. Mare maijille ia, iena raise fino.

² Jiaie cominina jeare ñaiñeno. Furiñeno. Fecuisse uiuicai. Nana comini diga marena ñaino.

³ Jiaie cai jiai ebe isoidicai. Jusiñamuina ñnoñedicai. Taife caina jifuate. Dani cai comeciata jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai.

⁴ Ie ia Jusiñamuidi maremienana jai fididicai. Naimie caina isiruillana jiai fididicai.

⁵ Ie mei Jusiñamui caina jillotate. Mare rafuena cai finoñedicai; iadedi caina duenailamona, caina jillotate. Cai jeacinona oni dotajanona, cai comeciaina dote. Ie jira naimie dibeimo cai comeciaina dobaiñoticai. Jusiñamui Joreño cai comeciaina marena finode.

⁶ Ie Joreño caimo raise fecade, Jesucristo finua muidona. Jesucristo cai Jilloitaraima.

⁷ Ie jira naimiemona marebicaidicai. Caina duenailamona, marebicaidicai. Caina ie cominina itatate. Iemona naimie diga jaca illemo ocuiridicai.

⁸ Tito, cue llucacínodi uanaicino. Jusiñamuina ñnotino marena maijillena, cue llucacínona llo-llocái. Cue llucacino mare. Ie jira nana comínidi iena cacacabillasa.

⁹ Ebena ñaiño. Omoi usumatiai mameciaina jamai sia-siadoño. Moisés micori llogacínuaína uaitaño. Naicino diga buena oñedícaí, Jusiñamui jitaillacínona caí finollena.

¹⁰ Roracomo comini comeci jiaifocaitatimie ia, naimiemo llono: “Tena finoño”. Dacaiño o llumona naimie ñnoñenia, dane llono. Ie mei ñnoñenia, naimie diga omoi ñaiño. Naimie diga omoi nabairiño.

¹¹ Uanaicínodo naimie jai jaiacaiñede. Jeacínona jai finode. Naimie iena jai uiñote.

Fuiduacino

¹² Artemas o ñine cue oretaia, Tíquico o ñine cue oretaia, Nicópolis railla nairaimo are sedaño raire bi. Nainomo rollime facaiseconi cue comeci illana jitaide.

¹³ Zenas railla abogado Apolos iaímaiaí diga cano, iaímaiaí oni jaiacana jira. Iaímaiaí jitaile rana feca.

¹⁴ Dueredino ia, naimacína canollena, creyentiaímo: “Marena maiji” jiaí llono. Naimaci jamai iñellena, iese llono.

¹⁵ Cue diga itino naimaci uaina omo oredimaci. Jesucristona caí ñnua jira, caína isiruitinomo cue uaina llono. Jusiñamui nana omoína duenailana uiñocana omoi jaillana jitaídícue. Mai. Pablodícue.

FILEMÓMO PABLO ORETAGA RABE

Filemómo Pablodi carta orede

¹ Filemón, bie carta o dine oredicue. ¿Nie isoidio? Pablodicue. Jesucristo rafue cue lluamona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusiñamuimo jai cai jainaiailla jira, naimiedi coco ama. Coco diga Cristo facaina o maijia jira, ona isiruiticoco.

² Coco uaina Apiamo jiai oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena ofcabinomo coco uaina jiai oredicoco.

³ Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoi jai. Iaimaia omoina uri jai itatate. Iena omoi uiñocana mai omoi jai.

Filemón Cristona ñnocana jaide

⁴ Jusiñamui diga cue ñaia, o facaina cue jiaa, naimiemo iobillacinona fecadicue. Mare rafuena o finuana cue fidia jira, naimiemo iobillacinona fecadicue.

⁵ Cai Nama Jesúna ñnocana o jaillana fididicue. Nana creyentiaina o isiruillana jiai fididicue.

⁶ Cristo dibeimo cai illa muidona, naimiemono diga marecinona feiñotica. Cristona o ñnuamona, jiaie creyentiaina o nabaia, omona naie marecinona uiñoitimaci. Naga mare ra uiñocana naimaci jaillana jitaidicue.

⁷ Cue ama, creyentiaina o isiruilla jira, iobidicue. O muidona creyentiaie comeciaie camare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue;

⁹ iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue.

¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jitona jaide.

¹¹ Omo naimiedi marañede rafue navui finode. O mullaïma naimie illanona, raise maijñede. Bene aisiamona, Cristona naimie ñnote. Cueno birui eo canode; iadedi birui o diga raise iacade.

¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jiai oretaiticue.

¹³ O facaina naimie cuena birui canode. Cue diga naimie fiebillana jitaidicue;

¹⁴ iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitañedidicue; iadedi dama o comeci jitailla jira, mare rafuena o finuana jitaidicue.

¹⁵⁻¹⁶ O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaïma; ia naimiedi jiai birui o ama. Naimiena isiruillanona feiño.

¹⁷ O nabaina iticuena cuena o feiñua isoi, naimiena feiño.

¹⁸ Naimie marañede rafuena omo navui finode. Omo naimie nia debia, cue facaina jone.

¹⁹ Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o ñnua jira, ailluena cuemo debedio.

²⁰ Cue ama, coco Nama Cristomo coco jainaiailla jira, cue jitaille rafuena fino. Ie mei cue comeci uri iite.

²¹ Cue jitailla rafue o finollena uiñoticue. Cue jitailla rafue baifemo o finollena uiñoticue.

²² Jiaie rafuena lloiacadicue. O jofomo daje cuarto cuejena fino. Cue facaina o jiaia, Jusiñamui jitaia, o dine jaiticue.

Damierie imaci uaina jiaie orede

²³ Omo Epafrae ie uaina orede. Jesucristo rafue llua muidona, cárcelmo cue diga naimie ite.

²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide.

²⁵ Cai Nama Jesucristo nana omoi creyentiaie comeciaina ocuiñotajamona omoia duenaillasa. Mai. Macaibaite. Pablodicue.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaína orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaína orede;

² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote.

³ Ie Jito uaido nana naie rana finocana uite. Naimie muidona Jusiñamui marena ebire-nana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisaí baífemo faite

⁴ Jusiñamui Jitona naimie illamona, naimie illano Jusiñamui jaienisaí illano baífemo faite. Ie illanomona naimie Jusiñamui jaienisaí baífemo faiana uiñoticaí.

⁵ Jusiñamuidi: “Cue Jitodio” Cristomo llote; iadedi ie jaienisaímo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisaí ie Jito baífemo fañena jira, ie jaienisaímo iena jaca lloñede.

⁶ Ie dajede Jito eniruemo oretaja facaiseconi Jusiñamui llote:

Nana cue jaienisaí naimiemo iobillacinona fecaja;

⁷ iadedi jiaie rafuedo ie jaienisaína ñaite:

Cue ocuilla rafuena naimaci finollena, cue ocuilla diese naimacina oretacabiticue.

⁸ Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

⁹ Mare rafue finuana jitaidio.

Maraiñedicinona finuana jitaiñedio.

Ie jira ona caimare jai itataticue.

Monamo o abido billanona, cue jaienisaí baífemo ona caimare itataticue raite.

¹⁰ Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jiai finodio.

¹¹ Bie eniruedi mona diga ico fuite.

Iniroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite.

¹³ Ie Jitomo buena llote; ia ie jaienisaímona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o dibeimo iñedinona o anamo itataticue.

¹⁴ Ie jaienisaïmo iena lloñede; iadedi naimacina oretacabite, ie Jitona ñnotinona canol-lena. Ie jira nana naiemona, ie Jito ie jaienisaï baifemo faiana uiñoticaï.

2

Jusiñamui caina jillotaja rafuena cai jamaiñena

¹ Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai ñnuasa.

²⁻³ Ero, Jusiñamui ie jaienisaïna jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise ñnoñenia, Jusiñamui naimiena eo duere finode. Jusiñamui jaienisaï lloga rafue mare; iadedi Cristo birui lloga rafue jaienisaï jaie lloga rafue baifemo faia jira, Cristo rafuena cai ñnoñenia, Jusiñamui caina duere finollemona ua jilloñeiticaï. Ero, naimie cai jeacinomona caina jillotaiacade. Naie rafuena cai jamaia, iena cai ñnoñenia, naimie caina duere finollemona ua jilloñeiticaï. Cai Nama Cristo naie rafuena jaie llote. Naimiena cacadinodi caïmo iena jai llotimaci. Cristo rafuedi uanaicinona llotimaci.

⁴ Jusiñamui uai diga jiaiforiède siño rafuena naimaci finuamona, Cristo rafuedi uanaicinona uiñoticaï. Naimie jitailla diese naga creyentemo Jusiñamuidi ie uaina itatate. Naga creyente naimie dibeïmo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticaï. Ie jira naie rafuena cai ñnuasa.

Cai isoi illena, Jesucristo ñmana jaide

⁵ Jusiñamuidi ie jaienisaïna oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote.

⁶ Jusiñamuïmo David micori iena jaie llote: Cai jamaï bue isoidicaï; iadedi caïmo começina facadio. Jamaï cominidicaï; iadedi caina canodio.

⁷ Caina cominina o finua jira, o jaienisaï isoi iñedicaï. Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

⁸ Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira.

⁹ Jesúna dane lloiticue. Naimiena uiñoticaï. Eniruemo naimie jaie billamona, Jusiñamui ecimona naimie billa jira, Jusiñamui jaienisaï illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abïmo naimiena Jusiñamui abido itatajamona, Jusiñamui naimiena iobitade.

¹⁰ Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicaï. Naimie illanomo ico iiticaï. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena ñnotinodicaina jai raise canorede.

¹¹ Naimie fiodaillamona marebicaidicaï. Naimie dibeïmo jai cai illa jira, daajena mooredicaï. Ie jira naimiedi: “Cue cominidomoi” caina meiruiñeno llote.

¹² Jusiñamui facaina lloraini micoriaï llogacinomona naie rafue uanaicinona uiñoticaï. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuïmo roitimaci jaie llotimaci.

¹³ Jesúna dane ñaitimaci:

Ie comini diga naimiedi Jusiñamuina ñnocana jaite.

Jusiñamui cominina damierie jailla jira, naimacidi jiai naimie comini ñaitimaci. Naimaci ñaia isoi, Jusiñamui cominina birui jaidicai.

¹⁴ Jusiñamuina ñnotinodi cominina jira, cai isoi naimie illena, Jesúdi comena jaide. Cai fodailla isoi, naimie jiai fodaite. Taife uaina cai ñnoia, jeacino finodicai. Iemona fodaicana jaidicai. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui ñibeimo ñnenanomona jai jillodicai.

¹⁵ Jesús nia fodañenia, nana cai illa dinori fodaillana jaciruicana jaidicai. Jesús jai fodailla jira, caina jaciruillacino anamona jillobitade.

¹⁶ Jeacino anamo naimaci ñena jira, Jusiñamui jaienisaimo ie comecina facañede; iadedi Abraham micori isoi ñnotinomo naimie comecina facade. Naimacina naimie jilloitalena, naimiedi comena jaide.

¹⁷ Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faimona, naimie fueollena, naimiena orede. Cai illana raise uñote. Iemona caina dueruite. Jusiñamui jitaillacino finuana raise uñote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamuimo jicanote.

¹⁸ Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie ñnoñena jira, caina canorede. Taife uaina cai finoñellena, cai comeciaina ocuiñotade.

3

Jesús Moisés micori baifemo faite

¹ Cue amatiai, jeacino anamo omoi jai ñena jira, ie ñibeimo omoina Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena lollena, Jusiñamui naimiena orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima.

² Ie Moo cominina naimie raise sedajanona, naimiedi ie Moo uaina ñnuanona, iena finode. Nana Israel cominina naimie sedajanona, Moisés micori Jusiñamui uaina ñnuanona, iena finode.

³ Jusiñamuimona Jesúdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúri Jusiñamui iobide. Cai jillua jira, Jusiñamui cominina jaidicai.

⁴ Buena cai finuamona, naimie cominina jaiñedicai; iadedi naimie caina ie cominina dama itatarede.

⁵ Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiemonona Jusiñamui ño lolle uaidi uanaicinsona uñoticaí.

⁶ Jusiñamui facaina maijianona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñnocana jaia, naimiemo caimare cai ocuiria, Jusiñamui ua cominidicai.

Jusiñamuimona abido cai jaiñellena, bie rafuemona cai fueua

⁷ Jusiñamui Joreño caimo birui lloia, iena cacarei. Ero, Jusiñamui jaie lluana cuetatate:

⁸ Omoi jaiagai isoi ñeno.

Jofue ñnenanomo omoi jaiagai ia, cue uaina ñnoñedimaci.

⁹ “Naimie uaina raise uñoticaí” raillanona, cuena facacacabitimaci.

Cuarenta años cue siño finoca rana ciodimaci; iadedi jaca ñnoñedimaci.

¹⁰ Naimacimo lloticue: “Omoi diga iciriticue.

Cue ñibeimo omoi illamo omoi comeciaina facañedomoi.

Cue lloga uaido jaiacaiñedomoi”.

11 Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

12 Cue amatiai, cai jaiagai rafuena cai uiñuamona, cai fueua. Uanai Jusiñamuimona abido omoi jaiñellena, naimie jai lloga rafuena omoi ñnocana jai. Omoimona bu raise ñnoiacañenia, naimiemo llono.

13 Jusiñamui rafuena omoi raise ñnollena, nagarui conini omoi comeciaina ocuiñota. Omoimona jeacinona ebiruiñellemona, jeacino anamo omoi iñellesa, birui Jusiñamui rafuena raise ñno. Jeacino anamo omoi dane jaia, Jusiñamui rafuena ñnoñeitomoi. Iemona naimie riicallafue anamo dane iitomoi.

14 Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiena cai nano ñnua isoi, cai ñnocana jaia, marena caimare iiticaí.

15 Ie jira naimiena ñno. Bie jaie cuega:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci cuega. Naimaci isoi iñeno.

16 Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise ñnoñedimaci.

17-18 Cuarenta años jofue iñenanomo itimaci; iadedi naimiena naimaci ñnoñena jira, Jusiñamui naimaci diga icirite. Naimiena ñnoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fiodaitimaci.

19 Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciái jaca uri illana uiñoñedimaci.

4

1 Jusiñamui dibeimo raise cai illamona, Jusiñamui cai comeciái birui uri illana jitaide. Naimie lloga uai nia saiñede. Caimona damierie iese iñellesa, cai jaiagai isoi cai iñellena, abina rairuicana mai cai jailla.

2 Jusiñamuidi comini comeciái uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci ñnoñena jira, iemona buena oñedimaci.

3 Jusiñamuidi cai comeciái uri illana birui caimo jai llote. Cristo ie mare rafuena jai cacadicaí. Naimie uaina cai ñnua jira, cai comeciái jai uri ite. Cai jaiagai comeciái uri iñede. Moisés micori cuiamona iena uiñoticaí. Cuega:

Naimaci diga Jusiñamui icirilla jira, naimacimo lloga eniruemo jaiñedimaci

Comeciái uri illana jaca uiñoñedimaci

cuega. Jusiñamuidi nana comini comeciái uri illana jitaide. Eniruena naimie finocamo, comini comeciái uri illana jitaide.

4-9 Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciái uri illana nia jitaide. Moisés micori facaise cai jaiagai comeciái uri illana jitaide; iadedi naimiena naimaci ñnoñena jira, naimaci comeciái jaca uri iñede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñnoñena jira, naimaci comeciái jaca uri iñede. Josué micori illa facaisemona diga años illanona, David micori comeciái uri illana jiaí llote:

Naimie uaina birui omoi cacaia, iena ñno

llote. Naimiena Jusiñamui cai comeciai uri illana jitaillana uiñoticaí. Naimiena ñnotinodicaímo naie rafue jai duide.

¹⁰ Jusiñamuina cai ñnuamona, cai comeciai jai uri ite. Cai comeciai uri illena, jiaie rafuedo jaiñedicaí. Naimiena cai ñnuamona, naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

¹¹ Cai jaiagai ñnoñedimaci. Cai faifiñellena, naimaci isoi cai jaiñena; iadedi Jusiñamui uaina ñnocana mai cai jailli. Jusiñamuina cai ñnuamona, naimiedi cai comeciai uri itatate.

¹² Naimiena cai ñnoñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaímo riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaímo iticinona riire bairetate. Nana cai comeciaina facajacinuaina riire bairetate.

¹³ Jusiñamuimona buna reirinide. Jusiñamui nana caina ciode. Nana cai finoca rafuena uiñote. Nana cai comeciaímo iticinona uiñote. Ie jira naimie uaina ñnocana mai cai jailli

Jesúdi cai facaina Jusiñamui diga nanoca ñairaima

¹⁴ Jesúdi naie uaina cai ñnuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abímo birui naimie illamona, cai facaina Jusiñamui diga naimie ñaicabite. Ie jira naimiena ñnocana jaiticaí.

¹⁵ Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie ñnoñede. Iemona Taife ramo faiacinona ñnoñenana naimie uiñua jira, jeacinona oñede. Caina canorede. “Naimacina cano” ie Moomo llocabite.

¹⁶ Cai facaina ie Moo abímo naimie illa jira, cai comeciaina naimie ocuiñotaiacana jira, Jusiñamuina jaciruiñeno naimiemo cai jia. Naimie caina duenailamona, cai jeacinona feitaite. Cai comeciaina jiai ocuiñotaite.

5

¹ Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticaí. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaima Jusiñamui diga ñaite.

² Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui ñbeimo raise jaiñedinona fecuise canorede.

³ Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

⁴ Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí.

⁵ Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie ciegafuiaimona iena uiñoticaí. David micori Jusiñamui llua jaie cueda:

Cue Jitodio. Jai o Moodicue
cueda.

⁶ Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

⁷ Eniruemo Cristo ia, imana naimie jailla jira, duere sefuide. Naimie fiodaiana cana iaiei ia, Jusiñamuimo eo jide. Naimie fiodañena Jusiñamui jillotarede; iadedi Jusiñamuimo ado llote: “Cuenallegi cacaitaño; iadedi cue comeci jitailla isoi finoñeno. O comeci jitailla isoi fino” llote. Jusiñamui uaina naimie raise ñnua jira, Jusiñamui naimie jiana cacajano fairiote.

⁸ Naimiedí Jusiñamui Jito; iadedí Jusiñamui naimiēna llegí cacatate. Iemona Jusiñamuina ñnocana jaca jaillana naimie uiñote.

⁹ Naimiēna ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiēna ñnotinona jillotaite.

¹⁰ Melquisedec micorí isoi comini facaina ñairaimana jaca illena, Jusiñamuidí naimiēna fetode. Melquisedec micorí uai jaca saiñena jira, naimie ifomo illena, jiaimēna jaca fetofede. Ie isoi Jesús uai jaca saiñede.

Cristo díbeimona abido danomo jaiñeno

¹¹ Bie isoide rafuena omoimo lloiacadicue. Bie rafue irirede; iadedí Cristo rafuena omoí raise cacaiñena jira, omoí comeciái iēna raise jitañena jira, omoimo iēna raise llonidicue.

¹² Cristo rafuena are omoí cacaja jira, iedo omoí raise jaidomoidēna, llofuerañina jaidomoi; iadedí iedo nia raise omoí jaiñena jira, jiaimie omoína llofuiana nia jitaïdomoi. Cristo díbeimo omoína itatate rafuena nia jitaïdomoi. Cristona nano omoí cacaja rafuena nia jitaïdomoi. Cristo rafuena ñnocana nia raise jaiñedomoi. Eo janorede janosa monoi ijina jitaicabide. Einamací isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iēna eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonaitē. Cristo rafuena are cacadomoi; iadedí janosa isoi nia itomoi. Nia moonaiñedomoi isoidomoi.

¹³ Janosa monoi ijina nia jitailla jira, naimie nia moonaiñenana uiñotícaí. Naimie nia abina uiñoñede. Jusiñamui jitailla isoi marecinona finuana nia uiñoñede.

¹⁴ Guilledí moonaitimie ie. Ie isoide. Cristo rafuedo raise jaidimiedí Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiaí uiñote.

6

¹ Díga icaiño bie rafuena jai cacadomoi. Cristona nano cai cacaja rafuena raise cai ñnuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo díbeimo caina itatañede rafuedo navui jaidícaí; iadedí cai comeciái iuai birui jai meidotícaí. Cristo díbeimo itatate rafuedo birui jaidícaí. Jusiñamuina ñnuamona, naimie díbeimo jaidícaí.

² Cristo díbeimo bautizajana jai uiñotícaí. Llofueraimana jaillena fetuana jai uiñotícaí. Creyentiañna naimaci sedallena, naimacimo cai onollí jonianona, Jusiñamuimo cai jñanona, naimaci fetuana jai uiñotícaí. Nana creyentiaí fiodaillamona jilluana jai ñnotícaí. Jusiñamuidí naimiēna ñnoñedinona ico jaca duere finollena jai ñnotícaí.

³ Naie isoide rafue mare; iadedí iēna cai raise ñnuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli.

⁴ Uanaicinona omoí comeciái uiñuamona, Cristona omoí ñnuamona, Jusiñamui Joreño omoimo illamona,

⁵ Jusiñamui uaina mare omoí uiñuamona, Cristo uai siñonana omoí uiñuamona, abido danomo omoí jaiñellena, abina rairuicana omoí jai.

⁶ Cristo díbeimona omoimona bu sofetena, jiaimie naimiēna jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitañena jira, Cristo fiodaillana jai jitañede. Cristona jeare jai finode. Cristo finoca rafuena jamaide. Cristona naimie jitañenia, ¿ñiese naimie jillobite? Jillobiñeite. Ie jira abido danomo omoí jaiñellena, abi rairuicana omoí jai.

⁷ Ero, iēna jiaie rafuedo lloiticue. Jusiñamui noci deitacabilla jira, enirue naimie riaticabilla jira, iemo riará sicuanona, iēna ie nama raitia, naiemona ie llisillana naimie uamona, Jusiñamui iobide;

⁸ iadedi naie eniruemona riara sicoñenia, maraiñede. Monaigi cuiraio diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fainonocaidé. Naie enirue isoidomoi. Jusiñamuimona mare rafuena cacadomoi. Iena ñnocana omoi jaia, naimie omoina iobitaite. Iena omoi jitaiñenia, naimiemona duere sefuitomoi.

Jusiñamui llua jira, cai comeciai ocuiñocana jaidicai

⁹ Cue isiruigaomoi, abi rairuillicinona omoimo lloticai; iadedi cai llofuiacino omoimo duiñenamo cai comeciaina facañedicai. Cristona ñnocana omoi jaillamo cai comecina facadicai.

¹⁰ Jusiñamui omoina raise uiñote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi.

¹¹ Omoi comeciainomona jiaie creyentiaina omoi canua isoi, Cristo rafuedo nana omoi ille dinori ñnocana omoi iocire jaillana jitaidicai. Naimie diga ico jaca omoi ille jira, iese omoi jaillana jitaidicai.

¹² Cristo rafuedo omoi jaillamona omoi sefuiruiñenana jitañedicai. Jusiñamui lloga uaina ñnocana jaidino isoi, omoi jaillana jitaidicai. Naimiena naimaci ñnuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiaí oitomoi.

¹³ Ero, Jusiñamuidi Abraham micorimo lloga uaina uiñotomoi. Naimiedi Jusiñamuina jira, uanaicinona llote. Tainona lloñede.

¹⁴ Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaina eo jebuitaiticue” llote.

¹⁵ Abraham micori naimie lloga uaina ñnote. Iena suillemo fecuise ocuride. Ie jito Isaac micori, Jusiñamui llua isoi, comuide.

¹⁶ Uanaicino cai llocabillana jiaie comini uiñollena, Jusiñamui mamecina llñnoticai. “Jusiñamui caina ciode” lloticai. “Uanaicinona cai lloñenia, Jusiñamui caina duere finoite” lloticai. Ie jira cai lloga uaina buna uaitañede.

¹⁷ Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uiñuana naimie jitaide.

¹⁸ Naimiedi Jusiñamuina jira, ie uai naimie jai llua jira, naimie tainona llonillana uiñoticai. Ie jira naimie lloga uai naimie finuana uiñoticai. Naimiena cai ñnuamona, naimie anamo cai illa jira, caina naimie eenua jira, cai comeciai ocuiñocana jaidicai. Naimie illanomo ico cai jaca illemo ocuridicai.

¹⁹ Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finollemo ñnoticai. Monamo Jusiñamui illanomo ico cai illena eo raise uiñoticai. Nainomo fiebillena, barco ie lloelluna illemo dotaja isoi, cai comeciai naganomo iñellena, Jesús caina eenote.

²⁰ Jesús nainomo jai illa jira, naimie muidona nainomo jiaí iiticai. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

7

Melquisedec micori illa isoi, Jusiñamui diga ñairaimana Jesús jaide

¹ Iena omoi raise ubiñollena, Melquisedec micori rafuena omoimo lloiticue. Naimie micoridi Salem railla nairai ie illaima. Naimiedi comini facaina cai Moo Jusiñamui diga ñairaima. Cinco illaimana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñotitcue” llote.

² Jusiñamui diga ñairaimana Melquisedec illa jira, naimiemo Abraham micorì dajerie rana fecade. Naie cinco illaimana anafetitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micorìdi Salem railla nairai illaima. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega.

³ Naimie moona, naimie eina, naimie cominina uiñoñedicaí. Naimie jeiciaruina uiñoñedicaí. Naimie fiodaillaruina uiñoñedicaí; iadedi Jusiñamui Jito isoi Jusiñamui mona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

⁴ Ero, cai cominimona Abraham micorì cai jaiagai baifemo faite; iadedi Melquisedec micorì Abraham micorì baifemo faite. Ie jira naimiemo ie décima facaina rana fecade.

⁵ Moisés micorimona Abraham micorì uruiaí Jusiñamui lloga uaina cacadimaci. Naimacimo Jusiñamui ie sedaja jofu finuana llote. Nainomo maijidinomo nainomo maijiana llote. Abraham micorì uruiaimona Leví railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona décima facaina rana feiñoudimaci.

⁶ Melquisedec micorimo Abraham micorìdi ie rana fecade; iadedi Melquisedec micorì Abraham micorì cominiñede. Leví railla nairai imieñede. Naisomo Abraham micorì dine Melquisedec micorì billanona, Abraham micorimo marecinona llote: “Jusiñamui ona jaca canoite. O diga jaca ite” llote.

⁷ Melquisedec micorì Abraham micorì baifemo faia jira, naie marecinona naimiemo llote.

⁸ Ero, Melquisedec micorimo Abraham micorì rana fecade; iadedi Melquisedec micorì fiodaillaruina uiñoñedicaí. Naimie uai saiñena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judíuai cominidi fecauidimaci; ia naie ñairaini fiodaicana jaillana uiñoticaí. Naimaci uai sailla jira, jiaino naimaci ifomo meidoudimaci.

⁹⁻¹⁰ Leví micorìdi Abraham jito. Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñoudimaci. Leví micorì nia comuiñenia, Melquisedec micorimo Abraham micorì décima facaina rana fecajamona, Abraham micorì Leví ie usumana jira, Melquisedec micorìdi Leví nairai baifemo faiana uiñoticaí. Melquisedec micorìdi Jusiñamui diga ñairaini baifemo faiana uiñoticaí. Melquisedec isoi Cristo illa jira, Cristodi Leví baifemo faiana uiñoticaí. Cristodi nana naie ñairaini baifemo faiana jiai uiñoticaí.

¹¹ Jusiñamui diga ñairaini finouilla rafuedo Jusiñamui jitailla isoi marebicaiñedicaí. Naimaci finouilla rafuedo cai jillobidicaídena, jiaie rafuena jitaíñedicaí. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiena orede. Caina jillobitallena, naimiena orede, jiaie rafuedo cai jillobiñena jira. Jusiñamui Moisés micorimo jaie llua isoi, comini facaina nano ñairaimadi Aarón micorì. Naimiedi Leví railla nairai imie. Naimie jitoniamona comini facaina ñairainina itimaci. Iena uiñotomoi. Aarón jitoniamona Cristo iñede. Aarón maijia rafuemo Cristo duiñede; iadedi Melquisedec rafuemo duide.

¹² Comini facaina ñairainina jaillana jai meidua jira, Jusiñamuidi naimaci rafuena jiai meidote.

¹³ Iena lloiticue. Aarón di Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamui rana fecauidimaci. Cristo naie nairaimo duiñede.

¹⁴ Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micorì jiaie jaca lloñede.

¹⁵ Cristo billa jira, Moisés micorí lloga rafue meiduana uiñotícaí. Melquisedec micorí illa isoi, comíni facaina ñairaimana Cristo jaca iite.

¹⁶ Moisés micorí lloga rafue isoi, Cristodí ñairaimana jaiñede; iadedí Jusiñamui uaido ñairaimana naimie jaide.

¹⁷ Jusiñamui lloga uaimona iena uiñotícaí. David micorí naimiena jaie cuega: Melquisedec micorí illa isoi, odí comíni facaina ñairaimana jaca iitío cuega.

¹⁸ Comíni facaina ñairaimana jaillena Moisés micorí jaie cuega. Naiemona jilluana comíni oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci.

¹⁹ Naiedo jaillamona, Jusiñamui jitailla isoi marebicaiñedícaí. Iedo birui jaiñedícaí. Jiaie rafuemo birui ocuridícaí. Cristo finoca rafue muidona, Jusiñamuina caí nabaillamona, Jusiñamui díga birui ñairedícaí.

²⁰ Jusiñamui llua jira, Cristo caí facaina ñairaimana jaide.

²¹ Leví micorí jitoníaidí imaci jeiciamona, comíni facaina ñairainina jaidimaci. Naga icaiño Jusiñamuidí naimacina ñairainina jaillana fetofede; iadedí ie lloga uaina jira, Cristo caí facaina ñairaimana jaide. David micorí Jusiñamui llua jaie cuega: Cue jai llua jira, cue llua finoitícue.

Cristomo llotícue: “Comíni facaina ñairaimana jaca iitío” cuega.

²² Jesús ñairaimana jaca illa jira, naimie jailla rafue Moisés micorí lloga rafue baifemo uaide.

²³ Moisés micorí lloga rafue anamo ailluena ñairainidí itimaci. Naimaci fiodaicana jailla jira, ailluena ñairaini jitaide, fiodaitíno ifomo meidollena.

²⁴ Naimie jaca illa jira, Cristo ñairaimana jaca iite. Naimie ifomo jaca buna meidoñeite.

²⁵ Naimie jaca illa jira, comíni facaina Jusiñamui díga jaca ñaicabite. Ie jira Cristodí nana Jusiñamui díbeimo iacadinona, naimaci jeacinomona, ua jaca jillotarede.

²⁶ Caina canollena, naimie isoide nanoca ñairaimana jitaídícaí. Ie Moo isoi naimiedi mareuidimie. Naimiemo jeacino jaca iñede. Jeacino finouidíno díbeimo naimie iñede. Jusiñamuidí ie ecímo naimiena itatate. Ie jira naimie caina canorede.

²⁷ Jusiñamuimo fecallena, naimaci jeacino facaina naimie iba oñellena, Moisés micorí llua isoi, nanoca ñairainidí nagarui toíniaina fatimaci. Daní naimaci jeacino facaina nagarui iese finodimaci. Iemei comíni facaina nagarui iese jiaí finodimaci. Cristo naimaci isoíñede. Naimie jitailla jira, comíni jeacino facaina naimie fiodailla jira, comíni facaina dacaiño fiodaite. Naimaci jeacino facaina naimie dane fiodaiñeite.

²⁸ Moisés micorí facai ñairainidí jeacínona finocana jaidimaci. Fiodaicana jiaí jaidimaci; iadedí jiaie rafue birui illa jira, ie uaido Jusiñamuidí ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

8

Cristo muidona jiaie rafue birui ite

¹ Cristomo ite rafuena llotícue. Caí facaina ñairaimana birui naimie ite. Illaímana naimie illa jira, monamo Jusiñamui ecímo ite.

² Jusiñamui illanomo naimie illanona, nainomo caí facaina birui ñaicabite. Moisés micorí facaise comíni finoca jofomo Jusiñamui díga ñaíuidimaci; ia birui Jusiñamui finoca illanomo Cristo illamona, caí facaina ñaicabite.

³ Moisés micorí naga ñairaima jeacino facaina Jusiñamuimo faga toíniaina fecauillena llote. Cristodí comíni jeacino facaina toíniaina fecañede; iadedí naimie jitailla jira, caí jeacino facaina naimie dama fiodaite.

⁴ Moisés micorí jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide.

⁵ Comini facaina Jusiñamui diga ñaillena, Moisés micorí facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñotícaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micorí jaie niacania, Jusiñamui naimiena llofujete: “Monamo iticue; ia cue jofo eniruemo jiai finoitomoi. Sinaí railla anedu navui o ia, ona llofueticue. Ona cue llofua isoi, cue jofona fino” llofujete.

⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micorí facaise ñairainimona cai cacaja rafue baifemo faia jira, Cristodi Moisés micorí facaise ñairaini baifemo faite. Cristomona cai cacaja rafuedi cai comeciaí marena itatate. Ie jira, bie rafue jiaie rafue baifemo faite.

⁷ Moisés micorí facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micorí lloga uaina cai jaiagai ñinoñena jira, Jusiñamui jai llote: Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jaie lloticue. Naie facaiseconi Egiptomona naimacina canuanona, naimacina atidicue; iadedi Moisés micorímo cue lloga rafuedo jaiñedimaci. Ie jira naimacina fañonocaidicue.

¹⁰ Naimacimo jiaie rafuena ico jiairuido lloiticue. Iena naimaci uiñuamona, cuena raise ñinoitimaci. Naimaci Jusiñamuidicuenta jira, naimaci cuena sedaitimaci. Cue anamo raise naimaci illa jira, cue comininitimaci.

¹¹ Nana naimaci cuena uiñoitimaci. Ie jira naimacimo: “Cai Namana omoi ñino” buna niese lloñeite. Jamai bue isoidinomona cuena ñinoitimaci. Jamai bue isoiñedinomona cuena jiai ñinoitimaci.

¹² Naimacina cue duenaillamona, naimaci jeacinona jaca feítaiticue llote.

¹³ Jiaie rafuena Jusiñamui jai llua mona, Moisés micorímo lloga rafue jai saillana uiñotícaí. Moisés micorí lloga rafue caimo jai duiñede. Cristomona jiaie rafuena birui jai cacadicaí.

9

Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorímo diga rafuena jaie llote. Naie rafuemonona cai fueollena, iena lloiticue. Naimiena sedajana llote. Naimie sedalle jofo finuana jiai llote.

² Jusiñamui llua isoi, hebreos comini naie jofona nitimaci. Jedaciede ñiroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenico joide.

³ Mena cuartos illena ñiroina sebiñoga. Naie baifemo iticuartodi Jusiñamui illano.

⁴ Naie ñiroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micorí jiguída nainomo jiai ite. Jusiñamui uaido naie jiguída dacaiño llisilla jira, nainomo ite. Jusiñamui cueda nofici ibici jiai ite.

⁵ Cajón emodo ibaillabici di ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruai de. Naie motomo Jusiñamui quenirena baireuide. Naie rafuena raise omoi jai uñua jira, iena omoi mo are lloñeiticue.

⁶ Naie isoide rana finodimaci. Iemei Jusiñamui diga ñairainimona damerie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci.

⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabici mo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenailamona, Jusiñamui naimaci jeacino facaina ibana oñede.

⁸ Jusiñamui Joreño caina llofuiamona, buena birui uñoticaí. Naie jofu nia ia, jamai comini fo jainina jira, Jusiñamui diga, cominidi atona nabairinidimaci.

⁹ Bie rafuena birui nia finodimaci. Moisés micori lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci.

¹⁰ Jusiñamuina naimaci raise sedallena, Moisés micoridi diga guille fimaide. Jiruana jiaí fimaide. Naimaci abiaina finollena jiaí llote. Nie isoide guille, nie isoide jirulle, niese naimaci abiaí finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

¹¹ Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicaí. Cai comeciái raise jai finobide.

¹² Naimie fiodailla mei, dane jilluanona, Jusiñamui dine monamo naimie abide jaide. Toiniái diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate.

¹³ Maraiñede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toiniái diailla mei, jobaide toiniái ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede.

¹⁴ Toiniaina fañeno Jusiñamuina birui sedadicaí. Cristo fiodaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade.

¹⁵ Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina ñnotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiena bu ñnoia, naimie jeacino facaina Jusiñamui birui ibana oñeite. Nana Jusiñamuina ñnotinodi naimie jai llua isoi, naimie diga jaca iitimaci.

¹⁶⁻¹⁸ Jusiñamui jofu jaie finua mei, Moisés micorimo Jusiñamui llote: “Cue lloga rafuena raise finodomoí. Bie jofomo cuena sedallena, faga toiniái dirue diga bie jofona llereca. Nana naiemo ite rana jiaí llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicaí.

¹⁹ Ie cominimo nana naimiemo Jusiñamui lloga rafuena Moisés micori llua mei, faga jurareta dirue diga, faga chivo dirue diga, nana naie lloga rafue cuebasiana llerede. Cominina jiai llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede.

²⁰⁻²¹ Jusiñamui jofona dirue diga llerede. Nana nainomo ite rana jiai llerede. Llote: “Jusiñamui llua isoi, buena finodique. Naimie llua jira, bie dirue illa jira, naimie caina duere finoñeite”.

²² Moisés micorimo Jusiñamui llua isoi, raise finobillena, nana rana dirue diga llerede. Toñiaí fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

Cristo fiodailla jira, Jusiñamui cai jeacinona oni dotade

²³ Jusiñamuidi Moisés micorimo toñiaína fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toñiaí baifemo faia jira, monamo cai jaca illena, jeacinona oni dotallena, Cristo fiodaite.

²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite.

²⁵ Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoiñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toñiaína fajanona, ie diruena uite.

²⁶ Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite.

²⁷ Nana dacaiño fiodaiticai. Iena uiñotical. Fiodailla mei, Jusiñamui uicomo iitical. Naimiena cai inoia, caina feiñoite. Naimiena inoñedinona duere finoite.

²⁸ Dacaiño Cristo jai fiodaillana uiñotical. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritinona monamo Jusiñamui illanomo uite.

10

¹ Moisés micori facaise naie ñairainidi Jusiñamuimo fecallena, toñiaína fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñotical. Jusiñamui cai jeacino oni dotajana uiñotical. Jusiñamui jaca mareuidimiena uiñotical. Jusiñamuina nabaillena janore uiñotical. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedical.

² Naie faga toñiaí Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toñiaína dane fecañedimaci; iadedi naimacimo jeacino jaca illa jira, faga toñiaína fecauidimaci.

³ Naiena fecauillamona, jeacinona finocana naimaci nia jaillana uiñotimaci.

⁴ Toñiaí dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona faitate.

⁵ Eniruemo jaie billanona, Jusiñamuimo iena Cristo llote: Jeacino facaina toñiaí fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toñiaína jai jitañedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaie cuetimaci llote.

⁸ Cristo lluana dane ñaiticue. Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toiniaina jaie fecaidimaci. Iena Jusiñamui birui jai jitaiñede.

⁹ Cristodi: “Jusiñamui jitailla rafuena finuaibiticue” llumona, Moisés micorimo llogacino jai saillana uiñoticaí. Jiaie rafue birui illana jiai uiñoticaí.

¹⁰ Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebicaidicaí.

¹¹ Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecaidimaci; iadedi naie rafue naimaci finuamona, Jusiñamui naimaci jeacinona feitañede;

¹² iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide.

¹³ Nana naimie dibeimo iñedinona naimie emodofillemo naimie birui ocuride.

¹⁴ Dacaiño Cristo fiodaillamona, naimiena cai inuamona, Jusiñamuimona jaca marebicaidicaí.

¹⁵ Jusiñamui facaina lloraíma micori ciegafuemona Jusiñamui Joreño caina iena uiñotade. Naimie facaina lloraíma micori Jusiñamui lluana jaie iese cuega:

¹⁶ Hebreos cominimo jiaie rafue ico jairuido lloiticue.

Cue rafuena naimaci uiñuamona, cuena raise inoitimaci.

¹⁷ Jiai cuega:

Naimaci jeacino jaca feitaíticue.

¹⁸ Cristo jai fiodailla jira, jeacinona Jusiñamui jai feitaja jira, faga toiniaina naimiemo fecajana dane jai jitaiñede.

Jusiñamuina cai nabailli

¹⁹ Cue amatiai, Jesús fiodailla jira, Jusiñamuina jaciruiñeno birui nabairedicaí. Naimie cai Moo jai illanona, naimie diga meiruiñeno jaciruiñeno birui jiai ñairedicaí.

²⁰ Moisés micori facaise nanoca ñairaima fo iticuartomo jaillena, sebiñoga iniroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicaí. Naimie diga birui atona nana ñairedicaí.

²¹ Cristona jai cai inua jira, cai facaina nanoca ñairaimana naimie illa jira,

²² cai mare comeciámona Jusiñamui diga birui cai ñailli. Naimiena eo cai inuamona, cai comeciai jeanillamona, naimie dibeimo cai bautizajamona, naimiena mai cai nabailli.

²³ Cristo caina jilluana inoticaí Monamo naimie diga cai illemo ocuridicaí. Jusiñamui inogamiena jira, naie rafuena inocana mai cai jailli.

²⁴ Jiaie creyentiamo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli.

²⁵ Rollena omoimona damerie oficabiñedimaci. Naimaci isoi omoi iñeno; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaiei illa jira, naimiena raise inollena, conini omoi comeciai ocuiñocana mai omoi jai.

²⁶ Cristo finoca rafuena bu uiñua mei, iena naimie inoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite;

²⁷ iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo iñedinona duere finoite.

²⁸ Moisés micori jaie cuega: “Jusiñamui llote: ‘Menaimie naimiena daje isoi lloillamona, Moisés micori llogacinona jamaidimiena dueruiñeno meinega’ ”.

²⁹ Iese duere sefuillana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena ñnotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite.

³⁰ Ero, Jusiñamui jaie llote: “Maraiñedicinona bu finoia, ibana oiticue. Cuen a ñnoñedinona duere finoiticue” llote.

³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi ñnellen a, Jusiñamui lloga rafuena jamaiño.

³² Creyentiaina nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona ñnocana jaidomoi.

³³ Omoimona damerie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci.

³⁴ Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedinomoi rana bairodimaci; iadedi omoi comeciaina nia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi.

³⁵ Jusiñamuimona iba ico omoi feiñua jira, Cristona nia ñnocana omoi jai.

³⁶ Jusiñamui jitaillacino omoi finollena, monamo jaca omoi illena, ñie isoide ramo omoi jiria, Jusiñamuina nia ñnocana omoi jai.

³⁷ Jusiñamui buena llua jira, iese suite:

Cristo abido billirui iairei illa jira, naimiena ñnocana omoi jai.

³⁸ Naimie nia abido biñenia, omoina cue jai marebicaitaja jira, cuena ñnocana mai omoi jailli;

iadedi cuena jitaiñedinori iobiñedicue.

³⁹ Naie isoidino jillobiñeitimaci. Naimaci isoi ññedica. Jusiñamuina ñnocana cai jaillamona, jaca jillobidica. Ie jira naimiena ñnocana mai cai jailli.

11

Jusiñamuina ñnocana jaidica

¹ Jusiñamuina cioññedica; iadedi naimie illana ñnotica. Naimie lloga uaina ñnocana jaidica. Naimie lloga uai suillena ñnotica. Ie lloga uai suillemo ocuridica.

² Cai jaiagaimona damerie iese ñnocana jailla jira, Jusiñamuimona marebicaidimaci.

³ Jusiñamui finoca rana birui ciodica; iadedi jaie nano dofoconi jaca buena ññede. Naie facaiseconi dama ie uaido Jusiñamuidi eniruena finode. Mona finode. Nana rana finode. Nana rana comuitate. Iena ñnotica.

⁴ Cai jaiagai rafuena ja lloiticue, naiemona cai fueollena. Abel micori Jusiñamuina jaie ñnuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise ñnoñena jira, naimie fecaca rari iobiñede. Iena feiñoñede. Abel micori Jusiñamuina ñnua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise ñnollena, naimiemon a nia fueoitica.

⁵ Enoc Jusiñamuina jaie ñnote. Naimiedi Jusiñamuina eo iobitate. Moisés micori ciegafuiaimona iena uñnotica. Jusiñamuina ñnuamona, Jusiñamuina eo iobitaja jira, naimie fiodaññede; iadedi fiodañño monamo Jusiñamui naimiena naimiena uite.

⁶ Jusiñamuina cai ñnoñenia, naimiena iobitaññedica. Jusiñamuina cai nabaiacania, naimiena cai raise sedaacania, naimie illana ñnotica. Naimiena cai nabaiacania, cai jitai raillano, caina canollena ñnoitica.

⁷ Noé micorí Jusiñamuina jaie jiaí ñnote. Jusiñamui ico suille rafuena naimiemo llote. Enirue buillena llote. Iena ñnuanona, Noé micorí aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui llua Noé micorí ñnua jira, jillode. Noé micorí Jusiñamui llua ñnote; iadedi naimie facaise ite comini ñnoñena jira, Jusiñamui ricailafue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micorí marebicaide.

⁸ Abraham micorí Jusiñamuina jaie jiaí ñnote. Ie moo eniruemona naimie jaianillena Jusiñamui naimiemo llote. Are ite eniruemo naimie jaianillena llote. “Jiaie enirue omo iiticue” Jusiñamui llote. Abraham micorí ñnote; iadedi ie jaillinona uiñoñede.

⁹ Jusiñamui lloga eniruemo Jusiñamuina ñnocana jaide. Naie eniruemo ride; iadedi naie enirue naimiemo nia raise duiñede. Chivo itiraimona niga ñnroimona sebiñoga jofomo naimie jaca ite. Ie jito, Isaac micorí, naie isoide jofomo jiaí ite. Isaac micorí jito, Jacob micorí, naie isoide jofomo jiaí ite. Jusiñamuidi nana naimacimo daje isoide rafuena llote: “Bie enirue omoimo iiticue” llote.

¹⁰ Abraham micorí mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuiride. Monamo Jusiñamui mare finolle illanomo ocuiride.

¹¹ Abraham micorí aidi Sara micorí. Jusiñamuina Sara micorí ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana ñnote.

¹² Abraham micorí jiaí eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicai. Ailluena conillie illa jira, iena facadonidicai. Ie isoide. Eo ailluena Abraham micorí uruai illa jira, naimacina facadonidicai.

¹³ Abraham micorí, Isaac micorí, Jacob micorí Jusiñamuina ñnocana jaidimaci. Nana naimacimo Jusiñamui lloga uaina suiñedemo fioiditimaci. Nia fioidañena, Jusiñamui llogacinona cacadimaci. Iena ñnotimaci. Ie jira bie eniruemo naimaci jaca illemo comecina facañedimaci;

¹⁴ iadedi monamo jaca illemo comeciaina facadimaci.

¹⁵ Naimaci jaie billa eniruemo comeciaina naimaci facadena, nainomo abido jaidimaci;

¹⁶ iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

¹⁷⁻¹⁸ Jusiñamuina Abraham micorí ñnua jira, ie jitona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micorí naimiena ñnuana raise uiñollena, facacite. “O jitona fano” Abraham micorimo llote. Abraham micorí Jusiñamuina ñnuanona, ie jito faiacade.

¹⁹ Ie jito fioidillemona, Abraham micorí Jusiñamui naimiena jilloitallena ñnote. Isaac micorí fioidañede; iadedi fajamona jillode.

²⁰ Isaac micorí Jusiñamuina jiaí ñnote. Naimie fioidiacania, Jusiñamui ie llogacino finollena ñnuamona, mena ie urue iaiaiamo ie uaina fecade. Llote: “Jusiñamui llua isoi, jebuicana jaitomico”.

²¹ Jacob micorí Jusiñamuina jiaí ñnote. Naimie fioidiacania, Jusiñamuimo jñanona, ie jiguidamo juita naidaidemo, José micorí ie mena urue iaiaiamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomico. Naimie omicono canoite” llote.

22 José micorí fioldaiacania, ie cominimo llote: “Jusiñamui omoína canuano, Egiptomona ico jiairuido omoi jaillena ñnoticue. Omoi jaia, cue illaiciaina omoi diga uiño. Canaán railla eniruemo omoi ria, nainomo cue illaiciaina raño”.

23 Moisés micorí moo, ie ei diga Jusiñamuina jia ñnotiaimaia. Hebreos comini jebuiñellena, naie facaiseconi Egipto illaíma nana hebreos isaiaína meiniana llote. Iaimaia jito jeicia mei, iaimaia uruena daje amani fivui reidiaimaia. Jusiñamuina ñnuanona, naimie maresana eruailla jira, jaciruiño naimiena jofomo fo reide. Illaíma llumona Jusiñamui naimiena jillotajana ñnotiaimaia. Ie jira Faraón jisa anamo comuide. Faraón di Egipto nairai illaíma.

24 Moisés micorí Jusiñamuina ñnote. Naimie eimienamona, naimiedi Faraón jisa ie jitona mamecireaiañede;

25 iadedi naimiedi Jusiñamui naimiena ie cominina Egiptomona jillotajana ñnote. Jusiñamui naimie fetua jira, ie comini ñdibeimo naimie iacade. Ie comini diga duere sefuiacade. Jusiñamuina ñnoñedino diga ie comeci jamai iobitaiacaiñede.

26 Faraón jisa anamo naimie comuilla jira, naimiemo eo aillue rana ite; iadedi Egiptomona ite ebirede ramo ie comecina eo facañede. Jusiñamuimona iba naimie ico feiñoiacana jira, Jusiñamui Jito billemo ie comecina facajano, duere sefuide.

27 Ie jira Egiptomona Moisés micorí Faraóna jaciruiño oni jaide. Jusiñamui naimiena eenuana ñnote. Jusiñamuina cioñede; iadedi Jusiñamui illana naimie ñnua jira, ñnocana jaide.

28 Jusiñamui ie cominina jillotajana Moisés micorí ñnua jira, Jusiñamui llua isoi, pascua railla rafuena finode. Ie cominimo toica llaua fallena llote. Ie ñrue nase fuemo jidellena llote. Naie naio Jusiñamui jaienici nana nano doforanina meinesiñellena, Jusiñamui llua finodimaci.

29 Egiptomona naimaci billa mei, jiairede railla monailai ruica ñdine jaillena, Jusiñamuina ñnotimaci. Jusiñamui Moisés micorimo llua naimaci ñnuamona, jinui motodo saferedifodo ruica jaidimaci; iadedi Egipto soldaduai daje isoi ruica jiaicadimacimo, nana corobaitimaci.

30 Canaán railla eniruemo hebreos comini rilla mei, Jericó railla nairai ñdine ridimaci. Jusiñamuina ñnuanona, Jusiñamui llua isoi finodimaci. Siete ñdigarui Jericó ecimo naimaci macarilla mei, Jusiñamui llua isoi, naie llaigafu ana bijide. Naie nairaina emodofidimaci.

31 Naie facaiseconi Jericómo Rahab micorí fioldañede. Naiñaiñodi callirediñaiño. Nana Jericó comini Jusiñamuina ñnoñena jira, fioldaitimaci; iadedi jofue iñenanomo, ña Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comini iaimaiana naiñaiño feiñua jira, Jericó nairaina emodofilla facaise naiñaiñoña meineñedimaci.

32 Diga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona ñdamerie mameciaína jamai cueiticue: Gedeón micorí, Barac micorí, Sansón micorí, Jefe micorí, David micorí, Samuel micorí Jusiñamui facaina jaie llorainina jiaie eo cueñeiticue.

33 Jusiñamui naimacina canuamona, ñnotimaci. Ie jira ñdamerie naimaci bacauaina emodofidimaci. Illaíma isoi jiaño naimaci cominina raise marena sedadimaci. Jusiñamui llogacino suillana ciodimaci. Leones naimacina riacanamona ñdamerie jillode.

34 Iraimo usillamona ñdamerie jillodimaci. Lloebi diga meiniamona ñdamerie jillodimaci. Jiaño jamai bue isoidino; iadedi jamai bue isoiñedinoña jaidimaci. Jobaime raise finuamona, jiaño imaci bacauai soldaduaina judaisitade.

35 Dañaiñorie riñoniamona uruai fioldaiilla mei, fioldaiillamona Jusiñamui ñdamierena jillotate. Illaicominimona jiaño duere fioldaitimaci. Jusiñamuina fañonocaiacaiñena jira,

naimacina meinetimaci. Naimaci fiodaiacania, monamo Jusiñamui diga ico jaca illena naimaci inua jira, Jusiñamuina fainonocaiñeno fiodaitimaci.

³⁶ Jiaino duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damieriena maianona, cárcelmo jonetimaci.

³⁷ Damierie nofici diga fairinuamona, meinetimaci. Damierie ramo faitimaci. Meinelena, naimacina serrucho diga denaisite. Damierie lloebi diga meinetimaci. Jiaino buenidimaci. Naimaci iniroi jamai igoie. Dueredimaci. Naimaci iniroi raise iñede. Aime guisoidimaci. Jiaie cominimona duere sefuisoidimaci.

³⁸ Jiaie cominimona jamai bue isoidimaci; iadedi Jusiñamuimona jamai bue isoiñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai biita inuidimaci.

³⁹ Jusiñamuina inocana jaidimaci. Naimaci finoca rafuemonam Jusiñamui comini naimaci illana uiñoticaí. Jusiñamuina inotimaci; iadedi nana naimacimo Jusiñamui lloga rafue naimaci illa facaise suiñede.

⁴⁰ Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jiaí jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

12

Jesús finoca rafuemo cai comeciaina cai facalli

¹ Cai jaiagai Jusiñamuina inocana jaillana uiñoticaí. Ie jira caidi naimaci isoi, Jusiñamuina inocana birui mai cai jailli. Marena riire cai aisiacania, ailluena rana abiñedicaí. Ie isoide. Jeacinona cai finoñellena, naimiena raise cai inollena, jeacino finuacinona mai cai fainonocalli. Nie isoide rafue caimo ia, Jusiñamui jitaillacinona finocana mai duere cai jailli.

² Jesús finoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuiñotajanona, Jesúsna inoticaí. Cruzmo marañedimie isoi fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúsno cai comeciaina facajamona, caimare mai cai jailli.

³ Jusiñamui dibeimo iñedinomona Jesús eo duere sefuide. Ie isoi cai duere sefuia, Jesúsno cai comeciaina facajamona, cai comeciaina ocuiñotacana mai cai jailli.

⁴ Jusiñamui dibeimo iñedinomona duere sefuillamona, Jesús isoi duere nia sefuiñedomoi. Omoína nia meineñedimaci.

⁵ Duere omoi sefuia, bie jaie ciegafuiaína feitañeno. Naimie cominina omoi illamona, Jusiñamui llote:

Cue uruiaí, omoína cue duere finoia, cuena nia ino.

Duere sefuillamona, cuena fainonocaiñeno.

⁶ Omoína cue isiruillamona, omoína duere finodicue.

Cue dibeimo omoína raise itatallena, omoína duere finodicue.

Nana cue cominina cue llofuecabillamona, naimacina duere finodicue llote.

⁷ Naimie jitaillacinona cai finollena, caina duere finode. Ie uruiaína cai illamona, caina duere finode. Ero, nana ie uruiaína isiruillamona, naimaci ie jitaillacinona finollena, naga eniruemo ite moo ie uruiaína duere finocabide. Ie isoide Jusiñamui. Ie jitaillacinona cai finollena, caina duere finocabide.

⁸ Caina inotallena, Jusiñamui caina duere finoñenia, naimie cominiñedicaí. Naimiedi nana ie cominina duere finocabide.

⁹ Cai eniruemo ite cai mootiai caina duere finoia, naimaci uaina #noticai. Ie isoide. Cai Moo Jusiñamui caina isiruillamona, caina duere finoia, naimie uaina cai #nuua. Naimiena cai #nuamona, monamo naimie diga ico jaca iiticaí.

¹⁰ Naimaci comeciai illua isoi, cai eniruemo ite mootiai dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataiacade.

¹¹ Jusiñamuimona duere cai sefuia, iena gaiñedicai. Iena jitaiñedicai; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

Jusiñamui rafuena cai cacai, iena cai aruiruiñena

¹² Nie isoide ramo caimo jiria: “Jusiñamui caina nibai canoñede” raiticaí. Iemona naimiena fainonocaiacadicaí; ia iemo cai comeciaina cai facañena. Jusiñamui rafuena cai sefuirua, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise #nuamona, cai comeciai ocuiñocana mai cai jailli.

¹³ Jiaie rafuedo cai jaiñena; iadedi Cristo rafuedo raise #nocana mai cai jailli. Iese cai jaia, Cristo rafuedo naimaci jiai raise jaillena, jiaie creyentiaina canoiticaí.

¹⁴ Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite.

¹⁵ Jusiñamui caina duenailamona, nana cominina jillotaiacade. Omoimona buna Jusiñamui duenailacinona fainonocaillana jitaiñedicue. Omoimo iese suia, iemona conini gaiñenacino comuirede. Iena jitaiñedicue. Omoi comeciai daje isoi lloillana jitaidicue.

¹⁶ Jearede rafuena jaca finoñeno. Esaú micori jiaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiodable mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fioidañena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade.

¹⁷ Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiñeno.

¹⁸ Moisés micori facaise cai hebreos cominimo Jusiñamui ie rafuena jiaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude.

¹⁹⁻²⁰ Trompeta ficirenana cacadimaci. Iena cianona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toinai nainomo macaria, nofici diga fairinuamona, naimiena omoi meine” llote. Jusiñamui llua cacajamona, eo jaciruitimaci. Moisés micorimo: “Jusiñamui caimo nia llua jai jitaiñedicai” llotimaci.

²¹ Eo jacirede ra illa jira, nana comini diga Moisés jiai jaciruite.

²² Sinaí anedumona lloga rafuedo birui jaiñedicai; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicai. Monamo Jusiñamui ite; iadedi birui naimiena atona nabairedicaí. Cai fiodaia, naimie dine jaiticaí, naimie diga jaca cai illena. Nainomo ie jaienisaí naimiemo iobillacinona fecacabidimaci.

²³ Ailluena comini diga, Cristona birui #noticai. Nana caina Jusiñamui fetuanona, cai mameciaí monamo ite rabenicomo jai cuela. Jusiñamui nana comini comeciaina uiñote.

Naimiena ñnotinomona ailluena jai fiodaitimaci; ia naimie ecimo naimaci joreñuai jiai jai itimaci.

²⁴ Jesús fiodailla jira, Jusiñamuina nabairedicai. Naimie fiodailla jira, caimo jiaie rafue birui ite. Naie rafuena cai ñnuamona, cai comeciai jai marena iticai. Jiai cai jeacinona oni dotade. Iena jiai jai featate. Abel micori jaie fiodaia, naiemona Jusiñamui buna ie jeacinona feitañede; iadedi Jusiñamui Abel micori meinetimiemo ibana ote.

²⁵ Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaino iena jitañedimaci. Iena ñnoñedimaci. Ie jira Jusiñamui naimacina duere finode. Cristomona jiaie rafue birui cacadica. Bie rafuedi Moisés lloga rafue baifemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai ñnua.

²⁶ Moisés micorimo ie rafue llua facaise, Jusiñamui naie eniruena niraidotade. Jusiñamui jairuido jiai llote: “Eniruena dane niraidotaiticue. Ucuaina, fivuina, jitoma diga, jiai niraidotaiticue” llote.

²⁷ Naimie lloga uaimona enirue fuillena uiñotica. Monamo ite ra fuillena jiai uiñotica. Nana naie rana naimie fuidoite; iadedi naimiena cai ñnua jira, naimie caina fuidoñeite. Ico cai illinona jai finode. Iena naimie fuidoñeite.

²⁸ Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai ñnuamona, naimiena cai raise sedajamona, naimiena cai iobitaja.

²⁹ Naimiena ñnoñedinona Jusiñamui eo duere finolle jira, naimiena jaciruillanona naimiena cai ñnua.

13

Jusiñamuina cai iobitaja

¹ Dani conini jiaie creyentiaina isiruicana omoi jai.

² Abraham micori Jusiñamui jaienisaia uiñoño jaie nafuete. Jiaie illanomona jiaie creyentiaia bia, naimaci ñnillino iñena jira, naimacina nafue. Jusiñamuimona ibana feiñoitomo.

³ Cristo rafue muidona damerie creyentiaia cárcelmo itimaci. Nainomo omoi jiai itomoidena, naimacina feitaño. Naimacina isiruillamona cano. Damerie creyentiaia duere sefui, naimacina jiai cano. Jairuido naimaci isoi ñbaia duere sefuitomo.

⁴ Airedimie jiaie riño diga illemo ie comecina facañena. Inirediñaiño jiaie ñima diga illemo ie comecina facañena. Ie aiñede riño diga bu ia, ie iniñede ñima diga bu ia, marañede. Iena finoño. Iena bu finoa, ie jeacino Jusiñamuimo lloñenia, Jusiñamui naimiena duere finoite. Naiñaiño jiai duere finoite.

⁵ Ailluena ucube ollena, iemo nicñeno. Omoimo ite ra diga caimare i. Iena Jusiñamui facaina lloraima jaie cuga: “Jusiñamui llote: ‘Omoina jaca canoiticue. Omoina jaca fainonocaiñeiticue’ llote”.

⁶ Naiena cai uiñuamona, cai comeciaina ocuiñoitica. Jaie cugafue isoi lloitica:

Cai Nama caina canoite.

Ie jira cai comeciai jarire finoñeitica.

Buena jaciruiñeitica.

Jiaimie buena caina jaciruitanide.

⁷ Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomo. Cristo ñibeimo naimaci illamo omoi comeciaina facajanona, naimaci isoi Jesucristona ñnocana mai omoi jai.

⁸ Naimie jaca ñnogamiena uiñotica. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiena cai ñnua.

⁹ Cristo ieñede rafuedo jaiño. Diga jiaie llofuiacino ite; iadedi iedo jaiño. Jusiñamui caina canuamona, cai comeciaina birui ocuiñocana jaitica. Moisés micorimo lloga

rafuedo navui jaidicai. Diga ra fimaide; iadedi naiedo cai jaillamona, cai comeciai raise illena, buena oñedicai.

¹⁰ Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci.

¹¹ Moisés rafue llua isoi, nanoca ñairaima toiniaina faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide.

¹² Ie isoide. Cristona comini jitaiñena jira, ie comini nairaimona jino uillanona, naimiena meinetimaci. Nainomo jeacino facaina fiodaite, comini comeciaina raise finollena.

¹³ Ie jira Moisés micori lloga rafuena cai fañonocaida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca ñnocana cai jailli.

¹⁴ Beno jaca cai illemo ocuriñedicai; iadedi monamo Jusiñamui diga cai jaca illemo ocuridicai.

¹⁵ Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja.

¹⁶ Marecinona finocana mai cai jailli. Jiaie creyente jitai raillano, omoi raruiaimona naimiena omoi cano. Iena omoi finoia, Jusiñamui omoi iobite.

¹⁷ Omoi llofueraini uaina ñno. Naimaci anamo raise omoi i. Cristo dibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi ñnoia, Cristo dibeimo caimare maijitimaci. Naimaci uaina omoi ñnoñenia, sunaitimaci. Sunailla jira, naimaci llofuiacinomona buena oñeitomoi.

¹⁸ Jusiñamui diga omoi ñaia, cai facaina omoi jii. Jusiñamuimona cai comeciai marena illana uiñotica. Naimie jitailla isoi, mare rafuena finocana jaiacadica.

¹⁹ Omoi dine cue raire illena cue facaina Jusiñamuimo eo omoi jii.

Naimaci marena jaca illana jitaide

²⁰ Jusiñamui conini omoi comeciaina uri itatajana jitaide. Cai Nama Jesús fiodailla mei, Jusiñamui naimiena jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacina feitate. Naimie fiodailla jira, naimie anamo cai illamona, caina raise sedarede.

²¹ Jusiñamui ie jitaillacino omoi finuana canoite. Cristona omoi ñnuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaide.

²² Cue amatiai, bie cartana caimare feiño. Eo are rafuena cueñedicue. Janore cueticue.

²³ Cai ama Timoteo cárcelmona jai jino bite. Cue dine naimie raire bia, omoi dine naimiena atiticue.

²⁴ Nana omoi llofuerainimo cue uaina oredicue. Ua nana creyentaimo cue uaina oredicue. Italamona bitino imaci uaina jiai oredimaci.

²⁵ Jusiñamui omoina jaca duenailana omoi uiñuana jitaide. Mai. Macaibaite.

SANTIAGO ORETAGA RABE

Uaiduacino

¹ Caímaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoimo cue uaina oredicue.

Ramo omoi jiriadedi, omoi comeciaina mairita

² Amatiai, diga ie ramo omoi jiriadedi, eo iobilla.

³ Ramo omoi jiriadedi, Jusiñamui uaina raise omoi ñnuana uiñoitomoi. Iemona omoi comeciai mairillemona, ñnocana omoi jaitomoi. Biena omoi uiñua jira, iobilla.

⁴ Mairicana omoi comeciai jaia, omoi comeciadi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo ñnoitomoi;

⁵ iadedi omoimo rafue ia, niese nibaiana omoi uiñoñenia, Jusiñamuimo jica. Ie mei omoimo naimiedi abi uiñoracinona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite;

⁶ iadedi omoi jicaia, uai ñnuanona jica. Omoi comeciai ñnoñenia, jicañeno. Comecina ñnoñedimiedi aifi betaja jorai isoide. Naimie comeci naganomo ite.

⁷ Naimiedi Jusiñamuimona ra feiñollemo tainona sedaite.

⁸ Naie isoidimiedi nana naimie illa dinori ie comeci naganomo iite.

⁹ Naimie ramo jiriadedi, Jusiñamuimona naimie jamai bue isoñena jira, duerede creyente iobilla;

¹⁰ iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite.

¹¹ Jitoma a ia, eo ecasillamona, safia safenaite. Lliride. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feiñoticaí

¹² Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuena isiruitinona cue illanomo jaca itataiticue”.

¹³ O ramo bu faia, lloñeno: “Jusiñamuidi cuena ramo faite”. Maraiñede rafue dibeimo naimie iñena jira, naimiedi buna ramo jaca fañede.

¹⁴ Cai comecimo naie jitaillacino illa jira, ramo faia uai ñnoticaí. Naie facaiseconi caimona ebirena jirari, iena finoacadicaí.

¹⁵ Cai jitailla jira, jeacinona finodicaí. Jeacinona finocabillanona jaillano, faifiticaí.

¹⁶ Ero, cue isiruiga amatiai, Jusiñamui omoina ramo faitatañena jira, naimiemona da mare rafue billa jira, dani omoi abina jifueñeno.

¹⁷ Nana mare rafue cai Moomona feiñoticaí. Naimiedi monamo ite lligaiñoraniaina jaiie finode. Naie radi nagarui daje isoi lligaiñoñede; iadedi naimie daje isoñede. Naimie comeci jacanano danoconi nagarui ite.

¹⁸ Naimie jitailla jira, ie uai lluno, naimie caina ie uruiaina itatate. Ie uruiaimona nano doforanidicaí.

¿Nie isoide rafuena finoacadicaí?

¹⁹ Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire iciriñeno.

²⁰ Icirillamona, Jusiñamuidi cai marena jitailla isoi, buna jaca marebicaiñede.

²¹ Ie jira nana marañedicinona oni fainonocai. Jusiñamui uai omoi comecimo fecuise abi iedoñeno nagarui feiñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede.

²² Cacajamona iena ñnocana jai. Cacajanona iena omoi ñnoñenia, dani abina jifuetomoi.

²³ Bu naie uaina cacajamona ñnoñenia, naimiedi acaranimo eruaidimie isoide.

²⁴ Ie uiecona eruaide. Naimie jailla meinoconi, ie eruailla ie uiecona jai raire feitate.

²⁵ Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena ñnua jira, naimie comeci caimare ite.

²⁶ “Jusiñamuina sedadicue” raillanona ie comecina facadimiedi jeare ñaia, marañeno ñaia, dama naimie abina jifuate. Jusiñamuina taino sedade.

²⁷ Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jai finoacaiñeite. Jusiñamui dibeimo iñedio isoi iacaiñeite. Jusiñamui naimie iese sedajia, Jusiñamuimona eo mare.

2

Nana cominimo comeciaina lloitaicadica

¹ Amatiai, cai Nama Jesucristo uai eo ebirede. Naimiena omoi ñnua jira, naimacimo daje isoi comeciailloillamona, nana cominina daje isoi nafue.

² Ero, omoi roracomo mena ñima bia, ¿nie ñimana nafueitomoi? Damie ucuberedimie. Naimiemo oro ie anillos ite. Eo mare ñinroina jitate.

³ Ucuberedimiemo llotomoi: “Bai bene bancomo rai”. Dueredimiemo llotomoi: “Bai bene naidai. Raiacania, eniruemo rai”.

⁴ Iese omoi lloia, damiena jai raise nafuetomoi; ia damiena jai raise nafueñedomoi. Iaimaiai ñinroimo omoi eruaillamona, nafuetomoi. Mare rafuemo comeciaina fa-cañedomoi.

⁵ Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenedimaci, naimiena naimaci eo ñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”.

⁶ Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomoi. Ucuberedinomona duere sefuicabidomoi; ia ucuberedimiena raise nafuetomoi. Maijitalena, juez dine ucuberedino omoina uitatatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci.

⁷ Cristomo omoi jainaiailamona, ucuberedino naimiena jeare jai ñaitimaci.

⁸ “Cristo llogacino finodica” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofocimo itinona isirui, dama o abina o isiruilla isoi”. Iese omoi ia, cuemona mare;

⁹ iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinona ñnoñedomoi. Jusiñamui llogacinomona jai marañeno itomoi.

¹⁰ Nana Jusiñamui llogacinuaimona daje llogacinona omoi ñnoñenia, Jusiñamuimona nana naie llogacinuaina jai ñnoñedomoi.

¹¹ Jusiñamui caimo jai llote: “O añede riño diga iñeno. O ñiñede ñima diga iñeno”. Jai llote: “Jaimiena meineño”. O añede riño diga iñedio; iadedi jaimiena o meineia, nana Jusiñamui llogacinuai jai ñnoñedio.

¹² Jiairuido Jusiñamuidi juez isoi omoimo lloite. Omoi comeciaimo iticino diese omoimo lloite. Ie jira marena ñaino. Marena i.

¹³ Ero, omoimo naimie lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaite. Duere sefuillena omoimo lloñeite.

Jusiñamuina cai ñnuamona, diga rafuena cai finua

¹⁴ Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimiena jillotaite? Jillotañeite.

¹⁵ Jiaie rafuedo iena lloiticue. Omoimona daje creyente ñniroinia, guille iñenia,

¹⁶ naie creyente omoi ñine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi?

¹⁷ Ero, Jusiñamui omoi ñnuamona mare rafuena omoi finoñenia, omoi ñnoracino ieñede.

¹⁸ Omoimona damie cuemo ñibai lloite: “Jusiñamuina raise ñnoticue”. Jiaimie cuemo ñibai lloite: “Mare rafuena finocabidicue”. Iaimaiaimo lloiticue: “Jusiñamuina cai raise ñnoia, mare rafuena finocabiticai. Mare rafuena cai finuamona, Jusiñamuina cai raise ñnuana uiñoiticai”.

¹⁹ Dajede Jusiñamuidi illana ñnotio. Iena o ñnuano, mare; iadedi jananiai iena jiai ñnotimaci. Ie jira Jusiñamuina jaciruitimaci.

²⁰ “Jusiñamuina raise ñnoticue” ñibai ñia raitio. Abina raise ñia uiñoñedio. Mare rafue o jiai finoñenia, dama abi o ñnoracinodi ieñede.

²¹ ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori.

²² Abraham micori ñnote. Mare rafuena jiai finode. Mare rafue naimie finuamona, naimie jai raise ñnote.

²³ Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”.

²⁴ Abraham micori rafuemona daje rafuena uiñoticaí. Dama ie ñnoracino diga jaca bu marebicaíñede; iadedi Jusiñamuina ñnuano, mare rafuena finuano, marebicaide.

²⁵ Jiaie rafuedo iena lloiticue. Jiaie Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraímaiaína feiñote. Naiñaiño nairaidi iaímaiaína meinellena jenodimaci. Meineñellena, naiñaiño iaímaiaína reide. Ie mei iaímaiaína bainino oretate. Mare rafuena naiñaiño finuamona, Jusiñamuimona naiñaiño marebicaide.

²⁶ Ero, bumo ie joreño jai iñenia, cajeñede. Ie isoide. Mare rafue bu finoñenia, ie ñnoracinodi ieñede.

3

Cai fuaímona jeacinodi comuide

¹ Amatiai, omoimona diga comini creyentiaína llofuerainina jaiñeno. Jusiñamuidi juez isoi ico lloite. Llofueraini jiaie comini baífemo uiñuamona, Jusiñamui rafuena naimaci eo raise ñnoñenia, Jusiñamui naimacina jiaíno baífemo duere finoite. Iese riire naimacimo lluaña jaciruillano, llofuerainina ailluena jaiñeno.

² Nana caídi diga marañede rafuena finocabidicai. Marañedicinona bu ñaiñenia, jai marebicaide. Naimie nana ie comeci namarede.

³ Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai.

⁴ Riire aifi aillue botena nine uiacade; iadedi eo janorede quilla diga, ie jailla dine piloto botena dataoicaide.

⁵ Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate.

⁶ Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaiacade.

⁷ Nana rana toiredicai: ocainai, sillini, ofomai, eniruemo bicaidino, lliciai. Nana toiredicai;

⁸ iadedi jaca bu ie fuena namatanide. Cai fuiai jaca eo maraiñede. Iemona eo maraiñede rafue icabite.

⁹ Cai fuiai diga cai Namamo, ua cai Moomo, marecinona lloticai. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai.

¹⁰ Cai fuedi dajede; iade marecinona ñaiticai. Maraiñedicinona jiai ñaiticai. Amatai, iese cai ñaiñena.

¹¹ Ero, daje pozomona mare jinui, erirede jinui diga, oñedicai.

¹² Amatai, higuera railla riaromona aceitunadi comuiñede. Uvas railla riaromona higo railla riaradi jiai comuiñede. Cuerede jinuiomona mare jinui oñedicai. Cai fuiaimona jeacino comuiñellena, cai fuiaina cai namataja.

Ua abi uiñoracino

¹³ Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomo. Abi iedoñoeno mare rafuena naimie finoia, naimiemo ua abi uiñoracino illana uiñoitomo;

¹⁴ iadedi naimie abi eo uradoia, dama naimiemo ite ramo comecina facaia, naimie abi uiñoracino diga naimie abina iedoña. Jai tainona llote. Naimie llua isoi iñede.

¹⁵ Naie isoide uiñoracinodi Jusiñamuimona iñede. Bie enirue ie. Comini ie. Taife ie.

¹⁶ Comini abina uradoia, dani naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite.

¹⁷ Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede.

¹⁸ Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

4

¿Bue ñellena uri iñedicai?

¹ ¿Bue ñellena fuiriruidomo? ¿Bue ñellena iciriruidomo? Omoi comeciaino maraiñedicino illa muidona. Omoi comeciaino maraiñoeno jitaillacino illa muidona. Naie jitaillacino omoi comeciaino namataacana muidona.

² Rana jitaidomo. Iena omoi feiñoña jira, naimaci rana fillena, comena meinetomo. Eo uraidomo. Omoi jitailla rana feiñoña jira, fuiridomo. Omoi jitailla rana Jusiñamuimo omoi jicaña jira, iena feiñoñedomo.

³ Jiaicaiño Jusiñamuimo jicadomo; iadedi raise jicañedomo. Ie jira iena feiñoñedomo. Dani omoi jitailla ra feiñollena, omoi comeci jaisillena, jicadomo.

⁴ Jusiñamuina birui raise jitañedomo; ia naimie dibeimo iñedinona jai jitaidomo. Bie eniruemo ite rafuena omoi isiruillamona, Jusiñamuina jai raise nabaiñedomo. ¿Niese iena uiñoñedomo? Bu naie rafuena isiruianca, Jusiñamui dibeimo jai iacañede.

⁵ Jusiñamui cuetatagafuina raise facañedomo. Naiedi caimo llote: “Jusiñamui omoimo jai fecaca Joreñodi omoi comecina eo raise namataacade”.

⁶ Caina eo duenailla jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuai iena llote: “Jusiñamuidi abi iedotimiena canoñede; iadedi abi iedoñedimiena canode”. Naimie dibeimo iacañedimiena ñaite. Naimie dibeimo iacadimiena canuana jiai ñaite.

⁷ Ie jira Jusiñamui anamo omoi i. Naimiena raise omoi ñno. Taife uaina jitaiñenanona, naimie uaina oni caiño. Ie mei omoimona naimie oni jaite.

⁸ Jusiñamuina nabaillena, naimie dine iaire omoi i. Ie mei naimie omoi dine iaireno iite. Jeacinona finoraini, omoi comeciai iuaillaina meido. Naganomo omoi comeciaina facañeno. Omoi comeciaina marena fino.

⁹ Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai.

¹⁰ Jusiñamui dibeimo abina iedoñeno omoi i. Ie mei naimie omoi comeciaina iobitaite.

Jiaino jinafomo jeare ñaiñeno

¹¹ Amatiai, maraiñede rafuena naimaci finoiadedi, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñnoñede. Jusiñamui uaina naimie ñnoñenamona, Jusiñamui uaina jiai jamaiñocaide.

¹² Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoño.

Ico are caimo suite rafuena uiñoñedicaí

¹³ Jiaie rafuena lloiacadicue. Nibai llotomoi: “Birui jiaie nairaimo jaiticaí. Birui cai jaiñenia, ico are jaiticaí. Rana fecajamona ucube cai ollena, nainomo daje año iiticaí”.

¹⁴ Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticaí. Dallu bene iticaí. Ie mei jai iñedicaí.

¹⁵ Ie muidona omoi llua: “Cai Nama jitaia, nia iiticaí. Cai Nama jitaia, nie isoide rafuena finoiticaí”.

¹⁶ Iena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduadi maraiñede.

¹⁷ Mare rafuena finuana uiñotimiedi mare rafuena finoñenia, jeacino jai finode.

5

Ucuberedinomo llucino

¹ Ucuberedino, daje rafuena omoimo jiai lloiacadicue. Omoimo ramo jirite. Ja eo duere sefuitomoi. Ie jira cuiri-curi ee.

² Omoi raruiaí ja sabite. Omoi mare iniroi ja sabite, ibuisaí guilla jira.

³ Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi.

⁴ Ero, ailluena ucube irairuillaí iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade.

⁵ Omoi illa dinori ailluena raruiaí omoimo ite. Nana omoi comeciai jitailla rafuena finodomoi. Omoi comeci jitailla isoi itomoi. Naie iba ollirui jai ride.

⁶ Maredinona duere finodomoi. Nie isoide rafuena omoimo finoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

Cai Nama billemo fecuise omoi ocuiri

⁷ Amatiai, cai Nama billemo fecuise omoi ocuiri. Cominidi imaci illimona riarra feiñuana sedadimaci. Noci deillemo fecuise ocuiritimaci. Ie mei riarra llisillana otimaci.

⁸ Ie isoi cai Nama billemo fecuise ocuiri. Omoi comeciai rucaicuereñeno, cai Nama bille iaire illa jira.

⁹ Duere omoi sefuia, Jusiñamui juez isoi omoimo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uiñote.

¹⁰ Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci.

¹¹ Naimaci Jusiñamuina fañonocaiñena jira: “Naimaci comeciãidi caimare itimaci” raiticai. Job micorina jiai comeciticai. Naimie jaie ite. Naimie eeñeno duere sefuide. Duere sefuide; ia Jusiñamuina fañonocaiñede. Ie mei ja muidomo nie isoide cai Nama naimiena finuana uiñoticaí. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

¹² Cue amatiai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai linoia, cai lloga uaina cai finoñenia, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi llumona, uanaicinona jaca llono. Iese llono, Jusiñamui omoi na duere finoi raillano.

¹³ Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua.

¹⁴ Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena.

¹⁵ Inuano jia, jilloite. Cai Nama naimiena jillotaite. Naimie finoca jeacinona oni jiai dotajite.

¹⁶ Ie jira coninimo omoi marañedicinona llono. Ie mei Jusiñamuimo coninaina omoi jii, omoi duicomona omoi jilloillena. Jusiñamuimo marebicaidimie jia, diga rafuena finorede.

¹⁷ Eliana comecitomoi. Jaie ite; ia naimiedi cai isoide. Jusiñamuimo jide, noci deñellena. Ie mei daje amani fiemona abimo atomonado jaca deñede.

¹⁸ Ie mei dane jide, noci deillena. Ie jira noci deide. Ie mei riarane dane sicode.

¹⁹ Amatiai, omoimona damiedi Jusiñamui ie uanaicino dibeimona jaia, dane Jusiñamui dibeimo naimiena bu itataia, eo mare.

²⁰ Iena bu finoia, naimiena ie uañedicinomona itatate. Faiillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santi-agodicue.

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue.

² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñnollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenailana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, ñnocana cai jaillemo jiai ocuridicai.

⁴ Omoi ocurillafuedi monamo ite. Faiñeitomoi; ia nainomo caimare marena jaca iitomoi. Jusiñamui iese omoina itataite.

⁵ Jusiñamuina omoi ñnua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi.

⁶ Ieri iobidomoi; iadedi dallu diga rafuemona duere sefuidomoi.

⁷ Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca iñede. Ie isoide. Cristona omoi ua ñnuana facacillena, diga rafuemona duere sefuidomoi. ñnocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoi ieo iobite.

⁸ Jesucristona jaca cioñedomoi; iadedi naimiena jai isiruitomoi. Naimiena jaca cioñedomoi; iadedi naimiena jai ñnotomoi. Ie jira eo iocire itomoi.

⁹ Cristona omoi ñnuamona, jeacinomona jai jillobidomoi.

¹⁰ Jusiñamui facaina lloraini micoriaidi Jusiñamui omoina jai duenailana jaie llotimaci. Jusiñamui omoina jilluana jaie llotimaci. Iena naimaci raise cacaiñenia, naiemo comeciaina facauidimaci.

¹¹ Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo iese ico suillena uiñoiacadimaci. Naie facaise illemo comeciaina jiai facadimaci.

¹² Jusiñamuidi naie rafue naimacimo duiñenana uiñotade. Naimacina naie rafue caimo duillana jiai uiñotade. Jusiñamui ie Joreñona monamona naimacimo oretajanona, ie uaido naimaci llumona, naimie facaina llorainimona bie mare rafuena birui jai cacadomoi. Jusiñamui jaienisaie bie rafuena jiai raise uiñoiacadimaci; ia cai isoi iena uiñoñedimaci.

Naimie jitaillacinona cai ñnollena, Jusiñamui caina fetode

¹³ Ie jira omoi comeciaini raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuri.

¹⁴ Jusiñamuina omoi nia uiñoñena facaise dani omoi comeciaini jitaillu rafuedo jaisoidomoi. Naimiena omoi jai ñnua jira, naimiena omoi nia uiñoñega facaise finoca

rafuedo birui omoï jaiñeno. Mare uruiaï imaci moo uaina ñnotimaci. Jusiñamui uruiaïna omoï jai illa jira, naimie uaina ñno.

¹⁵ Jusiñamui ie uruiaïna omoï illena, jai omoïna fetode. Naimie mareuilla jira, marena omoï i.

¹⁶ Iena naimiedi jaie cuetatate: “Cue mareuidimiena isoi, marena omoï i”.

¹⁷ Cai Moona Jusiñamui illamona, naimiemo birui jñdomoï; iadedi juez isoi nagamiemo ñco Jusiñamui llua jira, nana omoï ille ñnori jaciruicana omoï jai. Nagamiena ie marañede ñnoca rafue ñese duere ñnoite; ia marañede rafuena ñnoñedimiena duere ñnoñeite.

¹⁸ Omoï einamacï rafuedo jaie jaisoidomoï. Naie rafue jamaifue. Naifuemona Jusiñamui omoïna jai jillotate. ñbatajamona omoï jeacinomona jillotañede. Ucubedi raire cueruide. Raire cueruide ra ñiga omoïna jillotañede;

¹⁹ iadedi Cristo ñruedo naimie ñacaiño ñodaillamona, omoïna jaca jillotate. Cai comini imaci jeacino ñacaina mare toïca llaudana ñauidimaci; ia Cristomo jeacino ññena jira, cai jeacino ñacaina birui ñacaiño ñodaite.

²⁰ Caiña jilloitallena, enirue ñia ññena ñacaiseconi Jusiñamui Cristona jaie fetode. Naimiena omoï uñollena, birui bene eniruemo Jusiñamui naimiena oretate.

²¹ Cristo muidona Jusiñamuina ñnotomoï. Cristo ñodaite; ia iemona Jusiñamui naimiena jillotate. Ie mei monamo ie ecimo naimiena ñane itatate. Ie jira Jusiñamuina ñnotomoï. Omoï ñodaia, ñane jilloillemo jiaï jai ocuiridomoï.

²² Uanaicinsona omoï ñnuamona, omoï comeciã jai jeanidimaci. Ie muidona jiaie creyentiãna isiruicana omoï jai. Omoï comeciãmona conini omoï isirui.

²³ Jusiñamui cominina jai jaidomoï. Naimie uaido ñese jaidomoï. Comini uaido ñese jaiñedomoï. Naimie uai jaca ñuiñeite. Jaca ñite. Naie uaido naimie cominina jaca ñiticaï.

²⁴ Jusiñamui ñacaina lloraima ñicori ñena jaie cuete:

Nana cominidi raiticai isoidimaci.

Safia dallu ebirede; iadedi raiticai ie safia ñiga are ññede.

Ie isoide. ñiga rafuena ñnuanona, dallu iticaï.

Are ññedicaï;

²⁵ iadedi Jusiñamui uai jaca ñte

cuete. Naie uaidi mare rafue. Naie rafuena birui jai cacadomoï.

2

¹ Jusiñamui cominina cai illa jira, jiaie cominina gaiñenacinona ñañonocai. Nana jifuiacinona ñañonocai. Abina caitajacinona ñeita. Nana abi uradoillacinona ñeita. Jiaie comini joreñona ñaññeno.

² Ero, raise moonaillena, raise ecairellena, janosa monoi ijina jitaide. Ie isoide. Omoï comeciã raise marena illena, Jusiñamui rafuena jitaïdomoï.

³ Cai Nama omoïna ñuenaillana jai omoï uñnuamona, naimie uaina ñnocana jai.

Cristodi jofomo ñte ñanoca ñofici isoide

⁴ Ie cominina raise omoï illena, Jusiñamui rafuena ñnocana jai. Naimie omoïna jai fetode. Naimiemo omoï raise ñuillana jitaide. Iena omoï raise uñollena, jiaie rafuedo ñena lloiticue. Naimiedi jofona ñacade isoide. ñoficimona ñacade. ñiga ñoficina jitaide. Naimie ñaie ñoficiãna jai fetode. ñanoca ñofici ñiga ñaie jofo ñillana tañede. Cristodi ñaie ñanoca ñofici isoide. Cai ñairai Cristona jaie jitañedimaci; iadedi Jusiñamuimona naimie maredimiena jira, Jusiñamui naimiena fetode. Caidi jiaie ñoficiã isoidicaï. Ie jofona ñillena isoillena, Jusiñamui caiña fetode.

⁵ Naimiena cai jai ñnua jira, naimie cominina jai jaidicaï. Naimie ñiga jai atona ññairedicaï. Naimie ñiga jiaie comini ñacaina jiaï ññaicabiticaï. Naimiena cai raise sedal-lena, Jesucristo caiña canuamona, Jusiñamui jitaillacinona ñnocana jaidicaï.

⁶ Jusiñamui facaina lloraima iena jaie cuega:
 Ero, Jerusalémo cue jofona nillena, daje noficina fetoiticue.
 Eo mare noficina fetoiticue. Cue Jitona ñaiticue.
 Naimiena jai fetodicue. Naimiedi eo mare.
 Naimiena ñnuamona, comini iobitimaci
 cuega.

⁷ Naimiena omoi ñnoia, Jusiñamui omoina iobitaite. Naimiena omoi ñnoñenia, faifitomoi.
 Jusiñamui facaina lloraima micori iena jaie cuega:
 Jofona finoraini jitaiñena noficidi nana naie jofomo ite noficiái baifemo jai faiga
 cuega. Ie isoide. Cai nairai Cristona jitaiñede; iadedi Jusiñamui naimieri eo iobide.

⁸ Dane cuega:
 Nine naimaci macaria, naie noficimona eicaitaillamona, uaitimaci
 cuega. Cristona cuete. Cristo uaina naimaci ñnoñena jira, Jusiñamui llua isoi faifitimaci.

Pedro Jusiñamui fetocanona llofuede

⁹ Jusiñamui jai fetocanodomoí. Naimiemo omoi jai duillamona, naimie diga atona
 ñairedomoi. Jusiñamui ua cominidomoi. Naimiena omoi nia ñnoñenia, jeacino anamo
 omoi illa jira, jitiredinomo itomoi isoidomoi. Naiemona omoína jai jillobitade. Naimie
 anamo jai omoi illamona, useredinomo jai itomoi isoidomoi. Eo mare rafue omoimo
 naimie finua jira, iena llocana omoi jai.

¹⁰ Jaie Jusiñamui cominiñedomoi; iadedi birui Jusiñamui cominidomoi. Naimie omoína
 duenaillana jaie uiñoñedomoi. Birui iena uiñotomoi.

Pedro Jusiñamui jitaillacinona finocana cai jaillana llofuede

¹¹ Cue isiruiganodomoi. Jusiñamui illanomo omoi birui jainaiaila jira, eniruemo jaca
 ñneitomoi. Eniruemo jaca omoi ññena jira, jeacinona finocana jaiñeno. Jeacino omoi
 comeciaina namataacana jira, iena ebiruiñeno, naie anamo omoi i raillano.

¹² Jusiñamuina ñnoñedino motomo omoi illamona, mare rafuena finocana jai. Omoína
 birui jeare ñaitimaci; iadedi omoi marena illana naimaci uiñuamona, Jusiñamuina ico
 naimaci ñnoia, naimiemo iobillacinona fecaitimaci.

¹³ Cai Namamo omoi duilla jira, illaicomini anamo raise i. Riai diga omoi nanoca
 illaíma uaina ñno.

¹⁴ Naimacina omoi illaicomini fetua jira, omoi gobernadores uaina ñno. Maraiñede
 rafue omoi finoa, omoína duere finoitimaci; iadedi mare rafuena omoi finoa, omoi
 iobitimaci.

¹⁵ Jusiñamuidi mare rafuena omoi finuana jitaide. Iena omoi finua jira, omoína ebena
 ñaitino uaina llícaítaitomoi.

¹⁶ Jusiñamui anamo cai illamona: “Jiaie illaíma uaina ñnoñeíticái” raiñeíticái. Cai
 enirue illaíma uaina cai ñnoñenia, jeacinona finodicái. Jusiñamui díbeimo cai illa jira,
 naimie jitaillacinona finocana cai jailli.

¹⁷ Nana cominimo marena fino. Nana creyentiaína isirui. Jusiñamuina jaciruiocaida
 ñno. Riai diga omoi illaíma uaina ñno.

Cristo duere sefuilla rafuemona fueoíticái

¹⁸ Patrón anamo damerie itomoi. Omoi patrón ocuica uaina ñnocana omoi jai. Omoi
 patrón marena fecuise ocuica, naimie uaina ñno. Naimie raire iciria, naimie ocuica uaina
 jiaí ñno.

¹⁹ Maraiñede rafuena omoi finoñenia, omoi patrón omoína duere finoa, Jusiñamuimo
 omoi comeciaina facajanona, ibana oñeno. Ibana omoi oñenia, Jusiñamuimona mare.

²⁰ Maraiñede rafuena omoi finoa, omoi patrón marena duere sefuitomoi; iadedi maraiñede
 rafuena omoi finoñenia, omoi patrón omoína duere finoa, ibana omoi oñenia,
 Jusiñamuimona mare.

²¹ Duere omoi sefuia, ibana oñeno. Iese omoi illena, Jusiñamui omoïna fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli.

²² Naimiedi maraiñede rafuena jaca finoñede. Tainona jaca lloñede.

²³ Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoïna ico duere finoiticue” rainede. Naimiedi Jusiñamui naimacina ico raise duere finollena uiñote.

²⁴ Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodici.

²⁵ Sedañega toïca llaudaïai isoi jaie ebena jaisoidici. Cai sedaraima anamo jai itici. Naimiedi cai comeciaina jai eenote.

3

Pedrodi inirediñaiñuaina, airedino diga llofue

¹⁻² Inirediñaiñuai, omoïmo jai lloiacadicue. Omoi iniñiaï uaina ñno. Nibai birui Cristo rafuena ñnoñedimaci; iadedi omoi marena illamona, Cristo dibeïmo naimacina itatait-omoi. Jusiñamui uaina omoi ñnuamona, omoi marena illamona, damierie Cristona ñnoitimaci.

³ Dañaiñorie abina eo finocabidimaci, naiñaiñuaina jiaie comini ebinallena. Naiñaiñuai ifotiena eo finocabidimaci. Eo raifide rana jitacabidimaci. Eo ebirede raifide ñiroina jitacabidimaci. Naie isoide ra comeciina marena itatañede; ia Jusiñamui jitaillacinodo jaillamona, comeci marena ite. Jiaie comini omoïna ebinai raillano, iese omoi iñeno;

⁴ Iadedi jiaie comini omoïna ebinallena, omoi comeciï marena fino. Omoi iniñiaï uaina oñeno. Naimaci jitailla rafuena fino. Omoi comeciï iese ia, Jusiñamuïmona eo mare.

⁵ Cai jaiagai facaise Jusiñamuïna ñnotiñaiñuai iese itimaci. Cue birui llofuia isoi, naiñaiñuai abina jaie finodimaci. Naiñaiñuai iniñiaï uaina ñnotimaci.

⁶ Iese Sara micori ie ini Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaia, buena omoi jaciruiñenia, naiñaiño isoi itomoi. Iemona naiñaiño uruiaïna jaitomoi isoïtomoi.

⁷ Airedino, omoïmo jai lloiacadicue. Omoi ainiaïmo comeciaina faca. Cai isoi naiñaiñuai mairiñena jira, naiñaiñuaina isiruïllamona, naiñaiñuaina marena raise seda. Jusiñamui omoïna duenaïllamona, naimie cominina jai jaidomoi. Omoïna jai jillotate. Omoi ainiaïna omoi raise sedañenia, Jusiñamuïmo daajena raise jïnidomoiico.

Cristo dibeïmo cai illa rafue

⁸ Daje isoi comeciï lloïcana jai. Coninina duenai. Naga creyentena isirui. Jïainona cano. Abina ñedoñeno.

⁹ Omoïna jiaie comini duere finoi, ibana oñeno. Omoïna naimaci jeare ñaïa, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui ñnena: “Mare” caina raite.

¹⁰ Jusiñamui facaina lloraima micori iena jaie cueda:
Marena uri jaca bu iacania, jeare ñaiñeno.

Tainona lloñeno.

¹¹ Jearede rafue finuana fainonocai. Mare rafuedo jai.

Omoi ecimo itino diga, uri icana omoi jai.

¹² Naimie jitailla rafue omoi finoi, Jusiñamui iena uiñuamona, omoïna raise sedade.

Naimie diga omoi ñaïa, iena cacade;

iadedi maraiñede rafue bu finoi, Jusiñamui naimie diga icirite.

¹³ Mare rafuena omoi finocana jaia: “Maraiñede rafuena naimaci finua jira, naimacina duere finoitici” rainidimaci;

14 ia mare rafuena omoi finuamona omoi duere sefuia, Jusiñamui omoina canoite. Omoina duere finodinona jaciruiñeno. Jarire iñeno;

15 ia omoi comeciai jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoimo bu jicanoia, uaina raise ono. Fecuisse iciriñeno, uaina ono.

16 Mare rafuena finocana jai. Omoina jiaino jeare ñaia, mare rafuena omoi finocabillamona meidaitimaci. Omoi marena illamona, tainona naimaci llwana bairen-ite.

17 Mare rafuena omoi finuamona, Jusiñamui jitaillamona omoi duere sefuia, dama iese duere sefuitomoi; ia maraiñede rafuena omoi finuamona omoi duere sefuia, omoi muidona.

18 Cristomo omoi comeciaina faca. Dacaiño cai jeacino facaina naimie fiodaite. Naimie mareuidimie; iadedi maraiñedino facaina fiodaite. Jusiñamui dibeimo caina itataiacade. Naimiena meinetimaci; iadedi naimie Joreño jaca ite.

19 Ie Joreñodo naimie jaillanona, jaie fiodaitino imaci joreñuai eenoranomo ie finoca rafuena lluaide. Naimaci nia fiodaiñenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide.

20 Jusiñamui rafuena jaie ñnoñedimaci. Noé micori facaise Jusiñamuidi naimaci naimiena ñnuamo fecuisse ocuride. Jñnuimona jillobillena, Noé micori ie balsana finode. Ocho digamie jillobidimaci.

21 Ie isoide. Omoi bautizaia: “Jusiñamui dibeimo jai iticai” llotomoi. “Jecinomona jai jillobidicai” llotomoi. Omoi abimo ite jearenamona jillobiñedomoi; iadedi omoi comeciai jai marena ite. Fiodaillamona Jesucristo jillua muidona, jillobidicai.

22 Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisa; naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

4

Jusiñamuimona cai feiñooga uai diga, naga jiaie creyentena cai canua

1 Cai isoi naimie illamona, Cristo duere sefuide. Naimie duere sefuide; ia jecinona finoñede. Duere omoi sefuia, naimie illamo omoi comeciaina faca.

2 Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai.

3 Jusiñamuina uiñoñedino isoi jaie bie isoide rafuena finouidomoi: Omoi aiñede riñoniai diga isoidomoi. Omoi iniñede iñia; diga isoidomoi. Jearede rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraina sedauidomoi.

4 Naie isoide rafuena omoi jai finoñenia, Jusiñamuina uiñoñedinodi omoi raiji-caidimaci. Omoina jeare ñaitimaci.

5 Iese itimaci; iadedi Jusiñamui uicomo ico iitimaci. Naimacina duere finoite. Nia fiodaiñedinona duere finoite. Jai fiodaitinona jiai duere finoite.

6 Naimaci nia fiodaiñena facaise, Jesucristo rafuena cacadimaci. Jeacino muidona nana fiodaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

7 Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoi jai.

8 Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire faitaitomoi.

9 Jiaie cominina jafueoicaida feiñoñeno; ia caimare feiño.

10 Creyentaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano.

11 Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemonu Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidecue.

Cristo diibeimo cai illamona, duere sefuitica

12 Cue isirui ganodomo. Eo duere omoi sefuia, rajicaiñeno. Creyentiana omoi jailla jira, duere sefuitomo. Jusiñamuidi Cristona raise omoi ñnuana facacite.

13 Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomo.

14 Creyentiana omoi illamona, omoina bu jeare ñaia, caimare omoi i. Iemona Jusiñamui Joreño omoimo illana uñnoitomo. Naimie: “Mare” omoina raite.

15 Jiañodi cominina meinetimaci. Rana fiidimaci. Marañede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitañedicue.

16 Creyentiana omoi illamona omoi duere sefuia, ieri meiruiñeno; iadedi creyentiana omoi illamona, iobillacinona Jusiñamuimo feca.

17 Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite.

18 Jusiñamui facaina lloraima micori iena jaie cuega: “Mareuidinodi niadedi jillobiñedimacimo, ¿ñiese comeciaina jearedinodi jillobitimaci? ¿Ñiese marañedinodi jillobitimaci? Nibai jaca jillobiñeitimaci” cuega.

19 Iena omoi uñnuamona, mare rafuedo jai. Jusiñamui jitaillamona duere omoi sefuia, mare rafuedo jai. Jusiñamui caimo finuana omoi uñnuamona, naimie anamo raise i. Naimie omoina raise eenoite. Ie lloga uaina jaca finoite.

5

Pedro creyentiana nia llofuite

1 Creyentiana llofuerañi, omoimo rafuena lloiacadicue. Cuedi jiai llofueraimadicue. Cristo fiodalana ciodicue. Naimie ebire abido bia, jiaie creyentia digu iena cioiticue. Iese cue illamona, omoimo lloiacadicue.

2 Omoi anamo ite creyentiana raise seda. Naimacina raise llofue. Jiaimie railla jira, llofueñeno; iadedi omoi jitailla jira, llofue. Rana ollena llofueñeno; iadedi iocire llofue.

3 Omoi anamo itinona riire llofueñeno; iadedi mare rafuedo omoi jaillamona, naimacina llofue.

4 Cai creyentia nanoca sedaraimadi Cristo. Naimie abido bia, naimiemonu ibana feiñnoitomo. Naimie digu jaca iitomo.

5 Conirueni, omoi llofuerañi uaina raise ñno. Coninimona abina iedoñeno. Jusiñamui facaina lloraima micori iese jaie cuega:

Bu abina iedoia, Jusiñamuimona marañede;
iadedi bu abi iedoñena, Jusiñamuimona mare.
Jusiñamui naimiena duenaite
cuega.

6 Iese illa jira, cai Jusiñamui siñona jira, naimie anamo abina iedoñeno mai raise omoi i. Iemona naimie jitailliruido omoina iobitaite.

7 Nie isoide rafue ia, Jusiñamui omoina canocabillana omoi uñnuamona, omoi comeciari jarire finoñeno. Naimie omoina eenoite.

⁸ Ebona jaiño. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide.

⁹ Naimie ra faia uaina inoño; ia Cristona inocana jai. Omoi duere sefuilla isoi, nana jiaie creyentiaie duere sefuidimaci. Iena omoi uinuamona, omoi comeciaie ocuiñocana jai.

¹⁰ Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iticai. Dallu birui duere cai sefuia, Jusiñamui cai comeciaina raise finoite. Cai comeciaina raise ocuiñotaite.

¹¹ Illaimana naimie illamona, caina jaca sedade. Naimiemo iobillacino cai fecacabilasa. Iena jitaide.

Naga creyentiammo carta oria rafue

¹² Silvanona uinotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise inogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uinuamona, bie rafuena inocana jai.

¹³ Babiloniammo ite creyentiaie omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiaie orede. Cristomo naimie jai duilla jira, naimie cue jitona eruaide.

¹⁴ Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uinocana mai jai. Macaibaite. Pedrodicue.

IE EMODOMO PEDRO ORETAGA RABE

Pedro creyentiaimo carta orede

¹ ¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo dibeimo maijiamona, ie rafuena lloticue. Cuen a oretajamona, ie lloga uaina finodicue. Cai isoi jai inotomoi. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai inotomoi. Jusiñamuimona cai isoi omoi illa jira, bie carta omoi dine oredicue.

² Jusiñamuina omoi uñuamona, cai Nama Jesús omoi uñuamona, iaiaia omoina duenallana uñocana jai. Iaiaia omoi uri itatajana uñocana jai.

Creyentia marena illa rafue

³ Jesús siñona illamona, bene cai marena illena, naimiedi nana rafue caimo jai iga. Naimiena cai uñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode.

⁴ Naimie iese illamona, eo mare rafuena caimo jai llote. Jiaie rafue baifemo faite. Bie rafue muidona jeacinomona jillobidicai. Cai comeciaiaie jitailla jira, faificana jaidicai; iadedi naimie rafuena cai inuamona, naimie illa isoi, icana jaidicai.

⁵ Jesucristona jai inotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uñocana jai.

⁶ Jearede rafue finocana jaiñeno; iadedi omoi comeciaina eeno. Iena ocuiñocana jai. Jusiñamuina sedacana jai.

⁷ Jiaie creyentiaina isiruicana jai. Nana cominina isiruicana jai.

⁸ Naie isoidicinona jitaidomoi. Iedo omoi raise jaia, cai Nama Jesucristona eo raise uñocana jaitomoi;

⁹ iadedi iedo omoi jaiñenia, abina nia raise uñoñedomoi. Omoi jeacinomona jai jilluana jia jai feitatomoi. Mare rafuena finocana jaillena, omoi jeacinomona jillobidomoi. Iena feitañeno.

¹⁰ Cue amatiaia, naie isoidicinona finocana jai. Iemona Jusiñamui omoina fetuana raise uñoitomoi. Abido danomo jia jaiñeitomoi.

¹¹ Iese omoi jaia, cai Jilloitaraimana naimie illamona, cai Nama Jesucristo ie illanomo omoina eo marena feiñote. Nainomo naimie anamo jaca iitomoi.

¹² Ie jira bie isoide rafuena diga icaiño omoimo lloticue. Bie rafuena uñotomoi. Bie rafue uanaicinona jai raise uñocaidomoi.

¹³⁻¹⁴ Cai Nama Jesucristo cuemo jai llua jira, raire cue fiodable uñoticue. Nia cue fiodiañenia, bie rafuena omoimo diga icaiño lloticue. Iese omoimo cue lloia, cuemona mare.

¹⁵ Bie rafue omoi raise nagarui uñollena, omoina birui canoiticue. Cue fiodaille mei, nagarui bie rafuena omoi feitañenana jitaidicue. Ie muidona bie rafuena jai cueticue.

Pedro Cristona ebirenana jaie cide

¹⁶ Jamai rafue omoimo lloñedicai. Omoina jifueiacaiñedicai. Cai Nama Jesucristo siñonana lloticai. Naimie abido billena jia lloticai. Naimiena ebirenana jaie cidicai.

¹⁷⁻¹⁸ Eniruemo naimie jaie ia, anedu muidomo naimie diga jaidicai. Jusiñamui nainomo jia illa jira, naie illano mare. Naie facaise Jusiñamui llua cacadicai. Jusiñamui naimiena iobitaicade. Ebire llote: “Bimie cue isiruiga Jito. Naimieri iobidicue”. Iena jaie cai cuanona, birui naimie siñonana lloticai.

¹⁹ Naiemona Jusiñamui facaina jaie lloraini micoriai lloga rafue suillena jai raise uñoticai. Naimaci lloga rafuemo omoi comeciaina faca. Lamparín jitre dinomo lligaiñua isoi, naie rafue cai comeciaina uanaicinona uñotade. Monairaicuduna cai cioia, iaie rei

monaille ua illana uiñoticaí. Ie isoide. Cristo dane baireia, iena raise uiñoticaí. Jusiñamui facaina lloraini micoriaí rafuena cai uiñuamona, uanaicínona ua uiñoticaí.

²⁰ Biena uiñoticaí. Dani comeciáimona Jusiñamui facaina lloraini micoriaídi naimaci lloga uaina llofueñedimaci.

²¹ Dani naimaci comeciáí jamai facajamona naie rafuena oñedimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

2

Pedro tainona llofueraínina llote

¹ Cai jaiagai facaise tainona llofueraíni itimaci. Birui ie isoide. Omoi motomo tainona llofueraíni iitimaci. Jusiñamui rafuena raise llofueñeitimaci; iadedi naie rafuemonona omoína itataiacanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raire ebena faifitimaci.

² Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci.

³ Ucube ollena, naimaci tainona llofuiacínodo omoína jifueiacanitimaci; iadedi Jusiñamui ricaillafue anamo jai itimaci. Jusiñamui naimacina ico duere finoite.

⁴ Naimie ecimo ite jaienisaímona damerie jeacino jaie finua jira, Jusiñamui naimacina jai oni dotade. Naimie ricaillafue anamo naimaci jai illamona, naimacimo ite uai jai iñede. Jitiredinomo jai itimaci. Naimacina duere finoite, nana comini Jusiñamui dine illirui ia.

⁵ Jusiñamui Noé micori facaise ite comínina jaie duere finode. Noé micori Jusiñamui ie mare rafuena naimacimo llote; iadedi Jusiñamuina ñnoiacaíñedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorína, ie siete comini diga, jillotate.

⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua.

⁷ Sodomamona Jusiñamui Lot micorína jillotate. Lot micori maremie. Eo jearede rafuena naie nairai finua jira, Lot micori comeci jarire ite.

⁸ Naimaci motomo naimie illamona, nagarui naimaci maraiñede rafue naimie ciuamona, naimie comeci uri iñede.

⁹ Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faíamona jilloitajana uiñote. Jusiñamui naimiena ñnoñedino naimie ricaillafue anamo illana jiaí uiñote. Ico naimacina duere finoite.

¹⁰ Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraíni marefodo llofuecabitimaci. Naimaci jitaillacinona llofuecabitimaci. Jusiñamui jaienisaína jaciruiñeno jeare ñaitimaci.

¹¹ Jusiñamui jaienisaí uai naimaci baífemo faíte; iadedi Jusiñamui illanomo naimaci illamona, bie tainona llofueraínina jeare ñaiñedimaci.

¹² Ocainaíai abina raise uiñoñena muidona, cai rillena naimacina faticaí. Bie tainona llofueraíni ocainaíai isoidimaci. Naimaci raise uiñoñega rafuena jeare ñaitimaci. Ocainaíai faifilla isoi, faifitimaci.

¹³ Jiaie comínina naimaci duere finua dinori duere sefuitimaci. Birui ite rafuena nagarui ebiruitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi.

¹⁴ Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñnoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci.

15 Cristo rafuena fañonocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacañede; iadedi jiaie rafuena lollena, jiaie nairai dine jaide.

16 Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofuerañini, Balaam isoi, jiaie rafuedo jaidimaci.

17 Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Raire aifi bia, naie uillie oni ñaitade. Bie tainona llofuerañimona buena oñedomoi. Naimaci comeciai daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiñedimomo jaca iitimaci.

18 Jamai ñaia diga abina iedotimaci. Uanañede rafuemona, como Cristomo ñnotinona ramo faitimaci. “Jearede rafue finuana mare” raitimaci.

19 “Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci.

20 Cai Nama Jesucristo. Naimiedi cai Jilloitaraima. Naimiena naimaci jaie ñnuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci.

21 Cristo rafuena jaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fañonocaillamona, eo jai fodo jaidimaci.

22 Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodi daje isoidimaci.

3

Pedro cai Nama Cristo dane billena llofuate

1 Cue isiruiganodomo. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue.

2 Jusiñamui facaina jaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomoi. Bie rafuemo omoi comeciai facajana jitaidicue.

3 Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci.

4 Jicanoitimaci: “¿Ñiese Cristo nia abido biñede? Enirue finua facaisemona nana ra daje isoi comucana jaide. Cai mootiai jai fiodaicana jaidimaci. Cristo jaca biñeite”.

5 Iese raitimaci; iadedi iese iñede. Jaie suide rafuemo comeciaina facacañedimaci. Jusiñamui jaie lluamona, ie uaido mona finode. Enirue jia finode. Jinuimona iena finuamona, jinuimona eniruedi bairede.

6 Jinui diga Jusiñamuidi Noé micori facaise cominina jaie fuidode.

7 Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena ñnoñedinona iese duere finoite. Ie uai jai llote; ia nia suiñede.

8 Cue isiruiganodomo. Biena feitaño. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide.

9 Damierie comeciai facadimaci: “Are suiñena jira, cai Nama ie lloga uaina niba finoneite”. Iese cai Nama iñede; iadedi comini naimiena ñnuana fecuise sedade. Comini imaci uai meidollena sedade. Naimaci fafillana jitañede. Ie muidona nia abido biñede. Ie lloga uai nia suiñede.

¹⁰ Firiraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite.

¹¹ Bie rafue suillena uinotica. Naie cai uinuamona, Jusiñamui jitailla rafue finocana cai jailla. Naimiena raise cai sedajasa.

¹² Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite.

¹³ Naimie jai llua isoi, jiaie mona, jiaie enirue diga illena sedadica. Nainomo Jusiñamui jitailla isoi marena jaca itica. Nainomo mare rafue finocana jaitica.

¹⁴ Cue isiruiganodomo. Bie rafue nia suiñena jira, naimie abido nia biñena jira, jeacino finoñeno i. Uri icana omoi i. Iese omoi ia, naimie abido bia, omoia: "Mare" raite. Omoiri iobite.

¹⁵ Raire abido cai Nama biñena, naimiedi comini naimiena inuamo ocuride. Iena uinotica. Cai isiruiga ama Pablo, bie isoide rafue omoimo navui cuete. Cristo naimiena uinotaga rafue diese cuete.

¹⁶ Nana naimie cartaimo bie isoide rafuena cuete. Naimie cartaimo diga rafue ite. Dajerie rafue irirede. Cristo rafuena raise uinoñedino, Cristona raise inoñedino iena tainonana llofuecabitimaci; iadedi iemona faificana jaidimaci. Jiaie Cristona cugafuiaina tainonana llofuecabitimaci.

¹⁷ Bie rafue birui uinotomo. Iena omoi uinuamona, jearede rafue finocabidino rafuedo jaiñeno. Abido danomo omoi jaiñellena, iemona abina rairui.

¹⁸ Cai Nama cai duenaillana uinocana jai. Naimiedi cai Jilloitaraima. Naimiena omoi uinocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

¹ Cue uruiaina omoi isoilla jira, omoimo cartana oredicue. ¿Nie isidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicaí. Naimiena ciodicai. Naimiena jiaí jetadicaí. Caina Jusiñamuina uiñotade. Jusiñamui diga cai jaca illena, jiaí caina llofuate.

² Jusiñamui dinena billanona, imana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicai.

³ Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiaí jitaidicue.

⁴ Omoi comeciaí caimareficaillena, omoimo bie rafuena cueticue.

Jusiñamuidi jaca mareuidimiena jira, useredinomo ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredinomo ite isoide. Naimie comecidi jaca jeanina jira, jitiredinomo iñede isoide.

⁶ “Jusiñamuina nabaidicaí” cai raia, iadedi jeacinona finocana cai jaia, tainona lloticaí. Uanaicinodo nia jaiñedicaí.

⁷ Jusiñamui jeacino jaca finoñede. Naimie isoi jeacino finoñeno cai jaia, coninina nabaidicaí. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate.

⁸ “Caimo jeacino jaca iñede” cai raia, dani cai abina jifueticaí. Uanaicinodo nia jaiñedicaí.

⁹ Naimiemo cai finoca jeacino cai lloia, Jusiñamui cai jeacinona dotaite. Nana cai maraiñedicinona dotaite. Naimie inogamiena jira, naimie maremiena jira, iese finoite.

¹⁰ “Omoimo ite jeacino” Jusiñamui llote; iadedi: “Jeacino finocabiñedicaí” cai raia, “Jusiñamui tainona llote” raiticaí. Iemona naimie uaina jai uaitaticaí.

2

Cai facaina riidotimiedi Cristo

¹ Cue uruai isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitaiñedicue; ia jeacino bu finoa, Jusiñamuimona naimie facaina riidotimie jai ite. Jesucristo maremiena jira, cai facaina caina riidoite.

² Cai jeacino facaina naimie fiodaite. Iemona Jusiñamui riicaillifue anamona jillobidicaí. Jesucristo cai facaina fiodaite; ia nana comini facaina jiaí fiodaite.

³ Jusiñamui llogacinona cai inuamona, naimiena cai uiñuana jai uiñoticaí.

⁴ “Naimiena uiñoticue” raitimiedi ie llogacinuai inoñenia, naimiedi tainona lloiraíma. Uanaicinona uiñoñede;

⁵ ia Jusiñamui llogacinuaina inotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticaí.

⁶ “Cristona nabaidicue” raitimiedi, Cristo isoi, mare rafuena finoite.

Cristo rafuedo jaidomoi

⁷ Cue isiruiganodomoi. Creyentiaína omoi jailla facaise bie rafuena cacadomoi. Ie jira jiaie rafuena birui omoimo cueñeiticue;

8 ia naicinona abido dane lloiticue. Cristo iedo jaide. Iedo jiai jai jaidomoi. Jeacino anamo omoi jaie illamona, jitedinomo itomoi isoidomoi; ia Cristo rafuena omoi jai uiñuamona, useredinomo jai itomoi isoidomoi.

9 “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitedinomo naimie nia ite isoide.

10 Jiaie creyentena bu isiruaia, Cristo rafuedo raise jaide. Iedo naimie jaia, jiaimiena jeacinona finotañeite;

11 iadedi jiaie creyentena bu enoia, jitedinomo nia ite isoide. Jeacino anamo nia ite. Uisnidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

12 Cue uruiaia isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

13-14 Einamaci, Jusiñamuina are omoi jai ñnuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabillamona, marañedimiena omoi jai anafelitaja jira, omoimo bie cartana cueticue. Naimiedi Taife. Uruiaia, Jusiñamui uaina omoi como ñnuamona, omoimo bie cartana cueticue.

15 Omoi ecimo marañede rafuena ebiruiño. Iena bu ebiruaia, cai Moo Jusiñamuina isiruiñede.

16 Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiaia diga, abi ieducinodi Jusiñamui ieñede.

17 Jusiñamui ieñede rafue jaca fuite. Naie isoide rafuedo jaidinodi jiai faifitimaci; iadedi Jusiñamui jitaillacinona finodimie Jusiñamui illanomo jaca iite.

Cristona abi caitadino rafue

18 Cue uruiaia isoidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaiei illana jai uiñotomoi.

19 Cai creyentiaia motomo nano itimaci; ia Cristo dibeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caïmona naimaci jailla jira, Cristomo naimaci duiñenana jai uiñoticaia.

20 Jesucristomona Jusiñamui Joreña jai omoi feiñua jira, nana omoi Jusiñamui dibeimo ite rafuena jai uiñotomoi.

21 Ie jira uanaicinona bu llofueia, iena uiñotomoi. Uanañedicinona bu llofueia, iena jiai uiñotomoi.

22 Tainona llofuerainina ja cueticue. “Cristo cai jilloitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini.

23 Cristona ñnoñedinodi Jusiñamuina jiai ñnoñedimaci. Cristona ñnotino Jusiñamuina jiai ñnotimaci. Jusiñamui Joreño omoimo illamona, iena jai uiñotomoi.

24 Ie jira creyentiaina omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiai raise nabaitomoi.

25 Jusiñamui caimo jai llua isoi, naimie diga jaca iiticaia.

26 Omoïna damerie jifueiacana jira, bie rafuena jai cueticue.

27 Jusiñamui Joreña jai feiñotomoi. Omoïna Jusiñamui rafuena naimie uiñotaja jira, jiaie rafuena llofuerainina jai jitañedomoi. Jusiñamui Joreño uanaicinona omoïna uiñotacabide. Naimie omoïna uiñotaja isoi, Cristona nabaicana omoi jai.

28 Cristo ico abido biite. Omoi jacinaiñellena, naimiena omoi meiruiñellena, naimiena birui raise omoi nabai.

²⁹ Jusiñamui maremiēna cai uiñuamona, nana mare rafuena finocabidino naimiemo duillana jiai uiñoticaí.

3

Juandi Jusiñamui cominina llua rafue

¹ Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídicae. Naimiēna naimaci uiñoñena jira, Jusiñamuina ñnoñedino cai uiñoğa rafuena jiai raise uiñoñedimaci.

² Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi cai ico illena jai uiñoticaí. Ico naimiēna cai cioillemona, iena raise uiñoiticaí.

³ Iemo cai ocurillamona, naimie marena illa isoi, cai comeciái marena itataja.

⁴ Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode.

⁵ Jusiñamui dinena Cristo billanona, imana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino dibeimo naimie jaca iñede.

⁶ Naimiēna nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiēna nia raise uiñoñede.

⁷ Cue uruiaí isidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoiña jifueñellena, abina rairui. Jes Cristo jaca maremie. Mare rafuena finocana cai jaia, naimie isoi mareniticaí;

⁸ ia jeacino finocana bu jaia, Taífemo duide. Nano dofomona Taífedí jeacino finocana jaide. Ie jira Jusiñamui Jito bite, Taífe rafuena anafefitallena.

⁹ Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide.

¹⁰ Iemona Jusiñamui dibeimo itinona raise uiñoticaí. Taífe dibeimo itinona jiai raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiai duiñede.

Coninina cai isiruilla rafue

¹¹ Creyentiaína omoi jailla facaise: “Coninina isirui” raillana cacadomoi. Jiaie creyentiaína nia omoi isiruiñenia, Jusiñamuimo nia duiñedomoi.

¹² Caín micorimona cai fueua. Naimie ie amana isiruiñena jira, Taífe naimiēna ramo faíamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete.

¹³ Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinaiñeno.

¹⁴ Cristona nia cai ñnoñena facaise jeacino anamo cai illa jira, Jusiñamuimona fiodaitino isoidicaí. Jiaie creyentena cai isiruia, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite.

¹⁵ Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede.

¹⁶ Cristomona cai fueua. Naimie jitailla jira, cai facaina fiodaite. Iemona jiaie creyentiaína cai isiruillana uiñoticaí. Ie jira naimaci facaina naimaci ramo jiriñellena fiodaiacaniticaí.

¹⁷ Jiaie creyentiaína cai isiruillamona, naimacina canoiticaí. Omoi mo ra ia, jiaie creyentemo ra iñenia, naimiēna omoi canoñenia, Jusiñamuina raise isiruiñedomoi.

¹⁸ Cue uruiaí isidomoi. “Jamai uaido jiaie creyentiaína isiruiticaí” cai raiñena; iadedí cai finoca rafuemona naimacina cai canua.

Jusiñamuimo jaciruiñeno jiredicaí

¹⁹ Jiaie creyentiaina isiruicana cai jaia, Jusiñamui cominina cai illana raise uiñoticaí. Jusiñamui muidona cai comeci uri ite.

²⁰ Cai comecimo iticinona uiñoticaí. Siñonamiēna jira, Jusiñamui iēna jiaí uiñote.

²¹ Cai comecimo jeacino iñenia, Jusiñamuimo jaciruiñeno jiredicai.

²² Naimie llogacinona cai inoia, naimie jitaillacinona cai finoia, naimiemo cai jicaca rafuena birui feiñoticaí.

²³ Naimie Jito Jesucristo cai inuana jitaide. Cristo llua isoi, coninina cai isiruillana jiaí jitaide.

²⁴ Naimie llogacinuaina cai inoia, naimiēna nabaidicaí. Caina jiaí nabaide. Naimie Joreño caimo illamona, naimie caina nabaillana jai uiñoticaí.

4

Juan tainona llofueraínina llua rafue

¹ Omoína isiruiticue. Naga llofueraíma uaina inoñeno. Ailluena tainona llofueraíni birui illa jira, Jusiñamuimona naimaci feiñoga uaina nica naimacina facaci:

² “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci;

³ ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiēmona naimaci uaina otimaci. Naimie billena jai fididomoi. Comini comeciaina feidocana birui jaidimaci.

⁴ Ero, Jusiñamuimo jai cai duillamona, Jusiñamui caimo ite. Taino llofueraíni dibeimo omoi jaiñena jira, naimaci llofuiana oñedomoi. Naie taino llofueraínimo Taife ite; ia Jusiñamui Taife baifemo faite.

⁵ Naie tainona llofueraíni Jusiñamuina inoñedinomo duidimaci. Naimaci ecimo ite rafuena llofuecabitimaci. Jusiñamuina inoñedino naimaci llofuiana ebiruitimaci.

⁶ Jusiñamuimo jai duidicaí. Jusiñamuina inotino cai llofuiana cacaacadimaci; ia Jusiñamuina inoñedino cai llofuiana cacaacaiñedimaci. Iemona Jusiñamui uaina llofueraínina uiñoticaí. Iemona tainona llofueraínina jiaí uiñoticaí.

Jusiñamui caina isiruilla rafue

⁷ Omoína isiruiticue. Coninina cai isiruilla. Jusiñamui caina isiruillamona, caina jiaínona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci.

⁸ Jusiñamuimo cai duillamona, caina jiaínona naimie isiruitaja jira, jiaínona isiruiñedimiedi Jusiñamui rafuena nia uiñoñede.

⁹ Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticaí. Ie finoca rafuēmona Jusiñamui caina isiruillana jai uiñoticaí.

¹⁰ Jusiñamuina cai isiruillana ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacina feitate. Iemona isiruillana raise uiñoticaí.

¹¹ Caina Jusiñamui isiruilla isoi, coninina cai isiruilla.

¹² Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uiñoticaí. Naimiēna isiruicana jiaí jaidicaí.

¹³ Naimie Joreño caimo itatajamona, naimiēna cai nabaillana uiñoticaí. Caina naimie nabaillana jiaí uiñoticaí.

¹⁴ Bie rafuena jiaí uiñoticaí. Jusiñamui ie Jitona eniruemo jaie oretate. Naimiēna inoñedinona jilloitallena, naimiēna oretate. Naimie Jitona ciodicaí. Ie jira iēna birui lloticaí.

¹⁵ “Jusiñamui Jitodi Jesús” llotimiedi Jusiñamuina nabaide. Jusiñamui naimiēna jiaí nabaide.

16 Ie jira Jusiñamui caina isiruillana uiñoticaí. Caina jiaínona naimie isiruitade. Iedo cai jaillamona, caina nabaide. Naimiena jiaí nabaidicaí.

17 Iemona Jusiñamuina isiruicana jaiticaí. Naimie uicomo ico nana cai ille facaise naimiena jaciruiñeiticaí. Jusiñamui Jitona Cristo illanona, Jusiñamui cominina cai jiaí illanona, naimiena birui jaciruiñedicaí.

18 Jusiñamuina cai isiruia, naimiena jaciruiñedicaí. Eo raise naimiena cai isiruia, ¿niese naimiena jaciruiticaí? Naimiena cai jaciruia, naimie caina duere finuana jaciruiticaí. Jusiñamuina jaciruitimiedi Jusiñamuina nia raise isiruiñede.

19 Nano Jusiñamui caina isiruilla jira, caidi naimiena isiruiticaí.

20 “Jusiñamuina isiruiticue” raitimiedi jiaie creyentena enoia, jai taino llote. Creyentena cide; ia naimiena isiruiñede. Jusiñamuina cioiñede. ¿Niese ie cioiñenamiena isiruite?

21 Jusiñamui iena caimo jai llote: “Cuen a isiruitimie jiaie creyentena jiaí isiruite”. Ie jira coninina isirui.

5

Taife ie rafuena anafefitaticai

1 Jusiñamuimona Jesús billana cai ñnoia, Jesús cai Jilloitaraimana cai ñnoia, Jusiñamui cominina jaidicaí. Jusiñamuina cai isiruia, nana naimie cominina jiaí isiruiticaí.

2 Jusiñamuina cai raise isiruia, naimie llogacinuaina cai ñnoia, naimie cominina jiaí isiruiticaí.

3 Jusiñamuina cai isiruia, naimie llogacinuaina jiaí jai ñnoticaí. Naimie uai raise ñnuamona, iena finollena sefuiruiñedicaí.

4 Jusiñamui díbeimo itinodi Taife ie rafuena anafefitaticai. Cristona cai ñnuamona, Taife ie rafuena anafefitaticai.

5 Jesúdi Jusiñamui Jitonana cai ñnuamona, Taife rafuena anafefitaticai.

Jesucristodi Jusiñamui Jito

6 Jesucristona dane ñaiticue. Naimiedi Jusiñamui Jitona ñnoticaí. Naimie bautizajamona, naimie fiodaillamona naimiedi Jusiñamui Jitonana uiñoticaí.

7 Uanaicinona naimie uiñuamona, Jesucristo bautizaja facaise Jusiñamui Joreño caina iena jiaí uiñotade.

8 Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uiñoticaí.

9 Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñoticaí. Comini llua baifemo Jusiñamui llua faia jira, Jusiñamui llua jiaí ua feiñoticaí.

10 Jesúdi Jusiñamui Jitonana cai ñnuamona, cai comeciaí daje isoi lloide; ia Jusiñamui ie Jitona llua ñnoñedinodi: “Jusiñamui taino llote” raitimaci.

11 Biena ñaiticue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate.

12 Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca iñeitimaci.

Jusiñamui caina raise uiñote

13 Jusiñamui diga ico omoi jaca illena omoi raise uiñollena, bie cartana jai cueticue.

14 Jusiñamuina cai ñnuamona, naimiena jai jaciruiñedicaí. Naimiemo cai jiaia, naimie jitailla isoide rafuena cai jicaia, naimie caina cacajana raise uiñoticaí.

15 Iese cai jiaia, naimie jaca fairuana jiaí uiñoticaí.

16 Jiaie creyente jeacino finuana omoi cioia, naimie facaina Jusiñamuimo jii. Iemona Jusiñamui díbeimo naimiena dane itataitomoi. Jusiñamui rafuena jamaidimie facaina omoi jiana lloñedicue. Naimie faificana jaiacade.

¹⁷ Jusiñamui llogacinona bu ñnoñenia, jeacino jai finode; ia naimie facaina omoi jñia, Jusiñamui iena feitaite. Faificana jaiacadimie facaina omoi jñiana lloñedicue.

¹⁸ Jusiñamui comini jeacinona finocana jaiñedimaci. Naiemona Cristo caina eenote. Ie jira Taife caina duere finonide.

¹⁹ Jusiñamuimo jai duidicai. Naimie anamo jai iticai; ia naimiena ñnoñedino Taife anamo jai itimaci.

²⁰ Jusiñamui Jito jaie eniruemo billana uiñoticai. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicai. Jesucristomo jiai jai duidicai. Ie jira Jusiñamui diga ico jaca iiticai.

²¹ Cue urui ai isoidomoi. Daje rafuena nia lloiticue. Jiraraimona abina rairui. Jusiñamui ieñede rafuedo omoi jaiñeno. Mai. Juandicue.

JUAN IE EMODOMO ORETAGA RABE

Uanaicinona coninina cai isiruilla

¹ Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uñua jira, omoina isiruiticue. Nana naie uanaicinona uñotinodi omoina isiruitimaci.

² Naie uanaicinona cai uñua jira, omoina isiruiticai. Iena uñocana jaca jaiticai.

³ Cai Moo Jusiñamui ie Jito Jesucristo diga, caina jaca duenaite. Iaimaiaí caina jaca uri itataite. Uanaicinona cai uñuamona, iaimaiaina cai isiruillamona, iese iiticai.

⁴ Caimo cai Moo llua isoi, uanaicimodo o uruiaimona dajerie jailla jira, iobidicue.

⁵ Ñoo, daje rafue omo lloiacadicue. Bie rafuena navui uñotio. Cristo rafuena nano cai ñnoia, bie rafuena uñoticai. Coninina cai isiruillana ñaiticue.

⁶ Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucacinona cacadomoi. Coninina cai isiruillana cacadomoi.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, imana jaiñenana llofuecabitimaci. Bu iese llofueia, cominina jifujete. Naimiedi Cristona abi caitadimie.

⁸ Cristo rafuedo omoi jailla jira, Jusiñamuimona buena omoi faifiñellena, omoi abina rairui. Jusiñamuimona ibana feñoitomoi.

⁹ Cristo llogacinona bu faionocaia, Cristo rafuedo bu jaiñenia, Jusiñamuina ua uñoñede; iadedi Cristo rafuedo bu jaiia, cai Moo Jusiñamuina uñote. Ie Jitona jiai uñote.

¹⁰ O jofomo Cristo rafuedo jaiñedimie bia, Cristo rafuena cue llofua isoi naimie llofueñenia, naimiena nafueño. “Jusiñamui ona canuamona, marena o jai” lloño.

¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuridicue. Danomo cai rillamona ñaiticai, cai comeciaí camarecaillena.

¹³ O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMODOMO JIAIE ORETAGA RABE

Gayo mare rafue finocana jaide

¹ Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue.

² Cue isiruigamiedio. Nana o finua rafue marena jaillana jitaidicue. O ecairenana jiaí jitaidicue. O comeci marena illana jai uñotícue.

³ Cue dine dajerie creyentiaí bite. Uanaicinodo omoí jaillana llote. Cristo rafuedo omoí jaillana llote. Ie jira iobidicue.

⁴ Uanaicinodo omoí jailla jira, eo iobidicue. Cue muidona Cristona omoí ñnua jira, cue uruiaidomoi isoidomoi. Uanaicinodo omoí jailla jira, eo iobidicue.

⁵ Cue isiruigamiedio. Naga icaiño jiaie creyentiaina o canoia, eo mare. Nia o uññoñega creyentiaí o illanomo ria, naimacina o canoia, ua eo mare.

⁶ Naie isoide creyentiaina o isiruillana jiaí fididicue. Rollena creyentiaí ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare.

⁷ Naimie rafue llua muidona, jai macaritimaci. Jusiñamuina uññoñedimomona jaca buena feiñoñedimaci.

⁸ Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

Diótfes marañede

⁹ O dine ite creyentiaimo cartana jai oredicue. Diótfesna janore ñaiacadicue. Naimiedi eo uicoidimie. Naimiedi cue uaina uññoiacañede.

¹⁰ O dine cue ria, naimie finoca rafuena omoímo lloiticue. Cuenajeare ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

¹¹ Jeacino finoraini isoi omoí iñeno; iadedi marecinona finoraini isoi omoí i. Marecino finocabidimiedi Jusiñamui ie. Jeacino finocabidimiedi Jusiñamuina ua uññoñede.

Demetrio marena ite

¹² Nana creyentiaidi Demetriona marena ñaitimaci. Uanaicinodo naimie jaide. Iese naimiena jiaí ñaiticai. Cai lluaciodi uanaicinona uñnotio.

Rafuena nia lloiacade

¹³ Diga rafuena cueiacadicue; iadedi cueñeiticue.

¹⁴ Raíre ona cue cioillemo ocuridicue. Ie mei ñaiticoco.

¹⁵ Uri o i. Cue dine ite o nabaiñiaidi uaina omo oredimaci. O dine ite cue nabaiñaímo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹ Cue nabaiñiaí, bie carta omoi ðine oredicue. ¿Ñie isoidomoi? Judadícue. Ie rafuena lollena, Jesucristo ðibeimo jai maijídícue. Jacobo cue ama. Jusiñamui omoína jai fetuana cue uiñuamona, bie cartana oredicue. Cai Moo Jusiñamui omoína isiruute. Jeacínona omoi finoí raillano, Jesucristo omoína jai sedade.

² Jusiñamui omoína eo duenaillana omoi uiñocana omoi jaillana jitaídícue. Naimie omoi comeciaina raise uri itatajana omoi uiñocana omoi jaillana jitaídícue. Naimie omoína eo isiruillana omoi uiñocana omoi jaillana jitaídícue.

Tainocínona llofueraíni ite

³ Cue isiruigano, omoímo Jusiñamui caina jai jillotaja rafuena iocire cueiacadícue; iadedi jiaíe rafue birui illa jira, omoímo cueticue. Jusiñamuimona cai feiñoga rafuena omoi eo riiduana jitaídícue. Naie rafuena Cristo oretaganomona cacadicaí. Naie rafuena meidonidicaí. Ieconi duide. Jusiñamui jiaíe rafuena lloñeite.

⁴ Caimo ite rafuena omoi eo riiduana jitaídícue. Cai creyentiaí motomo dajerie tainocínona llofueraíni illa jira, iena jitaídícue. Uanaicínona llofuecana naimaci illamo cai comeciaina facadicaí; iadedi Jusiñamui jitaillacínona finoñedimaci. “Jusiñamui caina duenaillamona, jeacino finocana cai jaia, cai jeacínona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidínona duere finoitícue” Jusiñamui jaie llote. Naimie duere sefuillacino anamo jai itimaci.

⁵ Iemona omoi raise fueollena, bie rafuemo omoi comeciaina faca. Bie rafuena navui llofueticaí. Iena raise cacadomoi; iadedi iena dane uibiño. Iena lloitícue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci ñnoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi ñnoñenia, omoína duere finoite.

⁶ Ero, bie rafuemona omoi fueua. Jusiñamui ecimo ite jaienisaímona dajerie imaci illanona jaie jitaíñedimaci. Naimie isoi iacadimaci. Naimaci illano naimie ecimo jaie itimaci. Naimaci jitailla rafuena naimaci finollena, naimie ecimo illana faínonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie rícaillafue anamo jai itimaci. Naimie ðine nana comíni illirui ia, naimacina duere finoite. Naimacimona omoi fueua. Jeacínona Jusiñamui ðibeimo itino finoia, Jusiñamui naimacina duere finoite.

⁷ Ero, bie rafuemona omoi fueua. Sodoma railla nairai micoriaí maraiñedicínona jaie eo finoidimaci. Gomorra railla nairai micoriaí daje isoidimaci. Nainomo ianorí ite nairai daje isoidimaci. Naimaci aiñede riñoniaí ðiga itimaci. Naiñaiñuái iñiñede iñiaí ðiga itimaci. Coninina aífiedotimaci. Iemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacínona finodínona duere finoite.

⁸ Naie tainocínona llofueraíni daje isoidimaci. Nicaírillaafuedo jaillamona, ebena jaidimaci. Naimaci abímo jearede rafuena finodimaci. Jusiñamui uaina jamaidimaci. Jusiñamui jaienisaína jeare ñaitimaci.

⁹ Miguelna mamecírede jaienici isoi iñedimaci. Miguel Jusiñamui nanoca jaienici. Moisés micorí fiodailla mei, Miguel Moisés micorí abina raíacade. Taife ðiga Moisés

mícori abina uaitate. Taife Moisés mícori abina bairoacade. Miguel iena jiaí jitaide. Miguel Taife diga riire ñaite; iadedi Taifena jeare ñañede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”.

¹⁰ Naie taino llofueraíni iese iñedimaci. Jusiñamui jaienisaina jeare ñaitimaci. Ocainaiái imaci comeciaí uifnuacinodo jailla isoi, naie taino llofueraíni imaci uifnoga rafuedo jaidimaci. Iemona ja muidomo faifitimaci.

¹¹ Caín mícori isoi naimaci illa jira, Jusiñamui naimacina duere finoite. Jusiñamui jitailla rafuena Caín mícori finoacaiñena jira, ie ama mícori diga icirite. Icirillamona Caín mícori ie ama mícorina jaie meinete. Caín mícori rafuedo naie taino llofueraíni jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam mícori isoi naimaci illa jira, naimacina duere finoite. Ucube ollena, Balaam mícori uanaicinona jaie lloñede; iadedi cai judíuai cominina jeacinona finotate. Ucube ollena, naie taino llofueraíni Balaam mícori rafuedo jaidimaci. Uanaicinona jaca llofueñedimaci. Coré mícori isoi naimaci illa jira, Jusiñamui naimacina duere finoite. Moisés mícori uaina Coré mícori ñnoñena jira, Jusiñamui naimie mícorina meinete. Jusiñamui uaina naie taino llofueraíni ñnoiacaíñena jira, jiaí faifitimaci.

¹² Dani omoi nabairillamona danomo omoi guia, naie taino llofueraíni jiaí bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoína canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraíni maraiñedimaci. Naimacimo marecino iñena jira, llisiñede riarra isoidimaci. Llisilla facaise riarra llisiñenia, maraiñede. Riarra llisiñenia, iena oni aiñodicaí. Maraiñena jira, safenaite. Naimaci maraiñena jira, naie taino llofueraíni jiaí safenaitimaci.

¹³ Naie taino llofueraíni jearede rana finocabidimaci. Eo bagode monaillai isoidimaci. Monaillai eo bagoia, monaillai fuemo jearede rana oni ñaicosite. Ucuaina eruaiillamona naiona cai macarillana uifnoticaí; iadedi ucudu ana feia, cai macarillana raise uifñoñedicaí. Naie taino llofueraíni ana fede ucudu isoidimaci. Comini uanaicinona uifnotañedimaci. Naimaci llofuiacinomona Jusiñamui jitailla rafuedo cai raise jaillana uifñoñedicaí. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴ Naimacina Enoc jaie llote. Adán mícori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisai diga biite,

¹⁵ nana naimiena ñnoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote.

¹⁶ Naie taino llofueraíni creyentiaína sedarainina uaitaside. Jusiñamuina jeare ñaioidimaci. Dani naimaci jitailla rafuena finoidimaci. Eo abina biruidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

Cristona ñnotinomo llucino

¹⁷ Cue isiruiga amatiaí, cai Nama Jesucristo oretagano jai llogacinona omoi comeci.

¹⁸ Raitimaci: “Jesucristo nia abido biñena facaiseconi naimie uaina ñnoñedino jaca iitimaci. Naimaci jearede jitaillacinodo jaitimaci” raitimaci.

¹⁹ Naie taino llofueraíni comini comeciaí daje isoi lloillana itatañedimaci. Jusiñamui díbeimo iñede rafuena gaídimaci. Jusiñamui Joreño naimacimo iñede.

²⁰ Cue isiruigano, naimaci isoi omoi iñeno; iadedi Jusiñamui rafue ñnocana mai omoi jai. Naie rafuedi mare. Jusiñamui Joreño omoína canuacinodo Jusiñamuimo omoi jii.

²¹ Jusiñamui omoïna isiruillacinona uiñocana omoï jai. Jusiñamui ecimo cai jaca illemo fecuise ocuiri. Caina cai Nama Jesucristo duenaila jira, naimie ecimo jaca iiticaï.

²² Diga comini naie taino llofueraini rafuedo jaidimaci. Iemona dajerie Jusiñamui uaina raise nia ñnoñedimaci. Naimacimo llono: “Mai ñno.

²³ Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoï finoi raillanona, naimacina jaciruoicaïda duenai.

Jusiñamuimo iobillacinona cai fecacabillasa

²⁴ Jusiñamuidi omoïna jeacinona finoñenana itatarede. Naimie uicomo omoïna ico itataite. Omoïna jeacinona omoï jaca finoñedena nainomo itataite. Nainomo iocire iitomoï.

²⁵ Jusiñamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaïbaite. Judadícue.

JUAN ICO SUILLE RAFUENA CUIAFUE

Jesucristo ico suille rafue llwana cueticue

¹ Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jiairuido ico ebena suille rafuena uiñotade. Cuena iena uiñotallena, iena cuemo llollena, ie jaienici cue dine oretate.

² Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jia jai cueticue.

³ Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iaiei illa jira, iemo raise cacarei.

Siete creyentiai illanuaimo bie carta oredicue

⁴ Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, biena cueticue. Jusiñamui ie Joreño diga, Jesucristo diga, omoina duenaicabide. Omoina uri itatacabite. Iena omoi uiñocana mai omoi jai. Jusiñamui jai jaca ite. Birui naimie jaca ite. Ico jaca iite. Ie Joreño naimie abimo illamona, omoina bie rafuena raise cacataite. Iena inotaite.

⁵ Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodañena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade.

⁶ Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaidicue.

⁷ Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaiie meinete nairaidi naimiena cioitimaci. Duere sefuillana jacinailamona nana comini eecuitimaci. Iese jaca suite.

⁸ Cai Nama Jusiñamui cuemo llote: “Jaca bue nia inenia, jai jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iiticue. Siño jitodicue”.

Juan Cristona cide

⁹ Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iticai. Naimie cai comeciaina ocuiñotajamona iemo birui ocuridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci.

¹⁰ Jusiñamuina cue sedajamona, naimie Joreño cuena namatajamona, inañenamona nicairilla isoi cue jinafo dine damie ado llwana cacadicue. Trompeta isoi ie uaidi ficirede.

¹¹ Cuemo llote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfi-amo, Laodiceamo. Diese illanuaimo oreta —llote.

¹² Cuemo llotimiena cue cioillena, jinafo dine erodaticue. Siete oromona finoca lamparinai ciodicue. Naga lamparin ie oromona finoca rairacom raide.

¹³ Naie lamparinai motomo imana eruaidimiena ciodicue. Naimiedi Cristo. Areroina jitade. Oromona finoca cinturóna jitade.

¹⁴ Naimie ifotirai userede iniroi isoi eo userede. Naimie uisi irai boa isoi eruaide.

¹⁵ Naimie eillidi bronze eo dua isoi quenirede. Naimie uai aillue ille tua isoi eo ficirede.

¹⁶ Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiñua isoi.

¹⁷ Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue.

¹⁸ Jaie fiodaiticue; iadedi naiemona jaie jillodicue. Jaca iiticue. Dane fiodaiñeiticue. Cue uai siñona jira, comini fodailliruina lloticue. Cuena ñnoñedino fodailla mei, naimaci joreñuai illinona jiai lloticue.

¹⁹ O como ciua rafuena cueno. Omo cue ja lolle rafuena cueno. O ciolle rafuena jiai cueno.

²⁰ Ailluena rafue omo lloticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparinaidi bie siete illanomo ite creyentiai isoide. Bie creyentiaina ja ñaiacadicue —raite.

2

Cristo Efesomo ite creyentiaimo lloga rafue

¹ Cristo cuemo llote:

—Efesomo ite creyentiaimo lllena, nainomo ite llofueraimamo cue llua cueno: “Cue nabeillimo siete ucuduai ite. Siete oromona finoca lamarinaidi motomo iticue. Omoina ñaiticue. Omoi llofueraima cue anamo ite. Omoi motomo cue illamona, cuena nabaidomoi.

² Omoi motomo cue illa jira, omoi illana raise uiñoticue. Omoi comeciadi ocuiñocana iciriñeno itomoi. Maraiñedinona finoraini diga nabairiñedomoi. Omoi motomo damierie ‘Cristo oretagaca’ raitinona facaciamona, naimaci tainona llorainina uiñotomoi.

³ Omoi comeciadi ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena ñnocana nia jaidomoi.

⁴ Iese itomoi; iadedi omoi abi rafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi.

⁵ Iemo omoi comeciaina faça. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciadi dane raise iñenia, omoina duere finoiticue. Iemona omoi lamparin oni uiticue. Omoi creyentiaina ñaiticue. Cue dibeimo raise omoi iñenia, jiairuido omoi illanomo creyentiai iñeitimaci.

⁶ Omoina marecinona jiai lloiticue. Nicolaítas railla comini finoca rafuena gaiñedomoi. Iena jiai gaiñedicue. Eo maraiñede rafuena finocana jaidimaci.

⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Cuena raise ñnotinomo Jusiñamui illanomo ite riarana iiticue. Ie lilllemona jaca iitimaci” cueno.

Cristo Esmirnamo ite creyentiaimo lloga rafue

⁸ Cristo cuemo llote:

—Esmirnamo ite creyentiaimo lllena, nainomo ite llofueraimamo cue llua cueno: “Jaie jaca iticue. Eniruemo jaie cue ia, fiodaiticue; iadedi naiemona jai jillodicue. Jaca iiticue.

⁹ Cue cominina omoi illa jira, duere sefuidomoi. Omoi duerenana uiñoticue. Benomo dueredomoi; iadedi Jusiñamui mona duenidomoi. Naimie dine ico omoi ia, buerenitomoi. Damierie omoina jeare ñaiana uiñoticue. Naimacidi judíuai comini; iadedi cue dibeimo iñedimaci. Taife anamo itimaci.

¹⁰ Ico omoi duere sefua, jaciruiñeno. Taife cárcelmo omoimona damieriena itataite. Abido danomo omoi jaillena, iese omoina duere finoite. Diez digarui duere sefuitomoi.

Omoï ille ðinori cuena ðnocana omoï jai. Duere sefuillamona bu fiodaia, cue ðiga jaca iite.

¹¹ Jusiñamui Joreñomona cue lloga rafue ite, omoï creyentiaï iena. Bie rafue bu cacajia, iena jiaï ðnua. Jusiñamuidi cuena raise ðnotinona naimaci jeacino facaina ibana oñeite. Iraimo faifiñeitimaci; ia Jusiñamui ðine jaca iitimaci” cueno.

Cristo Pérgamomo ite creyentiaïmo lloga rafue

¹² Cristo cuemo llote:

—Pérgamomo ite creyentiaïmo lllollena, nainomo ite llofueraïmamo cue lluaana cueno: “Nagafebei eo jairede lloebi cuemo ite.

¹³ Omoï illana uiñoticue. Taife anamo itino motomo itomoi; iadedi cuena ðnocana nia jaidomoi. Omoïmona Antipas micorina navui meinetimaci. Naimie micoridi cue rafuena raise llofueuide. Naie facaise cuena faïnonocaiñedomoi;

¹⁴ iadedi cuemona janore rafue omoï ðiga birui ite. Omoïmona damieriedi Balaam micori llofuiacinodo jaidimaci. Balaam micori Balac micorimo jaie llua jira, omoï jaiagai jeacino finodimaci. Balac cominimo omoï jaiagai ðiga nabairillena llote. Ie jira omoï jaiagai jiraraimo fecaca guillena naimaci ðiga guitimaci. Iemei naimacimona ainiaina otimaci. Jusiñamuina ðnoñedinomona ainiaina otimaci. Naiemona jearede rafue comuide. Omoïmona birui damierie iese isoidimaci. Cuena ðnoñedinomona ainiaina otimaci.

¹⁵ Omoïmona damierie nicolaïtas railla llofuiacinodo jiaï jaidimaci. Naimaci llofuiacinodi uanaïñedicino.

¹⁶ Naie llofuiacinomona eneno mai omoï i. Iedo jaiñeno. Naie llofuiacinodo jaidinomo: ‘Omoï comeciaï iuai ðane meido’ llono. Iena naimaci finoñenia, cue ðibeimo naimaci raise iacaiñenia, cuemo ite lloebi ðiga cuena ðnoñedinona duere finoiticue.

¹⁷ Jusiñamui Joreñomona cue lloga rafue ite, omoï creyentiaï iena. Bie rafue bu cacajia, iena jiaï ðnua. Judíuai jaiagaimo maná railla guille cue illa isoi, cuena raise ðnotinomo monamo jai ite maná isoi iiticue. Biena ñaiticue. Imaci comeciaïna ocuiñotajacinona iiticue. Cue cominina naimaci illamona, naimacimo userede noficina jiaï iiticue. Nainomo mameci ite. Dani naiena feiñotino naie mamecina uiñoitimaci” cueno.

Cristo Tiatiramo ite creyentiaïmo lloga rafue

¹⁸ Cristo cuemo llote:

—Tiatiramo ite creyentiaïmo lllollena, nainomo ite llofueraïmamo cue lluaana cueno: “Jusiñamui Jitona cue illanona, bie rafue omoïmo lloiacadicue. Cue uisï irai isoi boode. Cue eilli bronze eo dua isoi quenirede.

¹⁹ Omoï finoca rafuena uiñoticue. Jusiñamuina omoï isiruillana uiñoticue. Jiaie cominina omoï isiruillana uiñoticue. Cuena omoï ðnuana uiñoticue. Jiaie creyentiaïna omoï canocabillana uiñoticue. Duere sefuidomoi; iadedi omoï comeciaï ocuiñuana uiñoticue. Navui iese icana jaidomoi. Birui bai lliai jaidomoi;

²⁰ iadedi cuemo omoï ðiga rafue ite. Omoï motomo maraiñede riño ite. Jezabelna ñaiticue. Naiñaiño omoï oni dotañena jira, cuemo omoï ðiga rafue ite. ‘Jusiñamui rafuena jino llua uai cuemo ite’ naiñaiño llote. Uanaïñedinona llofuecabilla jira, omoïmona damieriena jifuate. Jearede rafuena llofuecabite. Omoï aiñede riño ðiga illana llofuate. Omoï iniñede ðima ðiga illana llofuate. Jiraraimo fecaca guille guillena llofuate. Iena guilla jira, omoïmona damierie naie jiraraina sedade. Iese naiñaiño llofuecabite.

²¹ Naiñaiño comeci iuai meidollena are sedadicue; iadedi naiñaiño naie jearede rafuena faïnonocaiacaiñede.

²² Naiñaiño duere sefuillena, naiñaiño duitaiticue. Naimaci comeciaï iuai naimaci meidoñenia, naiñaiño llofuiacinodo jaidinona jiaï eo duere finoiticue.

²³ Naiñaiño dibeimo itinona meineiticue. Nana creyentiaidi nana comini comeciai iuailaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi.

²⁴ Jezabel llofuiaicinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue;

²⁵ iadedi cue nia abido biñenia, cuemona omoi uiñoga rafuena ñnocana mai jai.

²⁶ Cue Moomona cue uaina feiñoticue. Cuena raise ñnuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci.

²⁷ Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llailla isoi.

²⁸ Cuena ñnotinomo monairaicuduna jiai iiticue.

²⁹ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cueno.

3

Cristo Sardimo ite creyentiaimo lloga rafue

¹ Cristo cuemo llote:

–Sardimo ite creyentiaimo llolena, nainomo ite llofueraimamo cue lluaña cueno: “Jusiñamui Joreño cuemo ite. Naimie Joreño omoína canocabide. Omoína sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise ñnoticai’ raitomoi; iadedi omoi comeciaimona raise iñedomoi.

² Cue dibeimo raise dane i. Cuena dane raise ñnocana jai. Cuena jai fañonocaiacadomoi. Jusiñamui omoi finoca rafueri iobiñede.

³ Cue rafuena jaie cacajamona, iena ñnotomoi. Iedo dane jai. Omoi comeciai iuaina dane meido. Cue dibeimo dane raise omoi iacaiñenia, firiraíma bainino billa isoi, omoína duere finollena, ebena biiticue. Omoi ñine cue billiruina uiñoñeitomoi.

⁴ Omoimona damierie jearede rafuena finocana jaiñedinomoi. Jusiñamuiomona naimaci comeciai marena jira, cue ñine naimaci illena, userede ñniroina jitaítimaci.

⁵ Cuena ñnocana jaidinodi userede ñniroina jitaítimaci. Cuemo ite rabenicomona naimaci mameciaína doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaímo iena jiai lloiticue.

⁶ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cueno.

Cristo Filadelfiamo ite creyentiaimo lloga rafue

⁷ Cristo cuemo llote:

–Filadelfiamo ite creyentiaíma llolena, nainomo ite llofueraimamo cue lluaña cueno: “Mareuidimiedicue. Uanaicinona jaca lloticue. David micori jítóna cue illamona, illaímana cue illa jira, siño uai cuemo ite. Ie muidona cue jitailla diese comínina feiñoticue. Jusiñamui illanomo naimaci illena, naimacina feiñoticue. Cue jitailla diese comínina feiñoñedicue.

⁸ Omoi finoca rafuena uiñoticue. Omoína cue canua jira, jaca buna cue rafuena omoi lluaña itatanide. Jamai bue isoidomoi; iadedi cue rafuena ñnocana jaidomoi. Cuena janoñedomoi.

⁹ Omoi ñine damierie Taife anamo itimaci. Naimacidi judíuai; iadedi cue dibeimo iñedinomoi. Tainona llocabitimaci. Ero, omoi ñine naimacina cue bitatajamona, omoína cue isiruillana uiñoitimaci. Cue dibeimo naimaci jailla mei, cuemo iobillacinona fecaitimaci.

¹⁰ Nana cuena ñnoñedinona íco eo duere finoiticue. Iemona cuena naimaci ñnoñenana uiñoiticue. Omoi duere sefuiñellena, naie facaisemona omoína jillotaiticue.

¹¹ Eniruemo ebena abido biitícue. Cuemona ibana omoi feiñoñeni raillano, cue dibeimo ñnocana omoi jai. Cue dibeimo raise omoi jaiñenia, cuemona jiaimie omoi facaina ibana feiñoite.

¹² Cuena raise ñnotino comeciaina ocuiñotaitícue. Cue illanomo jaca iitimaci. Cuemo naimaci duilla jira, cue jiaie mamecina naimaci abimo cueitícue. Jusiñamui mamecina naimaci abimo cueitícue. Jusiñamui illano mamecina naimaci abimo cueitícue. Naimie illanodi comue Jerusaléna mameciredede. Naimiemona, monamona ico ana biite.

¹³ Jusiñamui Joreñomona cue lloga rafue ite, omoi creyentiaia iena. Bie rafue bu cacajia, iena jiaia ñnua” cueno.

Cristo Laodiceamo ite creyentiaimo lloga rafue

¹⁴ Cristo cuemo llote:

—Laodiceamo ite creyentiaimo llollena, nainomo ite llofueraimamo cue llwana cueno: “Siño Jitodícue. Cue lloga uaina jaca finocabidícue. Uanaicinona jaca llocabitícue. Cue uaido Jusiñamui nana finode. Nana comuitate.

¹⁵ Omoi finoca rafuena uiñotícue. Cue rafuedo jaillana nia fainonocaiñedomoi; ia cue rafuedo eo raise jaiñedomoi. Janore ñnocana jaidomoi.

¹⁶ Omoi finoca rafuena cue gaiñena jira, cuemona omoina oni dotaitícue.

¹⁷ ‘Ucuberedica’ raitomoi. ‘Raruairedica’. Nana cai jitailla ra caimo ite’ raitomoi. Cuemona iese iñedomoi. Cuemona dueredomoi; ia iena uiñoñedomoi. Cuemona caimare iñedomoi. Cuena omoi raise ñnoñena jira, uisimidino isoidomoi. Taimiedomoi isoidomoi.

¹⁸ Ie jira omoina dajerie rafuena llofueitícue. Cuemona omoi eo duerena jira, omoi comeciara raise iñena jira, omoimo fiebidicinona cuemo jica. Cuemona ono. Omoi duenillena, cuemona eo mare oro isoide rana ono. Omoi taimieñelle isoñellena, cuemona omoi meiruñellena, userede iniroi isoide ra cuemona ono. Omoi uisina cioille isoillena, cuemona manue ono. Omoi comeciaina ñaitícue. Cuena raise omoi ñnoia, buena omoi comeciaino fiebiñeite.

¹⁹ Cue isiruigano cue dibeimo raise illena, naimacimo riire llocabitícue. Cue uaina naimaci ñnollena, naimacina jiaia duere finocabidícue. Ie jira cue dibeimo raise omoi i. Jecino omoimo ia, iena fainonocai.

²⁰ Ero, nase tutícue isoidícue. Bu cuena cacajia, cue fo billena cuena uaidoia, nasena bu econoia, fo jaitícue. Naimiena nabaillanona, naimie diga guitícue. Omoi comeciaina ñaitícue. Cue rafuena omoi cacaja mei, iena omoi ñnoia, cuena feiñoitomoi. Iemona conini nabaiticai.

²¹ Eniruemo cue Moo jitailla rafuena jiaie cue fuidua mei, naimie ecimo abido jai itícue. Cueri naimie iobillamona, illaimana cue illamona, naimie ecimo jai itícue. Ie isoide. Cuena raise ñnotino monamo cue ecimo itataitícue. Cue cominina naimaci illa jira, naimacina iobitallena, cue ecimo naimacina nabaiticue.

²² Jusiñamui Joreñomona cue lloga rafue ite, omoi creyentiaia iena. Bie rafuena bu cacajia, iena jiaia ñnua” cueno.

4

Juan Jusiñamui illanomo ciua rafue

¹ Dally illanona monamo cue eruaia, jiaie rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimiedi cuena uaidote. Naimie uai trompeta isoi ficiredede. Llote:

—Monamo bi. Jiairuido suille rafuena omo acataitícue.

² Jusiñamui Joreño anamo cue illamona, nicairilla isoi Jusiñamui illanona ciodicue. Nainomo naimie ana raillana ciodicue.

³ Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciodede. Cornalina railla noficina eruaide. Cornalina jiairede.

Naie illano ecimo ameona ciodicue. Ameo mocorena jira, esmeralde railla noficina eruaide.

⁴ Naie illano ecimo veinticuatro rairabici jiai ite. Nainomo userede iniroina jitanona veinticuatro einamací ana raídímaci. Naimaci ifogimo oromona finoca nuicirai ite.

⁵ Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode.

⁶ Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite.

⁷ Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide.

⁸ Nagamiaimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotímaci:
Mare, mare, mare.

Cai siño Nama Jusiñamuidi eo mareuidímie.

Jaie jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadímaci. Naimiemo iobillacinona naimaci iese fecaia,

¹⁰ naie veinticuatro einamací Jusiñamui uicomo ana bitadajanona, naimiemo iobillacinona jiai fecadímaci. Naimieri iobillanona, naimaci nuiciraina naimie dine faianona,

¹¹ rotímaci:

Cai Nama Jusiñamui, ona eo iobitaiacadícaí.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itímaci.

Ie jira iobillacinona omo fecacabidícaí.

5

Juan Jusiñamui illanomo ferinoga rabe illana ciodicue

¹ Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ibaibide.

² Jusiñamui ie nanoca jaienici ado lluana cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bummo ie uai iñede, naie rabe oni econollena. Naie rabe facanidímaci.

⁴ Jaca bummo naie uai iñena jira, eo eedicue.

⁵ Naie facaise naie veinticuatro einamacimona damie cuemo llote:

—Mai eeño. Judá nairai ie Leónna mameciredímiedi iena econorede. Naimiedi David micori comini imie. Ie díbeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiai itímaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede.

⁷ Naie facaise Jusiñamui ie nabellimona naie rabena ote.

⁸ Iena naimie ua mei, naie cuatro cajedino, naie veinticuatro einamací diga, naimiena sedallena, naimie uicomo ana bitadatímaci. Nagamiemo guitarrana eruaide arpa ite.

Nagamiero oromona finoca copa ite. Naga copamo caimare soride ra boode. Naie radi Jusiñamuimo comini jiacino mamecido ite.

⁹ Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

¹⁰ Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jiaruido enruemo ite cominina sedaitimaci.

Ie jira naie rabena oni suiñoredio.

¹¹ Iemei dane eruaillamona, naimie ecimo eo ailluena Jusiñamui jaienisaia ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide.

¹² Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiero jai illamona, Jusiñamui nana naimiero jai illamona, Jusiñamui naimiena eo abina uiñotajamona, naimiena jai iobitaiacadicaí.

Naimiena cai inuanona, naimiero iobillacinona fecaacadicaí.

¹³ Ie facaise nana comini, nana Jusiñamui comuitaga ra diga, luana cacadicue. Monamo itino, enrue itino, jai fiodaitino, monaillaimo itino luana cacadicue. Llotimaci: Jusiñamuina jaca cai iobicabillasa. Toica Llauda isoidimiena jaca cai iobicabillasa.

Iobillacinona jaca fecaacadicaí. Caina jaca sedallesa.

¹⁴ Naie cuatro cajedino raitimaci:

—Ie isoi jai lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

6

Juan siete nitaca ra oni suiñuana ciodicue

¹ Toica Llauda isoidimiero iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi luana cacadicue. Naimie llote:

—Mai bi.

² Naimie llua mei, userede caballo billana ciodicue. Caballo emodo itimiero sicuiria ite. Illaimana jira, naimie ifogimo nuicirai jide. Ie bacauai anafefitallena, oni jaide.

³ Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jaimie llote:

—Mai bi.

⁴ Naimie llua mei, jairede caballo billana ciodicue. Caballo emodo itimiero are lloebi illamona, Jusiñamui jitailla jira, caballo emodo itimie enruemo itinona uri itatañede. Naimaci uri iñena jira, conini icirilla jira, conini meinetimaci.

⁵ Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite.

⁶ Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomenicono finoia, dacaiño guille raifi ite. Tres kilos

cebada ie core darui maijia ua ucube diese raifide. Iena damie oia, iemona llomenicono finoia, dacaiño amani guille raifi ite. Illimo riara nia ite; ia iena iballena ucube baiñede. Ie muidona aime guitimaci —llote.

⁷ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁸ Naimie llua mei, lliai usereoide caballona ciodicue. Ie emodo itimie mamecidi Fiodaitadimie. Jusiñamui uai naimiemo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riai uaimona ie cuarta facaina comini fiodaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicai” naimaci llua jira, Jusiñamuina ñnoñedino naimacina meinetimaci. Jai fodaillamona naimaci joreñuai Jusiñamui illanomo jai itimaci.

¹⁰ Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Ñiruido caina meinetinona duere finoitio? ¿Ñiruido ibana oitio?

¹¹ Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meineitimaci. Naimacina meinia mei, ibana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitireficaide. Fivuidi diruena eruaide. Jiairede.

¹³ Riirede aifi riara ana llutaja isoi, monamona eniruemo ucuai llude.

¹⁴ Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide.

¹⁵ Ie jira illaicomini, jamai bue isoñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci.

¹⁶ Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui ricaillafuemona caina reirita. Llauda isoidimie ricaillafuemona caina reirita.

¹⁷ Iaimaiai ricaillarui jai ite. Naiemona buna jillobinide —llotimaci.

7

Juan ailluena Israel comini Jusiñamui sello diga nitajana ciodo

¹⁻² Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiai beicimo itiaimaiai. Aifi biñellena itimaci. Ie muidona monaillai dine aifi iñede. Aifi iñena jira, amenaiai nirairiñede. Eniruena monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaimo ado llote:

³ —Eniruena aifi diga maraiñeno nia finoñeno. Monaillaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uiecuai itofiai sello diga nia cai nitañenia, eniruena maraiñeno finoñeno.

⁴ Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci.

⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite.

⁶ Aser micorí cominimona doce mil ite. Neftalí micorí cominimona doce mil ite. Manasés micorí cominimona doce mil ite.

⁷ Simeón micorí cominimona doce mil ite. Leví micorí cominimona doce mil ite. Isacar micorí cominimona doce mil ite.

⁸ Zabulón micorí cominimona doce mil ite. José micorí cominimona doce mil ite. Benjamín micorí cominimona doce mil ite. Diese nitade.

Juan ailluena comini userede iniroina jitajana cide

⁹ Naie facaise ailluena cominina ciodicue. Ailluena jira, naimacina facadonidicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite.

¹⁰ Ado llotimaci:

Bie Llauda isoidimie jaie fiodaillamona, cai jeacinomona Jusiñamui caina jai jillotate.

¹¹ Naie facaise nana Jusiñamui jaienisaí naimie ecimo naidailana ciodicue. Naie veinticuatro einamací ecimo, naie cuatro cajedino ecimo jiaí naidaidimaci. Naie facaise Jusiñamui uicomo ana bitadajanona, naimiena sedadimaci.

¹² Raitimaci:

Bie comini isoi omo iobillacinona jiaí fecaacadicaí.

Odi mareuidimedio. Abina eo uiñotio. Odi jaca siño jitodio.

Ie jira iese lloticaí.

Ona jaca cai iobitajasa.

¹³ Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

¹⁴ Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina ñnoñedino meinegano. Naimaci iniroina jai jocatorimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiaí ñaiticue. Llauda isoidimie fiodailla jira, naimaci comeciái jai jeanide.

¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite.

¹⁶ Dane duere sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci.

¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eeñeitimaci. Dane sunaiñeitimaci.

8

Juan Llauda isoidimie irai nitaca ra oni suiñuana cide

¹ Toica Llauda isoidimie irai nitaca ra oni suiñuanona, media hora monamo tii raiñoicaide.

² Iemei siete Jusiñamui jaienici naimie uicomo illana ciodicue. Nagamiemo daje trompetana fecade.

³ Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina ñnotino jiacino Jusiñamuimo jaide.

⁴ Jobaillamona Jusiñamui uicomo a jaide. Nana Jusiñamuimo jiacino diga a jaide.

⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillena llinote.

⁷ Damie ie trompetana fite. Filla jira, monamona janorede hielu, boode ra diga, dirue diga, eniruemo uaide. Atuedo enirue booñede; ia ailluena boode. Riai uaimona ie tercera facaina boode. Nainomo nana amenaiai boode. Nainomo nana raiticiño boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite.

⁹ Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciai fiodaite. Nainomo ite botemona ie tercera facaina jiai anabaite.

¹⁰ Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illenai, ie tercera facaina jorainiai diga erireficaide.

¹¹ Ie muidona naie ucudu Ajenjona mameciredede. Riai uai oni dobaiñuamona “Eriredimie”. Iemona jinui erireficaide. Iena jiruamona, ailluena comini fiodaitimaci.

¹² Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

¹³ Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9

¹ Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci.

² Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide.

³ Uilliemona fioduaina eruaillanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci.

⁴ Raiticiño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci.

⁵ Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite.

⁶ Iese ico suia, eo duere comini sefuilla jira, fiodaillana jitaimitimaci. Naimaci abina meineacanitimaci. Fiodaiacanitimaci; ia fiodainitimaci.

⁷ Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci.

⁸ Naimaci ifotie arena illanona, riño ifotiena eruaide. Naimaci isiduai leones isiduaina eruaide.

⁹ Naimaci abiaimo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci.

¹⁰ Naimaci omacai acaido isoide. Naie diga maillanona, cinco fivui cominina duere finoitimaci.

¹¹ Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie.

¹² Daje duere sefuilla rafue jai fuite. Mena nia suiñede.

13-14 Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suiño —llote.

15-16 Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Ria uaimona ie tercera facaina meinetimaci.

17 Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogiai leones ifogiaina eruaide. Naimaci fuemona boode radi, uillie diga, azufre boa isoi jino bite.

18-19 Naimaci fuemona bite rado ailluena cominina meinetimaci. Ie tercera facaina meinetimaci. Caballos omacai jaona eruaidimaci. Naimaci omacaimo jaona eruaide ifogi itimaci. Ailluena cominina jiai duere finodimaci.

20 Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronce mona, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci.

21 Conini meinecabitimaci. Aimaniai dine jaicabidimaci. Naimaci aiñede riño, naimaci iniñede ima diga icabitimaci. Rana ficabidimaci. Jeacinona finocana nia jaidimaci.

10

Juan Jusiñamui jaienici, econoga rabenico diga, billana ciodicue

1 Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide.

2 Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide.

3 León eo irilla isoi, ado llote. Naie facaise siete gurua ñaia isoidino uai cacadicue.

4 Naimaci lluaana cacaja mei, iena cueiacadicue; iadedi monamona damie cuemo llote:

—Naie lluaana lloño. Iena cueño.

5 Naie jaienici ie nabei onolli mona dine ñuitajanona,

6 Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monailai nainomo ite ra diga jiai finodio. Cue baifemo o faia jira, uanaicinona cue lluaana uiñotio. O lloga uaina jaca suite.

7 Iraie jaienici ie trompeta ja fiite. Filla mei, bie facaise Jusiñamui ie facaina lloraini micoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

8 Monamona cuemo ailli llotimie dane llote:

—Jaienici onollimo econoga ite rabenicono llinuai.

9 Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

10 Llinua mei, iena guiticue. Ciifo isoi naimerede rana cacadicue; ia guilla mei, erirede ra isoi cue jebemo ite.

11 Cuemo dane llote:

—Omo cue lolle rafuena lloitió. Ailluena cominimo ico suille rafuena lloitió. Illaicominimo ico suille rafuena lloitió.

11

Juan menamie Jusiñamui rafuena llwana cacade

¹ Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca.

² Cue jofo ecimo ite taibirina facañeno. Naie illano judiúiñedinomo jainaiide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci.

³ Naie facaise menamemo cue uaina iiticue. Iaimaiai cue lolle rafuena daje amani años abimo atomonado lloitiiaimaiai. Comini comeci iuai meiduana iaimaiai jitailla jira, sunaillamona, ebinide iniroina jitaitiaimaiai —llote.

⁴ Iaimaiai mena olivos railla riará mamecido itiaimaiai. Enirue Namana Jusiñamui illanona, naimie uicomo mena ite lamparín ie rairaco mamecido itiaimaiai.

⁵ Iaimaiaina duere bu finoacania, naimiena meineitiaimaiai. Iaimaiai fuemona boode ra billanona, naimiena meinetiaimaiai Iaimaiaina duere finodino iese fioidaitimaci.

⁶ Iaimaiai Jusiñamui rafue lolle facaiseconi noci deitañellena, iaimaiaimo Jusiñamui uai iite. Jinui diruena jaitallena iaimaiaimo uai iite. Iaimaiai jitaicabilla facaise, diga isoide rafue finuamona cominina duere finoitiaimaiai;

⁷ iadedi Jusiñamui rafue iaimaiai llua mei, eo ana ite ifomona ocainana eruailanona, Taife jino biite. Jino billanona, iaimaiai diga fuirite. Iaimaiaina anafefitaja mei, iaimaiaina meineite.

⁸ Raiafomo joneñeitimaci; iadedi iaimaiai abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jiai isoidimaci. Jerusalémo Jesúsna jaie jiai meinetimaci.

⁹ Raiafomo iaimaiai joniana rairuitimaci. Darui amani abi atomonado ailluena comini, naga nairaiaimona iaimaiaina jibuisaibitimaci.

¹⁰ Nana eniruemo ite comini iaimaiai fiodaillari iobitimaci. Iaimaiaimona comini duere sefuilla jira, iaimaiai jai fiodailla jira, iobitimaci. Rafuena finuanona, dani coninina rana fecaitimaci.

¹¹ Darui amani abi atomonado illanona, fiodaillamona iaimaiaina Jusiñamui dane jillotaite. Ie muidona naidaitiaimaiai. Nana iaimaiaina ciolino eo jacinaitimaci.

¹² Naie facaise monamona damie iaimaiaina uaiduana cacadiaimaiai. Llote:

—Bene mai bi.

Iecon iaimaiaina enoidimacidi uillie motomo monamo iaimaiai jaillana cioidimaci.

¹³ Naie facaise aillue ñuisaño suide. Ie jira janore facai Jerusalén goide. Rai uaimona ie décima facai goide. Naiemona siete mil comini fioidaitimaci. Fioidañedino jacinailamona:

—Jusiñamuidi ua siño jito —lloitimaci.

¹⁴ Mena duere sefuilla facaise jai fuite. Nia daje suiñede; ia raire suite.

Juan irai trompeta fillana cacade

¹⁵ Naie facaise jiaie jaienici ie trompetana fite. Monamo itino ado llotimaci: Jusiñamui, Cristo diga, illaima isoi, eniruemo ite cominina biruimona jaca sedaite. Naie comini naimie anamo raise iitimaci.

¹⁶ Naie veinticuatro einamací Jusiñamui ecimo illanona, naimie uicomo ana bitadajanona naimiena sedadimaci.

¹⁷ Llotimaci:

Jusiñamui, cai Nama, omo iobillacinona fecaacadicaí.

Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci ñnoñenamona, o diga iciritimaci; iadedi naimacina emodofidio.

Bie facaise jai fiodaitino jillotajamona, ona naimaci ñnoñena jira, naimacimona ja ibana oitio.

Jearede rafuena naimaci finua jira, naie facaise ona ñnoñedinona duere finoitio.

O díbeimo maijidino, o facaina lloraini, nana ona ñnotino omona ibana feiñoitimaci.

Níbai jamai bue isoidimaci.

Níbai jamai bue isoiñedimaci; iadedi omona ibana feiñoitimaci.

¹⁹ Naie facaise monamo ite Jusiñamui sedajano nase econuana cidicue. Naie fo ite cajóna cidicue. Ieconí boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

12

Juan daje riñona, eo aillue jaio diga, cide

¹ Naie facaise monamo daje riñona cidicue. Naiñaiñona cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño ñniroidi jitoma isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite.

² Jai uruesite. Jocoacana jira, como isirede.

³ Ie facaise monamo jaiamiena cidicue. Naimiedi Taife. Naimie illamona jaiie rafue suillena uiñoticue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riaí uaimona naimiedi dragón.

⁴ Naimie omacai diga ailluena ucuaina eniruemo ana butade. Riaí uaimona ie tercera facaina butade. Ie uruena gutallena, riño uicomo naidaita naiñaiño jocollena sedade.

⁵ Naiñaiño ñimana jocode; ia jaio naimiena gutañede. Nana nairaiaí naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie ñia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate.

⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

⁷ Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jai fuiridimaci. Jusiñamui jaienisai illaíma mamecidi Miguel.

⁸ Naimaci ñinena emodofidimaci. Jaio ie jaienisai anafefilla jira, Jusiñamui illanomo naimaci illano jai iñede.

⁹ Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuate.

¹⁰ Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise ñnoñenia, jeacinona bu finoa, Jusiñamui uicomo birui naimie finocabilla isoi, Taife caina llogidoñeite.

¹¹ Toica Llauda isoidimie naimaciri fiodailla jira, naimie rafuena naimaci lluamona, Taifena emodofidimaci. Fiodaitimacina, naie rafuena llocana jaiacadimaci.

¹² Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are iñellena uiñote. Naimie icirillamona eniruemo itino eo duere sefuitimaci —llote.

¹³ Eniruemo jaiona eruaidimie dotajamona, naiñaiñona duere finollena, naimiedi ñimana jai jococa riñona racade.

¹⁴ Naimiemona jilloillena, Jusiñamui mena iaico, majaiño iaico isoi, naiñaiño ite. Feianona, jofue iñenanomo daje amani años abimo atomonado illena nainomo jaide. Naiñaiño Jusiñamui eenollena, nainomo jaide.

¹⁵ Ie facaise jaiona eruaidimie fuemona eo ailluena jinui bite. Ille isoi tote, naiñaiño corobaitallena;

¹⁶ ia enirue bojuamona, nana jinui nainomo ana jaide. Enirue naiñaiño canua jira, naiñaiño corobaiñede.

¹⁷⁻¹⁸ Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino ñnotino diga, nana “Jesúmo duidicai” raitino diga, jobairiacade.

13

Juan mena riirede ocainana ciod

¹ Naie facaise monaillai fuemo cue naidaillanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogaimo Jusiñamuina jeare ñaia mameci ite.

² Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade.

³ Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicaillamona, nana eniruemo ite comini naimie dibeimo jaidimaci.

⁴ Ocainamo ie uaina aillue jaiona eruaidimie fecaja jira, jaiona sedajanona, iobil-lacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

⁵ Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade.

⁶ Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite.

⁷ Taife uai naimiemo illa jira, Cristona eniruemo ite ñnotino diga jobairite. Naimacina emodofide. Iemona nana comini naga nairaiamona naimie anamo itimaci.

⁸ Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fodailla jira, Jusiñamui naimiena ñnotino mameciaina naie rabenicomo jai cuete. Naimie illanomo jaca illena, naimaci mameciaina cuete.

⁹ Omoi jeforena jira, raise fueollena, bie rafuemo cacarei.

¹⁰ Duere sefuillena, naie facaise cárcelmo Cristona ñnotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona ñnotino comeciai ocuiñocaida ñnocana jailla.

¹¹ Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite.

¹² Monaillaimona bite ocaina uai eniruemona bite ocainamo jiai ite. Ie uai diga, nana cominina monaillaimona bite ocainana sedatate.

¹³ Eo siño rafuena finocabite. Comini cioillena, monamona eniruemo boode ra ana bitatate.

¹⁴ Siño rafuena finuamona, Taife jitailla jira, eniruemo itinona jifuate. Iena naimaci sedallena, cominina monaillaimona bite ocaina joreño finuana ocuide. Monaillaimona bite ocaina lloebi diga navui bofiamona jai jillode.

¹⁵ Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide.

¹⁶ Nana cominimo naimie númerona cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoñedinomo cuetatate. Ucuberedinomo cuetatate. Ucubenidinomo cuetatate. Patrón anamo itinomo cuetatate. Patrón anamo iñedinomo cuetatate.

¹⁷ Iese bumo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate.

¹⁸ Iena raise cacaillena, iemo omoi comeciaina faca. Abina uiñotimie bie númerona uiñoite. Come mamecido iite. Bie númerodi seiscientos sesenta y seis.

14

Juan 144,000 comini ruana cacade

¹ Naie facaise Jerusalémo Sion railla anedu muidomo Toica Llauda isoidimie naidail-lana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cueda.

² Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue.

³ Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamací nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemona naimaci dibeimo iñedinomona jai jillodimaci.

⁴ Bie ciento cuarenta y cuatro mil comini jearede rafuena ebiruiñedimaci. Llauda isoidimie rafuena ñnocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena.

⁵ Cristo rafuedo jeacinona finocabiñeno raise jaidimaci.

Juan daje amani jaienici rafue lluaana cacade

⁶ Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide.

⁷ Ado llote:

—Jusiñamuina ñnuanona naimiena seda. Naimiemo iobillacinona feca. Naimiemo ñnoñedinona ja duere finoite. Monana, enirue diga, monaillai diga, ille diga, naimie finua jira, naimiena seda.

⁸ Jiaie jaienici billanona llote:

—Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiana jeacinona jiai eo finotatimaci. Babiloniamos jaie itino isoi, Jusiñamuimona duere sefuitimaci.

⁹ Naie facaise jiaie jaienici billanona, ado llote:

—Monailaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bumo ia,

¹⁰ Jusiñamui ricaillafuemona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci.

¹¹ Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodañeno jaca duere sefuitimaci —llote.

¹² Bie rafue suille facaise Jusiñamui lloga uaina raise ñnuanona, Jesús dibeimo raise illanona, comeciái ocuiñocana naimaci jaille.

¹³ Iemei monamona Jusiñamui Joreño llote:

—Biena cueno: “Biruimona Jesúna ñnuamona, meineganodi caimare iitimaci. Jesús ðibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

Juan Jusiñamui eniruemo itinona duere finua rafuena cacade

¹⁴ Naie facaise monamo cue eruaia, userede uilliena ciodicue. Uillie emodo Cristo raide. Himana eruaide. Naimie ifogimo oromona finoca nuicirai ite. Ie onollimo jairede lloebi ite.

¹⁵ Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite.

¹⁶ Jaienici llua isoi, ie lloebi diga Cristo cotade. Nana iena finode. Cominina duere finode.

¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite.

¹⁸ Iecon Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimie mo ado llote:

—Jai einaila jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite.

¹⁹⁻²⁰ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui ricailafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

15

Juan siete jaienisaí cominina duere finoacana ciode

¹ Naie facaise monamo jiaie rafuena ciodicue. Ieri eo rajicaidicue. Iena cue ciuamona, Jusiñamuidi eniruemo itinomo suille rafuena cue uiñuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie ricailifue saite.

² Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona,

³ jai emodofilla jira, Moisés micori ie ruana rotimaci. Moisés micori Jusiñamui facaina jaie maijuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

⁴ Cai Nama, nana comini ona jaciruillamona, ona ñnoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo ciodicue.

⁶ Naiemona siete jaienisaí billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade.

⁷ Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite.

⁸ Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaïmo ite rafue nia suiñena jira, Jusiñamuina sedajanomo buna fo jainide.

16

Juan eniruemo copas oni totajanona ciode

¹ Ie sedajanomona Jusiñamui naie siete jaienisaïmo ado llote:

—Cue riicaillafue omoi copamo illa jira, eniruemo itinona duere finollena, omoi copas oni tota.

² Daje jaienici iena finode. Eniruemo ite cominina duere finode. Monailaimona bite ocaina cuetataganona jiaï duere finode. Ocaina joreña sedadinona duere finode. Naimaci abiaïmo jodollaïaina comuitate. Iemona duere sefuidimaci.

³ Iemei jiaïe jaienici ie copa oni totajamona, monailaina duere finode. Nana monaillaidi fiodaitino dirue isoi jaide. Eo jearedena eruaïde. Nana nainomo ite cajedino fiodaitimaci.

⁴ Iemei jiaïe jaienici ie copa oni totajamona, nana illiaï, nana jorainiaï diga, duere finode. Diruena jaide.

⁵⁻⁶ Naie facaise nana jinuina sedacabide jaienici llote:

—Jusiñamui, o jaca mareuidimiedio. Ona inotinona eniruemo itino meinia jira, o facaina llorainina naimaci meinia jira, naimacina o raise uñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caïmare soride ra jobaisoïllanomona jiaïe jaienici llote:

—Caï Nama Jusiñamui, ua siño jitodio. Naimaci finocabilla isoi naimacina jai duere finodio.

⁸ Naie facaise jiaïe jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci.

⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uñnotimaci; ia naimie dibeïmo naimaci comeciaï iuaina meidoïacaiñedimaci. Jeacinona finuana faïnonocaiacaiñedimaci. Naimiemo iobillacinona fecaacaiñedimaci.

¹⁰ Naie facaise jiaïe jaienici ie copamona ie duere sefuillacinona monailaimona bite ocaina sedajano dine totade. Ie muidona nana enirue jitireficaide. Eo duere sefuillamona, comini imaci ifena ainitimaci.

¹¹ Duere sefuillamona, Jusiñamuina jeare ñaitimaci. Naimaci abiaïmo ite jodollaïaï isirede; iadedi naimaci comeciaï iuaina meidoñedimaci. Jeacinona finuana faïnonocaiñedimaci.

¹² Naie facaise jiaïe jaienici ie copamona ie duere sefuillicinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaïaï illaïcomini, imaci soldaduaï diga, ruica dine raise birenitimaci.

¹³ Naie facaise aillue jaïo fueмона, monailaimona bite ocaina fueмона, naimie facaina lloraima fueмона, daje amani jananiaï billana ciodicue. Nagamiemona daje janaba bite. Nai jananiaï jerocina eruaïde.

¹⁴ Taïfemona bite. Siño rafuena finocabite. Nana illaïcomini, imaci soldaduaï diga uaidollena, naimacina oreite. Danomo ofillena illaïcominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uñnotimaci.

¹⁵⁻¹⁶ Armagedón railla illanomo ofitimaci. Naie illano mamecidi juduaï uai mameci. Ieconï caï Nama cuemo llote:

—Furiraima isoi ebena biiticue. Cue billemo ocuridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruiñeite.

¹⁷ Naie facaise jiaie jaienici jafaici dine ie copamona ie duere sefuillicinona totade. Ieconie ie sedajanomona Jusiñamui llote:

—Bie duere sefuillicino diga, cominina cue duere finoacanacino ja fuite.

¹⁸ Ieconie boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede.

¹⁹ Iemona nanoca nairai illano daje amani facaina goide. Nana jiaie illanuai jiai goidimaci. Jusiñamuidi Babilonia railla nairaina raise uiñuamona, nana ie riicaillafuemona iena eo duere finode.

²⁰ Naie ñuisañomona naga uiasi jai cioiñena. Naga anedu jiai cioiñena.

²¹ Monamona noci deilla isoi, hielu jiai ana jurude. Naga hielu cuarenta kilos nibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

17

Juan eo maraiñede riñona duere sefuillana cide

¹ Naie facaise naie siete copas diga ite jaisenisaïmona cue dine damie billanona cuemo llote:

—Cue diga bi. Eo maraiñede riño duere sefuillana omo acataiticue. Monailai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci.

² Naiñaiñona sedajamona, naiñaiño diga, illaicominidi jearede rafuena finocabidimaci. Naiñaiñona nabaillamona, eniruemona ite comini jearede rafuena eo ebiruitimaci —llote.

³ Nicaïrilla isoi, jaienici cue joreña uillanona, jofue iñenanomo cue joreña uite. Eo jiaïrede riïrede ocaina emodomo naie riño raillana ciodicue. Jusiñamuina eo jearede ñaiacino ocaina abïmo eo ite. Ocainamo siete ifogiai ite. Diez sigai jiai ite.

⁴ Naie riño jiduirede ñiroi, jiaïrede ñiroi diga jïtade. Eo raïfide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo maraiñede jearede rafuena finocana uite isoide.

⁵ Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodïcue. Cuemona eo jearede rafue comucana jaicabide. Cue muidona comini jearede rafuena finocabide”.

⁶ Naiñaiñodi ailluena Jusiñamuimo duidinona, ailluena ua Jesúna ñnotinona meinetajana eo ebiruite. Naiñaiñona cue cioia, eo rajicaïdicue.

⁷ Jaienici cuemo jïcanote:

—¿Bue ñe rajicaïdio? Naiñaiñomo ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue.

⁸ Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faïfite. Ieri Jesucristona ñnoñedino rajicaïtimaci. Jesucristona naimaci ñnoñena jira, monamo Jusiñamuidi ie rabenicomona enirue nia finoñena facaise naimaci mameciaïna jaca cueñede. Naimie illanomo jaca iñeitimaci.

⁹ Ocaina rafuena omo ja lloiticue. Jusiñamui ona uiñotajanona iena cacaitio. Bie siete ifogidi siete anedu mamecido ite. Riño nainomo raide.

¹⁰ Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jiaïmie cominina nia sedañede. Cominina naimie sedaïa, are naimacina sedañeite. Dallu sedaite.

¹¹ Ifomona bite ocainana dane lloiticue. Cominina jiai sedaite; ia bie siete illaicomini sedajacïnomona duite. Cominina naimie sedaja mei, naimie faïfite.

¹² Ie diez sigaidi diez illaicomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci.

¹³ Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci.

¹⁴ Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiena jira, naimacina emodofite. Ie cominina naimie fetode. Naimiena #notimaci. Jai emodofitimaci —llote.

¹⁵ Jaienici nia llote:

—Riño monailai emodomo raillana ailli ciodio. Monailaidi nana comini mamecido ite. Naga nairai mamecido ite.

¹⁶⁻¹⁷ Naie diez illaicominidi, ocaina diga riñona enoitimaci. Naiñaiñona duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iniroina oni dotatajanona, naiñaiño taiñaiñona iite. Naiñaiñona meineitimaci. Ie llicisina riitimaci. Ja muidomo iraimo naiñaiñona dotaitimaci. Iese naiñaiñona duere finuanona, naiñaiñona fuidoitimaci.

¹⁸ Bie riñodi nanoca nairai illano mamecido ite. Naie nairai anamo nana eniruemo ite illaicomini iitimaci —llote.

18

Juan Babilonia railla nairai illano goilla rafuena ciodo

¹ Ie facaise monamona jiaie jaienici ana billana ciodicue. Naimie uai siño. Naimie uai siñona jira, eniruena lligaiñote.

² Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñeditimaci. Nainomo Taife jaienisaí birui itimaci. Jananiaí nainomo birui itimaci.

³ Nia goiñenia, bie nairai jeacinona eo finuamona, nana nairai iena ebiruitimaci. Bie nairaina nabaillamona, nana illaicomini jearede rafuena jiaí finocabidimaci. Jearede rafuemonona nana rana fecaraini bie nairaimona ailluena ucubena ganacabidimaci —llote.

⁴ Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i.

⁵ Bie nairai jeacino eo finocana jaidimaci; iadedi iena Jusiñamui uiñuamona, naimacina jai duere finoacade.

⁶ Jusiñamui, naimaci finua diese ibana ono. Naimacina ua eo duere fino.

⁷ Jeacino finuamona iobidimaci. Iemonona abi iedotimaci. Jeacino finuana eo ebiruitimaci. “Illaicomindicai. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci;

⁸ Iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiodaitimaci. Naimaci jofue booite. Jusiñamui siño jitona jira, naimacina raire fuidoite —llote.

⁹ Bouamona uillie naimaci cioia, sunaillamona, naie nairai diga nabairite illaicomini eo eeditimaci.

¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eeditimaci.

¹² Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronce, lloona, mare nofici,

¹³ guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci.

¹⁴ Sure illamona lloitimaci:

—Caimona omoi comeciai jitailla rana ja oñeitomoi. Omoi ebiruiga rana ja oñeitomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eetimaci. Sunaitimaci.

¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlomona finoca rana eo ebiruitimaci;

¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuidino diga, nainomo jaidino diga, botedo rana fecaraini diga,

¹⁸ aaremona uilliena ciuamona, naie nairai bouana fidiano, lloitimaci:

—Naie nairai nana jiai nairaiai baifemo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eetimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

²⁰ Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienicimo siño uai illanona, eo aillue nofici llinuanona, monailaimo iena faite. Llote:

—Bie nofici dane cai cioñena isoi, Babilonia railla nairai dane iñeite. Jusiñamui iena eo riire fuidoite.

²² Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberiñeite. Llomenicono finollena, buna dane maijiñeite.

²³ Nainomo naiona lamparinai dane booñeite. Rafue dane iñeite. Eo caimare iobitaja rafue dane iñeite. Iraisñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci.

²⁴ Naie nairai ailluena Jusiñamuina inotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19

¹ Ie facaise monamo eo ailluena comini ado lluana cacadicue. Jusiñamuimo llotimaci: Ona cai iobitajasa. Caina jai jillotatio.

O uai ebirede. Odi siño jitodio.

² O anamo itinona raise uiñuamona, uanaicinona o uiñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

³ Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —lloitimaci.

⁴ Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omoi llucino mare. Ie isoi jiai lloiacadica. Jusiñamuina cai iobitajasa.

⁵ Jusiñamui illanomona damie lloste:
 Nana cai Jusiñamuina facaina maijidino iobitajasa.
 Nana naimiena inotino naimiena iobitajasa.
 Jamai bue isoidino naimiena iobitajasa.
 Jamai bue isoiñedino naimiena iobitajasa.

Juan Toica Llauda isoidimie aina ua rafuena cacade

⁶ Naie facaise monamo eo ailluena comini llua cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

⁷ Eo iobidicai. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

⁸ Mare iniroi naiñaiño jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie inotino imaci mare finoca rafue isoide.

⁹ Jaienicí cuemo lloste:

—Biena cueno: “Llauda isoidimie aina ua rafue dine uaidoganodi caimare iitimaci”.

—Iemei lloste:

—Jusiñamui iena llua jira, uanaicinona omo lloticue.

¹⁰ Jaienicí uicomo eillimo ana bitadicue, naimiena sedallena; ia cuemo lloste:

—Dama ite. Cueno sedaño; ia dama Jusiñamuina seda. Jesús ie dibeimo itinona uanaicinona jai uinotade. Ie jira naga o diga naimiena inotino isoi, Jusiñamui facaina jai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimiena ciodo

¹¹ Naie facaise mona ecorillana ciodicue. Nainomo userede caballona ciodicue. Naie emodomo itimie mo mena mameci ite. Inogamiena mameciredo. Uanaicinona llocabitimiena jai mameciredo. Naimacina raise uinuamona, naimie dibeimo inedinona duere finollena, naimaci diga jobairite.

¹² Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uinoñede. Dama naimie iena uinote.

¹³ Naimie jitaca iniroi ie dibeimo inedino diruemo mutaca. Jusiñamuina naimie uinotaja jira, Jusiñamui Uairedimiena mameciredo. Naimiedi Jesucristo.

¹⁴ Naimie jinafona soldaduai isoi Jusiñamui facaina itino monamona billana jai ciodicue. Eo mare userede jeanide iniroina jitaadimaci. Userede caballuai emodomo itimaci.

¹⁵ Eniruemo ite nairaiaina emodofillena, naimie fuemo jairedo lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie ricallifue anamo itinona eo duere finoite.

¹⁶ Naimie iniroimo, naimie idaimo jai cuega: “Nanoca Illaima. Nanoca Nama”.

¹⁷ Naie facaise jaienicí jito ma lligaiñuanomo ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniamona rille eo iite.

¹⁸ Naimacina emodofillamona, ailluena llicisi ja iite. Ailluena cominina ja meineite. Illacomini itimaci. Soldaduai illacomini itimaci. Caballuai itimaci. Caballuai emodomo jicabidino itimaci. Diga comini ite. Jamai bue isoidino itimaci. Jamai bue isoiñedino itimaci. Patrones anamo itino itimaci. Patrones anamo inedino itimaci. Naimaci llicisi mai riabi —lloste.

19 Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci.

20 Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreñona sedadinona jifuecabite. Naie iaimaiaina gaitaja mei, eo boode iraimo iaimaiaina cajena dotadimaci. Azufre boa isoi irai boode.

21 Caballo emodomo itimiedi ie fuemo ite lloebi diga iaimaiai soldaduaina meinete. Jaienici llua isoi, inoniai naimaci llicisina ritimaci. Iemona eo monidimaci.

20

Juan mil años Taife maiana cide

1 Naie facaise monamona jaienici billana cidicue. Eniruemo eo ana ite ifo llave naimiemo ite. Aillue lloeo ie onollimo ite.

2 Aillue jaiona eruaidimiena gaitade. Naimiedi Taife. Riai uaimona Satanás. Jiaici dragón. Mil años iese illena lloeo diga naimiena maite.

3 Ana ite ifomo naimiena dotade. Llave diga ifona ibaide. Cominina ramo faiñellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

4 Ie mei monamo diga jueces illanuaina cidicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meineganona jiai cidicue. Eo duere sefuilla facaise “Jesús cominidica” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meineganodimaci. Monaillaimona bite ocainana sedañedimaci. Ie joreñona sedañedimaci. Ie cuetataga ra naimaci uiecomo, naimaci onollimo iñede. Navui fiodaitimaci; ia iemona bie facaise jai jillobitimaci. Imaci abiaia diga Jusiñamui naimacina jillotaite. Cristo diga mil años eniruemo itinona sedaitimaci.

5 Naimacidi nano jillodino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci.

6 ¡Nano jillodino caimare marena iitimaci! Dane fiodaiñenamona Jusiñamui illanomo jaca iitimaci. Faiñeitimaci. Cominina sedajanona, comini Jusiñamuina raise uñollena, comini Cristona raise uñollena, naimacina canoitimaci. Cristo diga mil años naimacina sedaitimaci.

7 Bie mil años fuilla mei, Jusiñamuidi ana ite ifomona Taife jino oretaite.

8 Nana eniruemo ite nairaiaina jifuaibite. Gog railla illaicominina, Magog railla nairaiiai diga, jifueite. Naimaci nairaiaina ofitaite. Eo ailluena naimaci illa jira, conilliena cai facadonina isoi, naimacina facadonidicue. Jusiñamuina inotino diga jobairillena, ofitimaci.

9 Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiga nairaina, ciribitaitimaci. Naie facaise monamona boode ra billanona, jobairiacadinona fuidoite.

10 Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaie dotade. Naimie facaina tainona lloraima jaie dotade. Nainomo ua jaca duere sefuitimaci

Juan aillue rairabicina cide. Nainomona Jusiñamui duere fnollicinona llua cacade

11 Naie facaise aillue userede rairabicina cidicue. Illaimana naimie illamona, nainomo Jusiñamuina jiai cidicue. Naimie siño illamona, mona enirue diga jai iñede.

12 Naie facaise Jusiñamui uiecomo nana fiodaitino naidaillana cidicue. Jamai bue isoiñedino itimaci. Jamai bue isoidino itimaci. Naimacimo juez isoi Jusiñamui lollena,

itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cueda. Iemei Jusiñamui jiaie rabeniconajibuide. Naimie diga jaca ille comini mameciai nainomo jai cueda. Naimaci mameciai nainomo inenia, naimaci finoca rafue diese Jusiñamui naimacimo duere sefuillena llote.

¹³ Monaillaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite.

¹⁴ Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci.

¹⁵ Monamo ite rabenicomo cueñega comini mameciai diese itinona iraimo dotaite.

21

Juan comue monana, comue enirue diga ciede

¹ Birui ite mona, birui ite enirue diga jai inede. Monaillai jiai jai inede. Iemei comue mona ciodicue. Comue eniruena jiai ciodicue.

² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede.

³ Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci.

⁴ Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodañeitimaci. Sunañeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunañeitimaci —llote.

⁵ Jusiñamui llote:

—Ero, nana ra comuena birui finoiticue. Cue llucino uanaicinona jira, cue llucina cue finua jira, bie rafuena cueno.

⁶ Iemei cuemo llote:

—Bie rafue jai fuite. Jaca bue nia inenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciari eo caimare itataiticue. Ibataño cue diga illena, naimacina jaca itataiticue.

⁷ Cuenaraise inotinona iese itataiticue. Jaca naimaci Jusiñamuiniticue. Naimaci jaca cue comininitimaci.

⁸ Jiaño jaca eo boode iraimo jaca iitimaci. Azufre boa isoi irai boote. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise inoñedino, jearede rafue finocabidino, cominina meinetino, añede riño diga icabitino, inñede ima diga icabitino, añinai, jiraraina sedacabidino, tainona llocabitino —llote.

Juan comue Jerusaléna llote

⁹ Naie facaise naie siete jaienisaimona damie cue dine bite. Naie jaienisai imaci copamo cominina duere finollicinona navui ite isoide. Naimie cuemo llote:

—Cue diga mai bi. Ima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

¹⁰ Nicairilla isoi, Jusiñamui Joreño cue joreña eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare.

¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruaila jira, enefebecodo ciede.

¹² Ie llaigafu eo a ite. Eo jedaciede. Doce nasiaí ite. Naga nasemo daje jaíenici ite. Israel micorí uruiaí mameciaí naie nasiaímo cuega. Doce uruiaí illa jira, naga naserie daje mamecí cuega.

¹³ Jitoma bicabillano dine eruaíde llaigafomo daje amani nase ite. Jitoma jaicabillano dine eruaíde llaigafomo daje amani nase ite. Naga beici dine eruaíde llaigafomo daje amani nase ite.

¹⁴ Naie llaigafu anamo doce nofici ite. Nainomo Toica Llauda isoidímie ie doce llofueoicaigano mameciaí cuega.

¹⁵ Cue diga ñaíte jaíenicimo oromona ra facara ite. Naie nairaí facallena ite. Ie nase, ie llaigafu diga, facallena ite.

¹⁶ Naie nairaina naimie facajamona, nagafebei daje isoi illana uiñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite.

¹⁷ Ie llaigafona jiaí facade. Sesenta y cuatro metros a ite. Comini facaja isoi, jaíenici iena facade.

¹⁸ Ie llaigafu jaspe railla nofici mona finoca. Bie nairaí difai oromona finoca. Enefebecodo cide.

¹⁹ Diga eo quenirede nofici na eruaíde ra llaigafomo ite nofici mo jai nitade. Nano jaspe. Enefebecodo cide. Iemei zafiro. Mocorede. Jiaie ágata. Mocorede. Jiaie esmeralda. Mocorede.

²⁰ Jiaie ónice. Jiaírede userede diga faiga. Jiaie cornalina. Jiaírede. Jiaie crisólito. Orona eruaíde. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafu anamo ite nofici a doce diga ite.

²¹ Ie doce nasiaídi perlas. Userede. Naga nase daje perlamona finoca. Bie nairaí naisuaídi difai oro. Enefebecodo cide.

²² Bie illanomo Jusiñamui sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidímie diga, nainomo illa jira, iaímaiaí uicomo sedaiticaí.

²³ Jusiñamui siñona jira, nainomo comini jitomana jitaiñeitimaci. Fivuiña jitaiñeitimaci. Jusiñamui, Llauda isoidímie diga, iena lligaiñoite.

²⁴ Nana comini iaímaiaína nabaicana jaitimaci. Nana illaicomini iaímaiaí dine billanona, iaímaiaímo iobillacino jaca fecaitimaci.

²⁵ Bie nairaí nasiaí jaca ibaiñeite. Nainomo naionadi jaca iñeite.

²⁶ Iaímaiaímo iobillacinona fecallena, nana comini nainomo biitimaci.

²⁷ Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidímie mo ite rabenicomo cuega mameciaí itinodi nainomo biitimaci. Bie rabenicomo Jusiñamui illanomo jaca iitino mameciaí jai cuega.

22

¹ Naie facaise jaíenici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidímie diga, illanomona tote.

² Nanoca naiso motodo tote. Nagafebelle dine jaca itataite amenaiaí ite. Naga fivui llisillamona, naga fivui llisilla ite. Ie ibiaí illamona, comini caimare marena itimaci.

³ Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidímie diga illamona, naimie comini naimiena jaca sedaitimaci.

⁴ Naimiena marefodo cioitimaci. Naimie mo naimaci duillamona, naimaci uiecuai itofiaímo naimie mamecí cueite.

⁵ Nainomo naionadi iñeite. Lamparína jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

Juan Jesucristo billirui iaírei illana cacade

⁶ Jaíenici cuemo llote:

—Bie lluacínodi uanaicino. Naimie facaina llorainimo ie rafuena lollena, ie uaina itatate. Naimiena ñnotinona ico suille rafuena ja uñnotaiacade.

⁷ “Raíre biitícue” Cristo llote.

Bie rabenicomo ite ico suille rafuena ñnotinodi caimare iitimaci.

⁸ Juandícue. Bie rafuena cacadícue. Iena ciodícue. Iena cue cacaja mei, iena cue cúa mei, iena cuemo acataga jaienici uicomo ana bitadadícue. Naimiena sedaacadícue;

⁹ iadedí cuemo llote:

—Dama ite. Cuená sedaño. O díga, naimie facaina lloraini isoi, bie rabenicomo ite llogacínona ñnotino isoi, naimie díbeimo jiai maijidícue. Dama Jusiñamuina seda.

¹⁰ Bie rafue suillirui iaírei illa jira, iena jino llono. Iena uñnota.

¹¹ Bie rafuena bu ñnoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie ñnoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacínona bu finoacania, naimie jitaillacínona nia finocana jailla.

¹² Jesucristo cuemo llote:

—Ero, raíre biitícue. Naimie finoca rafue díese nagamiemo ibana fecaitícue.

¹³ Jaca bue nia iñenia, jaie jaca itícue. Nana rana finodícue. Nana ra cue uaido icana jaide. Nana rana fuilla mei, jaca iitícue. Jaca siño jitodícue.

¹⁴ Naimaci ñniraina naimaci jocoia, caimare iitimaci. Naimaci comecina ñaitícue. Ie jeacínona oni dotacame jaca itataite amena llisillamona lliite. Cue comínina naimie illamona, Jusiñamui illanomo ie nasedo jaicabite;

¹⁵ ia naimacina jeacínona naimaci fañnonocaiñenia, Jusiñamui illanomo marañede rafuena finocabidino, aima díne jaicabidino, añede riño díga icabitino, ñiñede ñima díga icabitino, comínina meinetino, jiraraina sedacabidino, tainona llocabitino duiñeitimaci.

¹⁶ Creyentiaina bie rafuena uñnotallena, cue jaienici o díne jai oretadícue. David micori ie jitodícue. Monairacudu bairia isoi, Jusiñamui jitaillacínona cue finollena, baireitícue —llote.

¹⁷ Bie facaise Jusiñamui Joreñodi, Cristo jai oga ai railla comini díga, naimiena nia ñnoñedinona uaidote:

—Bie rafuena mai cacarei. Iena mai ñno. Iena bu ñnoia, jiaimíemo iena lluai: Iena mai cacarei. Iena mai ñno.

Jiroacadimiemo llotícue:

—Mai jiruaíbi. Bie jinua raíñede. Biena o jiroacania, jaca iitio. Iese llotícue; ia ie comecina ñaitícue. Bie rafue ñnuana ñaitícue.

¹⁸ Bie ico suille rafue ite rabenicono bu facajia, naimíemo rafuena lloiacadícue. Bie rafue baífemo bu lloia, bie rafuena bu meidoia, bie rabenicomo ite duere finuacino isoi, Jusiñamui naimiena duere finoite.

¹⁹ Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai llotícue.

²⁰ Cristo raite:

—Bie rafue jaca suite. Ua raíre biitícue.

Iena raíre suillena jiai jitaídícue. Cai Nama Jesús raíre billena eo jitaídícue.

²¹ Naimie duenaillacínona nana Jesucristona ñnotino uñnocana jaillana jitaídícue. Macaíbaite. Juandícue.